

ЎЗБЕКИСТОН ЁЗУВЧИЛАР УЮШМАСИ
“ИЖОД” ЖАМОАТ ФОНДИ

*Адиб
ва
жасамият*

Уйғун РҮЗИЕВ

ШАБНАМ СОЯСИДА

Роман

ТОШКЕНТ
“АДАБИЙОТ”
2021

УЎК: 821.512.133-32
КБК: 84(5Ў)6
T 71

Т 71 **Рўзиев, Уйғун**
Шабнам соясида [Матн]: Роман / Уйғун РЎЗИЕВ. – Тошкент:
«Adabiyot» нашриёти, 2021. – 288 б.

ISBN 978-9943-6782-1-7

Масъул мұҳаррир
Собир ЎНАР

Ушбу асарда тақдирнинг бутун зарбаларию ҳукмини сабр-тоқат, шукроналик билан қабул қилиб яшаган она ва қиз ҳаёти мисолида бутун бир мураккаб давр, зиддиятли харәктерлар, инсонларнинг шафқатсиз томошаталаблиги ёритиб берилади. Ялтироқ ҳою ҳаваслар ичидә инсонийликнинг қандай йўқолиб кетиши ва унинг меҳр-муҳаббат туфайли қайтадан барпо бўлиши ҳақидаги ҳақиқат воқеалар ривожида англашилиб боради. Баҳти ва баҳтсиз дамларда ҳам қалб асиллигини сақлаб қолиш қанчалар муҳим эканлиги ҳақидаги бу роман ўқувчиларда чукур таассурот қолдиришига ишонамиз.

УЎК: 821.512.133-32
КБК: 84(5Ў)6

*Китоб Ўзбекистон Ёзувчилар уюшмаси
“Ижод” жамоат фонди ҳомийлигига чоп этилди.*

ISBN 978-9943-6782-1-7

© У. Рўзиев, 2021
© “ADABIYOT”, 2021

* * *

199... йилнинг ёзида мен эндиғина бешинчи синфни тамомлаган эдим. Онам деярли кун бўйи кашта тикиб ўтиради. Мен эса онамга кўмаклашишни, ҳеч бўлмаса, игнага ип ўтказиб беришни, ҳар хил қийқимларга ўзимча кашта тикишни яхши кўрардим. “Кўлингга эҳтиёт бўл, қизим” деб огоҳлантиради онам. Лекин барибир неча мартараб бармоқларимга игна санчиди олиб, юм-юм йиғлаган пайтларим бўлган. Шундай кезларда мендан ҳам кўра онамнинг юраги кўпроқ ачишар эди. Кейин ҳовлига чиқиб, қўлимдан келган юмушларни қилиб овунардим.

Ёз келса мазза – жазирама кунлар бошланиши билан гулдан гулга қўниб ўйнайдиган бир-биридан чиройли ҳашаротлар кўпайгандан кўпаяди. Мен шундай иссиқ кунда ҳам рўмолимни бошимдан ечмай, ҳовли этагидаги ўтлоқ оралаб, ҳар хил тусдаги капалакларни авайлабгина ушлаб, обдон томоша қиласман ва уларни яна қўйиб юбораман. Қизил, сарик, кўк рангдаги турли ниначилар мен билан қувлашмаоқ ўйнамоқ-чидек атрофимда гир айланиб учишади. Анжир ёки наъматакнинг шохларига қўнганида яқинроқ бориб, уларнинг ҳарир қанотларини, шишасимон қўзларини томоша қиласман ва тутмоқчи бўлиб, секин қўл чўзганимда ҳушёр ниначилар “пир” этиб учади-ю, кўздан ғойиб бўлади. Бу каби ўйинлардан кейин бироз чарчаганимда қадрдан челакчаларимни олиб, сойга югураман. Бу ерда ўзимни анчагина енгил сезаман. Муздай сувга оёқяланг тушиб олиб, роса кечиб ўйнайман. Баъзан кўйлагимнинг этаги шалаббо бўлса ҳам сув ке-чишдан тўхтагим келмайди. Сув остидаги майин қумлар оёғимнинг кафтларини қитиқлаши завқ беради. Худди шу ердан ўзимнинг севимли булоқчамни ҳам

топиб олганман. Булоқча гүё менга сирдош дўстдек бўлиб қолган. Ҳар куни бир неча марта шу ерга келиб, унга бир нималарни гапириб беришни хуш қўраман.

Ўша кунларнинг бирида ҳар доимгидек булоқ тепасига келиб энгашдим. Ундан ҳовучимга сув олиб ичдим. “Булоқча, бунча тиник, бунча чиройлисан? Сендай гўзал ҳеч қаерда йўқ”, – дедим сув юзини авайлаб силаб. Шу пайт сойнинг пастки томонида бир ноатаниш боланинг сув кечиб, аста-секин мен томонга қараб келаётганини кўриб қолдим. Булоқ билан сухбатимни тугатиб, чеалкларимни ялтиратиб қўйиш учун сув остидан сиқимлаб қум олиб, уларни ишқалаб юва бошладим. Кўз остидан ҳалиги болага бир-икки қараб қўйдим-у, лекин таниёлмадим. Бу ерлик болаларга ўхшамайди. Эгнидаги кийимлари ҳам бошқача, худди ҳозиргина дўкондан олгандек яп-янги. Бола салгина энгашиб, сув остидан ниманидир қидираётганга ўхшарди. У шу кўйи сув кечиб, менга яқинлашиб қолди ва таққа тўхтаб, бир зум индамай турди. Мен унга қарамасдан юмушимни қиласвердим. Бола, совуқ сувда оёқлари совқотди чамаси, сув ёқасидаги қуёшда қизиб турган харсангтош устига бориб ўтирди.

– Ҳой қиз, – деди у ниҳоят мени чақириб, – бу ерда балиқлар борми?

– Йўқ, бу ерда балиқ бўлмайди, – дедим мен ҳамон унинг юзига қарамасдан. – Ҳув баландроқда ҳовуз бор, ана ўша ерда бўлса керак. У ерда болалар чўмилишади, лекин сувни роса лойқалатиб ташлашади.

Сойнинг юқори томонида катта ҳовуз бор – ариқларга сув чиқариш учун қурилган. Ёз келди дегунча ҳамма болалар ўша ёққа югуришади. Илгари, дугоналарим кўп бўлған вақтлари, мен ҳам қизлар билан ўша ҳовузга кўп борганман. Ўғил болалар кетган пайтда биз қизалоқларга Худо берарди: кўйлакларимизни еч-

май, мазза қилиб чўмилардик. Ўғил болалар ҳовузнинг чуқур жойларига бориб чўмилишни яхши кўришади, энг чуқур жойига боргандари мақтаниб ҳам қўйишиди. Бизга эса саёз жойи ҳам бўлаверади. Офтоб куйдидай деганда қизлар билан сув сепишиб чўмилиш қанчалар роҳат. Кейин уйга етгунимизча қўйлакларимиз ҳам қуриб қоларди. Онам ҳовузга бормаслигимни тайинларди. Аммо у ерга бориб чўмилганимни кўпинча ҳали қуриб улгурмаган сочимдан билиб қолар эди. Сочимни қуритиб уйга кирганимда ҳам барибир билиб қоларди ва дакки берарди. Онамнинг койишлари ҳам ёқимли эди, уришяптими ё эркалаяптими, деб ўйлардим.

– Ҳаҳ, қурғур, яна ҳовузга бордингми? – дерди онам кулимсираб.

– Ая, сеҳргармисиз, сочим ҳам, кўйлагим ҳам қупкуруқ-ку, қаердан биляпсиз? – дердим ҳайрон бўлиб.

– Лойқа сувда чўмилибсан, қара, бетинг қовундай тўрлаб кетибди.

Шундан сўнг мен ҳовуздан чиққач, сойнинг тиниқ сувига юзимни ювиб келадиган бўлдим. Бироқ шунда ҳам онамни алдаб бўлмасди.

Нотаниш болага ўша ҳовузни айтиётган эдим. Шу пайт сойнинг нариги қирғоғидан бизнинг синфимизда ўқийдиган Маҳмуд деган бола югуриб ўтиб қолди. Ёз эндиғина бошланди-ю, унинг ярим яланғоч бадани офтобда чалмадай қоп-қорайиб кетганини қаранг.

– Эй, Марка, Алиш билан Шерка шу ердан ўтишмадими? – сўради у тез чопганидан пишнаб.

– Йўқ, кўрмадим, – дедим ҳамон челагимни қум билан ишқаб юварканман.

Маҳмуд юқоридаги ҳовуз томонга қараб чопқиллади. Тош устида ўтирган бола эса ҳайрон бўлиб жилмайди.

– Нега у сени Марка деб чақирди? Марка конвертга ёпишириладиган қофоз-ку.

– Болалар шундай дейишади, – дедим хижолат бўлиб.

– Ҳе, ғалати эшитиларкан. Исминг нима ўзи?

– Марям.

– Уйингдагилар ҳам Марка деб чақиришадими?

– Йўқ, отам Марям деб, онам бўлса Биби Марям деб чақиради.

– Ўхў, битта қизда шунча исм бўлишини биринчи марта эшитишим.

– Ўзингнинг отинг нима?

– Анор.

Менинг кулгим қистади. Бунақа исмни биринчи марта эшитишим эди-да. Ичимда кулсам ҳам бола сезиб қўйди.

– Нега куляпсан?

– Қизларнинг отига ўхшаркан, – дедим.

– Ҳечам-да. Анора десанг, қизларнинг исми бўлади. Менини эса Анор – ўғил боланинг исми, билдинг. Анави юқоридаги ҳовли сизларникими?

– Ҳа.

– Дараҳтларинг кўп экан.

– Ҳм.

– Менга қара, сизларда ёнғоқ борми?

– Йўқ.

– Эй, рўмолингни ечсанг-чи, ҳаво жуда иссиқ-ку. Сенинг рўмол ўраганингни кўриб, мен терлаб кетяпман. Гапиришингга ҳам халақит беряпти, юзинг ҳам кўринмайди.

– Э, йўқ, – дедим баттар ғужанак бўлиб.

– Майли, ўзинг биласан. Ҳа, айтганча, бизникида ҳам дараҳтлар кўп. Лекин мевасини ейишнинг иложи йўқ, бувамдан рухсат тегмайди. Ёнғонинг-ку яқинига ҳам йўлаб бўлмайди: “Ёнғоқ кузда пишади, мезон

шамолини емагунча унга тегманлар", – дейди. Кузда мен шаҳарда бўламан-ку.

Шунда унинг ростдан ҳам бу ерлик эмаслиги, афтидан, шаҳарлик эканлигини тусмолладим.

– Қаерликсан ўзинг? – сўрадим унга бир-икки қараб қўйиб.

– Ойим шу ерлик бўлган, дадам эса шаҳарлик. Шунинг учун шаҳарда турамиз, Тошкентда. Ҳов анави пастроқда яшайдиган Мели бувани танийсанми? Ана ўша киши менинг бувам бўлади. Ёзда шаҳар жуда иссиқ бўлади-да. Уйимиз тўққизинчи қаватда. Қишлоқда эса мазза экан.

- Тошкент чиройлими?
- Ҳа, чиройли. Ўзинг ҳеч борганмисан у ерга?
- Йўқ, фақат эшитганман.
- Нечинчи синфда ўқийсан?
- Олтинчи синфга ўтдим.

– Мен бўлсам еттинчи синфга. Эҳ, аттанг, ёнғоқларинг йўқ экан-да. Ёнғоқни жуда яхши кўраман. Йўқ, ейишни эмас, ёнғоқ ўйнашни ёқтираман.

- Лекин гилос ва ўрикларимиз бор.
- Пишганми, еса бўладими?
- Бўлмасам-чи, юр, олиб бераман.

Мен юмушимни тўхтатиб, иккала челакчамни ҳам булоқдан тўлдириб олдим.

– Пақирларингни менга бер, ўзим кўтараман, – деди Анор. Мен челаклардан бирини унга тутқаздим.

– Вой, манглайнинг нима қилди? Йиқилдингми? – дедим пешонасининг ўнг томонидаги қип-қизил доғни кўриб.

– Э, қўявер, бу хол-ку. Исмим ҳам шунга қараб қўйилган, – деб у бепарвогина қўл силтаб қўйди.

Биз сойдан чиқиб, ҳовлимиздаги дараҳтлар ёнига бордик. Мен унга меваларнинг энг пишганларини, энг

ширинларини териб беришни истардим. Шаҳарлик боланинг бу ерда зерикаётганини, болалар билан танишиб, киришиб кетолмаганини ич-ичимдан сезиб турардим. Мен ҳам ўртоқларим кўплигида зерикмасдим. Улар билан ўйнамай қўйганимдан бери ўзим билан ўзим овуниб юраман. Шунинг учун ҳам ҳозир унинг аҳволини ҳаммадан ҳам кўра мен яхшироқ тушунсан керак. Яхшиям, шу дараҳтлар бор, яхшиям, ҳар хил мевалар ранг очиб қолган. Бўлмаса, мана бу болакай шу ҳовлига келармиди, у билан тил топишиб, яхшигина гаплашиб ўтиармиди? Одатда, чор атрофига тенгқурлари кўп бўлатуриб, лекин биронта ўртоғи бўлмаган, уларнинг ҳеч биридан тотли сўз эшитмаган одам ана шундай ҳаяжонга тушади. Мен учун бу боланинг эски қадрдонлардай гаплашиб, бирга ўйнаши қорбобонинг кутилмаган совғасидай бўлди. Бу тасодифдан бениҳоя шодланиб: “Яхши бола экан, ишқилиб, тез кетиб қолмасин-да, ҳар куни келсин, у билан ҳар доим бирга ўйнайлик”, дея кўнглимдан ўтказмоқда эдим. Шунинг учун ҳам уни хурсанд қилиш, ширин меваларни териб бериш истагида ўрик шохига маймундай сакраб чиқиб кетдим.

– Ма, мана буларни илиб ол, – деб энг баланд шохлардаги сара пишган ўрикларни териб, пастга ташлай бошладим.

– Вой-бўй, манави гилосларни қара, шохларини кўтаролмай қолибди, – деди Анор кўзлари чақнаб.

– Ол, олиб еявер.

Анор бир дона гилосни олиб, татиб кўрди-ю, юзи бужмайиб кетди.

– Қип-қизил бўлсаям аччиқ экан, – деди у чайнаганини зўрға ютиб.

– Баландроқдаги қорамтири бўлиб пишганларини олсанг-чи.

– Дарахтнинг танасини роса елим қоплаган экан, чиқаман деб тағин ёпишиб қолмай.

– Унда, ҳозир, шошмай тур, ўзим олиб бераман.

Мен ўрик шохларига осилиб, пастга тушдим ва чаққонлик билан гилос шохларига тирмашиб, юқорига чиқдим. Пишиб, қорамтири тусга кирган гилосларни териб, пастга ташлайвердим.

– Қалай, аччиқ эмас эканми? – дедим пастга қараб.

– Нордонроғ-у, лекин мазали экан, – жавоб қилди Анор ўтлар орасига тушган гилосларни териб кафтига артиб еяркан.

Шу пайт кўча эшик тарақлаб очилди-ю, отамнинг овози эшитилди.

– Гулшан, қаердасан? – дея у бақирганча онамни чақирди.

Одатда отам маст бўлиб келган пайтлари гоҳида эшиқдан бақириб киради. Кўпинча ёнида икки бақалоқ улфати ҳам бирга келади. Англадимки, отам бугун ҳам тўйгунча ароқ ичиб келган. Ҳа, ростдан ҳам шундай эди. Отам эшиқдан чайқала-чайқала кирди. Шерикла-ри ҳам қип-қизариб, изидан киришди. Онам шўрлик уйдан оёқяланг чопиб чиқди. Ўрик дарахти тагидаги чорпояга кўрпача ёзди. Отам билан шериклари чорпоя устига чўзишишди. Онам зир юргурганча дастурхон ёзишга чоғланди. Отам маст бўлиб келганда доим шунақа бўлади: онам оёғи куйган товуқдай типиричилайди. Отамнинг бирон жанжални бошлаб қолишидан чўчирди чамамда. Менимча, отамнинг ичидаги аламлари кўп эди, ана шуни ароқ билан енгмоқчи бўларди. Аламининг ўтини ароқ ҳам босолмаса, онамга зуғум қиласади. Аямай сўккан, дўқ урган пайтлари ҳам кўп бўлган. Бечора онамнинг ана шундай хархашалардан юраги зада бўлиб қолган эди. Айниқса, анави бақалоқ ўртоқларининг олдида ҳақоратласа, онам кўз ёшини

яшириб, йиғлаб-йиғлаб олади. Мен эса ҳаммасини кўриб, сезиб тураман. Шунда ўғил бола бўлиб туғилмаганимга, онажонимга ҳимоячи бўлолмаганимга чексиз афсусланаман, ичимни ит тимдалайди.

– Йиғиштир дастурхон-пастурхонингни, – деди отам қўлини силтаб, – бизнинг қорнимиз тўқ.

– Ҳа, бизнинг қорнимиз тўқ, – дея масхаралагандай қийқиришди шериклари ҳам.

– Бор, ундан кўра муздай сув олиб кел бизга, – деди отам қорнини силаб.

Шундай пайтларда отам ё муздай сув ичиб ҳовурини босади ёки “chalob tayёrlab ber” деб бақиради. Ҳовлимизда на бир сигир, на қўй, на бирорта эчки бор. Лекин онам буни важ қилиб ўтирумайди. Кўшнилардан биронтасиникига чиқиб, чакки олиб келади-да, сув қўшиб, кўкат аралаштириб чалоб тайёrlаб беради. Отам билан шериклари чалобни хўриллатиб ичишади. Хайриятки, ҳозир чалоб эмас, муздай сув сўради. Ўchoқхонадаги идишда турган сув илиб қолган бўлса керак. Онам атрофга қараб, мени ахтара бошлади. Мен шошиб дарахтдан сакрадим ва ўтлар орасига тушган гиолосларни териб, Анорга тутқаздим. Менинг бесаранжом бўлиб қолганимни кўриб, Анор қандайдир хавотирни сезгандай, энгашиб шоша-пиша меваларни қўйнига солди.

– Отам келди, меҳмонлари ҳам бор, мен бориб қаравшим керак. Сен энди уйларингга бора қол, – дедим шивирлаб. – Эртага яна кел, хўпми, сенга ширин-ширин ўрикларни териб бераман.

Анор гўё бировнинг боғидан ўғирлик қилгандай энгашганча чопиб кетди. Мен сойга тушиб, чеълакларимни булоқдан бошқатдан тўлдириб олдим-да, онамнинг олдига югурдим. Онам битта чеълакни чойчўмич билан бирга чорпоя устига қўйди, иккинчисини ошхонага олиб кириб кетди. Отам билан шериклари навбати билан муздай сувни денгиз қирғоғида қолган

балиқдай тамшаниб симиришди. Шериклари қоринларини силкитиб қулишарди, нега кулаётганларини эҳтимол ўзлари ҳам билишмаса керак. Кейин отам жиддий тортиб, болишга ёнбошлади.

– Хотиндан ёлчимадим-да, Турдибой, – деди отам ҳар доимги дийдиёсини бошлаб. – Худо менинг пешонамга яхши хотин битмаган экан. Аввалгиси икки қизчасини етаклаб, қочди-кетди. Буниси касалдан чиқмайди. Камига яккаю ёлғиз боласини ҳам қўйдирб үтирибди. Буларни тузатгунча озмунча харажатга тушдимми. Ўзи шундоғам бўйнимгача қарзга ботиб юрган бўлсам.

– Хотин қаҳатми, Шопўлат. Истасанг буни ҳам қўйиб, бошқасини ол, – деди шоп мўйлабли улфати. – Ҳозир кимга тегишини билмай юрган хотин қўп.

– Эҳ, дардимни билмайсан-да, Мавлонқул, – отам болишини ғижимлади. – Буни қўйиб юбориш осон, биринчисидан оғзим куйганидан кейин бу билан ҳатто никоҳдан ўтмаганман, муллага ўқитиб олганман, холос. Лекин ҳадеб хотин алмаштираверишдан нима наф? Буларнинг ҳаммаси бир гўр, турган-битгани харажат. Илгариги топиш-тутишим бўлганда-ку, ўзим билардим-а. Қандай замонлар эди – еганим олдимда, емаганим ортимда. Унча-мунча пулнинг бетига қарамасдим. Шаҳардаги базадан ҳар куни дўконларга юк олиб келиб тарқатардим. Одамлар эҳтиёжига қараб арzonроқ нархда у-бу нарсаларни олиб келиб беришими илтимос қилишарди. Ҳеч кимнинг кўнглини қолдирмасдим. Бирорлар тўй қилаётган бўлса бир-икки қоп қанд-қурс, беш-олти яшик ароқ-коњякми, тўп-тўп мато дейсанми, олиб келиб берардим. Қирқта-элликта шиферларни насияга бериб юборган пайтларим ҳам бўлган. Пулини бермай кетганларга ҳам индамай қўяверганман.

– Ҳа, сенинг қўлинг очиқ эди, – деди Мавлонқул отамнинг гапларини маъқуллаб. – Бутингдан тую ўтиб кетса кўрдим демасдинг.

– Биз савдо ходими эдик. Савдода тантилик бўлгани дуруст, қўлинг қанча очиқ бўлса, шунча барака киради. Ҳозирги савдогарларни кўринглар. Тадбиркор эмиш булар. Бир қути гугуртни насияга сўрасанг, ранги оқариб, оёғи қалтирайди. Биз ҳам савдода ишлаганмиз, унча-мунча нарсани одамлардан аяб ўтирганмиз, бунча хасис бўлмасанглар, дейман. Сиз давлатникини бергансиз, бизники хусусий мулк, дейди. Давлат ким эди? Давлат – халқ эди. Демак, ҳамма нарса халқники бўлган. Халқникини халққа бермай катта холангга беришим керакмиди, дейман. Сиз эски замоннинг одамисиз, биз ҳозирги замоннинг тадбиркоримиз, ҳозир отанг бозор, онанг бозор, дейди. Отанг билан онангни бозорга обчиқиб қўй бўлмасам, дейман.

– Ҳозиргиларнинг кўзи оч, Шопўлат, кўзи оч, – гап қўшади Мавлонқул. – Одамнинг кўзи тўймаса ўзи ҳеч қачон тўймайди.

– Ҳа, бизнинг назаримиз ҳам, кўнглимиз ҳам тўқ бўлган-да, Мавлонқул, ҳамма гап шунда. Замон ҳар доим шундай бўлиб туради, деб ишонганимиз. Бўлмаса, иттифоқ тугаётиб, ола-ол бошланган йиллари битта-яримта дўконни олиб қўймайманми. Ҳали савдо қанақа бўлишини буларга қўрсатиб қўяман. Олдин қарзларимдан қутулиб олай, кейин шундай ишлар қиласики, бир-иккита босар-тусарини билмай юрган янги бойваччалар тилини тишлаб қолсин. Фақат ҳозир сал омадим келмай турибди-да.

Турдибой бақириб қўшиқ хиргойи қила бошлади:

*Ўтди даврон, кетди даврон,
Омад кетиб, қолди армон...*

– Вой-до-о-од, – дея қийқириб, унга жўр бўлади Мавлонқул.

Онам икковимиз девларнинг тузоғига тушган кийикдай дир-дир титраб ўтирадик. Кейин онам кечки овқатга уннаб кетди. Қозончага солинаётган масаллиқлардан билдимки, мастава пишиromoқчи. Албатта, гўшт солинмайди. Чунки кўпинча уйимизда гўшт бўлмасди. Отам ойда бир марта озгина гўшт олиб келар, онам эса шуни ҳам тежаб-тергаб бир неча кунги овқатга етказарди. Ҳатто онда-сонда палов пиширганда ҳам гўшт ўрнига картошка ёки шолғом солар эди. Лекин ҳеч қачон турмушимиздан нолимасдик. Биз ана шундай муштумзўр ва ғарибона ҳаётга кўнишиб қолган эдик.

* * *

Ўша куннинг эртасига эрталабдан Анорни қутдим. Булоқ бўйига бир неча марта бориб келдим. Дараҳтларга ҳам дам-бадам чиқиб-тушдим. Ўрикнинг энг баланд шохига чиққанимда сой томонга қайта-қайта разм солдим. Сойнинг нариги қирғоғидан бир тўп болалар ҳовуз томонга чопиб ўтишганда улар орасидан Анорни қидириб синчиклаб қарадим, лекин у кўринмади. Айвонда кашта тикиб ўтирган онамнинг ёнига бориб, ип турадиган қутичани титкиладим. Игналарга ҳар хил ипларни ўтказиб, тикишга тайёрлаб қўйдим. Буюртма билан кашта тикиб ўтирган онам менга бир-икки қараб қўйди-ю, индамасдан ишини давом эттираверди. Онам бу ишни тирикчилик важидан қиласди. Қизларини турмушга узатишга тайёрланаётган аёллар унга кашта тикиб бериш учун буюртма беришарди. Бу ҳам бўлса келинлик сепини безаш учун қилинадиган қадимдан қолган одат. Шуни билардимки, илгари бу ишни бўй етган қизларнинг

ўзлари қилишган, улар йиллар бўйи келинликка ҳозирлик кўришган. Кашталар ёстиқларнинг бош томонига ҳошия қилиниб, тахмонларга териб қўйиларкан. Тўй қилган хонадоннинг узоғу яқинлари келиннинг қанчалик эпчил, дид-фаросатли ва баракали эканини тиккан кашталарию сўзаналарига, жимжимадор қўлрўмлларига қараб билишар экан. Ҳозирги қизлар эса бундай ишларни хуш кўришмайди. Гўё бу эскирган одат, замонавий қизларнинг бу каби кераксиз юмушларга эҳтиёжи ҳам, вақтлари ҳам йўқ. Жуда бўлмаса уларнинг оналари тўй куни уялиб қолмаслик учун онамга ўхшаган чеварлик қилувчиларга буюртма бериб, уч-тўртта кашта тикириб олишарди. Бундай буюртмалар ҳам кун сайин камайиб бораарди. Шошқалоқ қизлар ва уларнинг оналари кўхна одатлар ҳақида ўйлаб ҳам ўтирасдан, бош-адофини билиб бўлмайдиган тайёргина фабрика кўрпа-ёстиқларини дўкондан сотиб олиб, сеп деганини алламбало нарсалар билан бир кунда тўлдириб қўя қолишмоқда эди. Онам, гарчи урфдан қолаётган бўлса ҳам, кашта тикишни менга ҳам ўргатиб бораарди. Менга аввал ипларнинг рангларини танлашни, игнага ўтказишни, кейин турли қийқимларга гуллар тикишни ўргатди. Ҳар ҳолда у, бирга ўйнаб-кувнайдиган ўртоқлари бўлмаган мендек қизга шу ҳам бир овунчоқ бўлишини ўйлаган бўлса керак. Айни вақтда эса онам менинг нимадандир безовта бўлиб, кашта тикишга ҳам ҳафсала қилмаётганимни оналик қалби билан сезиб турарди-чамамда.

- Қаерларда юрган эдинг, қизим? – сўради онам менга қарамасдан.
- Сойга бориб келдим, – дедим хушламайгина.
- Кечаги бола ким эди, мактабда бирга ўқийсизларми?

– Йўқ, бирга ўқимаймиз. Шаҳарлик бола, Мели бува деган одамнинг набираси экан.

– Э, ҳа, қариндошлариникига келибдими?

– Ҳа, – дея жавобни қисқа қилдим. Одатда, мен бир саволга ўн жавоб ҳозирлаб, бийрон-бийрон бидирлашни яхши кўрардим.

Кейин мен яна чelакларимни олиб, сойга югурдим. Оёқяланг сув кечиб юрдим. Муздайгина сув оёқларимга хуш ёқарди. Аммо якка-ёлғиз сув кечиб юриш ҳам барибир зерикарли. Анордан эса ҳамон дарак йўқ эди. Оёқларим сувда бўлса ҳам, иссиқлаб кетдим. Рўмолимни ечиб, майсалар устига қўйдим-да ҳовучимга тўлдириб-тўлдириб сув олиб, юзимни чайдим. Рўмол остида кигиздай бўлиб кетган соchlаримни ҳам сувга ботиргим келди, бироқ бунга улгурмадим.

– Марям, чўмиляпсанми? – деди қирғоқда туриб кимдир.

Мен овоз келган томонга қарадим-у, Анорни кўрдим. Бола менинг шу пайтгача рўмол остида яширган, энди эса бус-бутун очиқ турган чап юзимга кўзи тушиб, сесканиб кетганини пайқадим ва рўмолимни олиб, чelакларимни ҳам эсдан чиқариб, ҳовлига қараб югурдим. Дараҳтлар тагидаги ўтлоққа ўзимни ташлаб, йиғлашга тушдим. Анор бир зум ҳайратдан қотиб турди-ю, кейин сакраб сойга тушди ва менинг чelакларимни олиб, ортимдан аста келди. Менга яқинроқ келиб, ўтлар устига ўтирди. Мен аллақачон рўмолимни ўраб, юзимни яшириб олган эдим. Боланинг келганини кўриб, юзимни терс ўгириб ўтириб олдим.

– Нега келдинг? – дедим ҳиқиллаб.

– Нимага унақа дейсан? – ҳайрон бўлди бола.

– Тепада пойлаб турган экансан-да?

– Ҳечам пойлаганим йўқ. Ҳамма болалар юқоридағи ҳовузга чўмилгани боришаркан, мен ҳам ўша ёққа бордим.

– Бор, ўшалар билан ўйнайвер.

– Йўқ, энди бормайман. Улар мени, баданинг оппоқ экан, қиз болага ўхшаркансан, деб масхара қилишди. Ёмон болалар экан.

– Сен билан ўйнамайман, кет, – деб боланинг кетишини ҳам кутиб ўтирумасдан ўзим у ерни тарк этдим.

Чорпоя устида йиғлаб ўтирасам, дард устига чипқон деганларидаи, оқсоқланганча Соли амаки келиб қолди. У ҳар доимги одатича, кўча эшикни ўзи тақиллатиб, ўзи очиб, кириб келаверди. Бу одам отамнинг ўгай акаси, эҳтиёжмандларга пул бериб, ортиғи билан қайтариб олади. Уни судхўр деганларни ёқтирумайди. “Судхўру саррофлар қадимги подшолар замонида бўлган. Биз қайси замонда яшаяпмиз ўзи, тараққий этган замондами, замонавий мамлакатдами? Шундоқ экан, янги замон одамига эскича рутбани ёпиш ҳақорат бўлади, чирофим. Мен судхўрлик қилмайман, одамларга яхшилик қилиб, муҳтожлик юки бошига тушганда пул бериб, мушкулини осон қиласман. Ҳисобли дўст – айрилмас дўст, деган ҳикматга монанд, мен пулни кредит қилиб бераман. Ахир, замоннинг зайди шундай, ҳеч ким пулни кўчадан супуриб олмайди, ҳозир ҳар кимнинг ўз тирикчилиги бор. Тирикчилик айб эмас. Қолаверса, бир муҳтожнинг кунига яраб, ҳожатини чиқариш ҳам савоб”, – дея у ўзининг қилиб юрган амалини чандон оқлаб, кўкларга кўтариб мақтаб юради. Одамлар унга рўпара келиб қолганда мулозамат билан саломлашсалар-да, орқасидан кинояли кулиб, унинг “савоб”лари ҳақида латифанамо гапларни гапиришади. Соли амаки одамлар пул сўраб келганида тилхат ёздириб олиб, сўралган пулни бериб юборади-ю, келишилган вақт яқинлашганида мижознинг ўзи келишини кутмасдан, унинг уйига бориб, келишувни обдон эслатиб қўяди. Саломини ҳам пулга чақадиган

бу одамдан отам ҳам қарз олган. Шундан бери амаки ойда бир-икки марта келиб, йўқлаб кетади.

– Одамларга яхшилик қилиб қарз берасан-у, кейин раҳмат эшитиш ўрнига орқасидан югурасан, – деб гап бошлайди ҳар гал у амри маъруф ўқишга келган мулладек салобат билан. – Қарзни фоизи билан қайтараман деб лафз қилиб олгансан, чирофим, шу эсингдами? У пул ҳар куни фоиз ишлайвериб, катта ботқоққа айланиб кетди, иним. Сени бу ботқоқдан ким қутқариб оларкин, ҳайронман. Мен-ку, акалик қилиб фоизлардан кечиб юборишим ҳам мумкин эди, лекин ўзинг кўриб турибсан, ҳозир ҳаёт – бозор, бу – ўзинг учун ўл етим, дегани. Энди таниш-билиш, оға-иничилик деган нарсалар кетмайди. Бу нарсалар бўлса, унинг бозорлиги қоладими? Тўғри, сен билан икковимиз ака-укамиз, аммо бунинг пулга дахли йўқ. Бозорчиликда чап қўл ўнг қўлга бегона – ўртадаги ҳисоб-китоб тўғри бўлса, муносабат ҳам яхши бўлади. Гапнинг индаллоси шуки, чирофим, бизнинг кредитнинг фоизларини олиб чиқ. Қолганини ҳам тезроқ кутулиш чорасини кўр, ҳадеб ароқ ичавермасдан. Бўлмаса, бир вақти келиб уй-жойингни сотиб ҳам тўлай олмай қоласан.

Отам жаҳли чиқса ҳам тишини-тишига қўйиб чидайди, айбдор одамдек қўл қовуштириб, индамай турраверади. Бир-икки сўм пули бўлса бериб юборади, бўлмаса, бирон кунни ваъда қилиб жўнатади. Амаки пинагини ҳам бузмай хотиржам кетади. Ҳар ҳолда у зарар кўрмайди. Яшашнинг ҳадисини олган бу одам пулини қайси пайт қандай қайтариб олишни яхши билади. У кетиши билан отам жаҳл отига минади. Худди ҳаммасига онам айбдордай бор аламини ундан олади. Онам эса бирон марта гап қайтармайди, ҳаммасини ичига ютади. “Шунинг учун ҳам онам бечора касалманд бўлиб қолган бўлса керак”, дердим ўзимга-ўзим.

– Қаёқданам шу касофатдан қарз олдим-а, – дея бошини чангаллайди отам. – Ака бўлгани билан ўгайдада. Пул деса туққан онасини ҳам танимайди. Бунинг фоизлари деб тепа сочимгача қарзга ботдим. Бошқа бирордан қарз олганимда шу маҳалгача ортифи билан қутулган бўлардим. Буникини адо қилиб бўлмайди-ку. Бунинг фоизлари қўёндай болалаб кетаверади...

Шу тобда мени ранжитган нарса, йиғлаб турганим устига Соли амакининг хукмфармон қиёфада кириб келиб, чорпоя устига чордона қуриб ўтириб олгани ҳам ёки ҳадемай бир-икки оғиз мақтанишу танбеҳга тўла гапларни айтиб, ҳамманинг дилини хуфтон қилиб кетиши ҳам эмас, балки у билан бирга ўғли Донабой – Дониш пакананинг думга ўхшаб эргашиб келгани бўлди. Ўзи мендан икки ёш катта-ю, лекин паканалигидан бўлса керак, бир-икки ёш кичкинага ўхшайди. Бурнидан доим икки ирмоқ оқиб туради. Кўпинча, отасининг орқасидан думдай эргашиб юради. Ўзи, нафсилаамрини айтганда, менинг фалокатга йўлиқиб, бир умрга юзим айбли бўлиб, бирйўла тенгдошлариму болаликнинг ҳамма завқ-шавқларидан ажралиб қолишимга ҳам шу шумшик бола сабабчи бўлган. Аслида, аввалроқ мен ҳам бошқа қизалоқлар қатори чиройли эдим. Қўнғироқ соchlаримга ҳамманинг ҳаваси келарди. Турли-туман қизиқарли ўйинлар ўйлаб топиб, қун бўйи ўртоқларимни зериктирмаганим, тўптошми, мак-макми, жамбилми – барча ўйинларни қойилмақом қилиб ўйнаганим, мактабда ҳам дарсларда бийрон-бийрон жавоб бериб, муаллимларимни қувонтирганим учун бўлса керак, яқин атрофдаги ҳамма қизлар, ҳатто ўғил болалар ҳам кўпроқ мен билан бирга ўйнарди. Дугоналарим соchlарини менинг соchlаримга ўхшатиб тарамоқчи бўлиб, қанча тароқларни синдириб қўйишарди ва опаларидан дакки эшитиб, ора-си-

ра калтак ҳам еб қолишар эди. Ана шундай мунаввар, бахтли ҳаёт бир кунда, бир лаҳзада чилпарчин бўлди, гўё қуёш ғарбдан чиқди, дарёлар тескари оқди, ёмғир ўрнига тош ёғди, дараҳтлар япроқсиз, гуллар ифорсиз қолди...

* * *

Ёзниг чилласи, офтобнинг тифида қолган қовжираган ўт-ўланлар “пuf” десанг “лов” этиб ёнаман, деб турган бир паллада Дониш пакана бурнини тортганча эшиқдан мўралади. Болалар бу бола кўзларига овсарга ўхшаб кўринганидан у билан ўйнашни ёқтириш масди. Мен эса шу овсаргинанинг ҳам кўнглига қараб, бемалол ўйнайверардим. Бундан Дониш бениҳоя хурсанд бўлиб, ҳар куни шу ерга келишни канда қилмасди. Бир неча кун аввал бизнинг ҳовлимизга қаёқдан-дир келиб қолган мушук сомонхонамизга кириб болалаган эди. Мен буни мушук болаларининг ожизгина миёвлашлари қулоғимга чалинганда пайқаб қолдим. Кувончим ичимга сифмасди. Бу хушхабарни онамга айтиб, нон ушоқларини ивитиб, мушукчаларга олиб бориб бериб турдим. Бир куни уларни Паканага ҳам кўрсатмоқчи бўлиб, уни сомонхонага бошладим. Мушукчалар сомонхонанинг қоронғи бурчагида эди. Менning ортимдан борган Пакана сомонхона ичкарисига мўралади-ю, бироқ қоронғиликка киришга кўрқди. У, ҳозир, деди-да, чопиб бориб ошхонамиздан гугурт олиб келди. Кейин сомонхона эшигидан кирибоқ гугурт чақди. Ичкари бир муддат ёришиб турди. Унга ғира-шира кўринди. Мен мушукчаларни қўлимгга олиб эркалаётган эдим. Паканани чақирдим: “Яқинроқ кел, яхшироқ кўрасан”, дедим. Барибир яқин келишга юраги дов бермади. Кўлидаги гугурт чўпи ўчатуриб бармоқларини чимиллатиб куйдирган бўлса керак, у

чүпни ташлаб юбориб, бармоқларига туфлади. Кейин қутичадан иккинчи чүпни олди. Аммо иккинчи чүпни ёқишига ҳам улгурмай, у ердаги бир түп сомон “лов” этиб ёна бошлади. Пакана құрқиб кетиб, урра қочди. Алангани қўриб, юрагим ёрилаёзди. Мен сомонхона ичидә қолиб кетган эдим. Тутунни пайқаган онам со- монхона олдига югуриб келганида менинг чинқириб йиғлаётганимни эшитиб, ўзини аланга ичига урди. Бир зумда мени бағрига маҳкам босиб, олов қаъридан отилиб чиқди ва биз ерга ағанадик. Ёнғинни қўриб, югуриб келган қўни-қўшнилар бизнинг ёнаётган кўй- лакларимиздаги оловни ўчиришди. Сомонхона эса бус-бутун ёнди.

Онам икковимизни марказга – Узумзордаги ка- салхонага олиб кетишиди. Биз касалхонада анча вақт- гача даволаниб ётдик. Отам кунора касалхонага бориб турди. Баъзан ярим кечаси маст бўлиб келиб шовқин кўтарар, докторларга, сенлар тез-тез даволамаяпсан- лар, текинтомоқлар, деб дағдаға қилиб кетар эди. Шундай бўлса ҳам у докторлар неки дориларнинг рўйхатини ёзиб берса, Узумзордаги дорихонадан олиб келарди. Худди шу дамларда отам Соли амакидан қарз олишга мажбур бўлган эди. “Оловни сенинг овсар ўғлинг ёқди-ку”, деб айтиш отамнинг хаёлига келма- ган, чамамда. Соли амаки эса ўғлини заррача айбдор деб ҳисобламасди. Одатда болалар бирор ножўя иш қилишганда, катталар, овсарми, абжирми, ҳамма бо- лаларга бир хил қарашади ва кечиришади – бола-да, болалик қилган, деб. Дониш пакананинг ана шу “бола- лик” қилиб қўйгани оқибатида мен сал бўлмаса ҳаёт билан хайрлашай дедим. Онам ўзининг чандиқлари- даги оғриқларга ҳам парво қилмасдан, уззукун мени ўйлаб қийналарди. Мен куйишдан олган жароҳатлар берайдан азобдан деярли ухлаёлмасдим. Эндиғина кў-

зим илинган заҳоти оғриқдан инграб юборар, ёнимда мижжа қоқмай, юрагини ҳовучлаб ўтирган онажоним мени тинчлантиришга уринарди. Онам гоҳида менга тикилиб туриб, сўнг тескари ўгирилганча овоз чиқармай юм-юм йиғлаётганини сезиб қолардим. Кўл ва оёқларимдаги куйган жойларни дори суришаётганда кўриб қолардим. Онамнинг: “Ҳадемай тузалиб кетади, жоним қизим, кўрмагандай бўлиб кетасан” дея таскин беришларига ишониб, тинчланардим. Лекин юзимдаги кушиш асоратини ҳали қўролмаган эдим: турли нарсаларни баҳона қилиб, мени кўзгуга яқин йўла-тишмасди.

– Биз имконимиздаги ҳамма ҳаракатни қилдик, аммо куйган терини асл ҳолига қайтариш қўлимиздан келмайди, – деди доктор бизга касалхонадан жавоб берадиган куни.

– Шуёғига ҳам раҳмат, доктор, қизимнинг жони омон қолганига шукур, – деди онам ўзга чора йўқлигидан хўрсиниб.

Кун иссиқ бўлишига қарамасдан онам менга енглари узун кўйлак кийдириб, бошимга рўмол ўраб қўйди. Касалхонадан чиқаётганларга одатда шундай қилишса керак, деб ўйладим мен. Ўзимни рўмоли ияги остига танғилган кампирлардек тасаввур қилсан-да, лекин уйга қайтаётганимдан кўнглим чоғ эди. Бир эски шалдироқ автобусда уйимизга етиб олдик. Ҳовлимиз тўзғиб ётарди. Қоп-қорайиб куйиб кетган сомонхонанинг куллари ҳар ёққа сочилиган, ўша куни оловга сув сепиш учун ишлатилган челягу тоғоралар думалаб ётар, буларни саришта қилиш учун онам икковимиз анчагина тер тўкишимиз зарурлиги қўриниб турарди. Отам, ташқари ҳаддан ортиқ иссиқ бўлгани учун бўлса керак, уй ичиди болишига ёнбошлаб ётган экан. Эшик-деразалар очиб қўйилганидан елvizак эсиб турарди.

Биз салом бериб, ичкарига кирдик. Мен отамни кўриб хурсанд бўлдим, бироқ унинг юзида хурсандчиликни кўрмадим. Отам менга қараб бақрайиб қолди. Хонтахта ёнига бориб ўтиредим. Онам отамдан ҳол-аҳволини сўраган бўлди. Отам эса бош иргаб қўйди-да, ҳамон мендан кўзини узмасди. Мен хижолат бўлиб, кўзими олиб қочавердим. Отам хонтахта устидаги совиб қолган чойдан бир пиёла қуиб ичди, кейин бизга ҳам қуиб узатди. Унинг тунд юзига қараёлмасам-да, ҳамон менга тикилаётганини сезиб турардим. Мен аста ўрнимдан туриб, ташқарига чиқдим.

– Барибир ҳеч нарса қилишолмабди-да, – деган гапи қулоғимга чалинди отамнинг.

– Ёш бола-ку, аста-секин яхши бўлиб кетар, – деди онам. У бу гапни йиғлагудай бўлиб айтди.

– Бизнинг докторлар юз йиллаб орқада қолиб кетган бошқалардан. Булар игна санчиш-у одамларни шилишдан бошқасига ярамайди. Кўлларидан ҳеч нарса келмайди-ю, яна шу чала хизматига уялмай пул сўрайди. Илгари пул сўраган докторларнинг пешонасидан отишарди. – Отамнинг нега бундай деётганини ўшандаган англамаган эдим.

Онам ортимдан ҳовлига чиқиб, тезда ишга киришиб кетди. Менга сойдан сув олиб келишимни буюрди. Челакларимни олиб, қадрдон булоғим томонга қушдай учдим.

– Сувни кечмай тур, Биби, ҳали яраларинг битмаган, – дея қичқирди онам хавотир олиб.

Шу чоғда роса сув кечиб ўйнагим келаётган эди, аслида. Онамнинг айтганини қилиб, чеалакларимни булоқдан тўлдириб олдим-да, изимга қайтдим. Онам фаришта аёл эди, уйнинг бесаранжом бўлиб ётишига асло чидамасди. Биз аввал ҳовлини, сўнг уй ичини суруриб-сибирдик, сочилиб ётган идишларни жой-жо-

йига қўйдик, чанг босиб кетган қозон-товоқларни яхшилаб ювдик, эшик-деразаларгача артиб, уйимизни ёғ тушса ялагудек қилиб қўйдик. Ҳамма юмушларимизни тугатганимизда қоронғи тушиб, сойдаги қурбақалар басма-басига қуриллай бошлаган эди. Онам пиширган карам шўрвадан бир-икки қошиқ ичдим-у, қаттиқ чарчаганимдан ухлаб қолибман. Эрталаб эса...

Эрта тонгда ҳаммадан аввал турдим, десам онам аллақачон уйғониб, чой дамлаб, чорпоя устидаги дастурхонга қўяёттган экан. Отам эса ҳовлида кўринмайди, бугун якшанба бўлгани учун саҳарлаб бозорга кетган бўлса керак. Эшик олдидаги обдастага қаноат қилмай, югуриб бориб сойдан юз-қўлимни ювиб келдим.

– Нега рўмолингни ўрамадинг? – деди онам чойнакдаги чойни қайтараркан.

– Ўрагим келмаяпти, ая, – деб ичкарига кириб кетдим. Иссик кунда рўмол ўрашни ҳечам истамаёттган эдим-да. Ундан кўра сочимни чиройли қилиб тараиман, капалакчали тўғноғичимни тақаман. Бироздан сўнг кўчага чиқиб, дугоналаримни кўраман, мазза қилиб ўйнаймиз. Уларни соғинганман, ахир. Улар ҳам мени соғинишган бўлса керак. Шуларни ўйляяпман-у ҳозироқ кўчага отилиб чиқиб кетгим келяпти. Токчадан тароғу тўғноғичларимни олдим. Қувончим ичимга сиғмай, кўзгу олдига бордим. Аммо...

Кўзгуда куттилмагандага бегона бировни кўргандай сесканиб, бир неча қадам ортимишга тисарилиб кетдим. Сал бўлмаса оёғимдан мадор кетиб, йиқилаёздим. “Ҳали уйқум очилмабди, кўзимга ажина кўринди шекилли”, деб ўйладим. Кўрқа-писа яна кўзгуга яқинлаша бошладим. Ҳа, яна ўша қиёфа. Буёғини айтиб беришга юрагим бетламайди. Лекин, майли, бошладимми, айтаколай. Кўзгудан менга... юзининг ярми қовжираган... ялмоғиз кампир қараб турарди. Ярми таниш юз, ярми

эса нотаниш башара. Мен ойнада ўзимни кўриб турганимга ишонгим келмасди. Аммо шафқатсиз ҳақиқат шу қиёфа ўзимники эканини уқтирган лаҳзада кўзларимдан тирқираб ёш чиқиб кетди. “Йўқ, бу мен эмас, мен эмас...” дея чинқириб юбордим ва гиламча устига ўтириб қолдим. Онам чинқириғимни эшишиб югуриб келди-ю, пойгакда қотиб қолди.

– Ая, – дедим ҳали ўзимга келолмай, онамдан најжот кутгандай бир алфозда, – энди мен шундай бўлиб қоламанми?

– Қандай?.. – деди онам шошиб қолиб ва бу саволнинг залворидан боши ғувиллаб кетди чоғи, ҳолсизланиб деворга суяниб қолди.

– Бетим... – дея олдим, холос.

– Тузаласан, ҳеч нарса кўрмагандай бўлиб кетасан, ҳали яраларинг битгани йўқ, жон қизим, йиғлама, – деб онам мени юпатмоқчи бўларди-ю, лекин ўзи мендан ҳам баттар йиғларди. Она-бала бир-бирилизни опичлаб кўзёш тўқдик.

Менга енглари узун янги кўйлак тикирилди, янги рўмол олинди. Мен рўмолни бошим билан юзимга шундай ўраб-чирмадимки, соchlарим, бўйним ва чап юзим бутунлай беркилди. Фақат ўнг юзим очиқ турар ва атрофни ҳам фақат бир кўзда кўрадиган бўлдим. Уйдан бир қадам чиққим келмас, кўзгу яқинига боришни ҳам истамас, ҳеч ким билан ўйнашни ҳам, гаплашишни ҳам хоҳламас эдим. Фақат ҳар замонда деразадан ҳовлига қараганимда, ёниб кул бўлган со-монхонага кўзим тушиб, даҳшатли манзара хаёлимга келар ва сесканиб, шартта юзимни ўгириб олар, унсиз йиғлардим. Ўзимдан ҳам кўра аланга ичиди қолиб кетган мушук болаларига кўпроқ юрагим ачишар эди.

Рўмол билан чандиқларимни бекитиб юришга ўрганганимдан сўнг илк бор ҳовлига чиқиб, гуллар

ва ўтларнинг хушбўй ҳидлари анқиб турган ҳаводан нафас олдим. Сойга тушиб сув кечдим. Қўчага чиқиб, ҳар куни болалар билан мазза қилиб ўйнайдиган майдончага бордим. Бу ерда ҳар доим ўғил болалар билан қиз болалар бирга ўйнашарди. Болалар мени кўриб югуриб келиб ўраб олишди. Мен уларни жуда соғинган эдим. Бироқ болалар мен билан ўйнашга эмас, жароҳатимни кўришга кўпроқ қизиқишарди. Рўмолимни аста қўтариб, ярадор юзимни кўриб олишга ултурганлари ҳам бўлди. Кўрганлар қўрқиб кетишди. Бу қўрқувнинг даҳшати оғиздан-оғизга ўтиб, гўё менинг юзим эртаклардаги ялмоғизнинг жодусига учраб, бадбашара маҳлуққа айланиб қолган маликанинг қиёфа-сидек тасаввур пайдо қилгани қулоғимга етиб келди. Инсон боласи барибир ожиз банда-да: менинг ярадор юзимни кўришга катталар ҳам уялмай қизиқа бошлидилар. Болаларнинг ўзларини бундай тутишларидан, одамларга томоша бўлишдан юрагим безиллаб қолди. Шундан сўнг болаларнинг олдига бормай қўйдим, кўчага чиқсан ҳам, ўйнагани чиқмайман. Менинг баҳтиёр кунларим поёнига етганини тушундим. Алвидо, менинг таъби нозик дўстларим, алвидо, завқли ўйнларга тўла хушнуд дамларим!

Ўқишиш бошланганда мактабга ҳам рўмол ўраб борадиган бўлдим. Ҳатто дарс вақтида ҳам рўмолимни ечмадим. Муаллимлар менинг аҳволимни тушуниб, рўмол ўраб юришимга рухсат бера қолишди. Юзимнинг ярмини рўмол ёпиб тургани учун доскадаги ёзувларни гоҳида бир кўзда кўраман, китобларни ўқиётганда эса рўмолни секин суриб, иккинчи кўзимни очаман. Менинг рўмол ўраб юришим синфимиздаги баъзи ўйинқароқ, бетамиз болаларнинг ғашини келтиради. Улар танаффус бўлди дегунча менинг ортимдан пусиб келиб рўмолимни тортиб қочишар: “Қаранглар,

Марканинг бетини кўриб қўйинглар” деб масхара қилишарди.

- Эй, Марка, бошингдаги рўдапони еч.
- Марка, рўмолингни бериб тур, доскани артиб қўяй.
- Паранжингни қачон ташлайсан, Марка? – деб жигимга тегишарди улар.

Ҳасадгўй қизларнинг эса жони кираарди. Айниқса, Санобар деган синфдошим гўёки хусн бобида яккаю ягонага айлангандек ўзига янада кўпроқ оро берарди. Болаларнинг қилиқларидан хўрлигим келиб, бошимни қайси деворга уришни билмасдим, дунё кўзимга қоронғи бўлиб кетарди. Охири мактабдан бутунлай бе-зид қолдим. Китоб-дафтарларга қарашга ҳам, болаларни кўришга ҳам истагу иштиёқим мутлақо қолмади.

– Бу мактабга энди ҳеч қачон бормайман, ая, бошқа жойга кетайлик, – деб йиғладим мен ниҳоят сабрим тугаб.

– Озгина чидагин, қизим, тийиқсиз болалар бир куни тийилиб қолишар, – деди онам йиғлагудай бўлиб. – Бошқа қаёққа ҳам борамиз? Бош уриб борадиган бирор кўнгилтортар яқинларимиз бўлмаса. Эъзоз тоғанг иккаламиз етимлиқда ўсганмиз. Шаҳарда яшар эдик, ҳозир у ерда ҳам бошпанамиз йўқ.

– Ана, тоғам бор-ку, – дейман ногаҳон йилт этган йўлчи юлдузни кўргандай.

– Тоғангнинг йўриғи бошқа, болажоним. Тўғри, у бизга меҳрибон, лекин иши қўп, илмга шўнғиб кетган. Бошқа иложи ҳам йўқ эди-да. Эъзоз иккаламиз тортган азобларни ҳеч кимга раво кўрмайман. Шундай қийноқлардан қутулиш йўлини тоғанг фақат илмда кўрган бўлса керак, болам. Кечалари темирийўл омборига бориб юк ташиб, кундузи вақт топди дегунча китобга мук тушарди. Шу азобларда ўқишини тугатди. Энди бўлса чет элга бориб, яна ўқийман деётган эди.

У йўлини топиб олди, энди тўхтамайди. Мен эса отанг билан танишганимиздан кейин бу ёқларга келиб қолдим. Ҳозир отангнинг ишлари бироз юришмай турибди. Ҳали ҳаммаси яхши бўлиб кетади, қизим.

Онам отам ҳақида ҳеч қачон ножўя гап айтмайди. Фақат унинг бир кун келиб ишлари яхши бўлиб кетишини истайди. Аслида мен отамнинг қизи эмасман, онамнинг биринчи турмушида туғилганман. Опа-ука шаҳарда ҳаёт машаққатларини тортиб юрган бир лаҳзода онамнинг қаршисида бир хушрўй йигит пайдо бўлган. Онам ёши ўтиб қолаётгани боис оғиз солган йигитнинг насл-насабини кўпам суриштириб ўтирамай, шундоққина кўз ўнгидаги бўй-бастига ишониб қўя қолган. Мұхаббатнинг кўзи кўр, жилвалари алдоқчи бўлади, хушёр бўлмаган киши панд еб қолади, деганлари рост экан. Йигитнинг ўзини тутиши, одобу муомаласи аввалига онамни маҳлиё этган-у, аммо тўйдан кейин кўп ўтмай, буларнинг бари йигитнинг юзидаги ниқоб экани аён бўлибди. Оқ отдаги шахзода аслида фарибгар ва ўғри бўлиб чиқибди. У гоҳо ичкиликка мук тушиб, гоҳо бир балоларни чекиб кунда-кунора маст бўлиб келар, қўли ҳам югурик экан. У онам оғироёқ пайтида ҳам ҳеч бир сабабсиз дўппослаб туришни канда қилмабди. Она бўлганидан кейин ҳам бир куни аёвсиз калтаклаган ва онамни умрбод дардга мубтало қилган экан. Кейин кўп ўтмай шериклари билан бир қинғир иш устида қўлга тушиб, қамалиб кетибди. Онам чеккан барча қийноқларидан Эъзоз тоғамни воқиф этмаган. Кейинроқ тақдир мазлума онамнинг истиқболига ҳозирги ўгай отамни бошлаб келган. Уларнинг қисматлари ўхшаш бўлган. Биринчи кўришганларидаёқ ўгай отам ҳаётидаги бор ҳақиқатни рўй-рост айтиб берган экан. Унинг оиласи, икки жажжи қизалоғи бўлиб, турмуши ҳам эл қатори кеч-

ган. Аммо ўша хотин борига қаноат қилмасдан, фаровон ҳәётни орзу қилиб, қизалоқларини етаклаган-да, уч-түртта сатанг хотинларга қўшилиб, чет элга кетган. Ўшандан сўнг отамнинг ичи дардга тўлган, кўнглига чироқ ёқса ёришмайди.

Онам ўгай отамга турмушга чиқиб, Боғишодга келганимизда мен эрта-индин мактабга борадиган кичкина қизалоқ эдим. Аввалига бир-икки ой отам бизга фақат яхши муомалада бўлди. Онамга муло-йимлик билан гапирав, мени эркалатиб, кунда-куно-ра хўроzқандми, бирон майдароқ ўйинчоқми олиб келлар эди. Лекин, менимча, бошлаган янги турмушидан кўнгли тўлмади. Аста-секин ичидаги алам уни енгиб, ҳасрати сиртига чиқа бошлади. У ҳаётидан, тақдиридан койиниб, ўчини кимдан олишни билмасди.

– Минг лаънат ҳаммасига, хотин зотининг ҳаммаси бир гўр. Мен эркак эдим, эркаклик ғуруримни топтаб кетди, мени яксон қилиб кетди, ярамас, – деб қичқирганча аввалги хотинини лаънатлаб, қўлига илинган нарсани ҳар ёқса отадиган одат чиқарди. Кечагина бизга хушфेъл бўлиб кўринган одам энди жаҳлининг жилови йўқ бир маҳлуқдай тасаввур уйғотмоқда эди. Мен, кетайлик бу ердан, деб хархаша қиласдим. Онам эса мени сабр қилишга, буларнинг ҳаммасига қўни-кишга даъват қиласди ва охир-оқибат бунга эришди ҳам. Назаримда, шўрлик онамнинг бошқа чораси ҳам йўқ эди. Икки марта турмуш қуриб, икковида ҳам оғзи куйган муштипар онам энди буёғига сув келса симириб, тош келса кемириб, турмушнинг борки муштлари-га бардош бериб яшашни афзal қўрди, деб ўйлайман. Отам эса қаршисидаги бундай ожизликни суистеъмол қилиб, қаҳру ғазаби кундан-кун авжига чиқарди.

У илгари дўконларни ҳар хил нарсалар билан таъминлайдиган давлат идорасида ишлаган ва шу важдан шаҳарга тез-тез бориб тураркан. Эски тузум

барбод бўлгач, замоннинг зайди билан отам ишлайдиган идора ҳам ёпилган. Унинг омади юришмай, боши гангид қолган. Давлат ихтиёрида бўлган кўп нарсалар одамларга мулк қилиб сотиб юборилган-у, сармояси борлар уларни арzon-гаровга сотиб олишган. У ўз вақтида тежаб-тергаб, бир-икки сўм пул жамғариб қўёлмаганидан надомат қиласарди. Отам ора-сира ўзига ўхшаган омади чопмаганлар билан кўча-кўйда улфатчилик қилиб, маст бўлиб келадиган бўлди.

Онамнинг мени юпатишларидан таъсирландим. Бундай йифи-сигиларимнинг бефойдалигини, қайтага бундан ўзимдан ҳам кўра онамнинг хаста кўнгли чандон эзилишини, бизнинг тақдирнинг ҳар қандай синовларини лаббай деб кутиб олишдан ўзга чорамиз йўқлигини бола қалбим билан пок-покиза англаб етдим. Шундан кейин мен бошқа хархаша қилмай қўйдим. Юзимни рўмол билан чирмаб юришга ҳам, болаларнинг ҳазил-мазахларига ҳам, tengkurlarim билан кўнгил ёзиб ўйнай олмаслигимга ҳам чидадим ва бора-бора буларнинг ҳаммасига кўниқдим. Мен ўқишига аввалгидан ҳам шиддатлироқ киришиб кетдим. Барча изтиробларни енгишга китоблардан куч олаётгандек, танаффусларда ҳам, уйда ҳам китоблар ичига шўнғиб кетардим. Кутубхоналар унutilган оролдек мунғайиб қолаётган, не-не китоблар саҳифалари очилмай эскириб кетаётган бир пайтда менинг дардкашим ҳам, бирга ўйнаб-кувнайдиган қадрдон дўстим ҳам, беминнат маслаҳатгўйим ҳам китоблар бўлиб қолди. Ҳар ҳолда, китоблар мен билан бугун бирга ўйнаб, эртага ташлаб кетмайди, мендан ижирғанмайди ҳам, масхара ҳам қилмайди. Қачонки кўнглим таскин истаганда ёхуд шукроналик туйганимда онамга ўхшаб фақат Худога илтижо қилишга одатландим: *Оллоҳим, бу дунёда неки дилозорлик бўлса, барининг ажрини бергувчи Ўзингсан!*

* * *

Соли амаки ўрик соясида ўтириб, ўзининг қанчалик саховатпешалигию одамлар уни умрбод алқаб юришлари кераклиги, қарздорлар олган пулларини ўз вақтида қайтармаса, бир куни хонавайрон бўлиши мумкинлиги ҳақида узундан-узоқ насиҳат айтиб турганида кўчадан отам келиб қолди. Бу сафар у, хайриятки, маст эмас эди. Қаердадир тирикчилик учун биронта юмуш қилиб келяпти шекилли, чарчагани юз-кўзларидан сезилиб турарди. Бир-икки сўм пул ҳам ишлаган чамаси, бир жуфт ҳандалак ҳам олиб келибди. Унинг кўзи кутилмаган меҳмонларга тушиши билан авзойи ўзгарди ва бир дам ногаҳон қўлга тушган ўғридек кўча эшик олдида серрайиб қолди. Кейин секин бориб, амаки билан саломлашди-да, чорпоянинг бир четига ҳорғин ўтирди. Соли амаки ўткир насиҳатлари билан уни сийлади. Доңиш пакана суқланиб, чорпоя устида турган ҳандалакларнинг олдига борди. Биттасини қўлига олиб, ҳидлаб кўрди. “Мишиғи оқиб турган бурни ҳид сезармикан?” деган гап ўтди хаёлимдан. Отам чўнтагидан пичоқчасини олиб, ҳандалакни тиликлади. Бир тилигини Паканага, бир тилигини амакига узатди. Кейин яна, яна тиликлади.

– Бу зомича деганлари жуда хуштаъм нарса бўлади, – деди амаки димоғини қириб. – Қайсиadir йили мен ҳам ҳовлимга уч-тўрт туп эккан эдим. Яхши тугди. Айни пишай деганда Зайни ғилайнинг ялмоғиз сигири ҳовлига кириб, экинларни пайҳон қилгани етмагандай, зомичаларни ҳам паққос туширибди. Ғилай ҳам кўрадиганини кўрди. Охири сигирини сотиб, пулини бериб кутилди. Шундан бери ҳеч нарса экмайман. Мен экиб, бирорнинг моли ҳузурини кўрсинми? Ҳовлида беш-олти туп дарахт бор, шунинг ўзи кифоя. Уларга мол-ҳолнинг бўйи етмайди.

Ота-бала битта ҳандалакни еб бўлишгач, Дониш иккинчи ҳандалакни ҳам қўлига олиб ҳидлай бошлади. Отам унисини ҳам тиликлаб, меҳмонларга узатиб турди. Лекин тиликлар тобора юпқалашиб борарди. Шундай бўлса-да, ота-бала иккинчи ҳандалакнинг ҳам учдан икки қисмини еб бўлишди. Мен эшик панасида уларни кузатиб, ютиниб-ютиниб қўярдим.

– Жонивор, ўзи митти бўлганни билан шундай асалки, қанча еганинг билан тўймайсан, – деди Соли амаки лабини ялаб. – Бўлди энди, ўзларингга ҳам қолсин. Ҳа, мен шунаقا танти одамман, бироннинг ҳақини емайман. Нима бўлса элга бўлсин, эл қатори менга бўлсин, дейман-да. Менинг кимлигимни билган билади, билмаган ўзи билади.

Соли амаки кетишга чоғланди. Отам атрофга аланглади, буни дарров тушундим, отам мени ахтараётган эди. Чопиб бориб, обдастани кўтариб, сув қуишига чоғландим. Соли амаки шира бўлган қўлларини ювди. Пакана ҳам қўлию лабларини ҳўллади, бироқ шунда ҳам тепа лаби устидаги икки “ирмоқни” ювмади. Менинг эса ғашим келди. Паканани ҳар сафар кўрганимда кўз олдимга олов ичидаги қолиб кетган бечора мушук болалари келаверади ва кўнглим бузилади. Ҳозир ҳам шундай бўлди: мен шундоққина рўпарамда ожиз мушукчаларнинг қотилини кўриб турардим.

Отам чўнтағидан озгина пул чиқариб, Соли амакига бергач, у кекирганча ҳовлидан чиқди ва унинг изидан Пакана ҳам равона бўлди. Кейин отам чорпоя устида қолган бир бўлаккина ҳандалакни учта тиликлади. Бир тиликни ўзи еб, икковини мен билан онамга қолдирди. “Кўрган ошнинг куюги ёмон, дейишади, – деди отам. – Олинглар, ўзимизга шуниси ҳам етади”. Мен ўзимга теккан бир тилик ҳандалакни анча вақтгача ҳидлаб ўтирдим. Хушбўй ҳиддан кайфиятим кўтарилди.

* * *

Мен бир неча кун сойга тушмадим, булоқдан сув ҳам олиб келмадим. Зўр бериб кашта тикдим. Гоҳ-гоҳ бармоқларимга бехосдан игна санчилиб кетса елкам учиб тушар, яна индамай ишимни давом эттираверардим. Онам қўз қири билан мен томонга назар ташлағанда ҳаракатларимдан кулгиси келаётганини сезиб туардим.

– Кўлларинг чакич урилган патирдай бўлиб кетди. Каштани қўй, бор, ўриклар тўкилган бўлса териб кел, – деди онам менинг хаёлим паришонлигини пайқаб.

Мен ҳам худди шу буйруқни кутиб тургандай, каштани тахмонга қўйдим-да, челагимни олиб сой томонга кетдим. Булоқ ёнига тушиб, у ёқ-бу ёққа қараб олдим. Қуириқда Анорнинг сув кечиб юрганини кўрдим. У энгашиб олиб, сувдан ниманидир қидираётгана га ўхшарди. Мен челагимни булоқ лабига қўйиб, сувга термилиб ўтирудим. Тип-тиниқ сув юзида сув қўнғизлари қувлашмачоқ ўйнаётгандек айланишарди.

– Эй, Биби, нега қўринмай қолдинг, бирон жойга кетганмидинг? – деди Анор. У узоқдан мени қўриб югуриб келганди.

– Йўқ, уйда эдим, – дедим унга қарамай. – Нега келдинг?

– Ие, гапинг қизиқ бўлди-ку. Нима, мендан хафамисан? Ахир, мен сенга биронта ёмонлик қилмаган бўлсам.

– Нега рўмолимни ечганимда келганингни билдирмай қараб турдинг?

– Бу нима деганинг?

– Энди сен ҳам мени масхара қиласанми?

– Қўйсанг-чи, унақа гапларни. Қара, қанча итбалиқ тутдим, – деб у қўлидаги шиша банкани кўрсатди. Банка ичидаги сувда бир ҳовуч итбалиқ сузиб юради.

– Нима қиласан уларни?

– Шунчаки, бошқа нима ҳам тутиш мүмкин бу ердан. Кўйиб юбораман, ҳозирча шунинг ичида ўйнаб туришсин.

Мен эндиғина ўзимга яхши дўст топдимми деганимда у ҳам кетиб қолдимикан, деб ўйлаб, сиқилиб юрган эдим. Унинг яна ҳеч нарса бўлмагандек келиб гаплашаётганидан кўнглимга илиқлиқ юурди. Уни ўрикларнинг энг ширинлари билан меҳмон қилгим келди.

– Ўрикларимиз жудаям яхши пишибди, юр, олиб бераман, – дедим ўрнимдан туриб.

Мен дараҳтдан олтиндай товланиб пишган бир ҳовуч ўрикни териб, челақдаги сувга ташладим. Анор ўтлар устига чордона қуриб олиб, ўрикларни мақтаб-мақтаб еяверди.

– Биби, юзингга нима қилган? – сўради у гап орасида ва кейин яна, хафа қилиб қўймадиммикан, деган хавотирда мен томонга зимдан қараб қўйди. Мен жавоб ўрнига юзимни терс ўгириб олдим. – Майли, хоҳламасанг жавоб берма, шунчаки сўрадим-қўйдим-да. Хафа бўлмагин тағин.

– Йўқ, хафа бўлмайман, – дедим ниҳоят лўнда қилиб. – Сомонхонамиз ёнганда олов ичида қолиб кетганиман, бўлди, шу.

Анор абжирлик билан гапни бошқа нарсаларга буриб кетди. Шу пайт сойнинг нариги қирғоидан бир тўп болалар тупроқ чангитиб ўтиб қолишли. Уларнинг кўзлари мен билан Анорга тушиб, гап отишиди.

– Ҳой, шаҳарлик, қиз бола билан ўйнайсанми?

– Ўзингам қиз болага ўҳшаркансан-да.

– Ўйнайвер, унинг сендан бошқа бирга ўйнайдиган дугонаси йўқ ўзи...

– Бор, йўлингдан қолма, – деди Анор ва кейин мендан изн сўраб, чақонлик билан дараҳт тепасига чиқиб кетди.

Кейинги куни ҳам бир неча марта булоқ бўйига тушиб чиқдим, аммо Анор кўринмади. Тушга яқин сойнинг қуий томонига қараганимда қизларнинг қийқиришиб чўмилаётганини кўрдим. Улар кўйлакларини шалаббо қилиб, яйраб чўмилишарди. Лекин уларнинг олдига бориш бефойда. Агар борсам, мен ҳам кўйлагим билан ўзимни сувга ташлайман, бироқ рўмолим билан чўмилмайман-ку. Рўмолимни ечганимдан кейин эса қизларнинг бутун диққати менинг юзимда бўлади. Шунда уларнинг қийқириқлари сўнади, ўйинлари совийди, чўмилишнинг завқи қолмайди, кейин уй-улярига тарқалишади. Бунга сен сабабчи бўлаётганингни зимдан сезиш нақадар оғир. Йўқ, ундан кўра бормаганим маъқул. Дараҳт соясида ўтириб, уларнинг кетишлигини кутдим. Анча вақтдан сўнг қизлар кетишиди. Мен дарров сойга тушиб, сувнинг оқими бўйлаб кечиб боравердим. Мели буванинг уйини биламан, ёнғоқларининг шохлари сой томонга осилиб турадиган ҳовли. Ўша ёнғоқларга етишим билан юқорига тирмасиб чиқдим ва ҳар томонга алангладим.

Бир пайт нарироқдан таниш овоз мени чақирди:

- Ие, Биби, нима қиласяпсан бу ерда?

Чўчиб тушиб, овоз келган томонга қарадим. Анор нарироқда ёнғоқлар соясидаги ўтлар орасида дам олиб ётган экан. У ёнимга келиб ўтирди.

- Ёнғоқ тагида ухлама, эсинг оғиб қолади, – дедим.

- Нега бугун бизникига бормадинг?

У индамади, негадир хомуш, хаёли фаромуш кўринарди. Уй олдида эса хотин кишининг йиғлаб, ниманидир тушунтирмоқчи бўлаётгани, Мели буванинг эса ғазаб билан койиётгани эшитилиб турарди.

- Нима бўляяпти у ерда? – дедим кўнглим бир нотинчликни сезиб.

- Э, ҳар куни шунаقا жанжал, – деди Анор хафа бўлиб.

Ёлвориб йиғлаётган аёл Анорнинг онаси Башорат хола экан. Анор менга бу машмашанинг боисини, онасининг қандай қилиб тошкентлик бўлиб кетганлиги ни айтиб берди. Башорат хола мактабни битиргунча Боғишоддан бир қадам чиқмаган оддий қишлоқ қизи бўлган, лекин бошқаларга ўхшаб содда эмас, ўзига яраша шаддодгина, тутган ерини узадиган, чўртке-сар бўлган экан. Уларнинг шаҳарда бирор бир яқинию танишлари ҳам бўлмаган. Мактабни битиргач, институтга кирмоқчи бўлганида Мели бува рухсат бермagan. “Бегона жойда бетартиб бўлиб кетасан. Қиз бола мактабни тамомласа бўлди, у ёғига ўқиши шарт эмас. Рўзгорни эркак тебратади, хотин киши диплом олиб, дунёга устун бўлармиди. Йиғиштир дийдиёнгни” деб уришган. Башорат хола кечаю кундуз дод-фарёд қилиб, охири онасининг кўмагида Мели бувани кўндириган. Кейин Тошкентда қариндошлари бор дугоналарига эргашиб, у ерга кетган. Омади чопиб ўқишга ҳам кириб олган. “Илоё, ўқишга киролмай қайтиб келсин” деб илтижо қилиб ўтирган Мели бува баттар тажанг бўлиб қолган. Башорат хола институтда ўқиб юрганида тошкентлик бир йигит билан бир-бирларига кўнгил қўйиб, аҳду паймон қилишибди. Ўқишни битириш арафасида йигит Боғишодга совчи юборган. Бундан Мели буванинг фифони фалакка кўтариленган.

– Мен шунча йил қизимни ўзим танимаган етти ёт бегонага бериб юбориш учун боқиб катта қилдимми? – деган Мели бува совчиларни оғиз очишга ҳам қўймай.

Лекин Башорат хола аҳдидан қайтмаган.

– Мен аҳду паймон қилганман, берган сўзимдан қайтмайман, ўлдирсангиз ҳам шу йигитга тегаман, – деган.

– Аҳд қилгансан? – деган Мели бува ҳам ғазаб отига миниб. – Менинг аҳдим-чи? Сен мактабда ўқиб юрганингдаёқ қиёматли ўртоғимнинг ўғлига сени

бераман деб лафз қилиб қўйганман. Шаҳарга бориб ўқийман, дединг, кўндиридинг. Энди бунисини кечириб бўлмайди. Сен менинг юзимга оёқ қўйдинг, лафзимни булғадинг. Энди мен нима деган одам бўлдим? Қиз боққунча ит боқсам бўлмасмиди?

Башорат хола барибир ўша йигит билан турмуш қурган. Тўйларига Мели бува бормаган, бошқаларни ҳам боришга қўймаган. Аммо онасининг илтимоси билан бир-иккита қариндошлари яширинча бориб келишган. Улар куёвни ҳам, унинг ота-оналарини ҳам оғзиларидан бол томиб мақташган. Шунда онасининг у томондан кўнгли анча таскин топган бўлса-да, бу томондан ғам-андухга тўлган: Мели бува қизининг бу хонадонга қайтиб қадам босмаслигини тайинланган. Башорат хола орадан шунча вақт ўтиб, мана энди юрак ютиб келган экан. Бироқ Мели буванинг қўксидаги тош йиллар ўтиб ҳам эримабди.

– Ойим ҳар куни бир йиғлаб олади, ялиниб-ёлворади, бувим ҳам ойим тарафида, лекин барибир бувам кечирмаяпти, – деди Анор хўрсишиб.

Ховлидаги бақир-чақир, йиғи-сиғи ҳамон тинмаяпти.

– Боламни олиб борсам кўнгли юмшаб қолар, деб ўйладингми? Бекор айтибсан. Сен мени оёқсти қилиб кетдинг, ғуруримни ер билан яксон қилдинг. Энди буни тиклаб бўлмайди, – деди Мели бува қаҳр билан.

– Мен бир бетайнин, бедавога тегмадим-ку, – дея қон йиғларди Башорат хола. – Турмушим яхши, оилас тинч, рўзфорим бут. Сиз мени узатмоқчи бўлган ўртоғингизнинг ўғли ҳеч қаерда ўқимаганидан чет элга бориб, ишлаб пул топиб келаман, деб боридан ҳам айрилиб қайтибди-ку. Энди ўзинг бориб пул топиб кел, деб хотинини четга жўнатиб юборибди. Хотини бир этак боласи билан эрини боқиши учун қайси юртда нима юмушларни қилиб юрганини ким билади? Менга шу ҳаётни раво кўрганмидингиз, ота?

Мели буванинг тоқати тоқ бўлди, шекилли, жаҳл билан уй ичига кириб, эшикни қаттиқ ёпди. Башорат хола супага ўтириб олиб, онасининг кўксига бошини қўйганча йиғлайверди. Мен бу аянчли манзарани ортиқ томоша қилгим келмай аста изимга қайтаётган эдим, Анор тўхтатди.

– Шошма, Биби, сенга бир нарса бераман, – деди у ва чопиб дараҳтлар орасига кириб кетди. – Қара, сенга нима олиб келдим, – деди бирпасдан сўнг қайтиб келиб. Унинг қўлидаги елим халта қаергадир кўмиб қўйилган бўлса керак, тупроқ юқи бўлиб ётарди. Халта ичидан миттигина китобчани олиб, менга узатди.

– Бу дуолар китоби. Ма, ола қол, бу сенга.

– Қаердан олдинг? – дедим китобчани олиб у ёқ-бу ёғига қаарканман. Китобчанинг муқовасига ростдан ҳам “Нажот келтирувчи дуолар” деб ёзиб қўйилган эди.

– Бувамнинг китоблари орасидан олдим.

– Ўғирлаб олдингми?

– Йўқ, шунчаки олдим, вассалом. Э, бувамда бунаقا китоблардан сон мингта. Бир кучоини олсанг ҳам камайиб қолмайди.

– Нима қиласман уни?

– Бувимнинг айтишича, бундаги дуоларни юз марта ўқиган одам ҳар қандай яхши ниятига етишар экан.

– Ростданми?

– Бўймасам-чи, буни мен ўзимда синаб ҳам кўрдим. Бир куни чала пишган олмани еб, кейин қорним оғриб қолган эди. Шунақаям қаттиқ оғридики, ўлиб қолай дедим. Бувим кафтларини тўлдириб-тўлдириб исириқнинг донини чайнатди. Бирам заҳар экан, бирам заҳар экан, барибир фойдаси бўлмади. Кейин эса қўлимга мана шу китобчани берган эди. Маккапоянинг орасига ётиб олиб, оғриқни тўхтатишими сўраб, кечгача тўхтамай дуоларни ўқидим. Юз мартадан кўпроқ

үқидим-ов, билмадим, элликдан кейин адашиб кетдим-да. Дуоларни деярли ёдлаб ҳам олдим. Қоронғи тушай деганда қорнимнинг оғриши таққа тұхтади. Шундан бери бу китобни эсімдан чиқармайман. Сен ҳам ниманидир чин күнгилдан хоҳласанг, мана шу китобдаги дуоларни юз марта ўқи, күрасан, сен истаган нарса, албатта, бўлади.

Мен рўпарамда гўё буюк сеҳргар сўзлаётгандек, кўпдан бери ахтариб юрган нажоткоримни топгандек унга қулоқ тутиб турардим. Китобчани маҳкам ушлаб бағримга босдим ва мени изтироблардан халос қилгувчи, ҳамма истакларимни муҳайё этгувчи бир туйғу кўнглимга киргандек бўлди. Шундан сўнг, бу табаррук китоб менинг доимий ҳамроҳимга айланди. Мен ётганимда ҳам, турганимда ҳам китобчани қўлимдан қўймасдим. Унда шундай дуолар бор эдики, гўё ўқиганим сайин шеър ёдлаётгандек завқланардим. Анорнинг: “Юз марта ўқиган одам яхши ниятига етишади” деган гапи қулогим остида жаранглаб турар ва мен уни деярли ҳар куни юз мартадан ўқирдим. Мен дуоларни ҳар гал такрорлаганимда: “Художон, жароҳатларим бутунлай битиб кетишига, яна аввалги соғ-саломат кунларимга қайтишимга мадад бер” дея илтижо қилиб юзимга фотиҳа тортардим.

* * *

Бу ёз мен учун, ҳар ҳолда, мароқли ўтди. Август ойи охирлаб, ишкомдаги ҳусайнинг маза кириб қолган бир пайтда мен шундай яхши кунларнинг охирлаб бораётганидан хўрсиниб қўядим. Тандир ёнида нон ёпаётган онамга ёрдамлашиб ҳали сув, ҳали рапида ва енгсаларни узатиб, ҳар битта нонга чакич уриб турган эдим. Иссиқ нон тандирдан узилаётганда ҳовли этағида Анорнинг шарпаси бир қўринди-ю, ғойиб бўлди.

Бир парча нон синдириб олиб, қўлларим куя-куя ўша томонга югурдим. Анор сойда итбалиқ тутиб ўйнаётган эди. Мен булоқ ёнига ўтириб қўлимдаги ҳовури кўтарилиб турган нонни иккига бўлдим ва бирини унга узатдим.

– Уф-уф, бунча иссиқ бўлмаса, – деди Анор қўлла-ри куйиб.

– Буни мана бундай қилиб сувга ташласанг дарров совийди, – деб қўлимдаги нонни булоққа ташладим. Анор ҳам худди шундай қилди. Кейин муздай сувга бўккан нонни мақтаб-мақтаб едик.

– Жудаям мазали экан, – деди Анор нонни еб бўлгач лабини ялаб.

– Яна олиб келайми?

– Йўқ, раҳмат, қорним тўйди.

– Сениям аянг шунаقا нон пиширадими?

– Йўқ, айтгандим-ку сенга, биз кўпқаватли уйда турамиз, деб. У ерда тандир бўлмайди. Бизнида кўпинча бўлка нон бўлади, дўкондан олиб келамиз-да. Кейин бизда бунақа булоқ ҳам йўқ. Биби, мен эртага кетяпман, – деди Анор ниҳоят хайрлашгани келганини билдириб.

– Қаёққа?

– Тошкентга, уйимизга.

– Кейинги ёзда яна келасанми? – дедим унинг юз-кўзларини эслаб қолишга киришиб, синчилаб қа-рарканман.

– Билмадим, балки яна келарман, – деди Анор хўр-синиб. У нимадандир хомуш кўринарди. Чамаси, она-сининг илтижоларию шунча кун овора бўлганлари бекор кетган, буваси эса сира юмшамаганга ўхшайди.

– Лекин мен сени унутмайман, сен ҳам мени эсингдан чиқариб юборма, Биби. – У итбалиқлар солинган шиша банкани менга бериб, ўзи бошини қуи солганча сув кечиб, уйлари томонга кетди.

- Буларни нима қиласан? – дедим унинг ортидан бақириб.

- Сувга қўйиб юбор, – деди Анор тобора узоқлашиб бораркан ортига ўгирилиб.

- Банканг-чи?

- Сенда қола қолсин.

Мен Анор кўринмай қолгунча ортидан қараб турдим, сўнг итбалиқларни сойга қўйиб юбордим.

Шундан сўнг кунлар зерикарли кечди, юрагимни ғашлик тарқ этмади. Онам ўчоқбошида мураббо қайнатаётганида мен дараҳтлар орасида бироз куймаланиб юрдим. Ўрик ва гилос дараҳтлари меваларини бус-бутун ҳадя этиб бу йилги хизматини адо этиб бўлганидан шохларини кўтариб хотиржам бўлиб олган. Энди мева улашиш навбати шафтолиларга келганидан улар шифил мева тугган шохларини эгиб, салом бериб турибди. Мен тўкилган шафтолиларни тердим, кейин қовжираган ўтлар устига ётиб, осмонга кўз тикиб, хаёл сурдим. Онамнинг мен томонга қараб-қараб қўяётганини сезиб турибман. Биламан, дугоналаримдан узилиб, ёлғиз бўлиб қолганим онамни изтиробга соларди. Анорнинг қишлоққа меҳмон бўлиб келгани яхши бўлди. Ҳартугул, бир муддат ёлғизлиқ шамоллари мени четлаб ўтди. Энди мен билан ўйнайдиган яккаю ёлғиз ўша болани, гарчи ўғил бола бўлса ҳам, келгуси ёзгача кутишим керак. “У жуда беғубор бола экан. Нега ҳамма болалар унга ўхшаб яхши бола бўлишмайди? Нега ўқиш даври узоқ чўзилади-ю, таътил вақтлари бир зумда ўтиб кетади? У яна қайтиб келармикан? Қанийди, у шу ерга кўчиб келса-ю, бизнинг мактабимизда ўқиса. Балки, бошқа болалар ҳам ундан ўрнак олиб яхши бўлиб қолишармиди” дея энтикиб ўйлаётган хаёлларимнинг чеки йўқ эди. Лекин нима бўлганда ҳам, ёз поёнига етди. Буёғига энди ўқиш бош-

ланади. Яна ҳар куни мактабга бориш керак. Кузда бир нави-ю, қишида юпун кийинишга ҳам, оёқларим қор ва лойдан азоб чекишига ҳам чидашим мумкин. Лекин бардош топиш зарур бўлган бошқа нарсалар мени қийнарди: яна ўйинқароқ болаларнинг масхараомуз гапларию рўмолимни тортиб қочишларига, қизларнинг сездириб-сездирмай айирмакашлик қилишларига – ҳамма-ҳаммасига чидашим керак.

Ўзинг менга сабр ва тоғларнинг тошидек бардош ато эт, Эгам!

* * *

Кўча томондан отамнинг бўғиқ овози эшитилди. Яна бошқа қийқириқлар ҳам қўшилганига қараганда, шериклари ҳам бирга келганга ўхшайди. Эшик очилиб, аввал отамнинг ширақайф юзи кўринди. У оёқда зўрға турарди. Шериги уни суяб ичкарига кирди. Иккинчи шериги эса уларнинг ортидан бир эчкини етаклаб кирди. Эчкининг иккита улоқчаси ҳам бор эди. Отам билан шериги бир-бирини суяб, чорпояга бориб ўтиришди. Онам ҳайрон бўлиб қараб турган эди, отам ўшқириб берди: “Нега бўзрайиб турибсан, ол, эчкини кўрага боғла”. Онам ўчоқнинг оловини тортиб қўйиб, шошилганча эчкини шохидан ушлади. Мен ҳам югуриб бориб, онамга кўмаклашдим. Эчкини улоқчалари билан кўрага қамадик. Улоқчаларни кўриб, севиниб кетдим. Бири оқ, бири қора, бирам чиройли. Уларни галма-галдан кўтариб ўйнайман, қувончим ичимга сифмайди. Чорпо-ядя отам билан шериклари қийқиришади.

– Бизга чалоб олиб кел, – деб бақирди отам.

“Онам чалобни қаёқдан олади?” деб ўйладим. Отам сигиримизни сотиб юборганидан бери ўйимиздан оқлик узилган. Лекин онам шошилганча кўчага чиқиб кетди-да, бирпасдан сўнг қайсиadir қўшнини-

кидан бир коса чакки олиб келди. Чаккини челяқдаги сувга аралаштириб, бир чимдим туз сепиб, кўкатларни тўғраб солса, бир челяк чалоб бўлади. Онам чалобни тайёрлаб, челяги билан чорпоя устига қўйди. Отам билан шериклари дам-бадам чалобни косаларга қу́йиб ичишарди. Ҳар ичганда танлари яйраб, қийқириб ҳам қўйишарди. Чалоб тугагач, отам қўлидаги чинни косани ўчоқхона томонга қарата улоқтириди, коса чилчил синди. Биз бунга ўрганиб қолганмиз – отамнинг “раҳмати” шу. Отамнинг мақтаниб гапиришларидан шуни тушундимки, бозорга қайсиdir узоқроқ тоғли қишлоқдан келган бир содда чолнинг эчкиларини бу учовлон кўз остиларига олишибди. Сўраган нархла-рига чол сотмагач, булар зимдан ҳеч кимни шу эчкиларга харидор бўлишга қўйишмабди. Даллолларга шивирлаб қўйишган экан, улар эчкиларни ерга уриб пачакилашибди: “Сотмай қайтариб олиб кетсангиз, уйингизга етгунча ўлиб қолади”, – дейишибди. Бозор охирлаб қолганда бечора чол ноиложликдан эчкиларни буларга арzon-гаровга бериб кетишибди. Эчкиларнинг бир нечтасини отамнинг улфатлари олишибди. Анави эчки билан иккала улоғини отам етаклаб кела-верибди.

– Ҳаммасини бор-йўғи биттагина эчкининг пулига сотиб олдик, – деб отам қаҳ-қаҳ отиб куларди. – Савдо деганлари бундай бўпти-да. Ҳали кўрасанлар, мен катта савдо-сотиқларни бошлайман. Ана ўшанда ҳамма менинг соямга салом берадиган бўлади. Шопўлатнинг кимлигини билмай юрганларнинг кўзларини мошдай очиб қўяман.

Шу гапларни эшитиб, ҳалиги эчки сотган чолнинг уйига қай аҳволда кетганини тасавур қиласдим ва унга раҳмим келарди. Лекин улоқчаларга қарасам, қувониб кетавераман. Анча вақтлардан бери қўрамиз-

дан бирон жонлиқнинг маъраши эшитилмай қолган эди-да.

Отам чорпоя устидаги чалобдан бўшаган челакни тепиб юборди.

– Ол бу ердан манави итялоғингни, эй, – деб ба-қирди.

Онам қаттиқ чарчаганми ёки эски дарди шу тобда қўзғалиб қолдими, ўchoқхонага кириб, бошини маҳкам чанглаб, энтикиб нафас олаётган экан. Мен онамга қандай ёрдам беришни билмасдим. Дилобар холанинг уйига югурдим. Касалхонада ҳамшира бўлиб ишлагани учун, уйимизда ким бетоб бўлиб қолса, ўша аёлни чақириб келишга одатланганмиз.

Ҳамшира холанинг уйи олдига етганимда бўсағада бир лўли аёл билан қизалоғи турганини кўрдим. Назаримда, улар тиланчилик қилиб, эшик қоқишишган-у, ҳамшира холанинг бирон нарса олиб чиқиб беришини кутиб туришибди. Қизчанинг бўйнидаги оппоқ мунчоққа бехос кўзим тушди-ю, юрагим “жиз” этиб кетди. Бу қизни дарров танидим, зоғорадай юзию жингалак соchlари ҳамон ўша-ўша, ўзгармабди. Лўлилар ҳар йили ёзда бизнинг қишлоққа қабиласи билан келиб, қир этагида чодир тикишади. Одамлар то улар чодирларини йиғиштириб кетмагунча ҳовлиларини бир кун ҳам эгасиз қолдиришмайди, эшикма-эшик юрадиган бу тиланчиларнинг ўғрилик қилишларидан чўчишади. Улар ўтган йили ҳам ёз бўйи қишлоқ айланишган, бизнинг ҳовлимизга ҳам неча марталаб бош суқишишган эди. Охирги келганларида мен чорпоя устида ётиб, эски бир китобчани ўқиётган эдим. Она-бала қўлларидағи лўлитаёқни дўқиллатиб кириб келишди-да, рухсат ҳам сўрамасдан тўппа-тўғри чорпояга келиб ўтиришиди. Онаси ҳавонинг иссиқлигидан нолиган бўлди, бир коса сув сўради. Мен чопиб бориб, булоқдан бир челак

муздай сув олиб келдим. Икковлари чўлдан келган туя билан бўталоқдай роса маза қилиб чанқоқларини қондиришди. Онам нон ёпаётган эди. То нон тандирдан узилмагунча булар ҳам кетақолишмади. Онам уларга бир жуфт иссиқ нон бергач, қўланса ҳид анқиб турган иркит хуржунларига солиб кетишиди. Кечкурун мунчоғимни ахтариб қолдим ва ҳеч қаердан тополмадим. Шунда уни эрталаб чорпоя устига қўйганимни эсладим-у, унинг қаёққа ғойиб бўлганини энди пайқадим. Мен булоққа кетганимда лўли қиз мунчоғимни кўрган ва фурсатни бой бермай хуржунига жойлаган. Тамом, мен мунчоғимдан айрилдим. Бирорларга яхшилик қиласан-у, улар сенинг яхшилигинг эвазига чиройли нарсангни ўғирлашади. Мен аламимдан юм-юм йифладим, лекин онамга билдирамадим. Орадан анча кунлар ўтгандан кейин онам бўйнимда мунчоғим кўринмаётганигини сўраганда: “Қаердадир узилиб, тушиб қолибди, балки сойга тушган бўлса, оқиб кетганмикин” деб қўя қолдим. Энди эса мана бу мўндининг бўйнида кўриб, аччиғим келди. Лекин, бу меники эди, деб қандай айтаман? Орадан шунча вақт ўтиб кетган бўлса. Нафсилаамрини айтганда, энди бундай тақинчоқлар менга керак бўлармикан? Қанчалик товланмасин, у энди менга безак бўла оладими? Кошкийди зебигардонлар яккаю ягона истагимни бажо келтира олса. Шуларни ўйлаб, ичимдан тошиб келаётган ғазаб ва аламини босишга уринардим. Аммо... Барибир мунчоғимдан кўзимни узолмасдим, у лўли қизнинг қоп-қора бўйнида яна ҳам оқариб кетгандек кўринарди.

Дилобар хола бир-икки сўм қофоз пул билан бир ҳовуч қурут олиб чиқди. Уларни лўлига узата туриб, менинг нима ташвиш билан келганимни сўради. Мен онамнинг аҳволини айтдим. Ҳамшира хола шошилиб уйига кирди-да, дарров қопчиғини олиб чиқди. Тошлоқ

Йўлда шундай чаққон юриб кетяптики, мен югуриб ҳам етолмай, ортда қолаётган эдим. У ора-сира ортига ўгирилиб, бояги лўлиларга ҳам қараб-қараб қўярди. “Иссиқ кунда шу бечораларга ҳам қийин. Бола-чақаси кўп бўлади лўлиларнинг. Болаларим оч қолмасин, деб ти-ланчилик қилиб, эшикма-эшик юришади-да, шўрликлар” дея ачиниб жавраб борарди. Уларнинг бола-чақасидан ташқари данғиллама ҳовлилари, машиналари, ҳатто юриб турган савдолари ҳам борлигини мен анча йиллар ўтиб, шаҳарга келганимдан кейин эшитдим. Содда қишлоқ аёллари буни қаёқдан ҳам билсин.

Ҳамшира хола онамни қўлидан ушлаб, уйга олиб кирди. Қопчиғидан дори олиб ичкизди. Мен сочиқни намлаб манглайига қўйишга кўмаклашдим. Онам, бироз яхши бўлдим, деганидан кейин хола кетди. Отам билан шериклари эса алжирај-алжирај ухлаб қолишиган экан.

* * *

Мактабда ўқишлиар бошланганда мен янги рўмол ўраб бордим. Уни ҳам бўлса онам отамга бир неча кун ялиниб, зўрға олдирган эди. Онам мен учун доим жонсарак бўларди. Ўзи учун айтарли ҳеч нарса сўрамас, қайтага бетоб бўлганида ҳам отамга билдириналикка ҳаракат қиласарди. Онам эрталабдан қозонда сув иситиб, соchlаримни ювиб-тарашимга, мактабга киядиган формамни дазмоллаб олишимга ёрдамлашди. Формам оз-моз калтароқ бўлиб қолгандек кўринди кўзимга, демак, ёзда бўйим бироз ўсибди. Рўмолимни иягим остидан танғиб, чиройли қилиб ўраб олдим.

Кузнинг биринчи куни бўлишига қарамай, ҳаво ҳамон ёздагидек иссиқ эди. Биринчи қўнғироқ чалинишини кутиб, ҳамма тераклар соясида тўпланиб турар, кимдир рўмолчаси билан, кимдир қўлига дафтарини

олиб елпиниш билан овора. Санобар елпифич олиб келибди. Ҳамманинг нигоҳи унда. Янги форма кўйлак кийган, ёқасига оқ ҳарирдан қўшёқа қадабди. Сочини шундай чиройли турмаклабдики, бунақа турмаклаш унча-мунча моҳир сартарошнинг ҳам қўлидан кела-вермайди. Оёғида қишлоқ чангларини ҳайф кўрадиган оппоқ бежирим туфли. Юзу қўллари ҳам оппоққина, қишлоқ қизлариникига сира ҳам ўхшамайди: у ўқиши бошланишидан олдин бир-икки ҳафтага шаҳардаги қариндошлариникига бориб келганлигини мақтаниб айтиб бераётган эди. У қўлидаги жимжимадор елпифични шундай назокат билан елпимоқдаки, шу туришида европалик маликаларга ўхшаб кетарди. Ҳамма синфдошлар унинг атрофида гирдикапалак. Ахир, ҳар йили шундай, ёз бўйи деярли учрашмаганимиздан бир-биrimизни соғинамиз, мактабга ошиқамиз, ўқишининг биринчи кунлари завқу шавққа тўламиз. Бир неча кундан кейин эса яна мактабдаги кунларимиз оддий ҳолга айланади, таътилни кута бошлаймиз. Барча қизлар у билан юзларидан ўпид саломлашишиди. Мен бошқалар билан қўл бериб саломлашарканман, унга ҳам қўл узатдим. Санобар хушламайгина қўл тутиб, совуққина кўришиб кўя қолди. Унинг осмон қадар аъло кайфиятига фақат Назира опа деган муаллима соя ташлаб қўйди. “Муштдай қиз ўзингга бунча оро беришга уялмайсанми, сафга тур”, – деб жеркиб берди муаллима. Бу муаллима бутун мактабдаги қизларнинг юриш-туришини кўздан қочирмайди.

Директоримизнинг мўйлабини силай-силай сўзлаган бир-икки оғиз нутқидан кейин қўнғироқ чалинди. Ёзда нари-бери таъмирланган синфонамиздан бўёқ ҳиди анқиб турарди. Аввал ўғил болалар, кейин қиз болалар ёпирилиб синфга киришди. Охирги бўлиб синфга кирганимда ҳамма парталар эгаллаб бўлинган,

фақат орқа қатордаги партада бўш қолган экан. Секин бориб ўша жойга ўтирадим, бошқа иложим ҳам йўқ. Илгари доим олдинги қаторда ўтирадим. Бунинг учун ўқишининг биринчи кунида синфхонага югуриб кириб, жой эгаллаш керак. Ҳозир эса менда бундай иштиёқ йўқ, қайси жойда ўтириш мен учун аҳамиятсиз. Ҳаммадан орқада қолган Илёс деган энг бўшанг бола парталар оралаб жой ахтариб, охири менинг ёнимдаги бўш турган жойга келиб, истамайгина ўтириди. Нариги қатордаги болалар буни кўриб, пичинг қилиб кулишиди. Илёс эҳтимол ҳамма дарслардан бериладиган вазифаларни, машку мисолларни мендан кўчиришга умид қилган бўлса керак. Майли, хоҳлаганича кўчирсин, мен ундан қизғанмаганим бўлсин. Дарс бошлангунча ҳамма болалар чуғурлашиб бир-бирларидан таътилда нималар қилгани, қаерга борганини сўраб, жағлари тинмади. Фақат мен бу издиҳомга қўшилмай, ўз хаёлларим билан овуниб ўтирадим. Уларнинг мен билан ишлари йўқ, мен ҳам уларнинг ҳеч бир ҳаракатларига эътибор бермасликка аҳд қилган эдим. Шунда синдошларим билан орамиздаги масофа қанчалар узоқлашиб қолганини сезиб, кўнглим алланечук бўлиб кетди. Ўйлаб-ўйлаб, охири бир фикр миямга келди: улар мендан узоқлашсалар ҳам мен улардан узоқ кетмаслигим керак. Ўшандан кейин ўғил болалар жигимга тегса ҳам кўнглимга олмадим, кимки мендан бирон дарсни кўчирмоқчи бўлса, қизғанмадим. Йўқса, шу биргина қалтис ҳаракатим билан дўстлик дараҳтидаги омонатгина илиниб турган сўнгги япроқнинг “чирт” этиб узилиб тушишига ўзим сабабчи бўлиб қоламан. Кўчириб яхши баҳо олганлар раҳмат айтишса, мен ҳали уларга керак эканлигимдан ўзимча енгил тортардим.

– Қизим, аълочи эканлигингни биламан, лекин озодаликни ҳам унутма. Рўмолни тоза қилиб ўраб юр-

санг, ўрагин, бўлмаса ечиб қўй, – деб бир куни Назира муаллима йўлакда тўхтатиб, танбеҳ берди. Ер ёрилса, кириб кетгудек бўлдим. Янги рўмолимнинг гуллари оқлиги боис болалар иркит қўллари билан ғижимлаб тортганида тезда кир бўлиб қолаверади. Кунда-кунора уни ювишимга тўғри келади. Ўша куни кир бўлганини ҳали қўрмаган эканман, қаттиқ уялдим.

Кузги таътил кунлари зерикишга вақт қолмади. Эчки ва улоқларимни сойга олиб тушиб ўтлатаман. Кейин китобга мук тушиб, эртаклар дунёсига шўнғиб кетаман. Зумрад менинг ана шу дунёдаги сирдошим бўлиб қолган. У билан ўзимча бир балоларни гаплашаман, дардлашаман. Мен унга ўгай онаси буюрган оғир юмушларни бажаришда ёрдам бераман, у ҳам менга ўгай отамнинг ғазабини енгишда кўмаклашади. Шунинг учун бу китобни юз марталаб мутолаа қилганман. Миттивой Нилс ҳақидаги эртакни ўқиганимда мен ҳам кичкина одамга айланиб қолсаму, ёввойи қушлар билан узоқ-узоқларга учиб кетсам, деб орзу қиласдим.

Биронта қизиқроқ китоб оларман деб қишлоқ кутубхонамизга бордим. Кутубхона эшигига каттагина қулф осилган. Кутубхоначи хола ҳали келмаган бўлса керак, келгунича кутиб ўтираман, деб ўйладим. Девор ёнидаги харсангтош устига ўтириб, кута бошладим. Ҳавонинг авзойи бузуқ, ёқимсиз шамол эсиб, ҳамма-ёқни тўзғитаётган эди. Мен зерикиб кетсам ҳам кутиб ўтиравердим. Ёмғир томчилай бошлади ва у аста-секин кучая борди. Кутубхонанинг ёнгинасига почтахона жойлашган. Почтахона ичкарисида одамлар бор шекилли, синик деразасидан эркак кишининг тинмай йўталиб гапириши эштилади. Кейин бўёқлари адо бўлган эшиги ғичирлаб очилиб, ичкаридан шоп мўйлабли қориндор амаки чиқиб, сигарет тутатди. У мен

томонга қараб-қараб күйарди. Ёмғирда ивиб ўтирганинга ҳайрон бўлган бўлса керак. Сигаретини чекиб бўлгач, яна ичкарига кириб кетди. Нарироқдан оппоқ соқоли кўксига тушай деган бир чол ҳассасини дўқилатиб, тез-тез юриб келяпти. Бошидаги дўпписига елим халта қоплаб олган, эгнидаги чопони эса ҳўл бўлиб кетибди. Ҳойнаҳой, у ҳам почтахонага келаётган бўлса керак. Одатда чоллар у ерга серқатнов бўлишади, пенсияларини олишга келишади-да. Ўйлаганимдай бўлди, чол почтахона эшиги олдида тўхтади ва мен томонга кўзларини қисиб қаради.

– Эй, қизча, нима қилиб ўтирибсан у ерда, ёмғирда қолиб кетибсан-ку? – деди у. Шунда уни аввал ҳам кўрганимни эсладим. Кутубхоначи холанинг чоли бўлса керак, доим унинг ёнида чой ичиб ўтиарарди.

– Кутубхоначи холамни кутиб ўтирибман, – дедим салом бериб.

– Холанг келмайди, кутубхона ёпилган. Ана, кўрмаяпсанми, ҳаммаёғига мих қоқиб ташланган-ку.

Мен аҳамият бермаган эканман, кутубхонанинг деразаларига худди уруш кинолардаги эгасиз уйларга қоқилгандек тахта қоқиб ташлашибди.

– Нега ёпилади? – деб сўрайман ҳайрон бўлиб.

– Мен қаёқдан билай, катталар ёпилсин, дегандан кейин ёпилади-да. Китобларнинг ҳам ярайдиганларини териб-териб олишди, қолганини бир мошин қилиб, қоғозфурӯшларга бериб юборишиди.

– Қоғозфурӯшлар нима қиласи уларни?

– Нима қиласиди, истанокдан ўтказиб апилка қиласи (қиринди демоқчи), сўнг пресслаб, тухум соладиган қутими, ҳожатхона қоғозими чиқаради.

– Ҳожатхона қоғози? Шундай китобларни-я? – дейман ҳам ҳайрон бўлиб, ҳам аччиқланиб.

– Кутубхона энди йўқ, қизим, тез уйингга бор. Қара, уст-бошинг шалаббо бўлибди. Касал бўлиб қол-

санг, додингни худога айтасан. Ҳозир битта дори бир арава китобдан құммат. Тез уйингга жұна, – деди чол ўзи ҳам елкасидан нам ўтганидан қалтираб. – Эй, падарингга қусурлар, мана битта бўлсаям ўқийдиган одам бор-ку, улар бўлса... – чол яна нималардир дея минғирлаб, норози тусда бошини ирғаб, почтахонага кириб кетди.

Мен тарвузим қўлтиғимдан тушиб, уйга қайтдим. Аксига олгандай ёмғир ҳам роса савалади. Кийимларим ҳўл бўлиб, баданимдан совуқ ўтиб кетди. Лекин менинг хаёлимда фақат ҳалиги китоблар. Улар қандай яхши эди-я, сарғайиб кетган бўлса ҳам кўзни қувнатарди. Ҳидини айтмайсизми, кутубхонага киришим билан энг аввал китобларнинг ҳидидан маза қиласадим. Кейин ўзимга ёққан учта китобни танлаб олиб кетардим. Кутубхоначи хола учтадан ортиқ китобни уйга бериб юбормас эди-да. Энди шу ҳам йўқ. Бечора китоблар, наҳотки энди улар ростдан ҳам қоғозга айланиб кетса?

Яхшиям, уйимиизда анча-мунча китоблар бор. Уларни онам олиб келган. Бир куни отам кесатиб қулган эди – сепига ҳам китоб йиққан бу Афлотун, деб. Китобларнинг кўпи катталар учун бўлса ҳам, энди уларни бирма-бир ўқишга киришдим. Менга шундай ширин орзуларни, чек-чегарасиз хаёлот дунёсини ҳадя этган китоблардан умрим поёнига қадар миннатдорман.

Қишки таътил ҳам ҳархолда мароқли ўтади. Қорқалин ёққан кунлари қишлоғимиздаги болаларга энг яхши эрмак топилади. Қирга чиқиб, қизу ўғил аралашиб, яхмалак учишади. Чанаси борларга-ку, ҳаммадан маза. Мен девор оша қирга қарайман, болаларнинг музда тойишлари, қорбўрон ўйнашлари узокдан бўлса ҳам яхши қўринади, қийқиришлари ҳам эшитилиб туради. Мен у ёққа бормайман, ўзи биттагина этигим бор,

унинг ҳам бўлса таги емирилиб, ичига сув кирадиган бўлиб қолибди. Оёғим жикқа ҳўл бўлиб кетса ҳам, онамга билдирамайман. Мактабдан келибоқ секин ечаман-да, печка ёнига қўйиб қўяман, эрталабгача қурийди. Лекин мен ҳам ўзимга ҳовлимиз этагидаги қиялиқдан кичкина яхмалакча қуриб олганман. Унда калиш билан учса бўлади. Оёғим музласа, дарров уйга кириб, печкага суюниб, исиниб оламан. Ичи қорга тўлиб, ҳўл бўлиб қолган калишимни ҳам оз-моз қуритаман. Оёғим исигач, бориб эчкиларимдан хабар оламан. Улоқчаларим яна иккита га қўпайди. Уларга кафтимда емиш беришни яхши кўраман. Кейин айвондан болтани олиб, ўтин ёришга киришаман. Катта ғўлаларга кучим етмайди, кичикроқларини олиб ёраман. Болта ўтмас бўлиб қолган, ўзим-ку, майли, ғўлани ҳам қийнаб юбораман.

Пага-паға қор ёғишини жуда яхши кўраман. Айниқса, капалак қор ёғаётганида осмонга қараб туриб, қормомо парёстиғини силкитаётганлигини кўз олдимга келтириб завқланаман. Ҳаммаёқ гурпак қор бўлса қандай яхши. Қорбобо ясашни ўрганиб олганимдан қувончим ичимга сиғмайди. Қорни коптоқдек думалоқлаб, учта бўлак ясайман. Бўлакларни устма-уст жойлашибираман. Белкурак билан у ёқ-бу ёғини қиртишлаб, бурнию қош-кўзларини чизаман. Бошига челягимни кийгизсам, қаршимда эртаклардагидек қорбобо пайдо бўлади. Эртакдаги қорбобо янги йил кечаси болаларга совға ташлаб кетиши тасаввуримда қолган. Аммо менинг қорбобом совға олиб келмайди. Шундай бўлса ҳам уни яхши кўраман, унинг борлиги яхши.

Янги йилни онам икковимиз кутиб оламиз. Онам ғарибгина байрам дастурхонимизни бир нималар билан безамоқчи бўлади, мени ҳам, ўзини ҳам хурсанд қилгиси келади. Шу кунга атаб нималарни тежаб, йиғиб юрган бўлса, ҳаммасини дастурхонга қўяди.

Уч кишига етарли қилиб палов ҳам дамлайди. Бироқ отам янги йилни ҳар доим қаердадир ўртоқлари билан кутиб олади. Биз билан бир оила бўлиб байрам қилишнинг отамга ҳечам қизифи йўқ эди. Онам икковимиз телевизор кўриб, янги йил киришини кутиб ўтирамиз. Телевизоримиз ҳам пирпирайвериб, гоҳ кўрсатиб, гоҳ кўрсатмай хуноб қиласди. Мени уйқу элтаверади, гоҳ-гоҳ ўтирган жойимда мункиб кетаман. Онам шивирлаб, янги йилдан кўп яхшиликлар, шодликлар олиб келишини тилаб ўтиради. Лекин, афсуски, йиллар келиб-кетаверади-ю, онам сўраган шодликлардан ҳеч дарак бўлавермайди.

Телевизордаги соат қоқ ярим тунда бонг урганда дам-бадам юмилиб кетаётган кўзим очилади. “Хайрият” дейман, чуқур нафас олиб. Бу бонг эски йилнинг иззати битиб, янги йил кириб келганлигини билдиради. Энди бемалол ухласак ҳам бўлади, деб ўйлайман уйқуни соғиниб. Мен ёстиққа бошимни қўйиб, бамайлихотир кўзимни юмаман. Бир ухлаб уйғонганимда онам ҳали ҳам ухламаган бўлади. Шунда англайманки, онам аслида янги йилни эмас, отамни кутиб ўтирган экан. Отам эса тонготарга яқин йиқила-сурина кириб келади. Ҳаммаёқни ароқнинг қўланса ҳиди тутиб кетади. Онам отамнинг этигини, пайпоқларини ечиб, уни жойига ётқизади. Отам шу қўйи то кун ёришиб, қуёш тиккага келгунча уйғонмайди. Онам ҳам сахар чоғи оз-моз кўз илинтириб олади. Отам чошгоҳда бошини чанглаб ўрнидан туради, кейин гандиракланча яна ўша улфатларининг ёнига кетади.

Баҳорнинг илиқ кунлари бошланиши билан мен яна сойга ошиқаман. Сойнинг суви кўпайиб, муз қотган кўлмакчалар ҳам аста-секин эриётган эди. Кейин ёмғирлар мавсуми бошланади. Бу пайтда ҳадеб сойга тушаверишга юрагим бетламайди, кутилмаганда сел

келиб қолишидан чўчийман. Чунки бир гал сал бўлмаса селда оқиб кетай деган эдим. Ўриклар айни қийғос гуллаганда сой бўйида ялпизлар ҳам бодроқдай по-тирлаб чиқади. Мен этагимга ялпиз териб, ёлғиз ўзим сойда юрганимни бутунлай унугиб қўйган эканман. Кимдир бехосдан: “Сел келаяпти, сел!” деб қичқирди. Атрофда ҳеч ким йўқ эди, ким қичқирганини ҳам англаёлмадим. Шундоққина нарида қутурган сел ваҳима солиб келаётганини кўрдим. Менга етиб олишига атиги бир неча қадам қолган эди, қушдай учиб, юқорига чиқдим, ҳартугул, улгуриб қолдим. Сел сойни қиртишлаб кетади. Мен термоқчи бўлган ялпизлар селдан сўнг ғойиб бўлади. Булоқчам кўмилиб кетади. Кетмомнимни олиб чиқиб, булоқнинг кўзини очаман. У аввал лойқаланиб туради, бироздан сўнг эса тип-тиниқ сувга тўлади. Унинг митти-митти кўзларидан сув қайнаб отилади, ялтироқ қум зарраларини рақсга туширади. Эртаси қуни ялпизлар, мана бўлмаса, дегандек кечагидан ҳам кўпроқ бўлиб чиқади. Мен сойга кичкина челакчамни олиб тушаман ва у тўлгунча ялпиз тераман.

Худди ана шу пайтда ёмғирдан сўнг кўпчиган ерларда япалоқ-япалоқ бўлиб исмалоқлар ҳам кўрина бошлайди. Қир ортидаги илгари буғдойзор бўлган ерларда исмалоқ жуда кўп бўлади. Аввалги йиллари кўшни қизлар билан у ерга кўп марта борганимиз. Кўчага чиқсан, бир тўда қизлар халталарини елкаларига ташлаб ўша томонга кетишаётганини кўрдим. Мен ҳам дарров ўчоқхонага кириб, халтачамни олдим-да, онамга айтиб, кўчага югуриб чиқдим. Қизлар анча узоқлаб кетишган экан. Шундай бўлса ҳам уларни қора қилиб, изларидан қолмай чопиб кетавердим. Вой-бў, бунча чаққон юришмаса, қанча чопсан ҳам етолмаяпман. Ҳадемай улар қирдан ошиб, кўринмай кетишди.

Қирга чиқаётганимда нафасим тиқилиб қолай деди. Ана, қызлар кенг майдонда ёйилиб, исмалоқ теришни бошлаб юборишибди. Қызларнинг қизиқ одати бор: ҳар бири тўп этиб бир жойга ўтириб олади-да, атро-фидаги тўрт-беш қадамча жойни ўзиники қилиб белгилаб қўяди, шу доирадан бошқа ҳеч кимнинг исмалоқ теришига қўймайди. Шунинг учун улар бу ерга келган заҳоти ёйилиб кетишади.

- Марка, сен ҳам келдингми? - дейишди мени кўриб қызлар.

Мен уларнинг ёнидан ўтиб, сал узокроқдаги исмалоқлар тиғиз ўсган жойни танладим. Қызларнинг гаплари, бепоён далада яйраб қийқиришлари қулоғимга чалинар, менинг эса бутун диққатим исмалоқларда эди. Бироздан сўнг улар бошқа жойга кўчиб, овозлари деярли эшитилмай қолди. Халтачам яримлай деганда, кутилмаганда бошқа қандайдир ғалати овозларни эшитиб сергак тортдим. Мен дала чеккасидаги сел ўзанига яқин келиб қолган эканман. Ўзан анчагина чуқур, унинг нариги томонида қушлар галаси бамайлихотир ўтларни чўқиб, озиқланиб юришарди. Мен аввалига уларни лайлаклар деб ўйлабман, кейин тусмоллаб билсан, турналар экан. Турналар ҳар гал осмондан тизилишиб учиб ўтганда онам уларнинг қув-қувлаган товушларини эшитиб, оёқяланг ҳовлига югуриб чиқарди. Мен ҳам чопиб чиқардим. Онам қаёқларгадир йўл олган турналарни то кўринмай кетгунча кузатиб турарди, бир нималарни пичирлаб, кафтларини юзига тортарди. Мен ҳам ҳеч нарсага тушунмасам-да, онамнинг ҳаракатларини такрорлардим. Ҳар ҳолда, онам турналарни кўриб хурсанд бўларди. Лекин мен шу пайтгача уларни бунчалик яқиндан кўрмаган эдим. Ҳозир эса шундоққина рўпарамда турганидан, мендан заррача ҳам ҳайиқишишмаётганидан ҳаяжоним ичимга

сифмасди. Қанийди ўзаннинг нариги қирғоғига ўтиб олиб қанотларини силасам, бирга ўйнасан, уларга қўшилиб узоқ-узоқларга учсан, онамни ҳам олиб кетсан, деб орзу қиласдим. Назаримда улардай баҳтли, улардай эркин ва иноқ жонивор йўқдай эди.

Мен ўзан қирғоғида уларни анча вақтгача томоша қилиб ўтирдим. Бир пайт нимадир кетма-кет қаттиқ пақиллади-ю, юрагим така-пука бўлиб кетди. Момақалдироқ гумбурладимикан, деб ўйладим, лекин осмонда сийрак булутлар сузиб юради. Кўрқиб кетган турналар ҳам қанотларини қаттиқ қоқиб, бирвакайига осмонга парвоз қилишди. Шундан сўнг, нарироқдаги бир чуқурликдан қамиш қалпоқ кийган, белидаги камарига ўқлар қадаб олган, узун милтиқ ушлаган одам чиқди. У овчи бўлса керак, учеб кетаётган қушларга қаратса яна бир-икки марта ўқ отди. Сўнг ерда ўлиб ётган иккита турнани тепиб кўрди-да, оёқларини бир-бирига жуфтлаб боғлади. Биттасининг ҳали жони бор экан, типирчилаб овоз чиқаради. Овчи уларни ерга ташлаб, тепасида туриб, мамнун жилмайди. “Яна бир-иккитасини отганимда эди” дегандек осмонда учеб, тобора узоқлашиб кетаётган турналар галаси орқасидан қараб қолди. Кейин пичофини қинидан чиқариб, нималардир қилди. Ҳалиги типирчилаётган турна ҳам тинчиб қолди. Овчи турналарни оёқларидан маҳкам ушлаб, бошларини ерга теккизганча судраб кета бошлади. Ям-яшил майсалар устида узун чизик бўлиб қон изи қолаётган эди. Овчи менга кўзи тушган заҳоти таққа тўхтади. Мен бундай ёвуз манзарани кўриб, даҳшатдан тошдай қотиб қолган эдим. Кўрқувдан дир-дир титрардим, оёқ-қўлимда мадор қолмаган эди. Ҳозир анави қонхўр одам турналарга қўшиб, мени ҳам отиб ташлайдигандек туюларди. Нажот ахтаргандек атрофга алангладим, қизлар ҳам

исмалоқларини териб бўлиб уйларига қайтишаётган экан. Мен уларни чақирдим. Ё овозим чиқмади ёки улар эшитишмади. Қизлар анча узоқлашиб қолишиган экан, кейин қирдан ошиб, кўздан ғойиб бўлишди. Мени баттар ваҳима босди. Ўрнимдан туриб қочай десам, оёқларим ишламаётганга ўхшарди. Кимсасиз далада овчининг қаршисида қанотлари синиб, иложсиз қолган қушдай мўлтираб ўтирадим.

– Ўв, қиз, нима қилиб юрибсан бу ерларда? – деди овчи овози бесўнақай дўриллаб. Мен жавоб бера олмадим. – Нега йиғлаляпсан? Ё адашиб қолдингми? – Мен, йўқ, дегандек бошимни қимиранлатдим. – Кимнинг қизисан? – Жавоб қайтаришга тилим айланмасди. Мен қонга беланган турналарга ачиниб йиғлаётган эдим. – Ёлғиз ўзинг нима қилиб юрибсан бу ерда? Қани, тез уйингга жўнаб қол-чи.

Мен гўё тутқунликдан кутулган ўлжадай оёғимни қўлимга олиб чопдим. Уйга қандай етиб келганимни эслаёлмайман. Онам ранг-рўйимни кўриб, қўрқиб кетди. Юзимга сув сепиб, кейин бир пиёла сувни мажбурлаб ичкизди. Онам нима содир бўлганини қайта-қайта сўрарди. Мен: “Турналар ўлди, турналар ўлди” деб тинмай такрорлардим. Бироздан сўнг онам Дилобар холани чақириб келди. Ҳамшира хола оёқ-қўлларимни уқалади. Нимадир ичкизди. Икки кун ўзимга келолмадим. Кечалари алаҳсирайдиган, чўчиб уйғонадиган бўлиб қолдим, лабларимга учук тошди. Онам бир куни қўшни қишлоқдаги қушноч кампирнинг уйига олиб борди. Кампир олдимга бир коса сув кўйиб, алланималарни ўқиди, хивчин билан елкаларимга савалади, анча енгил тортгандай бўлдим. Ўша баҳор исмалоқ териш учун қир ортига бошқа бормадим.

Мен сабрсизлик билан ёзни кута бошладим. Гўё ёзги таътил бошланиши билан яна Анор келадигандай

хурсанд эдим. Ҳа, у тўғри бизникига келади, мени чақиради. Ўғил болалар билан ўйнамайди, ҳовузга чўмилишга ҳам бормайди. У билан яна сойдан итбалиқлар ушлаб ўйнаймиз. Яна ўригу гилосларимиз пишади, унга энг сараларини териб бераман. Энди эчки-улоқларимиз ҳам бор. Анор билан уларни сойга олиб тушиб ўтлатамиз...

Ана шундай ширин хаёллар билан ёз келишини орзиқиб кутардим. Аммо ёз келиб, поёнига етса ҳамки Анор келмади. Мен ҳар куни қайта-қайта сойга тушиб уни кутардим. Бир ўзим итбалиқлар тутиб ўйнадим. Сув кечиб юриб, бир неча марта Мели бобонинг уйи тарафга ҳам бориб келдим. Ҳовлисига мўраладим. Лекин ўша ҳовлида яшаётган бирор кишидан: “Анор қачон келади?” деб сўрай олмадим. Уни қанчалик интизорлик билан кутаётган бўлмай, барибир, бирордан сўрашга журъатим етмади, уялдим. Демак, Мели бобо билан Анорнинг онаси ўшанда келиша олишмаган. Бобонинг тош қотган юраги озгина ҳам эримаган-у, Башорат хола умидини бутунлай узиб кетган. Мен шундай хulosага келдим ва Анор бундан кейинги ёзги таътилларда ҳам келмагач, бу хulosам тўғри эканлигига тобора ишончим ортиб борди.

Шундай бўлса ҳам мен ҳар ёз уни кутишни канда қилмасдим. Бу фақатгина ўзимга аён, бошқа ҳеч ким билмайди, билолмайди ҳам. Мабодо у келиб қолгудек бўлса ҳам мен учун ростакам мўъжиза юз бергандай бўларди. Мен у берган китобни қўлимдан қўймайман. Ҳар куни юз мартараб ундаги дуоларни ўқийман. Бу дуоларнинг бирон-бир янгилик яратиб қўйишидан энди умидвор бўлмасам ҳам, шу китобни қўлимга олганда Анорни кўргандай, гўё у билан ёнма-ён ўйнаётгандай ҳис этардим. Менинг ҳам дўстим бор ва у ҳозир дунёнинг қайси манзил-маконида бўлса ҳам соғ-сало-

мат юрганига имоним комил, дея ўзимга таскин бераман. У ҳамма болалардан яхши. У мени бирон марта хафа қилмаган, хафа қилмайди ҳам ва ҳеч қачон мени эсидан чиқариб юбормайди. Бу ёз келмаган бўлса, кейинги ёзда албатта келади. Юрагим сезиб турибди, у билан албатта яна кўришамиз. Мен ўқиган китобларимнинг энг қизиқ жойларини унга сўзлаб бераман. У совға қилган китобдаги дуоларнинг ҳаммасини ёддан айтиб бера оламан. Анор хаёлимда: “Китобчани ўқи, тўхтама, ўқийвер, юз марта ўқисанг, ҳар қандай истагингга етишасан” деб тинмай уқтираётгандек овози қулоғим остида доим жаранглаб турарди ва бу яна менинг умидларимни янгиларди. Мен эса уни эслаб ёзларни ёзларга улайвердим. Лекин, афсус, болалик манзилидан қун сайин узоқлашиб бормоқда эдим.

* * *

Ўн биринчи синфга ўтганимизда анчагина улғайиб қолганимизни сездим. Менинг рўмолимдан тортиб ғашимга тегадиган болалар ажабтовур қуиилиб қолишган, ҳаммамизнинг бўйларимиз чўзилган, болаларнинг гапларига ҳам маза-матра киргандек эди. Муаллимларимиз ҳам аввалгидек танбеҳ бераверишмайди. Бу бизнинг сўнгги ўқув йилимиз, яна тўққиз ой киприк қоққунча ўтиб кетади. Синфдошларим ҳадемай қанот чиқарган қушлардай ҳар томонга учеб кетишинди-ю, шундан сўнг такдир яна қачон йўлларимизни туташтиради – буниси фақат Яратганга аён.

Қизларнинг сумкалари дафтар-китоблардан ҳам кўра турли пардоз бўёқларию ширинликлар билан тўлалигини кўриб, кулгим келади. Танафусга қўнғироқ чалинди дегунча қизлар йўлақдаги ойна атрофига жамланишади. Бир-бирларига гал бермай, ойнага қараб, соchlарини қайта- қайта тарашади, юзларига яши-

ринча упа суртиб, ўзларига оро беришади. Уларнинг бундай бебошликларига бошқа муаллимлар парво қилишмаса ҳам, Назира муаллиманинг кўзи тушгудек бўлса роса коййди:

– Ҳа, ер ютсин сен қурғурларни. Келинчак бўлгилалинг келиб қолдими? Мактабда пардоз қилишни ким кўйибди. Қани, биттанг бўёқ чаплаб кўр-чи, лабларингни қайчилаб ташлайман. Эрга текканларингдан кейин қош-кўзларингни бўясанглар ярашади. Мактаб сенларга ўзларингни бозорга соладиган жой эмас.

Қизлар муаллиманинг овози эшистилган заҳоти тумтарақай қочиб қолишарди. Мен эса ойна билан ошно эмасман. Танафусларда ҳам, мактабдан қайта-ётганимизда ҳам ойнани четлаб ўтаман. Ундан кўра, дарсларимиз тугаганида Барно муаллиманинг хонасига кириб чиқиши мен учун мароқли. Барно муаллима инглиз тили ўқитувчимиз, бошқа тилларни ҳам яхши билади. Менга ҳам эринмасдан ўргатди. Ҳар куни ярим соатча бирга ўтириб гоҳ инглиз тилида, гоҳ рус ёки немис тилида суҳбатлашиб оламиз. Бу суҳбатлардан икковимиз ҳам завқ оламиз.

– Мени қойил қолдиряпсан, Марям, сен мендан ҳам ўзиб кетяпсан, – деб шодлигини яширмасди муаллима.

Кейин менга турли тиллардаги бир-биридан чиройли шеърий китобларни берарди. Мен шеърларни ёд олиб, эртасига Барно муаллимага айтиб беришга ошиқардим. Биз суҳбатларимизни тугатгимиз келмасди. Аммо уйга ҳам шошилмасам бўлмайди. Онам кундан-кунга ҳолсизланиб борар, юзи сўлғин бўлиб, озиб-тўзиб кетган эди. Овқат қилиш, кир ювиш, ҳатто нон ёпишни ҳам онамдан олиб қўйдим. Бу юмушларнинг ҳаммасини энди ўзим қила оламан. Онамга ширин овқатлар тайёрлаб бергим келади. Лекин “янгамнинг таоми акамнинг масаллиғига боғлиқ” деганлари

рост экан. Мазали овқатлар пиширай дейман-у, бироқ керакли масаллиқлар бўлмагач, овқатим кўпинча оддийгина ёвғон бўлиб қолади. Якшанба кунлари қозонда сув қайнатиб, кир юваман. Бир тандир нон ёпсак тежаб-тергаб, бир ҳафтага етказамиз. “Сиз уринманг, ая, ҳамма иш ўзимнинг қўлимдан келади” дейман. Онам ҳам мамнун бўлади, ҳам менга ачинади, буни кўзларидан сезаман. Лекин барибир онам дам олмайди. Ҳали кашта тикади, ҳали қизларга кўйлак бичиб-тиқади – бир зум тинч ўтирумайди. Тирикчилигимиз шу ишлар орқасидан бўлганидан кейин бошқа иложи ҳам йўқ аслида. Эчки-улокларимиз кўпайиб қолганидан кейин рўзғоримизга оз-моз барака кириб қолган эди. Отам уларнинг бир нечтасини Соли амакига қарзлари ҳисобига берди, қолганини бозорга олиб чиқиб сотиб юборди. У нихоят ўзи кўпдан бери айтиб юрган “катта савдони” бошлишга бел боғлади.

– Ўзимизнинг бозорда майда-чуйда тирикчилик қилиб юриш жонга тегди, – деди отам бир куни одатдагидан бошқачароқ қатъият билан. – Бунаقا хашаки савдо билан бир амаллаб қунинг ўтади, холос. Лекин ёлчитиб бир-икки сўм орттиrolмайсан. Чет элга чиқиб, савдо-сотиқ қилиб келганлар ютапти. Менинг улардан қаерим кам, а? Ҳозир замон шунаقا – пулинг бор бўлса одамсан, пулинг йўқми, тўрт оёқли, қўш туёқли, ақл-фаросати йўқ молдан нима фарқинг бор. Менинг ҳам қўлимдан келади. Эртагаёқ қарз олиб, катта ишга пул тикаман, тамом. Қарабсанки, бир-икки йилдан сўнг ҳали чўнтагидаги чойчақанинг дамига босар-тусарини билмай юрган тирранчалар эгилиб салом берадиган бўлади.

Отам айтганини қилди. Ўртоқлари билан кечқурунлари бизнинг уйимизда тўпланишиб, қаерга боришу нима сотиб келишни бир ҳафтача режалаштириб

чиқишиди. Аҳён-аҳёнда уларнинг гаплари қулоғимга чалинганда шуни англадимки, бир нечта қишлоқлардаги дәхқонлардан узум сотиб олиб, бошқа юртларга бориб сотиб келишмоқчи.

– Йўл узоқ, азоби ҳам бор-у, аммо фойдаси ҳам шунга яраша-да, – дейишарди шериклари отамни дам-бадам қизиқтириб.

Отам шу ишга қаттиқ киришиди. Онам хавотирга тушар, лекин отамни шаштидан қайтара олмаслиги ни билиб, бирор сўз деёлмасди. Узумлар ғарқ пишган пайтда отам ҳафталаб уйга келмайдиган бўлди. Биз унинг қайсиdir қишлоқларда шериклари билан узум ийифиб юрганлигини ўзимизча билардик.

– Ишқилиб, Худойим паноҳида асрасин. Шу ташвишларнинг кераги бормиди ўзи? Ейишга нонимиз, яшашга уйимиз бор. Шу ернинг ўзида ҳам қимиirlаган жонга ризқ топилади-ку, – дея ўзига-ўзи гапираётган-дек жаврарди онам.

Ниҳоят, бир куни отам иссиқ кийимларини эски жомадонга жойлади. Саҳарлаб онамга овқат пиширтириб, бир косасини еб, қолганини ўзи билан олиб, тонг ҳам ҳадеганда отавермайдиган, қовжираган ўт-ўланлар устига муздай шудринг ташлаган салқин куз кунида биз билан совуққина хайрлашиб, узоқ сафарга кетди. Эрталаб уйғонганимда ҳам, кечқурунлари ҳам онамни жойнамоз устида отамнинг ҳаққига дуо қилиб ўтирганлигини кўраман. Мен эса негадир отамни ҳеч соғинмайман. Шу ерда юрганида нима эди-ю, узоққа кетганида нима ўзгарди? Қайтага унинг ҳозир уйда йўқлигидан қандайдир енгиллик туйгандек бўляпман. Тошбағир бўлиб қолдиммикан, деб ўйга толаман. Лекин аввал ҳам бирон марта отамни соғинганимни ёки унга кўнглимда заррача илиқлик бўлганини эслай олмадим.

– Нега фақат отамнинг жони соғ бўлишини тилай-сиз, ўзингизни ҳам ййласангиз бўлмайдими, ая? – дедим бир куни онамга.

Онам менга хомуш қараб қўйди. Кейин бир нарсаларни тушунтироқчи бўлиб, елкамдан қучди. Нима десам экан, дегандек бир дам каловланади.

– Ҳар бир уйда эркакнинг, у қандай феъл-атворли одам бўлса ҳам, ўз ўрни бўлади, – деди кейин лўнда қилиб.

Мен шунда ҳам отамни соғинолмадим. Соғинган одамнинг қўли ишга бормайди, еганида ҳузур, уйқусида ҳаловат бўлмайди. Мен эса гоҳ чошгоҳ маҳали, гоҳ ярим тунда кўча эшикнинг тепиб очилиши, бесуроб сўкинишлар, идишларнинг синиши каби юракни зада қилгувчи шовқин-суронлар тиниб қолганидан кечалари хотиржам ухлайдиган, тиниқиб ором оладиган бўлганимдан мамнун эдим. Онамнинг бўлса ҳар доимги қуш уйқуси ўзгармади.

Рўзғорга керакли нарсаларни харид қилиш учун онам бозорга чиқмоқчи бўлиб, тонг аzonда шайланаётган экан.

– Сиз овора бўлманг, ая, ўзим бориб келаман, – дедим қўлидаги бозор халталарни олиб.

Ҳали ҳеч бозор-ўчар қилиб кўрмаганим учун онам нимани қанча миқдорда олишни, қандай савдолашибни обдон тушунтириди. Мен уяла-уяла бозорга йўл олдим, чунки бозорга фақат эркаклар чиқади, деган тасаввурда эдим. Кичкиналигимда, биз бу қишлоқقا эндиғина кўчиб келган пайтларимизда, бир марта отам мени етаклаб бозорга олиб борган, хўротқанд, бодроқлар олиб берган эди. Отам мени хурсанд қилиш учун бозорни айлантириди, энди ҳар якшанба олиб чиқиб, хўротқандлар олиб беради, деб ўйлаганман. Аммо кейинчалик фаҳмласам, ўшанда отам уни ташлаб кетиб қолган хотинининг ўрнига шаҳарлик ёш жувонга уйлангани, эгизак қизларининг ўрнини

босадиган чиройли қизчаси ҳам борлигини одамларга маълум қилиб қўйиш учун мени етаклаб борган экан. Отамнинг бозор айланиб юриб, одамларга айтган гаплари элас-элас қулоғимда қолган. Ўшанда ҳақиқатан ҳам бозорда фақат эркаклар юришган эди. Онда-сонда супургими, нимадир сотиб олаётган бир-иккита кекса аёлларга кўзим тушганлигини эслайман. Шуларни ўйлаб, минг бир хижолатликда бозорнинг ланг очиқ дарвозасидан аста ичкарига қадам қўйдим. Илгариги кўрган манзарамнинг бутунлай тескарисини кўриб, бир зум шошиб қолдим. Тумонат хотин-халаж, қиз-жу-вонларнинг орасида эркаклар камроқ кўзга ташланарди. Мен таниган қўшни хотинлар, ҳамшира хола ҳам, синфдош қизлар ҳам шу ерда. Бирор кўйлаклик матони бор бўйига ташлаб кўряпти, бошқаси янги камзул харид қиляпти. Салдан кейин мен ҳам шу издиҳомга кўшилиб кетдим. Шу чоққача бунча оломоннинг орасига тушиб кўрмаганим учунми, дарров бошим айланди. Кийим-кечаклар растасидаги одамлар орасидан туртиниб-суртиниб, дехқонлар растасига ўтдим. Дехқонлар овозларини баралла қўйиб, харидорларни чақиришарди. Мен ким билан қандай савдолашишни ўйлаб, анча айланиб юрдим. Бозорни кезиб-кезиб, то-пиб келган нарсаларимни кўрган онам кулгидан ўзини зўрға тийди. Хуллас, менинг биринчи бозорим бозорга ўхшамади. “Барibir бозор-ўчар қилиш эркакларнинг иши-да, эркак киши бозор қилса, барака бўлади” деган гапни онам айтмади. Бироқ шу гапни ичида айтиётганини юзидаги нимкулгидан бир лаҳзада англаб олдим.

Душанба куни мактабдан келсан, онам тараддуланиб турган экан. Эшиқдан киришим билан:

– Тез кийимларингни алмаштири, токзорга борамиз, – деди.

- Токзорда нима қиласиз?
- Токларни кесишаётган экан, ёрдамчилар керак, дейишди.

Тушлик ҳам қилмасдан, бир парча нонни халтага солдим-да, онам билан йўлга тушдик. Қишлоқ чеккасида давлатга тегишли хўжаликнинг токзори бор. Узуми териб олинган токларнинг ортиқча узун шохларини кесиб, токларни кўмишади. Токлар баҳоргача тупроқ остида дам олади. Биз ҳар йили ана шу мавсумда онам иккаламиз ток кесувчиларга ёрдамлашамиз. Токпояларни бир қулочдан қилиб кесиб, сўнг боғлаймиз. Токзор хўжайнини ҳар битта боғни санаб олади. Кейин ҳар ўн боғига бир боғ токпоя бериб, меҳнатимизни ҳисоб-китоб қиласиди. Биз шу тариқа қишига ўтин ғамлаб оламиз. Бу сафар ҳам икки ҳафтача токзорда ишладик. Онам кун бўйи ўша ерда. Кафтча нон билан елим идишга солинган бир чойнак чойни олиб кетиб, тушликни ҳам ўша ерда қиласиди. Мен дарсдан кейин бориб, кўмаклашиб турдим. Она-бала ҳар куни қоронғи тушгунча токпояларни кесиб боғладик. Кун охирида ўзимизга берилган “иш ҳақимизни” токзорнинг бир чеккасига тахлаб қўявердик. Ҳали ҳамма ишлар тугаганидан сўнг, қўшнилардан арава сўраб, уларни ташиб олишимиз керак. Кафтларимиз шилиниб, белларимиз сингудек оғриса ҳам бир-биrimизга билдиrmай ишладик. Оқшом чоғи зўрга оёқ судраб, уйга келганимизда бирон егулик тайёрлашга ҳам ҳолимиз қолмаган эди. Аксига олиб чироқ ҳам ўчиб қолган экан. Зимистонда пайпаслаб гугурт билан шамни топиб, хира ёруғда ёрилиб кетган қўлларимизни ювдик. Бармоқларим чунонам ачишяптики, чидаш қийин, кўзларимдан ёш чиқиб кетяпти. Лекин унимни чиқармайман. Мен чой қайнатиш учун ўчоққа ўт қаладим. Лекин чой қайнагунча онам болишга суюниб, ухлаб қолибди. Устига секин-

гина кўрпани тортиб қўйдим, ўзим эса мураббо суртилган нонни кавшаганча шам ёруғида дарсларимни тайёрлашга ўтирдим. Кўзларим юмилиб кетяпти. Уйқу шундай хумор қиляптики, кўзимга фақат ёстиқ кўриняпти. Кўпинча дарс тайёрлаб ўтирганида уйқусираф, мункиб кетаверсам, онам ёнимга келарди-да, нималарни ўқиётганимни сўраб, уйқумни очиб юборарди. Бир куни онам дарслик китобларимни варақлаб қолди.

– Нималарни ўқияпсан ўзи? – деб онам адабиёт китобимга кўз югуртирди. – Вой-бў, мана бу шеърни ўқиш бунча қийин бўлмаса. Бу шеърми ёки бошқотирмами? На шеърга, на гапга ўхшайди. Бизнинг давримизда шеър деганлари шундай самимий ёзилардики, ҳатто бир ўқищаёқ ёдда қолар эди. Вазн, қофия деган шеърни шеър қиласидиган нарсалари бўларди. Уни мазмунни, оҳангига қараб ифодали ўқиш шарт эди. Мана, қара:

*Водийларни яёв кезганда
Бир ажисб ҳис бор эди манда.
Чаппар уриб гуллаган боғин,
Ўпар эдим Ватан тупроғин...*

Кўрдингми, ҳар сатрини ўқиганда этинг жимирлаб кетади. Сизларнинг китобларингиздаги шеърни на ёдлаб бўлади, на чиройли ўқиб. – Онамнинг ҳазиломуз гапларидан завқланиб, кулгим келади. – Сизлар мана шуларни шеър деб ёдлайсизларми?

– Йўқ, биз буларни ўқиб, тушунганимизча мазмунини айтиб берамиз.

– Э, унда шеър эмас экан-да. Бизнинг давримиздаги шеърларни ўқисанг, худди қўшиқ эшитаётгандай, қайдандир мусиқаси ҳам эшитилиб тургандай туюларди. – Онам “biznинг давримиз” деганда ўзининг ўқувчилик даврини айтарди.

– Сизнинг замонингизда одамлар содда бўлишган, шунга яраша шеърлар ҳам соддагина бўлгандир-да. Бизнинг даврда эса ҳамма нарса янги – ҳаёт ҳам, одамлар ҳам, шунга монанд шеърлар ҳам. Бу янги давр шеъри, тушуняпсизми? Замонавий шеърлар ҳар қандай қофияни ҳам, вазнларни ҳам тан олмайди, қолип-ларга сифмайди, эркинликни яхши кўради.

– Ҳа, ҳозир ҳеч ким қолипга сифмайди. Чунки ҳеч нарсанинг аниқ йўриғини билишмайди. Буни хаспўшлаш учун эса ўзларини гўё эркинликни ёқтирадиган қилиб кўрсатишади.

– Ҳар бир замоннинг ўзига яраша шеър ва ҳикоялари бўлса керак-да, ая.

– Замонлар-ку, келиб кетаверади, одамлар ҳам. Лекин шеър шеърлигича қолгани яхши. Уни ҳар ким ўз йўриғига соламан деб тўрт томонга тортқиласа, шунчаки жароҳатлагани қолади. Сен буюк Навоийни ўқи, Бобурнинг ғазалларини ёд ол, Қодирийни, Чўлпонни қўлингдан қўйма. Нима, улар эркинликни ёқтиришмаганми? Ростакам эркинлик уларнинг ёзганларида.

Онамнинг мана шунаقا баҳслашишларини жондилимдан яхши кўраман. Улар айтган шоиру адиларнинг китоблари менинг сирдошим, ҳасратдошларим-у. Уларнинг шеър ва ғазалларини ичимда тинмай айтиб юраман. “Ўткан кунлар” каттагина китоб бўлса ҳам, ҳар бир саҳифасини ёддан айтиб бера оламан. Кумуш билан ҳатто тушларимда дардлашиб чиқаман, Зайнабга ачинаман, уни юпатгим келади...

Ташқарида шамол ғувилляяпти. Шитирлаган товшулар эшитилганидан шамол хазонларни учириб ўйнаётганини, дарахтлардан чирт-чирт узилиб тушаётган сарғайган, қирмизи япроқлар деразага келиб урилаётганини сезяпман. Шамолнинг аста-секин шашти зўрайди. Ҳовлидаги деворга суюб қўйилган

кир ювадиган тоғора даранглаб ағдарилди. Дераза тирқишидан кираётган елвизакдан шамнинг липиллаб турған оловчаси рақсга тушарди. Шамолнинг баттар кучайиб ғувиллаши қоронғи тунда юракка ваҳима солади. Мен хәёлим бўлинмасидан дарсларимни тезтез тайёрлаб олишга ошиқардим. Лекин барибир ғувиллаган товуш диққатимни ўзига тортиб кетаверди. Кейин шамолнинг шиддати пасайиб, ёмғир томчилайдигани қулоғимга чалинди. Бир муддат деразага тиктик томчилар урилиб турди-да, сўнг бирданига ёмғир заптига олиб, шовуллаб қуя бошлади. Тарновдан шариллаб қуйилаётган ёмғир товушидан онам уйғониб кетди. Бошига эски чопонни ёпиб, шошилганча ҳовлига чиқди: ёмғирда ивийдиган бирон нарса ташқарида қолиб кетмадимикан, деб хавотир олди, чамамда. Мен дарсларимни тайёрлаб бўлай деганимда китоб устига бошимни кўйиб, ухлаб қолибман.

Эртасига мактабдан келгунимча онам қўни-қўшнилардан арава ахтариб, анча овора бўлибди. Охири ҳамшира холанинг ўғлини мотоциклда токпояларни ташиб беришга қўндирибди. Кечаги ёмғирдан кейин ҳаммаёқ лой бўлиб кетган экан. Аравачали мотоцикл бу аҳволда токзорнинг ичига кириб боролмайди. Шунинг учун уни йўл четига қўйиб, биз токпоя боғламларини ўша ерга ташиб чиқадиган бўлдик. Тўплаб қўйган токпояларимизнинг ярмини кечаси кимдир ўғирлаб кетишга ҳам улгурибди. Мехнатимизга ачиниб, йиғлагим келарди. Аммо энди кўзёш тўқкандан нима фойда. Онам ҳатто ўғрини қарғамади ҳам. “Барака топкурлар, юқимизни анча енгиллаштиришибди, қийналмасин, дейишган-да” деб киноя қилиб қўя қолди. Қолганига шукр қилишдан ўзга иложимиз ҳам йўқ. Токзор оралаб юриш қийин эди, тиззамизгача лойга ботиб, токпояларимизни зўрға ташиб олдик.

Кечга бориб онам ҳолсизланиб қолди. Пешонаси-ни ушлаб күрмоқчи бўлсан, унамади: “Хавотир олма, озгина шамоллабман шекилли, ўтиб кетади”, – деди. Иссик чой дамлаб бердим, бир-икки пиёла ичди. Овқатни эса емади. “Ўзинг еявер, қизим, менинг ишта-ҳам бўлмаяпти” деб болишга бош қўйиб, ухлаб қолди. Ярим кечаси онамнинг аёзда қолган одамдек қалтира-ётганини сезиб, уйғониб кетдим.

– Ая, нима бўлайапти сизга? – дедим қўрқиб кетга-нимдан ўзим ҳам қалтираб.

– Ваража қиласайпман, аъзойи баданим музлаб ке-таяпти, – деди онам овози ҳам қалтираб.

Онамни ўрнига ётқизиб, икки қават қўрпа ёпдим.

– Мен ҳозир, бир зумда дори топиб келаман, ая, – деб югуриб ташқарига чиқдим. Бундай зарурат мав-ридида хаёлимга фақат ҳамшира хола келарди, холос. Кўча зим-зиё, милт этган шуъла кўринмайди. Осмон булат бўлганидан митти юлдузлар ҳам беркинган. Вужудимни қўрқув қамраб олди. Қаерда кетаяпман, қайси манзил томон, ўзим ҳам билмайман. Тангримга таваккал қилиб, кўчани чамалаб боравердим. Ҳаво би-рам совибдики, этларим жунжикиб, тишларим такил-лай бошлади. Уйдан гугурт олсан бўларкан, шу эсимга келмабди. Ҳарна бир қадам бўлса ҳам йўлимни ёритарди. Муюлишга етганимда ўнг томонга йўл солдим. Қў-зим қоронғиликка бироз кўниккандай бўлди. Ҳамши-ра холанинг уйига бир амаллаб етиб олдим. Совуқдан оёқ-қўлларим қалтираб, эшикни тақиллатдим. Бирпас ўтиб, ҳовли ичкарисидан қадам товуши эшистилди. Бу уйдагиларнинг ширин уйқусини бузганимдан қаттиқ хижолат чекаётган эдим. Эшикни холанинг ўғли очиб, сўнг гугурт чақди.

– Кимсан? – деди у қоронғида мени таниёлмай.

– Марямман, аямнинг тоби қочиб қолди, қаттиқ шамоллаганга ўхшайди, холамдан дори сўраб келган эдим, – дедим тишларим такиллаб.

Холанинг ўғли эшикни очиқ қолдириб ичкарига кириб кетди. Кейин дарров уйдан холанинг ўзи чиқди. Кўлида пилиги милтираб ёниб турган мойчироқ ҳам бор эди.

– Вой, Марям, ўзингмисан, онангга нима қилди? – деди ҳамшира хола чироқни юзимга яқин тутиб.

– Кун бўйи лойгарчиликда ишладик, зах ўтган бўлса керак, иситмаси кўтарилаяпти.

– Вой, бечорагина-ей, шу ҳаводаям лойда ишлайдими, – деб уйга кириб кетди ва бироздан сўнг қайтиб чиқди. – Ма, мана бу доридан битта ичсин, иситмани туширади. Эрталаб бориб, хабар оларман. Ё ҳозир бирга борайми?

– Йўқ, раҳмат, овора бўлманг, шу дорининг ўзи етади.

– Ўзинг ҳам совуқдан кўкариб кетибсан, шунаقاјам юпун кийиниб чиқасанми. Вой ўлай, ҳали оёқяланг ҳам юрибсанми?

Мен шундагина шошилганимдан уйдан оёқяланг чопиб чиққанимни пайқадим. Мойчироқнинг хира ёруғида оёқларим қонаётганини кўрдим. Мана энди оёқларимдан қаттиқ совуқ ўтаётганини, тошлар тилиб юборган жойлари ачишаётганини сеза бошладим.

– Шошма, ҳозир сенга калиш олиб чиқаман, – дея хола куюнганча кириб кетди.

Менга эса бир лаҳза ҳам ғанимат эди. Бу ерга қандай чопиб келган бўлсам шундай изимга қайрилиб, шамолдай учеб кетдим.

– Биби, қаёқларда юрибсан, жон қизим, хавотир олдим сендан, – деди онам болишдан қийналиб бошини кўтариб. – Нега совуқда дийдираб юрибсан?

Мен индамадим. Кечқурун чойнакда қолган чойни сочиқ билан ўраб қўйган эдим, илиб қолибди. Пиёлага

чой қуиб, онамга бир дона хапдори узатдим. Онам бироз ёнбошлаб, дорини ичди. Пиёлани қайтариб узатаёт-ганида бехосдан оёғимга қўли тегиб кетиб, чўчиб тушди.

– Оёғинг музлаб қолибди-ку! – дея шоша-пиша оёқларимни ушлаб қўрди. Кейин кафтини шам ёруғига тутиб, баттар қўрқиб кетди. – Нима бўлди сенга ўзи, нега оёқларинг қон?

– Ҳеч нарса бўлгани йўқ, ая, тинчланинг. Ҳамшира холаникidan дори олиб келдим.

– Дори? Шу қоронғи кечада, ёлғиз ўзинг? Оёқяланг бориб келдингми?

– Чопиб бориб келаман дебман-да. Шошилганимдан...

Онам қўрқиб кетганидан касалини ҳам буткул унудти.

– Ташвишланманг, ая, менга ҳеч нарса қилгани йўқ. Сиз жойингизга ётинг, тезроқ тузалинг, – дедим ҳамон оёқ-қўлларим қалтираб.

– Қоронғи тунда дорининг нима кераги бор эди? Сенга бирон нарса бўлса, менинг жоним узилади-ку, Биби. Оёқларингни тошлар тилганга ўхшайди. Сенинг оёғинг тилинса, менинг юрагим тилинади, Биби.
– Онам ёнимга ўтириб, мени маҳкам бағрига босди.
– Аъзойи баданинг музлаб қолибди-ку. Нега бундай қилдинг, эси йўқ қиз?

Мен бирон сўз деёлмай юм-юм йиғлардим. Онам мени адёлга ўраб, ўзи ташқарига чиқди. Ўчоққа ўт қалаб, сув иситди. Сўнг тоғорада иссиқ сув олиб келиб, оёқларимни авайлаб ювди. Чойшаб билан оёқларимни ўраб қўйди. Қайноқ чой дамлаб, бир-икки пиёла мажбуrlаб ичкизди. Бутун танамга иссиқ ҳарорат югурди. Ўрнимга ётқизиб, қўрпа билан ўраб-чирмади. Ўзи ҳам қалтираганча ёнимга ётиб, елкаларимни силади. Қаттиқ чарchoқ ва суюк-суюгимгача ўтиб кетган

аччиқ совуқдан кейин иссиқ күрпага бурканиб ётиш, ох, бундай роҳатни ҳеч нарсага алишмасдим. Боягина қоронғи күчалар бўйлаб чопиб юрганимда танам айтарлик ўзимга бўйсинмай қолаётган эди. Шунчалар даҳшатли қалтираётган эдимки, бу фақат замин узра енгилгина қиров тўшаётган куз ҳавосининг эмас, зими斯顿 қаъридаги кўрқувнинг ҳам таъсиридан бўлгандир эҳтимол. Энди иссиқ тўшакда гўё офтобда эриётган муздек бутун вужудим бўшаши. Онамнинг ҳароратли нафасини туйиб, ухлаб қолибман.

* * *

Шамоллаш деганлари битта хапдори билан ўтиб кетадиган нарса эмас экан. Онамнинг юzlари чўғдай қизариб, кўзларидан ёш оқиб қолди. Меники-ку сал енгилроқ, томогим қичишиб, йўталяпман, холос.

– Лойгарчиликда токпоя ташиймиз деб икковимиз ҳам баравар тумов бўлибмиз-да, қизим, – деди онам эрталаб шивалаб ёғиб турган ёмғирда тарнов остига эски челакни қўятуриб.

– Ая, сиз кириб дам олинг, менга ҳеч нарса қилгани йўқ, – дедим.

– Ҳеч нарса қилмаганмиш-а, томогинг бўғилиб қолибди-ку, овозинг зўрға чиқяпти.

Онам жаврай-жаврай ўчоқхонага кириб, қўлбола электр печда сув қайнатмоқчи бўлиб, чироқни ёқиб кўрди, ток ҳали ҳам келмабди. Ноилож ўчоққа ўт қалаб, сув қайнатдик. Онам исириққа яна алламбало ўтларни қўшиб дамлама тайёрлади. Ўшандан икковимиз ҳам бир-икки ҳўпламдан ичдик: шамоллашга даво бўларкан. Мен эшик олдини супуриб-сидиргунимча онам ҳолсизгина ичкарига кириб кетди. Нонушта ҳам қилганимиз йўқ. Дастурхонда бир тишлам ҳам нон қолмабди. Менинг мактабга жўнайдиган вақтим бўлиб

қолган эди. Лекин бугун ҳеч боргим келмаяпти, оёғим тортмаяпти. Онамни шу алфозда ташлаб кетолмасдим. Ундан қўра, хамир қориб, агар онам рухсат берса, нон ёпиб қўйганим яхши, деб ўйладим. Ўчоқхонага кириб, хамир қоришга тараффуд кўрмоқчи бўлдим. Лекин ун қопимизнинг ичидаги ҳам шамол айлануб қолибди. Қоп тубида қолган бир ҳовучгина ун икки кишига урвоқ ҳам бўлмайди. Дўконнинг уни бизга қимматлик қиласди. Қоплаб қўйган буғдойимизни тегирмонга олиб бориб ун қилдириб келишим керак. Онам иккаламиз қишиғамини ёзда ейишга одатланганмиз. Бўлмаса, масалдаги боқибекам ниначининг ҳолига тушиб қолишимиз ҳеч гап эмас. Чунки бизнинг ўзимиздан бошқа суюнчимиз йўқ. Отамнинг эса рўзғор билан иши бўлмайди. Ҳолбуки, дастурхон бўм-бўш бўлса, фифони фалакка кўтарилади. Ҳатто бўлакланган нонни ҳам емайди, тап тортмасдан: “Бутунини олиб кел” деб дўқ қиласди. Бели оғримаганнинг нон ейишини кўринг, деганлари шудир-да. Онамнинг жонига тўзим берсин, шундай пайтда ҳам отамга бир оғиз гап қайтармай, одоб сақлайди. Шунинг учун ҳам онамни рўзғорни бутлайман деб эртаю кеч тиним билмайдиган чумомлига ўхшатаман. Қопдаги буғдойни ҳам онам икковимиз жазирама саратонда, айни буғдой ўрими палласида хўжалик даласида ишлаб йиққанмиз. Ҳатто ўрим пайтида адашиб тўкилиб-сочилиб қолган, шундоғам қушларга ем бўладиган бошоқни ҳам дала хўжайини текинга бериб қўя қолмайди. Бир қоп-ярим қоп буғдой учун хўжаликнинг лавлаги экилган даласини бегона ўтлардан тозалаб беришимиз керак. Намхуш ерда онамнинг йиртиқ калишидан оёғига заҳ ўтиб кетишидан кўрқаман. Онам эса менинг оёқларимдан хавотир олади. Икковимиз қўлларимиз қонай-қонай кўрсатилган жойдаги бегона ўтларни юлиб чиқамиз.

Тарвақайлаб ўсиб кеттган бандидевоналарни юлиш ҳаммасидан ҳам мушкул. Ҳидини айтмайсизми, бирам қўлансаки, ҳар юлганимда кўнглим айнийди. Кейин буғдойзорга қайтиб келамиз. Комбайн буғдойни ўриб кетаверади. Бепоён далада тангадай соя йўқ. Офтоб тифи бошимиздан ўтиб кетса ҳам хўжайиннинг ваъда қилган буғдойни беришини сабр билан кутамиз. Унгача бекор ўтирмасдан, ерга тўкилган бошоқларни ҳам терамиз. Ҳозир хўжайинлар буғдойни янги комбайнга ўрдирадиган бўлишган. У деярла топ-тоза қилиб ўради. Ҳадеганда ерга бошоқ тўкилавермайди. Тўкилгандари ҳам кўпинча пуч ёки дони унчалик тўқ бўлмаган бошоқлар бўлиб чиқади. Шугина темир-терсак ҳам шунчалик ақлли бўладими? Эски комбайнлар яхши эди, ҳар ҳолда, анча-мунча тўкиб-сошиб ўрап эди. Келишилган буғдойимизни олганимиздан кейин дала хўжайини буйруқ беради:

– Бўлди, кетинглар, ерда ҳам бирон нарса қолсин. Сизлар худди чигирткага ўхшайсизлар, ортларингиздан фақат қоп-қорайиб тупроқ қолаяпти.

Биз ана шундай қилиб то бир қишилик буғдойимизни тўплаб олмагунимизча далама-дала юраверардик.

Тегирмонга кетаётганимни онамга айтиб қўймоқчи бўлиб, ичкари уйга мўраладим. Онам бир қўлида кашта билан болишга ёнбошлаганча ухлаб қолган экан. Ишқилиб, шамоллаши зўрайиб кетмасин-да. Уйқусини бузиб, безовта қилгим келмади. Ярим қопча буғдойни орқалаб, тегирмонга жўнадим. Тегирмон уйимиздан икки чақиримча нарида. Гоҳ тош йўлдан, гоҳ лой кечиб бораардим. Елкамдаги қоп тобора оғирлашиб бораётгандек туюлади. Ерга қўйиб, бироз дам олай десам, буғдойимнинг нам тортиб қолишидан қўрқаман. Устига устак боягина тўхтаган ёмғир яна ёғиб қолса ундан баттар бўлади. Елкам оғриб кетса ҳам тўхтамасдан тез-тез

юриб кетавердим. Тегирмон олдига етиб борганимда ўн чоғли одам айвон тагида навбат кутиб ўтиришган экан. Қатор охирида ўтирган аёлнинг ёнига бориб, мен ҳам навбатга қўшилдим ва қопимни ерга қўйиб, муздай ўриндиқقا ўтирдим. Бу хотин бир синфдошимнинг онаси эди. У ҳам мени таниди.

– Жуда юпун кийиниб олибсан, қизим, қопинг ҳам анча оғирга ўхшайди, – деди у дўриллаган эркакча овозда, менга бошдан-оёқ қараб.

– Совқотаётганим йўқ, хола, – дедим нафасимни ростлаб. Хола ҳорғингина жилмайиб қўйди.

- Ўтган гал онанг келган эди, бугун чиқолмадими?
- Бугун аямнинг бироз тоби йўқ.

– Ҳа, ҳозир хотинларга қийин. Биламан, сизларнинг ҳам уйларингда эркак йўқ. Меникилар ҳам рўзғорга пул топиб келамиз деб иш қидириб, узоққа кетишиди. Уч ойдан бери на дараги бор, на бир хат-хабари. Рўзғорнинг аравасини ўзим қизларим билан тортаяпман.

– Аравангиз бўш-ку, буғдой олиб келганмидингиз?
– дедим унинг олдидағи аравачага ишора қилиб.

– Боя ёмғир ёғаётганда йўлга чиқиб қўйган эканман. Бу ерга келгунимча қопдаги доннинг ҳаммаси ҳўл бўлиб қолибди. Қопни салапон билан ўраб олсам бўларкан. Ўзи бошим ҳам ишламай қолди. Тегирмончи олмайман деб қайсаарлик қилди, тегирмони ҳўл донни янчолмасмиш. Шу ҳам тегирмон бўлди-ю. Тегирмони ҳозирги янги чиққанидан, ток билан ишлайдиган хи-лидан. Ундан сув тегирмони яхши эди, шундай бақувват бўладики, тошни ҳам бир зумда янчиб юборади.

– Буғдойинг ҳалибери қуримаса керагов, Салтанат, кутганинг бефойдами дейман, – деди оппоқ мўйлабининг учлари сарғайиб кетган киши лабидаги папиросни бурқситиб тутатаркан.

– Ҳа, ўзимниям кутиб ўтирадиган бекорчи вақтим йўқ. Донни ичкарига олиб кириб, ёйиб қўйдим, эрталабгача қуриса янчиб қўяр, эртага олиб кетаман. Шу ҳавода шунча оғир қоп билан келиб кетаверишнинг ўзи бўладими, – деди Салтанат хола қўл силтаб. – Бунинг устига оёғим шишган. Озгина дам олай, кейин кетаман. Сенинг ҳам навбатинг тезроқ яқинлашади, – деди у менга қараб. – Мана бу олийжаноб эркакларнинг биронтаси аёлларни навбатсиз ўтказиб юборайлик, уйда ишлари кўпдири ҳам демайди.

– Ҳозир кимда иш кам дейсан, ҳеч кимнинг бекорчи вақти йўқ.

– Қаёқда, эртадан кечгача ҳаммангиз Чорибойнинг чойхонасининг атрофида тимирскиланиб юрасизлар. Уй ишларини ҳам, мол-ҳолга қарашни ҳам, ер чопишни ҳам хотинларингиз қилишади. Хотинларнинг ўлмаган жони.

– Ўзингам катта бозорчи бўлиб кетибсан деб эши таман, савдонг авжида бўлаётгандир?

– Э, шуям савдоми, совун-повун, қурут-мурут дегандай майда-чуйда нарсаларни ундан олиб бунга сотаман, ҳарна тирикчилик деб. Қимирлаган қир ошади. Оз-моз ҳаракат қилиб турмасам, болаларимни ким боқади?

– Эринг пул юбормаяптими?

– Пул тугул икки энлик хат ҳам юборгани йўқ. Пули бош-кўзидан садақа, ўзи тирик қайтиб келса ҳам гўрга эди, деб ўтирибман.

– Эрингни соғинганга ўхшайсан?

– Э, соғиндим нима-ю, соғинмадим нима, эркакларнинг ҳаммаси бир гўр. Қизларим катта бўлиб қолишиди, уларни турмушга беришим керак ҳали. Ҳаммаси аёл бошим билан ўзимнинг бўйнимга қолган. Э, бўпти, кўп гап – эшакка юк. Қанча дийдиё қилганим билан

биров дардимни тушунармиди. Қани, қизим, менинг жойимга ўтирип. Мен кетдим, ҳали бир дунё иш кутиб ўтирибди уйимда. – Салтанат хола жаврай-жаврай, аравачасини судраганча лапанглаб юриб уйига кетди.

Менинг навбатим келгунча пешин бўлди. Бир талай эркакларнинг қаторида ёлғиз қиз бола бўлиб турганимдан ўнғайсизланавердим. Боя оқ мўйлаби папирос тутунидан сарғайган амаки: “Қизим, қачонгача кутиб ўтирасан, буғдойингни ташлаб кетавер, тегирмончи янчиб қўйса, кечқурунми, эртагами олиб кетасан” деганида бир хаёлим шундай қилмоқчи ҳам бўлдим. Аммо яна шунча йўлга бориб келишни чамалаб, ундан ҳам кўра буғдойимнинг алмашиб қолишидан чўчиб, индамай ўтиравердим. Аввал одамлардан эшитган эдим: тегирмончи яхши тозаланган буғдойни кўрса, уни бир четга олиб қўйиб, ўрнига ўзидағи яхши тозаланмаган донни янчиб бераверар эмиш. Ўшандай буғдойларнинг орасида ҳатто аччиқмиянинг донлари ҳам аралашиб кетган бўлади, дейишади. Бунаقا уннинг нони жуда тахир бўларкан. Бизнинг буғдойимизни эса онам иккаламиз битталаб тозалаганмиз, орасида бир дона бегона ўтнинг дони ҳам йўқ. Шунинг учун ҳам кимки онам пиширган нонни еса, мазасини мақтаб-мақтаб ейди, фақат отамдан ташқари. Шуларни ўйлаб, қопимнинг ёнидан бир қадам ҳам нари кетмадим. Ҳатто навбатим келиб, тегирмончи қопимдаги донни тегирмонга солганда ҳам тепасида қараб турдим. Ҳарҳолда камбағалнинг буюми кўзининг олдида бўлгани яхши. Тегирмоннинг чангини ҳам писанд қилмадим. Онам иккимизнинг пешона теримиз билан топган донимизнинг чанглари ҳам табаррук.

Тегирмондан қайтиб келсан эшигимиз олдида синфдошларим Муниса билан Турсуной туришган экан. Орастакийиниб, соchlарини бирам чиройли тараб олишганки, ҳавасинг келади. Мени қўриб иккови ҳам

донг қотиб қолишган эди. Шунда сиртдан, уларнинг кўзлари билан ўзимга қарадим ва қоп кўтарган, мункиллаган кампирни кўргандай хўрлигим келиб кетди. Елкамдаги юкни ерга қўймасдан қизлар билан саломлашдим-да, индамай эшиқдан кириб кетавердим.

– Э, ҳой, Марка, менга қара, – деди шошиб қолган Муниса ортимдан. – Нега мактабга бормадинг? Аянгдан сўрасак, сени мактабга кетган эди, деб айтди.

– Аям ҳам, мен ҳам шамоллаб қолдик, – дедим овозим хириллаб.

– Вой-ей, шамоллаган одам қоп орқалаб юраркан-да. Мактабга текширувчилар келишармиш. Дарсни қолдириб юрмасдан эртага мактабга борар экансан, муаллима тайинлаб юборди. Сени деб раҳбарлардан гап эшитишни хоҳламас экан, тушундингми? Бизни ҳам овора қилганинг қолди.

Бугун дарсга бормаганимга-ку, ўзимнинг ҳам виж-доним қийналиб, ичимни ит тирнаяпти. Имконим бўлса, дарслар тугаган бўлса ҳам ҳозироқ мактабга бир бориб келишни жон деб истаб турибман. Аммо иложим қанча. Ўчоқхонага кириб, қопни елкамдан туширдим. Оҳ, биринчи марта белим қаттиқ оғриди. Бироқ онамга билдирамадим. Онам даҳлизда жун титиб ўтирган экан. Кимdir икки қоп қўй жунини келтириб ташлабди. Уни аввал титиб юмшатиш, ҳар хил хас-ҳашаклардан тозалаш, кейин эса урчуқда йигириб калава қилиб беришимиз керак. Шу ишимизга бир-икки сўм чойчақа оламиз. Мени кўриши билан онам ҳайрон бўлиб қараб қолди.

– Мен сени мактабга кетган десам, тегирмонда юрганимидинг? – деди онам, нега менга айтиб қўймадинг, дегандай савол назари билан қараб.

– Уйда бир бурда ҳам нон қолмабди, шунга тегирмонга дарров бориб келаман деб ўйлаган эдим. Нав-

батда турганлар күп экан. Ишимни битирмай қайтишга күнглим бўлмади. Бугунги дарслар ҳам қолиб кетмайди, эртага албатта етиб оламан, ая, хавотир олманг, – дедим.

Белим зирқираб оғриётганини онамга сездириб қўймаслик учун тезда ўчоқ ёнига бордим. Қозонда икки кишилик карам шўрва қайнаб турибди, онам мен келгунча пишириб қўйибди. Мазали ҳидидан иштаҳам яйраб кетди. Жудаям очқаб кетган эдим, шошилиб дастурхонни ёздим. Онам икковимиз нонимиз бўлмаса ҳам шўрвани ҳузур қилиб ичдик. Онам пиширган карам шўрва бирам ширин эдики, агар шугинанинг ичидан данакдеккина гўшти ҳам бўлганида борми, асалдан ҳам зиёда бўлиб кетарди. Кейин хамир қоридим. Хамир тошай деганда токпоя ёқиб, тандирни қиздирдим. Онамни ҳол-жонига қўймай, нонни ўзим ёпишга кўндиридим. Болалигимдаги ўша мудҳиш воқеадан сўнг ловуллаб ёнаётган оловни кўрсам қўрқадиган бўлиб қолган эдим. Шунинг учун онам қиздираётганда тандирнинг яқинига ҳам йўлатмасди. Бу гал эса неғадир оловдан қўрқмадим. Нон ёпишга ҳам астойдил иштиёқ пайдо бўлди. Бу иштиёқни онам ҳам кўзларимда кўрди ва ёнимда ҳар бир ишни ўргатиб турди. Кўнглим сезиб турибди, онам тандирнинг тафти абгор юзимга таъсир қилиб қолишидан чўчиб, безовта бўлмоқда эди. Мен бунга парво қилмасдим. Қайтага ҳар битта нонни тандирга энгashiб ёпаётганимда бу ишни оловга қасдма-қасд қилаётгандек дадилланардим. Нон ёпишни завқу шавқ билан ўрганмоқда эдим. Баҳонада шамоллашдан ҳам бирйўла кутулдим. Томоғимни бўғиб турган касаллик тандир тафтидан чилпарчин бўлди. Енгил нафас ола бошладим.

– Вой, шамоллашим кетганга ўхшайди, ая, сиз ҳам тандир оғзига яқинроқ келинг, – дедим хурсанд бўлганимдан.

Онам айтганимни қилиб тандирга яқинроқ келиб энгашиб турди. Лекин биламан, уни шамоллаш эмас, бошқа дард изтиробга солмоқда...

Тандир ичидан “тап-тап” деган овозлар чиқди, бурқисиб кулнинг чанги ҳам кўтарилиди.

– Ҳай, Марям, ўрикларинг пишиб, ерга тўкилаётганга ўхшайди, – деди онам шоша-пиша ва шарақлаб кулиб юборди. Онамнинг бундай ёзилиб кулганини кўрмаганимга кўп йиллар бўлиб кетган эди. Шу сабабдан ҳам қувониб, ҳам ҳайратланиб маҳлиё бўлиб қолибман. – Ҳой қиз, қарасанг-чи, – деди онам тандирнинг оғзига ишора қилиб.

Жон ҳайбатида тандир ичига мўраладим. Мен ёпган нонларнинг ярми пишай деганда тандирдан узилиб, кулга ағанабди. Чаққонлик билан уларни кулдан олиб, рапиданинг устига қўйиб, ёпишган чангларини енгса билан обдон тозалаб артдим. Буларни тозалаб бўлгунимча қолганлари ҳам узилиб, бирин-кетин кулни чангитди. Уларни ҳам шошилганча тандирдан чиқариб олдим. Мен довдираб қолган эдим. Онам эса ҳамон мириқиб куларди. Кейин билсам онам ўзининг ёшлигини, биринчи нон ёпганини эслаган экан. Ўшанда онамнинг ҳам нонлари беўхшов чиққан, шалпайган, чанг ёпишган нонларига қараб юм-юм йиғлаган экан. У пайтда онамни юпатадиган ҳеч кими бўлмаган. Менинг ҳам йиғлагим келиб, мижжаларимда ёш милтиллаб туради. Аммо онам қизиқ гапларни айтиб мени юпатди. Кўнглим анча енгил тортди. Нон ёпиш ҳазилакам иш эмас экан. Менинг биринчи нонларим қийшиқ бўлса ҳам мазали чиқибди, онам иккаламиз мақтаб-мақтаб едик.

Коронги тушганда мойчироқни ёқиб, дарс тайёрлашга ўтирдим. Бугун қайси фандан қайси мавзу ўтилганини тахминан биламан, албатта. Уларни синчиклаб

үқиб, алгебрадан мисолларни тез-тез ечиб ташладим. Бир кун мактабга бормаганимга китобларимни соғиниб қолгандек гүё уларнинг ичига шўнғиб ўқирдим. Уйқу элитаётгани ҳам йўқ. Ҳатто дарсларни тайёрлаб бўлганимдан кейин ҳам анчагача уйқу эсимга келмади. Мен эса вақтни бекор ўтказмадим, дуолар китобини қўлимга олиб, онам билан ўзимга шифо сўрадим. Китобчадаги дуоларни бошдан-адоқ ёддан айтиаётган бўлсам-да, барибир уни қўлимда ушлаб туришга, кўзларимни ундаги нафис сўзлар узра югутиришга ўрганиб қолганман. У қўлимда бўлса қўп-қўп яхши хотираларни ёдимга солади, қўнглимга ҳаловат ва қувват беради.

Шу қўйи китоб устига бошимни қўйиб, ухлаб қолибман. Тонг ғира-ширасида мойчироқнинг аччиқ тутунидан уйғониб кетдим. Мойчироқ ўчиб қолибди, демак, мойи тугаган. Энди яна мойфурушдан керосин олиб келишим керак. Пулимиз етармикан? Ёки яна насияга олиб келаманми?

* * *

Якшанба куни Одил буваникига бордик, икки кун олдин чақириб кетишган эди. Қоплаб қўйган буғдой бошоқларини янчиб, совуриб беришимиз керак. Ҳаво бироз илиб, шамол эсаётган эди. Бундай кунда ишимиз унумли бўлади. Биз борганимизда чол-кампир офтобрўядаги чорпояда гаплашиб ўтиришган экан. Онам дарвоза ўрнига ходадан қўйилган ғовни салгина туртган эди, тарақлаб тушиб, уй соҳибларининг диққатини тортди. Чол биз томонга кўзини қисиб қаради. Офтоб момо секин ўрнидан қўзғалди. Одил бува: “Сизларга мушайит бермай” деб чорпоя устида турган термосни қўлтиқлаганча ичкарига кириб кетди. Момо биз билан сўрашиб, айвон томонга бошлади. Учта қопда бошоқлар, мени янч, деб турибди. Уларни

яланг жойга олиб чиқиб, ерга шол түшадик ва шолга түкиб, янчишга тушдик. Шолнинг бурчакларини қайриб бошоқлар устига ёпиб, кафтишимиз билан эзғилаб уқалайвердик. Ҳамма бошоқлар янчилиб бўлгунча кафтларимиз ҳам шилиниб кетай деди. Кейин уларни тоғорага солиб, онам юқоридан пастга тўкиб турди. Шамолнинг кўмагида буғдой билан сомонлар бир-бираидан ажралиб, шол устига тушарди. Мен сомонларни бир четга супуриб қўявердим. Офтоб момо ҳам менга ёрдамлашгандай куймаланади-ю, лекин тинмай жаврайди. Икки ўғлининг бир йил бурун Холли раис билан чиқишилмай, кейин аччиқ устида далани ташлаб, чет элга иш қидириб кетиб қолганини куюна-куона гапириб берди. Айтишича, Холли лафзида турмаган эмиш. Йил бўйи ёлланган одамларни роса ишлатган. Оғиз ошга етганда эса бошда келишган иш ҳақининг ярмини берибди. “Бу йил ҳосил мўлжалдагидан камроқ бўлди, келаси йил яхши бўлса, ҳақларингни тўлиқ қилиб бераман”, – дебди. Куруқ гапга қорин тўйса қанийди. Дехқонларнинг оиласиги қишини минг бир азобда қийналиб ўтказишган ҳойнаҳой. Шундан сўнг, ризқларини узоқроқдан қидириб кўришни ўйлашган. Холли раис ўзи шунаقا – хасис одам. Биз ҳам шунинг учун унинг даласига буғдой сўраб бормаймиз. Ҳамма ишини қилдиргани етмагандай, ваъда қилган буғдоининг ҳам ярмини олиб қолади. Офтоб момо Холлини бисотидаги қарғишилар билан анча-мунча сийлади. Кейин келинларидан ёзғирди.

– Эй, ҳозирги келинларнинг пати елвагай, пул десанг бўлди, дарров ҳурпайиб кетади. Эрлари узоққа кетгандан кейин, икки келиннинг боши бир ҳовлига сифармиди. Бирга ўйнаб юрган болалари аразлашиб қолишса ҳам уларга баҳона, дарров гап талашишади. Бир-бировига чанг солиб қолмасидан: “Оналарингни

соғинганга ўхшайсизлар, боринглар, эрларинг қайтгунча уй-уйларингда яшаб туринглар”, дедим. Оч бўлсанм ҳам тинч бўлай, дедим-да. Жон-жон деб кетишиди, ота уйларида яшашияпти. Кунда-кунора навбат билан келиб, кир-чириларни ювиб, ош-нонимни пишириб бериб кетишади. Ўғиллар аҳён-аҳёнда пул жўнатиб туришади. Қанча юборганини билолмай қийналаман, юборгандарни ўзимизнинг пулга ўхшамайди-да. Келинлар бало, пулнинг ҳар қанақасини дарров танийди. – Момо кафтининг орқаси билан оғзини яшириб, секин шивирлади. – Яқинда катта ўғлим пул юборди, Сайрам жувозкашнинг ўғли бериб кетди. Қарасам, иккита пул экан, иккала келинни чақириб, икковига бўлиб бердим. Биттаси тўйиб, биттаси оч қолмасин, дедим-да. Каттасига пул келса-ю, кичигига келмаса, кўнгли ўксийди, болам. Катта ўғлим эпчилроқ, қаерда бўлса ҳақини айириб олади, кичигим бўшроқ. Жувозкашнинг ўғли: “Хола, ўғилларингиз қийналишапти, у ёқларда ҳам пул топиш осон эмас”, – деди. Буни ўзим ҳам биламан, болам, кўнглим сезади. Қишин-ёзин совуқ бўладиган жойларда ўғилларимнинг қай бир азобларда ишлаб юрганини билиб ўтираман, тушларимдаям кўриб чиқаман. Лекин нима қилайлик, ризқини излаб йўлга тушгандан кейин чолу кампир қариган чоғимизда уларнинг йўлига кўндаланг бўла оларидик.

Момонинг ҳасратидан тутун чиқарди. Онам бўлса, кампир гапириб-гапириб олсин, анча енгиллашади бечора, дегандек унинг айтганларини маъқуллаб, ишини давом эттиради. Мен эса бўғдойдан ажralиб учайётган майда сомонларни бир четга супуравердим. Бир пайт нимадир кўзимга учиб кирди-ю, ўнг кўзим чимиllаб оғриди. Бармоқларим билан мижжаларимни ўқалайман-у, лекин нафи бўлмасди. Онам ҳам, Офтоб момо ҳам бироз қараб туришди-да, кейин кўзимга

кирган нарсани чиқаролмаётганимни күриб, ёнимга келиб энгashiшиди.

– Кўзинг оғриса кўлингни тий, қизим, – деди момо қўлимни ушлаб.

– Кўзимга нимадир кирди, энди чиқмаяпти,вой-вой, жуда оғрияпти, – дедим кўзимдан оқаётган ёшни енгим билан артиб.

Онам хавотирланиб, кўлининг чангини этагига артиб, киприкларимдан тортиб кўзимга қаради. Аммо ҳеч нарса тополмади.

– Шошмай тур, менга кел, қизим, – деди Офтоб момо ва бошимдан ушлаб, юзимни ўзига қаратиб олиб, қовоғимни сийпалади. Кейин мижжаларим остига тилини солиб ўйнатди. – Мана, сенинг жонингни оғри-таётган миттичани топдик, – дея у тилининг учига илашиб чиққан майдагина хасчани бармоғига олиб кўрсатди. Бир зумда кўзимдаги оғриқ ҳам тинди.

Буғдойларни совуриб бўлай деганимизда кўча томондан отнинг кишнагани эшитилди. Бу яқин атрофларда ҳеч кимда от йўқлигидан кўпдан бери от товуши қулоғимга чалинмаган эди. Икки йилча аввал қишлоқ адодидаги адирда кўпкари бўлган, томошага кетаётган қизларга эргашиб мен ҳам ана шу кўпкарига борган ва от деган жоноворни сўнгги бор ўшанда кўрган эдим. Роса қизиқ томоша бўлган эди. Биз тепаликка чиқиб олиб, мириқиб томоша қилдик. Улоқни тортишиб, бир-биридан ўзиб чопаётган чавандозларнинг ҳаракатларини кўриб, завқим ортган. Томошага бутунлай қизиқиб қолганимдан дугоналаримнинг кетиб қолишганини ҳам сезмабман. Кейин у ердан бир ўзим қайтган эдим. Келибоқ онамга қандай зўр томоша бўлганини шошилиб-шошилиб айтиб берганимни эсласам, ҳали ҳам завқим келади. Офтоб момо отнинг кишнаганини этишиши билан сергак тортди.

– Нурияжоним келдими дейман, – дея жилмайган-ча эшик томонга юрди.

Зум ўтмай кўча эшиги очилиб, ёшгина бир аёл кўринди. Офтоб момо қучоқ очиб уни қаршилади. Онам икковимиз буғдойларни саранжомлаб, шолчаларни бир четга йиғиштириб қўйиб, эгни-бошимизни тўғрилаётганимизда улар биз томонга яқинлашиб келаверишди.

– Шу томонларга йўлим тушган эди, баҳонада сизларни ҳам бир кўриб кетай дедим-да, амма, – деб шошиб-пишиб гапиради меҳмон аёл. У оёғига маҳси-калиш кийган, эгнида одмигина қўйлак, қалин куртка, бошида момик рўмол, қўлида эса қамчи. Кулганида юзидан нур ёғилаётган бу аёлнинг кулгичлари унинг ой каби чеҳрасига яна ҳам чирой бахшида этмоқда эди. Унинг кўзларида ўзгача олов ва шиддат чақнаб турганини кўрган одамнинг юрагини ҳавас чирмаб олади. Бир аёл сиймосида ҳам Барчинойникидек назо-кату нафосат, ҳам Алпомишники каби шахту шиддат мужассам бўлишини илк бор шоҳиди бўлиб туришим эди, шундан бир лаҳза бу аёлнинг истиқболида анграйиб, табассумига маҳлиё бўлиб қолибман. Бир гапириб ўн кулиб сўйлаётган сўзларидан англадимки, у Офтоб момонинг жияни, ҳар ҳолда, қайсиdir бошқа қишлоқда яшар экан. Нурия опа биз билан саломлашгач, Офтоб момо уни ҳам, бизни ҳам ичкарига таклиф қилди. Лекин онам унамади. Менинг эса овози ҳам, сўзлари ҳам ёқимли мана бу аёл билан бирпас гаплашиб ўтиришга истагим бор эди. Бу истагим ичимда қолиб кетди, ошкор этолмадим. Онам Офтоб момо берган тугунни олди-да, уй соҳиблари билан хайрлашди, мен онамга эргашдим.

Шу куни Нурия опа туни билан хаёлимдан кетмади. Бу аёлнинг нимасидир мени ўзига тортмоқда эди:

ойдек тиниқ чехрасими, офтобдай истарасими ёки тим қора соchlаримикан, балки чарос кўзларида чақнаб кўринган шиддатидир? Ҳатто унинг от чоптириб юргани тушимга кириб чиқди. У отини шиддат билан елдириб кетар, мен эса гўё шамолга айланиб унинг ортидан югурадим. Мен унинг юзини кўришни истардим, бироқ кўролмай ҳалак эдим. У фақат олға қараб интилиб, отини тиндирмас эди. Мен барибир унга етолмадим. Уйғонганимдан кейин ҳам унинг нурли жамолини эслашга уринардим. Ё тавба, қадди-қомати кўз олдимда туриди-ю, лекин юзини эслеёнмай қийналардим. Афсус, қанча уринмайин, ўша гўзал чехра ни кўз олдимга келтиролмадим. Унга шунчалар ҳавас қилган эдимки, энди эслай олмаётганимдан асабларим чақнарди, ўзимни қаерга уришни билмасдим. Инсоннинг истараси ҳам қуёш тафти билан баробар бўлишини шу тобда юрак-юрагимдан ҳис этмоқда эдим. У қанчалар хушсурат, қанчалар дилбар, қанчалар бахти барқарор аёл. Ёстиғим остидан дуолар китобини олиб бағримга босганча илтижолар қиласман. Яратгандан кўп нарса сўрамадим, бугунгидай қувончли лаҳзаларни, онам икковимизга сиҳатлик беришини, яхшиларга ҳамроҳ қилишини тиладим, холос.

Яратган Эгам, агар бунинг имкони бўлса, ҳаммага тўқис бахт бер, кўпнинг қаторида бизни ҳам бир чимдим мурувватингга мушарраф айла!

* * *

Янги йилнинг киришига икки кун қолганда отам сафардан қайтиб келди. Отам анча озиб-тўзиб кетибди. У маст ҳам эмас (мен унинг қиёфасини фақат маст ҳолда тасаввур қилишга ўрганиб қолган эдим), кўполликларини ҳам қаёққадир ташлаб келганга ўхшарди. Саломимизга хушмуомалалик билан алик олди.

Бизни бўлмаса ҳам, уйини соғингани сезилиб турарди. У каттагина сумкасини очиб, онамга момиққина рўмолни узатди: “Бу сенга”, – деди сезилар-сезилмас жилмайиб (назаримда, турмуш қурганларидан бери биринчи марта совға бераётган бўлса керак). Онам, совға олиш нималигини эсидан ҳам чиқариб юборган онажоним бениҳоя севиниб кетди. Шундоқ ҳам боядан бери қувончи ичига сифмаганидан ўзини қўярга жой тополмай турган эди, энди шодлиги қўзларидан ёш бўлиб қалқиб чиқди. “Раҳмат, отаси, раҳмат, илойим, баҳтилизга омон бўлинг. Совғангиз нимаси, соғ-саломат кириб келганингизнинг ўзи бизга катта хурсандчилик-ку”, – дея тинмай жаврарди у. Отам менга ҳам юпқароққина бир рўмолни узатди. Таассуфки, қувонмадим, этим ҳам жимириламади. Болалигимдаёқ юрагимда у пайдо қилган муз ҳамон эримаганлигини билардим. Чамамда, у сафардан анчагина пул билан қайтган эди, сумкасидан рўмолни олаётганида ўрам-ўрам пулларга қўзим тушди. Қиёфасидаги мамнунлик ҳам шундан бўлса керак. Лекин барибир унга қараб туриб гоҳ раҳмим келар, гоҳ ўзим сабабини билмаган ҳолда аччиғим чиқарди. Юзида еловагай табассум зоҳир бўлса-да, барибир ҳадемай унинг жанжалкашлиги тутиб, яна ҳаловатимизни бузадигандай, осуда ўтаётган ёруғ кунларимиз тағин зимистонга айланадигандай кўнглимда бир хавотир ҳукмрон эди. У сумка ичига яна бир қур кўз ташлаб, ичидаги пулларни қайта санагандай бўлди-да, кейин ўрнидан ҳорғин қўзғалди.

- Бирон овқатинг борми? – сўради у онамдан.
- Қовоқшўрва қилганман, қайнаб турибди, иссиққина ичиб олинг. Йўл азоби... дегандай, чарчагансиз,
- деб онам меҳрибончилигини, кўнглидаги қувончни ҳали ҳам яширолмасди.

Отам юзини бужмайтирди. Шундай бўлса ҳам, онам иккимиз чаққонлик билан дастурхон ёзиб, нон,

туршак, жийда, умуман, бор бисотимизни қўйдик. Отам ғарибгина дастурхонимизга назар ташлаб, ке-йин бир нима эсига тушгандай сумкасини бошқатдан очиб, ичини кавлаб кўриб, елим халтага солинган бир ҳовуч ширинликни олиб менга берди. О, бизнинг хо-надонимиз бундай ажойиб ширинликни кўрмаганига неча йиллар бўлган бўлса керак. Энди шундай чирой-ли ўрамдаги конфетларга эскириб, ранги ўнғиб кетган дастурхонимиз шунчаки ярашмай турганидан хижолат бўймоқда эдим. Отам қовоқшўрвани бир-икки ҳўпла-ган бўлди. Кейин ташқарига чиқиб, ҳовлини бус-бутун айланди. Ҳеч нарса ўзгармаган, у кетаётганида қандай бўлса, шундайлигича турибди. Назаримда, у ҳалитдан зерика бошлаган эди. Онам эса мириқиб сухбатлаш-моқчи, дунё кезиб, нималарни кўрганини жудаям бил-гиси келарди. Бироқ отам бунга парво ҳам қилмасди. Унинг ичидаги қачонлардир ўчиб қолган чироқ ҳамон ёришмаганини онам билмаганга олган бўлса ҳам, ле-кин мен аллақачон англаб улгурган эдим.

Отам ҳовли этагидаги толдан синиб тушган бир-иккита шоҳ-шаббани териб, четандан нарига улоқ-тирди-да, қайтиб келиб уйга кирди. Унинг юзида яса-ма табассум ҳамон зоҳир эди. Буни очиқчехраликка йўйган онам хуш кайфиятда саволлар берарди. Аммо отам жавоб беришга ҳадеганда ҳафсала қиласвермас-ди. У болишга ёнбошлаб олиб онамнинг сўраганлари-га “ҳа”, “хим” дегандай қисқагина жавоб берар, кўзини юмганча нималарнидир ўйларди. Сўнг шу кўйи ухлаб қолди. Онам сезилар-сезилмас хўрсиниб қўйди.

Эрталаб, ҳали қуёш олтин сочини ёймасидан, отам-ни йўқлагани биринчи бўлиб Соли амаки эшик қоқди. Ҳар доимгидай Дониш пакана ҳам думдай эргашиб келди. Пакананинг энди анча-мунча бўйи чўзилиб, сўлоқмондай йигит бўлиб қолганини аввал пайқама-

ган эканман. Биз отамга нонушта тайёрлаётган эдик. Отам дарахт тагидаги ювингичга энгashiб, юзларини чаймоқда эди. Соли амаки томоқ қириб: “Хормасинлар, Шопўлатбой, кўз ойдин, кўз ойдин”, – дея беярашиқ тиржайиб келаверди. Отам юз-қўлларини елкасидаги сочиққа арта-арта битта-битта қадам ташлаб келиб, улар билан саломлашди ва ичкарига таклиф қилди.

– Қани, оқсоқол, тўрга ўтинг, – деди отам Соли амакининг иззатини қилиб.

– Йўқ, чироғим, жуда тўрга чиқиб кетмаймиз, бизга ўхшаганларга мана бу ер ҳам бўлаверади, – деб амаки печкага яқинроқ жойга ўтириди-да, болишга ёнбошлиди. Уйнинг тўрига эса Дониш пакана ялпайиб ўтириб олди. – Хўш, мулла Шопўлат, қани, сўйланг-чи, қай юртларда бўлдингиз, нималарни кўрдингиз?

– Қаерда бўларди, шу, ўзингиз эшитган, билган жойларда-да, – деди отам чой узатаркан, мийигида кулиб. Энди отам Соли амакининг олдида илгаригидай бўйнини қисиб, бошини қуий солиб ўтирмасдан, худди қарзларини ортиғи билан узиб қўядиган одамдай дадил-дадил гапирмоқда эди. – Дунё дегани, Соли ака, Қизилкум саҳросидай бепоён экан. Лекин бир мақсадни маҳкам тутиб кетаверсангиз-кетаверсангиз, охири етаркансиз-ей. Мен ҳам етдим. Савдо-сотигим ўйлаганимдан ҳам яхши бўлди. Ўзингиздан қолар гап йўқ, мен савдонинг одамиман, ақчани ақчага уриб, соқقا қилишни озми-кўпми биламан.

– Сен ўрганган савдо билан бугунги савдонинг фарқи ер билан осмонча, бўтам. Сен давлатнинг олиб келиб берган тайёр молини қўйиб берган нархида сотиб ўргангансан. Ҳозир замон бошқа, молни ўзинг топиб кел-у, ўзинг сот. Харидор сен қўйган нархни ё қўтаради, ё қўтартмайди. Фойдаси ҳам, зиёни ҳам ўзингнинг гарданингга. Худойим, ол қулим, деса, боийиб кетасан, ўл қулим деса, тойиб кетасан.

– Ўлманг, оқсоқол, маълумотингиз олий бўлмаса ҳам, дунёнинг илмини сув қилиб ичиб юборгансиз-а.

– Ҳа, олий маълумотингни билмадим-у, лекин энг олий билимни домла эмас, ҳаёт беради, чироғим.

– Устозим – ҳаёт, денг?

– Шундай, бўтам.

– Мен бўлсанм устозингиз бошқа бирор деб юрарканман, – дея отам айёrona илжайди. Назаримда, у, устозингиз шайтон бўлса керак, демоқчиди. Буни Соли амаки ҳам фаҳмлади, шекилли, қошини чимириб, томоқ қириб қўйди.

– У ёқларда даромадли иш қўп дейишади, шуростми? – деди Соли амаки гапни бошқа ёқقا буриб. Чунки ҳозир аччиқлашиб ўтиришдан наф йўқ, ундан қўра сипо гаплар билан қарзини ундириб кетгани муҳимроқ.

– Э, нимасини айтасиз, иш дегани бижғиб ётибди. Лекин ишлайдиган одам йўқ. Бизда нима қўп – одам қўп, иш оз, иш топсанг, кўнглинг тўладиган иш ҳақи йўқ.

– Бизнинг ўғилтойга ҳам ўша ёқларда дурустроқ иш топилармикан?

– Ўғлингизни уринтириб нима қиласиз, Донабой ҳали ёш, ўқисин, ҳунар-пунар ўргансин. Бундай қараганда, ўғлингизга ҳунарнинг ҳам кераги йўқ. Ўзи сизнинг топган-тутганингиз бунга умрининг охиригача етади-ку.

– Нима, мени боғлаб бериб қўйибдими, беш кунлигим борми-йўқми, кейин қийналиб юрмасин, дейман-да.

– Қизиқ гапирасиз-а, оқсоқол, сиз ўлмайсиз, ҳали бизга ўхшаганларнинг нечтасини қўмасиз.

Бу мақтовми ёки кесатиқми, Соли амаки тушунолмади чоғи, дўпписини ечиб, бошини қашлади. Дониш пакана дастурхондаги охирги конфетни еб тугатай деганда отам нариги хонадан қофозга ўралган бир даста

пул олиб чиқиб Соли амакининг олдига қўйди. Амаки ўрамни очмасдан пулнинг салмоғини чамалаб кўрди-ю, юзи ёришди.

– Овинг анча бароридан келган кўринади, Шопўлатбой, – деди у отамни мақтаб.

– Насибага яраша, тақсир. Ҳа, овим ёмон бўлмади. Ҳарқалай, савдони билганинг қўли қуруқ қолмайди. Биринчи уринишга бу куттанимдан аъло десам ҳам бўлади. Энди йўл-йўриқни анча билиб олдим. Яна бироз пул тўплай, баҳорга чиқиб каттароқ юк билан жўнайман у ёқقا. Мана бу сизга хамир учидан патир. Қолган қарзларингизни қистамай турасиз-да энди. Кейинги гал боришимда сизникига ўхшаган қарзлардан элликтасини узадиган пул олиб келаман. Бир-икки сўм пул топиб, бурнига хода етмай юрган мишиқи савдогарларингизга ўшанда кўрсатиб қўяман савдо нималигини. Шопўлатнинг кимлигини бир билиб қўйишин.

Отамнинг катта гапларига ота-бола маҳлиё бўлиб ўтиришарди.

– Шопўлат, иним, агар пул зарур бўлса, мана буни ҳам олиб ишлатавер. Ўша катта пулни олиб келганингда фойдаси билан қайтарарсан. Мен, пулимни ҳозир берасан, деб оёқ тираб туриб олганим йўқ-ку.

– Э, йўқ, оксоқол, – деди отам Соли амакининг ичida нафс ўти яна ҳам аланга олганини кўриб, – ҳисобли дўст айрилмас, дейдилар. Қарзларимни оз-оздан узиб қўяверганим яхши, шунда ҳисоб-китобимиз тўғри бўлади.

– Шундайми, ҳай, майли, ўзинг биласан. Лекин мабодо пул зарур бўлиб қолса, тортинмай сўрайвер. Сен фойдаси билан қайтарадиган одамсан, мен сендейлардан пулни қизғанмайман. Ҳар кимдан ҳам пул олаверма. Биламан, кимлардан қарздор бўлиб юрганингни. Улар ғирт бетайин одамлар. Пулни беришга беришади-ю, кейин орқаворотдан гўрингга ғишт қалаб юришади. Сен олсанг, мана мендан ол. Биласан, мен қўли очик, кўзи тўқ одамман. Ахир, подшойи олам Хорун ар-рашид

ҳам молу давлатини савобга тиккан дейишади, агар рост бўлса. Бизнинг у зотдан қаеримиз кам, чироғим?

Соли амаки отамдан олган пулинни бағрига босиб, мамнун ўрнидан қўзғалди. Кўйинидаги пул уни бир қоп семиртирганидан димоғи чоғ бўлиб, эшиқдан ўзгача салобат билан чиқди. Улар кетгач, отам ҳам худди яна одамлар қарзларини сўраб келаверадигандек шоша-пиша кўчага отланди. Биз меҳмонлар кетганидан енгил нафас олиб, дастурхон ёнига ўтирган эдик. Кўнглим сезиб тургани шу эдики, онамнинг отам билан бир пиёла чой устида гаплашиб ўтиргиси бор эди. У чойни бошқатдан дамлаб, тез-тез қайтарарди. Унинг бундай ҳаракатлари отамнинг парвойига ҳам келмасди. Онам унга деб чой қўйди-ю, лекин пиёла қўлида қолди. Отам бир сўз демай, ташқарига йўл олди. Она-бола кўнглимидан кечаётгандарини бир-бири мизга билдирамаслик учун чойни узун-узун ҳўплардик.

Отам шу кетганича кечаси алламаҳалда қайтиб келди. Яна ичкиликнинг кўланса ҳиди анқий бошлади – эски ҳаммом, эски тос. Сезгиларим алдамаган экан: кеча унинг юзида намоён бўлган нимтабассум бир лаҳзалик зарурият бўлган, у бизни соғинмаган, бу туйғу кўнглиниң кўчасидан ҳам ўтмаган, у бир қатра ҳам ўзгармаган эди. Яна аввалги ҳаётимиз қайтадан бошланди – биз отамни эрта тонгда индамасдан уйдан чиқиб кетаётгани-ю, тунда маст ҳолда оёқлари чалкашиб кириб келганини кўрардик, холос. Отам шу аҳволида гўё бу уйда ижарада яшаётган сўққабош одамни эслатарди. Менинг хаёлимда, биз ҳам онам иккимиз қайсиdir бегона жойларга бошимиз оғиб келиб қолганмиз-у, мажбурлиқдан мана бу одам билан битта ижара уйда яшашга маҳкум этилгандекмиз.

Бу ёқда қишининг ҳавоси ҳам одамни эрмак қилгандек кунда-кунора алмашиниб туради. Гоҳ қуёш чараклаб баҳорни эслатиб қолади, гоҳ қор бўралаб ёғиб,

бўрон кўтарилади. Совуқ забтига олган пайтларда уйни иситишга қийналиб қоламиз. Отам эса пинагини ҳам бузмайди, қорни ғарч-ғурч босганича чиқиб кетади-да, бошидаги қуён мўйнали телпаги-ю, қалин пўстини оппоқ қорга беланиб қайтади. Унинг заррача совқотмаётгани, қайтага иссиқдан бўғриққани чироқ ёруғида қип-қизил бурни устидаги тер томчилари йилтиллаётганидан ҳам билиниб турарди. У баъзида икки-уч кунлаб уйга келмайдиган ҳам бўлиб қолди. Мен-ку, ташвишланмас эдим, аммо онам хавотирланаб қийналарди. Ўзини ухлаганга солса ҳам, лекин “тиқ” этган товушга қулоқ тутиб ётгани менга аён эди.

* * *

Кўкламнинг боши серёмғир келди. Деярли ҳар куни эрталаб мактабга етиб боргунимча уст-бошим ҳўл бўлиб кетади. Лойгарчин йўллардан юриб борганим боис ботинкамнинг турқига қараб бўлмай қолади. Мактаб ичкарисига киришдан олдин тарновдан тушаётган ёмғир сувидан ҳовучимга олиб ботинкамни обдон юваман. Кейин синфхонага кириб, камзулимни партамнинг суюнчиғига илиб қўяман, бироз турса қуриди. Лекин ҳўл бўлиб кетган бўлса ҳам рўмолимни ечмайман, ахир, у танимнинг ажралмас бир бўлаги бўлиб ултурган-да. Болаларга қарасам, бу йилги баҳор аввалгиларидан фарқлидек кўринади қўзимга. Синфдошларимнинг юриш-туришлари анчагина ўзгарган. Ҳаммалари орастга кийинишган, ҳазил-мутобидалари ҳам ярашиқли. Мактабни битиришга яқинлашганимиз сари улар бир-бирларининг қадрини сеза бошлигаган эди, чамамда.

8 март куни ўғил болалар қизларни байрам билан табриклашлари ҳам ўзгача бўлди. Илгари ҳам ана шу байрам куни болалар қизларни табриклашарди, бироқ ҳаммани эмас. Ўзлари қизларнинг орасидан

кимларни маъқул кўришса, ўшанга совға беришарди – кимгадир ручка, кимгадир тирноқ бўёғи, яна кимгадир рангли қалам насиб этарди. Менга бундай сийловларни ҳеч қачон раво кўришмаган ва бундан асло хафа ҳам бўлмасдим. Санобар эса қандай совғаларни ёқтиришини, ким нима олиб келишини ўзи бирма-бир айтиб чиқар эди. Сўнгра бунинг эвазига Наврўз байрами арафасида бир қути ширинлик олиб келиб, барчани меҳмон қиларди. Бу гал қизларнинг биронтаси совғадан бебаҳра қолмади, ҳаттоки мен ҳам. Менга китоб совға қилишди. Кўзларимга ишонмай, атрофга жовдираб қарадим. Ҳаяжонланганимдан раҳмат айтиб қўйишни ҳам унугибман. Кўлимдаги китобнинг аввал муқовасига кўз ташладим: Алишер Навоийнинг “Фарҳод ва Ширин” достони. Бу китоб уйимизда бор, кўп марта ўқиганман. Лекин совға деб олганинг барабир бошқача бўлар экан. Китоб қайта-қайта ўқилган, чамамда, бироз уринган, муқовадаги сурати ҳам хиралашган, аммо нима бўлганда ҳам у мен учун ҳар қандай янги буюмдан кўра аълороқ совға бўлди. Менинг китобларни жону дилимдан яхши кўришимни билишганини айтмайсизми. Сўнг китобнинг ичига нигоҳ ташладим. Муқованинг ички томонида табрик сўзлари ҳам ёзилган экан: “Байрам билан чин юракдан табриклайман, Марям. Болаликда шўхлик қилиб, кўп бора ранжитганларим учун кечир. Қандай дилхираликлар ўтган бўлса, ҳаммасини унугишингни истайман. Синфдошлигимиздан фақат яхши хотиралар қолсин. Хурмат билан Аброр”. Китобни бағримга маҳкам босдим. Ҳурсандлигимдан сал бўлмаса йиғлаб юборай дедим. Қувончим ичимга сиғмай, ҳамма болаларнинг юз-кўзларига қарайман. Мен ростдан ҳам уларни таниёлмай қолган эдим. Фақатгина Санобарни таниб турибман. У ҳам ҳар кунгидан-да гўзал, ораста бўлиб келган, бироқ негадир барибири ҳар доимгидек таниш

туюлаверди. Унинг қучоғи совғаларга түлди. Кимдир ҳатто момиққина қўғирчоқ ҳам берибди. У шодликдан гул-гул яшнар, болаларнинг ҳар бирига чиройли табассум билан раҳмат айтишдан тўхтамас эди. Қизлар эса ҳаммалари совға олган бўлсалар ҳам, унинг қўлидаги бир-биридан чиройли нарсаларни қўришга ошиқишар, авзойларидан ҳавасдан кўра кўпроқ ҳасад қилишаётганга ўхшарди.

Кун бўйи кайфиятим чоғ бўлди. Танаффусларда қўлимдаги буюк муҳаббат достонини вараклаб, пи-чирлаб ўқишига чоғланаман. Навбатдаги дарсга қўнгироқ чалинганда ҳам ундан қўзимни узгим келмайди. Фақат муаллимимиз синфга кирганидан кейингина китобни аста ёпаман, шунда ҳам унинг муқовасидаги расмидан нигоҳимни узмайман. Мен бугун жуда баҳтиёр эдим. Мактабдан уйга келгунимча ҳам китобни қўлимдан қўймадим. Уйга келиб, китоб муқоваси ичидаги ёзувни такрор-такрор ўқигим келаверди: "...синфдошлигимиздан фақат яхши хотиралар қолсин". Ҳар ўқиганимда юрагимни ўртаб юборарди бу сўзлар. Аммо яхши хотираларнинг ўзи бормикан? Нега шунча уринсам ҳам, биронта яхши воқеа эсимга келмаяпти? Майли, барибир ҳам шу ишни ўз вақтида қилдинг, мана шу гапларни айни мавридида айтдинг, Аброр. Агар мактабни тугатиб кетганимиздан кейин узр сўраганингда, эҳтимол кечирардим-у, аммо дилхираликлар юрагимдан бутунлай ювилиб кетмас эди. Ҳозир эса неча йиллардан бери ўтган кунларимга соя ташлаб турган пардалар очиб юборилгандек, қалбимга азоб бериб келган хўрликлар, изтироблар бирлаҳзада сувларга оқиб кетгандек дилим равshan тортиди. Шу кунгача мактаб билан тезроқ хайрлашишни, бу ердан узоқлашишни ва дилимга озор берган ҳамма-ҳаммани унутиб юборишни ўйлаб шошилар эдим. Лекин энди ўқишлиаримиз охирлаётгани хаёлимга

келган сари шошқалоқ вақтнинг секинроқ одимлашини жуда-жуда истаяпман. Кейинроқ, орадан анча кунлар ўтиб, менга берилган бу совғани ва ҳатто ичидаги табрикномани Назира муаллима йигитларга тайинлаб ташкил қилганлигини қизлар гап орасида билиб-бilmай айтиб қўйишидди. Муаллима шундай қувончли байрамда мени ажратиб қўйишларини хоҳламаган. Бироқ барибир хурсанд эдим.

“Фарҳод ва Ширин” китобларим орасида иккита бўлди. Икковини ёнма-ён қўйиб, галма-галдан варақлайман. Унисидан бир саҳифа, бунисидан икки саҳифа ўқиб, тунни ярим қилдим. Тонгни ҳам шу дoston завқи билан оттирдим. Мактабда ҳам тушгача хуш кайфиятда юрдим. Тушдан кейин эса мактабга суратчи келганини айтишидди. Унинг келишини ҳамма болалар кеча билишган экан-у, бироқ мен хурсандчилик хаёллари билан овора бўлганимданми, эшитмаган эканман. Бугун ҳамма қизларнинг чиройли кийиниб, сочларини бошқача турмаклаб келгандарини қўриб, ҳали ҳам кечаги байрам шодлиги давом этаётгани учун бўлса керак, деб ўйлабман. Аммо... кеча билганимда нима ўзгарар эди? Синфдошларимга ўхшаб янги қўйлак кийиб, соchlаримга, юз-қўзларимга оро бериб келармидим? Қаердан олардим ўша чиройли қўйлакни? Ўзимга оро беришга менда имкон қайдада?

Охирги дарс ўтилмади. Ёп-ёруғ бўлгани учун бизни ўқитувчилар хонасига чақиришиди. “Ҳамма эшик олдида тайёрланиб турсин, ичкарига битта-битта кирасизлар, “винетка”га суратга тушираман”, – деди суратчи. Бу кўхна одат эканлигини ҳаммамиз яхши биламиз. Мактабни битириб кетаётганлар эсадлик учун ана шундай жамланган суратга тушишади. Кимлар бизнинг устозларимизу синфдошларимиз бўлишганини шу суратга қараб, бир умр эслаб юрамиз.

Йигитлар қайсиdir бири олиб келган бўйинбоғни алмашиб тақиб, навбат билан суратга тушишар, қизлар эса бир-бирларининг соchlарини бошқатдан тўғрилашар, юзларига упалар суртиб, кўзгуни талашишар эди. Табиийки, қизлар ичидан энг биринчи бўлиб Санобар суратга тушди. Унинг суратга тушиши инжиқ киноактрисанинг кинога тушиши билан баробар бўлди. “Э, бўлмади, яхши чиқмади, кўнглим тўлмаяпти, бошқатдан олинг” деявериб суратчиниям хуноб қилиб юборди. Биз, навбатда турганлар эса унинг чиқишини кутавериб, зерикib кетдик. Ниҳоят, Санобар ичкаридан чиққанида ҳаммамиз жўр бўлиб “хайрият-е” деб юбордик. Галим келганида мен ҳам хонага кириб, оппоқ девор ёнидаги курсига бориб ўтирдим. Суратчининг курсига тўғрилаб қўйилган ёриткичлари кўзимни қамаштиради. Суратчи фотоаппаратининг у ёқ-бу ёғини бураб бўлгач, менга кўзи тушиб, бир зум ҳайрон бўлиб қараб қолди. Мен эса хижолат бўлиб ўнғайсизландим.

- Шундай ўтираверасанми? – деди у ҳамон осмондан тушган ғайриоддий жонзотни кўргандек кўзини лўқ қилиб.

- Қандай? – дедим тушунолмай.

- Рўмолингни ечиб қўй, пардоз-андоз қилиб, сочларингни ёйиб-тара. Кейин... кўйлагинг ҳам расмга яхши чиқмайди.

- Йўқ, – дедим шартта гапини бўлиб, – мен пардоз қилмайман, рўмолимни ечишни ҳам, бошқа кўйлак кийишни ҳам хоҳламайман. Қандай бўлсан, шундай-лигимча суратга олаверинг.

- Ё тавба, бунаقا ўжар қизлар тўпланган синфни биринчи кўришим. Нега қайсарлик қиласан? Ахир, сен бу кўринишингда бутун бошли винеткани бузасан-ку...

Суратчининг гапи оғзида қолди. Мен шахт билан ўрнимдан турдим. Нафасим бўғзимга тиқилди. “Мен

суратга тушмайман", – дедим-да, ташқарига отилдим. Ортимдан синфдош қизлар ҳай-ҳайлаб қолишиди. Шамолдай учиб, мактаб ҳовлисидан чиқиб кетдим. Уйга қандай етиб келганимни ҳам билмайман. Кўзларимга ёш қалқиб чиқмасин, деб чуқур-чуқур нафас олардим. Эшикдан киришим билан онам менга бир қаради-ю, кашта тикишдан бир дам тўхтаб қолди.

– Нима бўлди, Марям, аҳволинг яхшими? – дея хавотирланиб сўради.

– Ҳеч нарса бўлгани йўқ, бироз чарчадим, – дедим-да, уйга кириб, кийимларимни алмаштиридим.

Шу пайт кўча эшигимиз олдига бир машина келиб тўхтади. Отам улфатлари билан келган бўлса керак, деб ўйладим. Чунки бир неча қундан бери отам уйга келмаётган эди. Қаерларда юрганини ҳам билмаймиз. Машинада отам келмаган экан. Эшик очилиб, башанг кийинган бир аёл билан мен тенги бир қиз киришди ва гўё бу ҳовлига аввалдан келиб юргандек бамайли хотир келаверишди. Онам иккимиз шоша-пиша уйдан чиқдик. "Келинг, опа", – деди онам бу нотаниш аёлни таниёлмай салом бераркан. Аёл ҳам, қизи ҳам саломимизга алик олмай, қошлирини чимириб аввал онамга, кейин менга ижирғанган кўйи ёвқараш қилишди. Но-таниш аёлнинг эгнидаги кийимлари камалакдек товланиб турар, ўзига ҳафсала билан оро берган, соchlари калта, лекин чиройли таралган, кўлида қимматбаҳо сумкача, ҳамма нарсаси ўзининг кибру салобатига ярашиб тушган эди. Ёнидаги қиз ҳам зеболикда ундан заррача қолишмас, боқсан одам уларга суқланмай қарай олмасди. "Оҳ, одамлар бунча гўзалликни қаердан олишаркан? Яратган ризқни барчага баробар сочмаганидек, ҳуснни ҳам фақат суйғанларига ҳадя этади чоғи? Уларга тортиқ қилинган шунча ҳусну латофатнинг четидан бир чимдимгина биз бечораларга ҳам

илинса қанийди” дея уларга тамоман маҳлиё бўлиб, оғзим ланг очилиб қолибди.

- Сиз экансиз-да, эски уйимнинг янги бекаси, - деди аёл. Хаёлим “чирт” бўлиниб, ўзимни ўнгладим. - Эрингизнинг аввалги хотини бўламан. Йўлим тушган эди, йўл-йўлакай бир пайтлар ўзим яшаган уйга ҳам бир кириб ўтгим келди. Мана, ҳаммаси ўша-ўша, ҳеч нарса ўзгармаган, шунча йиллардан бери ҳатто битта тош ҳам у ёқдан бу ёқقا олиб қўйилмаган. Вақтида қўлимни ювиб, қўлтиғимга урган эканман. Бу ердан кетаётганимда қизларим ҳали кичкина эди, мана, катта бўлиб қолишидди. Биз ҳозир шаҳарда яшаймиз, ҳамма нарсамиз етарли, бу жойларни асло соғинмайман ҳам. Сиз бўлсангиз... қандай чидаб яшаяпсиз?

- Бу нима деганингиз? - деди онам хомуш тортиб.

- Билишимча, ҳозиргача ҳам никоҳдан ўтмаган экансизлар. Эрингизнинг кўнглига йўл тополмаб-сиз-да? Наҳотки шу ботқоққа ўхшаган жойда яшашга ўз ихтиёргиз билан кўниккан бўлсангиз?

Онам бўрининг пойидаги қўзичноқдек ожизларча унга қулоқ тутиб турарди. Биз ростдан ҳам уларнинг олдида ҳар жиҳатдан ожизга ўхшар эдик. Шуни сезганим заҳоти кутилмагандан юрагимда бир ғалаён кўтарилиди. Ўзим ҳам тушуммаган бир куч пайдо бўлди.

- Бизни камситиш учун келдингизми бу ерга? - дедим нафратимни яширолмай.

Аёл ялт этиб менга қаради. Онам гапимдан саросимага тушиб, мени тинчлантироқчи бўлди.

- Ўзингиз билан олиб келган қизингизми? - деди аёл истеҳзоли жилмайиб. Қизи унинг қулоғига нимадир деб шивирлади. - Унинг юзига нима қилган? - Онам индамай ерга қаради. - Лекин тили ўткир экан, камбағал бўлсанглар ҳам. Кўрдингизми, бошқа болали ҳам бўлмабсизлар. - Аёл, шу ҳам яшашми, дегандек ҳамон бизга ҳам ачиниш, ҳам ижирғаниш билан қарап-

ди. – Тұғриси, сизга бир ғапни айтиб кетиш учун бурилдим бу ҳовлига. Эрингиз, яъни менинг собиқ эрим аввал бошидаёқ шаҳарга изимдан әргашиб борганида кўзимга бошқа кўринмаслигини тайинлаб, орани очиқ қилган эдим. Лекин ҳали ҳам уйимнинг атрофида изғиётган экан, қўшниларим айтишди. Сиз шунча йилдан бери у билан яшаб, қолган умрингизни ҳам шу оиласа бағишилаган экансиз, унга айтинг, энди менинг уйим атрофида тентираб юрмасин. Бўлмасам, менга ҳам, қизларимга ҳам, ўзига ҳам жабр қилади.

Бу онам иккаламиз учун саратонда чақмоқ чаққандай ғап бўлди. Онам нима дейишини билмай, аёлга қаттиқ тикилиб қолди. Чақирилмаган меҳмонлар шу ғапни айтишди-ю, ортларига қайтиб кетишди. Онами эса қалтироқ тутди. Уйга суюб олиб кирдим-да, бир пиёла сув бердим. Ичган суви кўзларидан ёш бўлиб оқди. Энди билдим, отамнинг нима учун гоҳида бир неча кунлаб уйга келмай қаёқларда санқиб юрганини. Ўз уйидан узоқда, бегона кўчаларда қай аҳволда сандироқлаб юргани кўз олдимдан ўтаверди. Нафақат жисми, ҳатто ички олами ҳам кўзимга кундай ёрқин кўринмоқда эди. Нима ўйда, не хаёlda, у ёқларга борган бу одам – энди менга ҳаммаси аён. Негаки энди ёш қизалоқ әмасман. Ё эрта улғайдим, ё мен тенгиларнинг ҳаммаси унча-мунча ғапларнинг мағзини тезда чақа оладиган бўлиб улгуришган. Ўйлашимча, мен илғаган синоатни онам ҳам дарров тушунди. Шунинг учун ҳам унинг бутун дунёси қоронғи бўлди, тушкунлик уни ўз домига тортиб кетди. Нега келди ўзи бу аёл? Шундоқ ҳам туманли бўлган турмушимизни остин-устин қилиб кетиш учунми? Ёки ўзининг умидсиз турмушдан воз кечиб, орзусидаги тўқис ҳаётга етишганини кўз-кўз этиш учунми? Мана, ҳеч қандай шовқинсиз, ҳақоратлашу юзга чанг солишларсиз ҳам одамни моматалоқ қилиб ташласа бўлар экан. Танноз хоним

юмшоққина гапириб, устимиздан кулиб кетди. Онам иккаламизнинг дилимизни вайрон қилди. Ундан кўра ошкора таҳдид қилиб келмайдими? Кейин бир-биримизнинг соchlаримизни юлиб, дод солмаймизми? Шунда, балки, аламимиз ичимиизда қолиб кетмасди, эҳтимол, анча енгил тортган ҳам бўлар эдик. Улар бўлса ўз ёғимизга ўзимизни қовуриб кетди. Инсон боласи ҳам шунчалик шафқатсиз бўладими?

Эртаси куни мактабда яна кун бўйи ҳамманинг эътиборида мен бўлдим. Кеча суратга тушмай кетиб қолганим учун синфдагиларнинг ҳаммаси мендан ранжишган эди. Суратчи: “Битта одам учун яна овора бўлиб келиб юрмайман”, – деган эмиш. Токи мен ўзим суратхонага бориб, очиқ юз билан суратга тушмагунимча ўша савил қолгур винеткани ҳам тайёрламас экан. Қизлар мени койишгани-койишган. Ўғил болалар ҳам ҳар хил пичинглар қила бошлишди. Ҳатто муаллимлар ҳам мени аврамоққа тушишди. “Майли, ҳозироқ бориб суратга тушиб келаман, фақат рўмолим билан тушаман” деб қайсарлик қилиб туриб олдим. Муаллимлар бунга кўнишмади. Таълим идорасидаги раҳбарлардан балога қолишармиш. “Улар ҳам одам, уларга ҳам тўғри тушунтиrsa, албатта, тушунишади-ку” дедим. “Агар билсанг, уларга бир гапни уқтиргунча она сутимиз оғзимизга келади. Ҳамма нарса фақат юқоридан пастга юборилишига кўникиб қолганмиз. Пастдан юқорига бирор гапни етказиш эса шовуллаган оқимга қараб сузаман деб беҳуда чираниш билан баробар”, – дейишиди. Лекин мен барибир кўнмадим. Охири ўша винеткаларини менсиз чиқарадиган бўлишди. Хайрият, енгил нафас олдим. Бир ҳисобдан жуда яхши бўлди. Майли, мени шу синфда ўқимаган деб ҳисоблаб қўяверишин. Шундоқ ҳам бу болалар билан қадрдон эмасмиз, шунчаки синфдошмиз, холос. Эслаб юрадиган яхши хоти-

раларимиз ҳам деярли йўқ. Сурат деганига чиройи киройилар тушсин-да. Бизга ўхшаганларга бундай нарсалар аллақачон бегона бўлиб кетган.

Танаффусда одатдагидай ёлғиз ўзим ташқарида айланиб юрдим. Куюи синфлардаги болалар шовқин солиб ланка ўйнашаётган экан, томоша қилиб туриб, завқим келиб кетди. Болалигимда мен ҳам ўйнаб кўрганман бу ўйинни. Болалар эчкининг терисидан тангадайгина қирқиб олиб, сўнг тагига кўрғошинми, тоши ми, бир балони ёпишириб, ким кўп тепишга баҳс бойлашиб ўйнашар эди. Нотўғри тепган одамнинг оёғи оғрийди. Айниқса, ўша кўрғошин тўпиқقا тегса борми... Менинг ҳам тўпигим шишиб кетган эди. Ўшандা билганман, бу қиз болаларга тўғри келмайдиган ўйин эканлигини. Ўғил болалар эса шундай маҳорат билан тепишадики, гўё лазгига рақс тушаётгандек одамни қизиқтириб қўяди. Ҳозир ҳам болаларнинг чуғурлашиб ланка тепишлари эски даврларни эсимга солгани учунми, анча вақт томоша қилиб турдим. Синфдош қизлар эса дераза ёнига туриб олишиб, бир-бирларининг соchlарини тўғрилашар, кафтдеккина битта ойнага галма-галдан қарашар эди. Улар билан байрам баҳонасида эндинга орамиздаги масофа яқинлашэтгандек туюлган эди менга. Сурат воқеасидан кейин бу яқинлашув яна пароканда бўлди, назаримда.

* * *

Бир неча кунлик бедараклиқдан кейин отам яна кўриниш берди. Мактабдан келганимда уй ичкарисида онам юрагига йиғилиб қолган гапларни айтиётган, отам эса унинг ҳар бир гапига ўзининг баҳоналарини рўйчилиб ўшқирмоқда эди. Уларнинг гапларига аралашмаслик учун ўчоқхонага кирдим-да, даҳанаки тортишувлари тугагунча кутиб ўтирдим.

– Э, ҳамманг қирилиб кет, – дея қичқирди отам ниҳоят ва эшикни қарсиллатиб ёпганча құчага чиқиб кетди.

Уйга кирсам онам шүрлик йиғлаб ўтирган экан. Ёнига чўккалаб, юпатмоқчи бўлдим.

– Биз нима ёмонлик қилганмиз отангга, қизим? – деди онам кўз ёшларини тўхтатолмай. – Мана шу турмушимиз тинч бўлсин, деб ҳамма орзуларимдан воз кечган эдим. Борига ҳам, йўғига ҳам чидадим. Оч қолган кунларимизда ҳам бировдан нон тиланмадим. Бу киши бўлса...

Онамни юпатмоқчи бўламан-у, аммо ўзимнинг ҳам ичимни дард тирнайди. Ахир, нега онамга чиройли турмуш насиб этмаган? Нега у фақат қайғуга кўмилиб яшаши, ҳаёт завқларидан бенасиб ўтиши керак? Ёки буларнинг бари синовмикан? Унда нима учун тақдирнинг синовлари бунчалар чўзилиб кетган? Одамзод бардошининг ҳам, умрининг ҳам чегараси борлигини тақдир унутиб қўйган чоғи?

Отам кечқурун улфатлари билан келганида ҳаммалари ширакайф эди. Кўчадаги ўтиришлари маромига етмаган кўринади, чаласини уйимизда давом эттиришмоқчи экани билиниб турибди. Бирининг қўлида бир шиша ароқ, бошқасининг қўлида елим халтага солинган шўр бодринг. Улар бир-бирларига суюниб, уйга киришди. Онам икковимиз ошхонага ўтдик. Онам уларнинг олдига дастурхон олиб кирди. Кейин чой дамлаб берди. Мен бўлсам бу бетайн одамлар ўтирган уйга қадам босгим келмасди. Улар ярим кечагача мижғовланиб ўтиришди. Биз эса ўчоқхонада деворга суюниб мудрардик.

– Ая, – дедим қаттиқ уйқум келганидан кўзларим юмилиб, – бизга мана шу уйдаги файзсиз ҳаёт жуда зарурми? Ёки сизга умр йўлдош, менга ота бўломмаган анави одамдан қарзимиз борми? Бизнинг бору йўқлигимиз унинг парвойига ҳам келмайди-ку.

– Ундей дема, Марям, – деди онам барибир отамнинг ёнини олиб. – Одам боласи хом сут эмган банда. Ҳаётда ҳамма ҳам хато қилади.

– Икковимиз бу ерлардан бошимизни олиб, узоқларга кетсак бўлмайдими? Шундоқ ҳам ўз тириклигимизни ўзимиз қилиб келяпмиз. Ҳадемай менинг мактабдаги ўқишларим ҳам тугайди. Кейин мени ҳам, сизни ҳам бу ерда боғлаб турадиган ҳеч нарса қолмайди.

– Қаёққа ҳам кетамиз, қизим, шу ер бизнинг уйимиз, охирги маконимиз бўлиб қолди.

– Барибир кетганимиз маъқул, ая, қайтага ҳаммаси яхши бўлади.

– Саргардонлик азобини мен кўрганман, қизалоғим. Эсласам, ҳали ҳам юрагим эзилади. Уйимиз, бош уриб борадиган оstonамиз йўқ эди, йўл кўрсатадиган яқинларимиз ҳам бўлмаган. Укам икковимиз кўрган кунларни худойим ҳеч бандасининг бошига солмасин.

- Ўша сизнинг укангиз, менинг тоғам ҳозир қаерда?
- Бу ерлардан узоқ юртларда.

– Унда жуда соз, биз ҳам кетайлик ана ўша узоқ юртларга. Тоғамга яқинроқ яшаймиз. Ҳар ҳолда, керак пайтда суюнчиқ бўладиган яқинимизнинг ёнида бўламиз. Бу ерда кимимиз бор? Ҳамма бегона, ҳамма бизни камситади. Бир уйда яшайдиган оиласиз боши ҳам биздан жирканади. Фақат ўзи билан ўзи овора. Унга биз ҳеч киммиз.

– Балким, тўғри айтиётгандирсан, лекин бирон нарса ўйлашга кечикдик. Поезд аллақачон кетиб бўлган, энди унинг ортидан юргургандан маъни йўқ. Яқинда отанг яна савдо иши билан узоқларга кетади. Топиб келган бор пулларини ўшанга сарфлабди. Соли амакингдан ҳам, бошқалардан ҳам қарз олибди. Майизми, пиёзми, нималардир йиғиб юрибди. “Энди йўлни билиб олдим, аввалгидан анча кўпроқ нарса олиб

бораман", – деяпти. Қоп-қоп пул топиб келишни күзлаб кетяпти. Майли, бизга фойдаси тегмаса ҳам, омон бўлсин. Кейин сен билан мен кенг ҳовлида бир қуни-мизни кўриб яшайверамиз.

– Мен-ку, хотиржам яшарман, аммо сиз яна отамдан хавотир олиб кун санайсиз.

– Йўқ, энди хавотир олмайман.

Уй эшиги қарсиллаб кетди. Отамнинг ўртоқлари бирин-кетин оёқлари чалкашиб, ташқарига чиқишиди. Отам уларни кўча эшиккача кузатиб қўйди. Биз уйга кириб, дастурхонни йиғиштирдик. Уй ичи сигаретанинг қуюқ тутунию ароқнинг қўланса ҳидига тўлган экан. Нафасим бўғилиб, йўталиб қолдим. Ҳайронман, бу одамлар қандай нафас олишаркан? Эшикни ланг очиб, уйни шамоллатдик. Отам зўрға қадам ташлаб қайтиб келди. Нимадир демоқчи бўлди-ю, лекин гапиролмади. Кейин кўрпача устига таппа ташлаб ухлаб қолди.

Шу оқшом кўзларимга уйқу келмади ҳисоб. Алла-маҳалгача дарс тайёрладим. Кейин дераза олдига ўтириб, ташқарига назар ташладим, ҳамма ёқ зим-зиё. Боя милтираб турган юлдузлар ҳам булувлар ортига беркиниб олибди. Тун шунчалар зерикарлики, ҳатто ёлчитиб хаёл сургинг ҳам келмайди. Нега уйқум қочганига ҳайрон бўламан. Балки, ҳаво етишмаётганми-кан? Димофимга ҳали ҳам папирос тутуни аралаш ароқ ҳиди урилаётганга ўхшайди. Хаёлимда бу қўланса ҳид фақат димофимга эмас, уст-бошимга, мана бу пардага, кўрпаю ёстиқларга, деворларга ҳам ўрнашиб қолган-дек. Сукунат ютиб юборай дейди. Нафас олаётганим қулоғимга баралла эшитиляпти. Чироқ шуъласида ўтирганим боис бўлса керак, деразанинг нариги то-монида қуюқ қоронғиликдан бошқа нарса кўринмайди. Мойчироқнинг пилигини бироз кўтариб, қадрдон китобчамни олиб дуоларни бошдан-адоқ қайта-қай-

та ўқийвердим. Ҳар бир дуони ўқиганимда илтижоларимни ҳам пичирлаб қўшиб турдим. Ўзимдан ҳам кўра шу китобчани берган болакайнинг ҳаққига кўпроқ ниятлар қилдим. Ҳозир у ҳам кап-катта йигит бўлиб улғайгандир. Қаерлардадир ўқиб ёки каттагина ишларнинг бошини тутиб, дунёнинг ташвишлари билан банд бўлиб юргандир. Балки қачондир яна бу ерларга йўли тушар, агар бутунлай ёдидан кўтарилиб кетмаган бўлсан, кўришиб қолармиз. Мен унга мана бу китобчани кўрсатаман, эсидан фаромуш бўлган бўлса ҳам, шундан сўнг албатта эслайди. Устимдан роса кулса керак, шу китобни ҳали ҳам кўтариб юрибсанми, деб. Майли, кулаверсин, унинг кулгусида ғубор йўқ.

* * *

Мартнинг охирги шанбасида қишлоқ аёллари ийғилишиб, сумалак пиширадиган бўлишибди. Бизни ҳам айтишган экан. Онам: "Шу сумалакка сен бориб кела қол, Биби. Менинг оёқларим қақшаб оғрияпти, – деб керагича ун ва ёғни идишларга солиб берди. – Бу бизнинг қўшандамиз, Маъмура холангга бер". Ҳали кундузлари ҳаво илиб, турли, туман қўнғизчалару ёввойи асаларилар учиб юрган бўлса ҳам, кечқурунлари шудринг тушиб, салқин шабада этни жунжиктирас эди. Мен кечаси ҳам у ерда қолишимни ўйлаб, пахтаглимни олиб олдим.

Отам бугун кўчадан эртароқ қайтди. Ўзи билан бирга келган бир нотаниш одамга ичкаридан қоғозга ўралган ғиштдек нарсани олиб чиқиб берди. Чамамда, пул бўлса керак. Эшик олдида нималарнидир гаплашиб, қоғозга алланималарни ёзиб, узоқ ҳисоб-китоб қилишди. Назаримда, отам қандайдир жиддийроқ ишга тараддуд кўраётган эди. Ҳалиги киши кетгач, отам менинг қаёқقا отланаётганимни сўради. Сумалакка бораётганимни айтдим. У индамасдан қўл силтаб, уйга кириб кетди.

Сумалак қилинаётган жой аллақачон сайлгоҳга айланиб кетган экан. Маъмурा холанинг ҳовлиси қишлоқнинг юқорироғида, шундоққина сой ёқасида. Ҳовли дарвозаси ланг очилган, одамлар гавжум, ҳар ким бир юмуш билан банд. Усталар сой қирғонин кавлаб ерўчоқ қуришяпти. Йигитлар атрофдаги ҳовлилардан, сойнинг нариги томонидаги чакалакзордан шох-шаббаларни, ғўлаларни олиб келиб ўтин ғамлашаяпти. Қизлар ундирилган буғдойни янчишмоқда. Хотинлар уларга ўргатиб туришибди. Гулсум лапарчи доира чалиб хотинларни ўйинга тортаяпти. Қизлар орасида синдошларимни кўриб, қувониб кетдим. Санобар билан Муниса бир-бирларининг қошларига ўсма қўйиш билан овора. Ҳусния, Гулнора, Чарос ва Турсуной бўлса буғдой янчаяпти. Олиб келган нарсаларимни Маъмурा холага бериб, қизларнинг ёнига бордим.

– Келганинг яхши бўлди-да, Марка. Ма, мана бу буғдойни ўзинг янч, сен бундай ишларга устасан. Энгашавериб белим оғриди, – деди Гулнора қиймалагичнинг ёнидан нари сурилиб. – Э, қариган чоғингда бунақа ишларга ярамай қоларкансан,вой, белим-ей.

Қизлар қийқириб кулишди. Бундай чиройли ҳази́лу кулгидан мен ҳам яйраб кетаман. Қизларнинг ёнига ўтириб, дарров ишга киришдим. Усталар ўчоқни қуриб бўлиб, иккита дошқозонни ўрнатишли. Ўтинчилар олов ёқишига тараддуздланишли. Биз супрамизни қозонга яқинроқ жойга олиб бориб ўрнашдик. Гулсум лапарчининг овози яна бир парда кўтарилиб, доирасининг зарби авжига чиқди. Ўスマларини эндириб бўлган Санобар билан Муниса ҳам хотинларга қўшилиб ўйинга туша кетишли. Айниқса, соchlарини ёйиб олган Санобарнинг чиройли рақсга тушиши ҳамманинг ҳавасини келтираётгани шундоққина билиниб турарди.

Кутилмаганда қаердандир Дўсан девона пайдо бўлди-ю, кўпчиликнинг нигоҳи унга қадалди. Ўчоқ-

ни қуриб бўлиб, уст-бошидаги чангларни қоқаётган усталардан бири унинг қўлидан шартта ушлаб ўйинга торта кетди. Девона ҳам худди шуни кутиб тургандек беўхшов тиржайиб, бесўнақай ўйинга туша бошлади. Санобар билан Муниса девонанинг кир-чир бўлиб кетган кийимлари, йиртиқ калиши, туллаган телпаги ва афтодаҳол ранг-рўйидан ижирганиб, ўзларини четга олишди. Буни кузатиб турган қизлар чапак чалиб кулишди. Ёйилиб ўйнаётган хотинлар ҳам бирин-кетин четланишди. Даврада фақат Дўсан девонанинг ўзи қолди. Одамлар уни ўраб олиб, баралла чапак чалишарди. У эса одамларнинг завқу шавқ билан олқишлишларидан куч олиб, баттар эшилиб ўйинга тушарди. Сой ёқасидаги майдончамиз энди росмана байрам шавқига тўлди. Бу издиҳомга қўшилмаган ҳеч ким қолмади. Ҳассага суюнган мункиллаган кампирлар ҳам, пилдираబ юрган иштончан болакайлар ҳам – ҳамма-ҳамма олқишлиб чапак чалар, девона эса илжайганча сакраб рақсга тушар эди. Гўё айиқ ўйнатувчи айинин ўртага қўйиб юборган-у, ҳамма шу айиқни ўйнатиш учун зўр бераетгандек туюларди. Ёнимдаги қизлар ҳам қотиб-қотиб кулганча чапак чалишарди.

– Вой, тавба, шугина телбада ҳам кўнгил бор эканми? Унинг қувонишини-чи. Тузук-қуруқ гапиришни билмайди-ю, лекин ўйинга тушишни қойиллатиб қўяркан, – деди Ҳусния қула-кула.

Юрагим ачишиб кетди. Негадир мана шунаقا телбанамо, хору хас одамларни кўрганимда уларга раҳмим келаверади. Шундай одамларнинг устидан кулаётгандарни кўрсам хўрлигим келади, гўё менинг ҳам устимдан кулишаётгандек. Дўсан девонанинг ҳеч кими йўқ деб эшитганман. Қаерда яшашини ҳам, тўғриси, билмайман. Лекин гоҳ кўча-кўйда, гоҳ тўй ёки бирор маърака бўлаётган ҳовлилар атрофида учратиб қоламан. Гоҳида кўчадаги болалар уни эрмак

қилиб, ўртага олиб ўйинга туширишади. У эса болаларнинг айтганини қилиб девоналарча ўйинга тушаверади. Болаларнинг қийқиришларини кўриб, ўзи ҳам хурсанд бўлгандек кулади. Катта ёшли одамлар кўриб қолишса, болаларни қувиб солишади-да: “Бор, Дўсан, ўйингга кетавер”, – дейишади. Бирорга зиёни тегмайдиган бу мусичай беозорга одамлар эшикларидан гоҳ нон ёки бирон овқат, ёхуд эскирган кийимларини чиқарип беришади. Девона эса уларни ерга ағанагудек таъзим қила-қила олади.

Гулсум лапарчи доирани чертавериб қўллари қавариб кетганидан кейин, ниҳоят лапар айтишни тўхтатди. Ҳамма, лапарчи четда қолиб, Дўсан девонани олқишиларди.

- Яша, Дўсан.
- Баракалла, Дўсанбой.
- Кам бўлма, мазза қилдик...

Ё тавба, айтсам бирор ишонмаса керак, ростдан ҳам шу девона келганидан кейин даврадагилар бошқача жонлангандек бўлди. Ҳамма бирваракайига завқ олди. Ҳатто пўрим кийимиға гард текизмай, бўйинбоғ тақиб олган казо-казо одамлар байрам даврасига кириб келишганида қайнаб турган издиҳом бир лаҳзада муздай бўлиб қолган пайтларга шоҳид бўлганман. Мана бу ҳеч ким назарга илмайдиган рўдапо одамнинг эса ичиди нимаси борлигини билишга ақлим бовар қилмайди.

Хотинлар дарров нон ва егуликлар солинган бир тугунни олиб чиқиб девонага бериши:

– Мана буни ол, Дўсан, ўйингга борганда ейсан. Дуо қилиб тур, сумалагимиз тотли чиқсин.

Дўсан девона қайта-қайта таъзим қилиб, уйига rawona бўлди. Анчагина узоқлашганидан кейин ортига ўгирилиб қичқирди:

- Яхши одамло-ор, омон бўлингло-ор.

Девона кетди-ю, лекин у бошлаб берган завқ шуерда қолди. Сумалакчи хотинлар қозонларни обдон ювиб, бирин-кетин масаллиқларни солишиди.

– Келинглар, ҳой келинжонлар, қызлар, бу ёққа келинглар, қозонларни кавлаб турасизлар. Буларга тош ҳам солиши керак ҳали, бир ҳовучдан тош териб келинглар, – дейишиди улар.

– Тошни ўзимиз соламиз, – деди Гулнора.

Биз сойга тушиб, бедананинг тухумидек келадиган думалоқ, силлиқ тошларни териб келдик. Келинчаклар битта қозонни эгаллашди, биз, қызлар иккинчи қозонни олдик. Тошларни қозонга ташлаётганимизда Гулнора: “Тўхтанглар, қызлар, бу тошларга қўшиб ҳар биримиз биттадан ёнғоқ ҳам ташлаймиз. Шунаقا ўйин бор-ку. Сумалак пишганидан кейин навбат билан кавлаб кўрамиз. Ким ёнғоқни биринчи топса, шу биринчи бўлиб турмушга чиқади. Кимга ёнғоқ чиқмаса, у турмушга чиқолмайди”. Бу сирли ўйинни фақат қызлар билишади ва у ҳеч кимга билдирмай қызлар ўртасида ўйналади. Гулнора Маъмурда холадан олган ёнғоқларини биттадан бизга берди, қолганини эса нариги қозон атрофида куймаланишаётган келинчакларга бериб юборди. Таомилга кўра, биз қўлимиздаги ёнғоқни ичимида ният қилиб қозонга ташлашимиз керак. Ёнғоқлар сумалакка қоришиб, тагига чўқади ва тошларга аралашиб кетади.

– Қани, ким биринчи бўлиб ташлайди? – деди шивирлаб Гулнора. – Санобар бошлай қолсин.

Ҳа, албатта, ҳамма нарсани биринчи бўлиб Санобар бошлаб бериши синфдош қызлар орасида бузилмас анъянага айланниб бўлган. У ҳам бунга ўрганиб қолганидан ўсмали қошларини ўйнатиб, қозонга бир муддат тикилиб туриб, кейин ёнғоқни ташлади. Ундан сўнг биз ҳам бирин-кетин ният қилиб, қўлимиздаги ёнғоқларни қозонга ташладик. Бошқа қызлар ни-

маларни ният қилган бўлса, ўзларига аён. Мен бўлсам, парвардигор, кўпнинг қаторида мен ожиз бандангни ҳам бир чимдим баҳтдан бенасиб этма, онажонимга сиҳатлик баҳшида қил, дея тилагимни айтдим.

- Ҳой, жиблажибонлар, ёнғоқ ташлаяпсизларми?
- деб нариги қозонни кавлашга тушган келинчаклар қийқиришиб, ҳаммамизни чўчитиб юборишиди.

- Вой, пойлаб турғанмидинглар, ўзларингиз ҳам ўйнагансиз-ку. Сизлардан ўрганганларимизни қила-миз-да, - деди Гулнора.

Қозон атрофига ўтириб, уни навбат билан кавлай бошлаганимизда қуёш ботиб, сокинлик чўкаётган эди. Илиқлик ўрнини салқин ҳаво эгаллади. Эркаклар ўзларига айтилган ишларни бажариб бўлиб, уйлари-га кетишган, ўчақбошида фақат келинлар ва қизлар ўтиришар, хотинлар Маъмура холанинг ҳовлисида чой ичиб, гурунглашишмоқда эди. Ҳали қурбақалар ва чигирткалар уйғонишмаган, сой сувининг шил-дираши ёқимли эштилар, қозондаги сумалакнинг биқир-биқир қайназию ўчоқдаги ғўланинг чирс-чирс ёниши унга жўр бўлаётганга ўхшар эди. Осмон тиник, тун қоронғиси қуюқлашгани сайин чараклаган юл-дузлар ҳам тобора кўпаймоқда. Сой тарафдан келаёт-ган салқин шабада юзларимизни силайди. Баррагина майсаларнинг ёқимли ислари димоққа урилиб, танни яйратади. Хотинлар ичкаридан бир тоғора кўксомса олиб чиқишиди. Иссиққина сомсаларни қизлар биланчувиллашиб, талашиб-тортишиб едик. Сумалакни ўт-тиз малак – ўттиз фаришта осмондан тушиб, тонггача қўзғаб чиқади, деб айтишади. Шу тобда эса бизнинг сумалагимизни етти қиз – етти малак қўзғаётганини бирон ким ҳис қилаётганмикан?

Салқин тушганидан қизлар рўмолларини ўраб олишибди. Мана, энди ҳаммамиз бир хил қўринишида бўлдик. Хотинлар кўрпачаларимизни икки қават қи-

либ кетишиди. Келинлар шивирлашиб, ўзларининг сирли суҳбатларини бошлаб юборишиди. Бизнинг қизлар эса жимгина ўтиришарди.

– Гули, бирон нарса айт, қўшиқми, лапарми. Жим ўтираверсак, ухлаб қоламиз, – деди Турсуной Гулнорани туртиб.

– Тағин ухлаб қолиб, мункиб қозонга тушиб кетманглар. Куйиб, ажир-бужур бўлиб қолсанглар ҳеч ким тузатолмайди, – дея гап қўшди Санобар.

Ичимда бир нарса узилиб кетгандай бўлди-ю, лекин ўзимни бу гапни эшитмаганга солдим.

– Вой, мен қўшиқ айтишни билмайман. Ана, Марка айтсин. Бу писмиқ индамай юргани билан ҳамма нарсани билади, – деди Гулнора мен томонга ишора қилиб.

Қизлар қистайверишиганидан кейин оёқ тираб турверсам бўлмас эди. Ўзини тарозига солаяпти, деб яна кун беришмасди. Мен Нодиранинг шеърларидан айтиб бердим:

*Нигори гулбаданимни тушимда кўрсам эдим,
Лаби шакаршиканимни тушимда кўрсам эдим.*

*Кўз очмайин ғамида рўзгорим ўтқучидур –
Ки, ёри сиймтанимни тушимда кўрсам эдим...*

Кейин Увайсий ғазалларидан бир талайини айтдим.

– Марка, буларни қаердан ёдлагансан, мактабда ўтмаганмиз-ку? – деди Ҳусния уйқусираб эснаркан.

– Э, айтмадимми, бу ҳар балони билади, деб, – дея Гулнора қозон қўзғаш навбатини Турсунойдан олди. – Ҳалиям кутубхона ёпилиб кетди. Бўлмаса, бу кун бўйи ўша ердан чиқмас эди. Китобчи хола бунга ҳар куни ширин чой ҳам қуишиб бераркан, ўқийвериб кўзинг тиниб қолмасин, қизим, деб. Санобар, сен ҳам кирганмисан ўша кутубхонага?

– Нима, менинг бекорчи вақтим бор эканми? Мактабда ўқиганим ҳам етиб-ортади. Газал айтиб, матал ўқиб юришларга ҳеч тоқатим йүқ. Менинг жону дилим театр, кино. Машхур актриса бўлишни хоҳлайман. Бунга менда иқтидор ҳам бор. Уйимдагилар ҳам қарши эмас. Керак бўлса ҳали ҳинд актрисалари ҳам соямга кўрпача солишади.

– Ростдан ҳам, Санобар, сенда артистликка қобилият бор, – деди Гулнора ҳушёр тортиб. – Эсизгина, бу ерга келаётганда биронта китобми, дафтарми, ола келмабман-да, сендан дастхат ёздириб олардим. Машхур бўлиб кетганингдан кейин яқинингга йўлаб бўладими. Сен осмонда парвоз қиласан, бизлар чумолига ўхшаб ерда ҳам зўрға юрсак керак.

– Э, нуқул кесатасан-да, Гули, – деди Санобар.

– Унда турмушинг нима бўлади, ахир, машхурлар то осмондан тушмагунча эрга тегишмайди-ку, – деб гапни илиб кетди Чарос.

– Буёғидан хавотир олманглар, мени олиб кетадиган шаҳзодам тайёр, десам ҳам бўлаверади.

Қизлар бирданига ҳайратдан энтикишди.

– Ростданми? Ким экан у омадли йигит?

– Ҳозирча сир. Лекин айтишим мумкинки, у йигитларнинг энг олди.

Ҳамма нарсаси етарли. Шаҳарда ҳам уйи бор экан. Биз шаҳарда яшаймиз. У ҳамма истакларимни муҳайё қилишини айтди. Аввал ўқишга киргизиб қўяркан, кейин қолган орзуларим ҳам бирин-кетин ушалаверади.

– Қандай баҳтлисан-а, Санобар.

Шу пайтда ҳаммамиз оғзимиз очилганча унга ҳавас қилаётган эдик. Ҳатто ҳасад эпкинлари-да киприкларимизни сийпалаб ўтганини ҳам яшиrolмайман. Кўзингни очсанг-у олдингда олисларга туташиб кетган ёруғ йўл намоён бўлиб турса, қанчалар баҳт.

Қизлар ширин хаёллар суриб, мудрай бошлашди.
Менинг күзларимга эса бутун оқшом уйқу келмади.
Тун бўйи сумалакни кавлаб ўтирдим.

Саҳар чоғи Гулсум лапарчининг доираси уйқудаги-
ларни уйғотиб юборди. Яна сайилгоҳ жонланиб кетди.
Хотинлар галма-галдан келиб, қозондан хабар олиб
кетишиди. Тонг ёришгач, одамлар ҳам кўпая бошлади.

– Ҳадемай сумалагимиз тайёр бўлади. Кейин ана-
ви хотинлар бизни қозон ёнидан қувиб, ўzlари ялпа-
йиб ўтириб олишади. Вақт ғаниматида ёнғоқ ўйинини
охирига етказиб кўямизми? – деди Гулнора шивирлаб.

– Ўин шартига кўра ҳар биримиз токи ёнғоқ топил-
гунча уч мартадан кавлаб кўрамиз. Ёнғоқ чиқса яхши,
чиқмаса пешонадан кўрамиз, келишдикми?

Қозонга биринчи бўлиб Санобар капкир ботирди.
Биринчи уринишдаёқ бир тўп тош билан ёнғоқ чиқди.
У хурсанд бўлиб, ўзининг ёнғофини олиб, тошларни
яна қозонга ташлади. Кейин қолганлар навбат билан
капкир ботиришди. Бирор биринчи кавлашда, кимдир
иккинчи ёки учинчисида ёнғоқни топди. Хусниянинг
гали келганда, уч маротаба капкир ташлаганда ҳам
фақат тошлар чиқди, ёнғоқ топилмади. Унинг ранги
докадек оқариб, саросимага тушди. Сўнг у капкирни
истар-истамас менга узатди. Мен бу ўйиндан воз кеч-
моқчи бўлдим, лекин қизлар қўйишмади. “Ўинни
бузма, кемага тушганинг жони бир. Қозонда икки-
та ёнғоқ қолди, балки, омадинг чопса, биттаси сен-
га чиқиб қолар. Қани, бўл, кавла”, – дейишиди. Уларга
бу ўйин охиригача қизиқ эди. Мен эса Хусниянинг
афт-ангоридан кўз узолмайман. Хусния бу ўйинни гўё
тақдир ҳукмидек қабул қилиб, тобора изтироб домига
шўнғиётганга ўхшарди. Капкирни ноилож сумалакка
ботирдим. “Эй, Худо, ишқилиб ёнғоқ илиниб чиқма-
син-да” дея ичимда илтижо қиласардим. Хайрият, ёнғоқ
чиқмади. Иккинчи кавлашимда ҳам фақат тошлар

илинди. Қизлар, бу тошмикан, ёнғоқмикан, деб синчиклаб текшириб күришарди. Ҳусниянинг кўлларида умид учқунланаётганини кўргандай бўлдим. Ҳаммаси шундайлигича қолишини жуда-жуда хоҳлардим. Аммо бунга изн беришмади. “Ўйинбузиқилик қилма, охиргисини ҳам кўрайлик, Марка”, деб қизлар жўр бўлиб, пишанг беришарди. Учинчи бор капкирни ботирдим. Афсус... ёнғоқ капкирга илашиб чиқди. Ялмоғиз қизлар уни тошлар орасидан топиб олишди. Қайноқ ёнғоқни менинг этагимга ташлаб, бутун сайилгоҳни бошларига кўтариб қийқиришди. Ҳусния эса дод солиб чинқириб юборди. Унинг кутилмаган аламли чинқириғи қизларнинг овозларини босиб кетди. Боядан бери нарироқда бизнинг ўйинимизни завқ билан томоша қилиб ўтирган келинлар югуриб келишди. Улар нима юз берганини билолмай Ҳуснияни юпатишга уринишарди. Қичқириқни эшитиб, Маъмура хола ҳам лапанглаб чопиб келди:

– Ҳай, нима бўлди, бирор қозонга тушиб кетдими?

Ҳусния изиллаб йиғлаганча одамлар орасини ёриб чиқиб, уйлари томонга югуриб кетди. Ҳамма лолу ҳайрон бўлиб, ортидан қараб қолаверди. Мен Ҳусниянинг изидан чопдим.

– Тўхта, Ҳусния, бу шунчаки ўйин эди-ку. Шу билан ҳеч нарса ўзгариб қолмайди, – деб ортидан етолмай чопарканман, уни тўхтатмоқчи бўлардим. – Тўхта, дугонажон.

– Йўқ, сен менинг дугонам эмассан, бошқалар ҳам, ҳамманг душмансанлар.

– Нега унақа дейсан, дугонажон, ахир, ҳеч ким сенга душманлик қилмади-ку. Бу арзимас ўйин эди. Ма, менинг ёнғофимни ола қол, мен уни сен учун қидириб топдим, – дедим кафтимни куйдираётган ёнғоқни унга узатиб.

– Керак эмас, сен тақдирни ўзгартиролмайсан. Бу оддий ўйин эмас, тақдиримизни синааб кўриш эди. Менинг тақдирим шўр экан, тушуняпсанми, шўр экан.

– Ундаі дема, Хусния.

– Нега ҳаммага чиққан ёнғоқ битта менга чиқмади? Ҳатто сенга ҳам чиқди, сенга-я! Мен сендан ҳам баҳтсизманми? Менинг түрт мучам соғ, нуқсоним йўқку, – деда у кўксига муштлаб йиғларди.

Ногаҳонда ўқ теккандек таққа тўхтадим. Юзимга шапалоқ ургандек дилим вайрон бўлди, хўрлигим келди. Энди мен ҳам сал бўлмаса соchlаримни юлиб, фарёд кўтаришга тайёр эдим. Юзимни яширмоқчи бўлсам, аксига олиб рўмолим ҳам йўлда тушиб қолган экан. Ҳатто калишим ҳам қаердадир тушиб қолган, оёқяланг юргурган эканман. Ичимда йиғлай-йиғлай изимга қайрилдим. Йўл-йўлакай рўмолимни топиб, чангларини қоқдим, яхшилаб ўраб олдим. Калишларимни ҳам топдим. Бизнинг ўйламай бошлаган ўйинимиз ана шундай шармандали якунланди. Оҳ, бу қуилмаган қизларнинг ўйинига ўт тушсин. Шунчалик ҳам шафқатсиз ўйин бўладими.

Қайтиб келганимда Маъмура хола бизнинг қозондаги сумалакни сузаётган экан. У тасодафан ҳалиги топилмай қолиб кетган битта ёнғоқни кўриб қолди.

– Ҳа, қизи тушмагурлар, шу ёнғоқни ўйнаб, шунча тўпалон қилдингларми? – деда у ёнғоқни қўлидаги дастмолга артаркан.

– Йўқ, ҳеч қанақа ўйин ўйнамадик, – деди Турсуёнай уялиб.

– Биламан, ҳар йили битта-иккита ёнғоқларингни ўзим топиб оламан. Мен бу ёнғоқларни келинларнинг қозонига солиш учун берган эдим-ку. Улар қўчқордай ўғиллар туғай, деб ният қилиб қозонга ташлашсин, деганман.

– Вой, хола, ёнғоқ сизга чиқди, энди яна чолга тегасиз, шекилли, – деб Гулнора ҳазил қилди. Ҳамма қийқириб кулди.

– Ҳаҳ, сен шайтон қизними, қараб тур ҳали, – дея Маъмурда хола ҳам билқиллаб кулди ва ёнидаги тошни олиб ёнғоқни чақди. – Ҳай, савил қолгур, пуч экан-ку. Бизга битта маймоқ чол ҳам насиб қилмаган экан, қизим.

Сайилгоҳимиз кулгига түлди. Лекин бундай ичак-узди кулгиларга ёлғиз мен қўшила олмадим.

* * *

Ана-мана дегунча мактабни ҳам тамомладик. Баҳор китобини ёпган майнинг сўнгги кунида шаҳодатномаларимизни қўлимизга олиб, сўнгги қўнғироқни чаладиган бўлдик. Бир кун аввал Назира муаллима синфхонаимизга кириб, эртага қай кўринишда келишимиз ҳақида огоҳлантириб кетди:

– Ҳаммангиз мактаб формасида келинглар. Йигитлар оқ кўйлак, қора шимда, қизлар ҳам формада. Кийимларингиз тоза-озода, дазмолланган бўлсин. Бу ҳам бир байрам, мактабдаги охирги байрамларингиз. Таълим идорасидан ҳам вакиллар қатнашишади. Тағин башанг кийиниб келиб, ҳаммамизни уялтирманглар. Кейин хайрлашамиз. Лўнда қилиб айтганда, биз сизлардан қутуламиз, сизлар биздан.

Муаллиманинг шунча жаврагани бир томон-у, Сабнобар билан унга яқин қизларнинг кўнгил майллари бир томон бўлди. Хайрлашув кунига улар атайлаб муаллиманинг ғашига тегишини ўйлагандек, энг сўнгги модадаги кўйлакларини кийиб, соchlарини ҳам шунга монанд турмаклаб келишди. Юз бўёқларини-ку, айтмасам ҳам бўлаверади. Улар бунга чамамда анча вақт тайёрланишган кўринади. Ҳамманинг оғзи очилиб қолди. Муаллимлар лабини тишлашди, синфдошларнинг нафаси ичига тушди, ҳатто таълим идорасидан келганлар ҳам бир зум бу модалар оламига маҳлиё бўлиб қолишди. Йиғин бўладиган залга битирувчи

қызлар әмас, гүё санъат юлдузлари кириб келгандек таассурот пайдо бўлган эди ҳаммада. Ҳозир кимдир бошлаб берса, чапак чалиб юборишга ҳам тайёр эдик. Фақат Назира муаллима ғижиниб, уят, дегандек кўрсаткич бармоғини юзига босиб қўйди. Аммо бугун биз битирувчилармиз, энди бу қызлар шу бугунданоқ мактабнинг ҳеч қайси қоидасига бўйсунмайди. Булар ҳализамон учирин қилинадиган қалдирғочлар әмас, балки аллақачон қанотларини баралла силкитиб, юлдузларни чўқиб юрган оққушлар эди.

– Рўмолингизни ечиб қўйинг, синглим, – деди таълим идорасидан келган ходим тантанани бошлаш аввалида, – шундоқ ҳам ҳаво иссиқ.

У қорамтирик кўзойнакдалиги боисидан бу гапни менга қарата айтиётганини англамабман. Ҳамма мен томонга қаради. Ўзимни йўқотиб қўяй дедим. Директоримиз ўша ходим томонга бўйин чўзиб нимадир деб шивирлагач, у менга бошқа эътибор бермай, маъруза-сини бошлади. Шундан сўнг ҳар биримизни исм-шарифимизни айтиб чақириб, шаҳодатнома топширишди. Маросим якунига етганидан кейин муаллимлар чиқиб кетишиди. Залда фақатгина куйиб-пишиб тартибга чақираётган Назира муаллима-ю биз, битирувчилар қолдик. Йигит-қызларнинг кулгига тўла шовқинлари бошланди. Ҳамма бир-бирини табрикламоқда. Мана шу соатлардан бошлаб биз собиқ синфдошлармиз. Энди бу ёғига ҳар куни шу даргоҳда кўришмаймиз, бир синфга йиғилмаймиз. Ҳозир мактабда сўнгги бора тўпланишиб туришимиз. Ҳали кечқурун Турсунойларнинг уйида бўладиган хайрлашув кечасига борамиз. Ана ундан кейин бизнинг ўқувчилик давримиз бутунлай ўтмишга айланади.

– Ҳой, бунча шовқин соласизлар, бирпас қулоқ тутсанглар-чи. Мана, винеткаларинг ҳам тайёр бўл-

ган экан, олиб келдим, – деди Назира муаллима ва бир қучоқ ўрамани стол устига қўйди. Боғламини ечиб, суратларни тарқатаверди.

Болалар шовқин солиб, бир-бирларининг суратларини томоша қилишар, ким чиройли тушгани ҳақида тортишишарди. Буларнинг менга қизифи йўқ, шу сабабдан шаҳодатномамни кўксимга маҳкам босиб, аста кетишига чоғланаётганимда Назира муаллима тўхтатди.

– Ҳа, сен нега ўзингни четга олиб шумшайиб турибсан? Бу ёққа кел. Мана бу виннеткани сураткашга илтимос қилиб, сен учун тайёрлатдим. Бу ерда сенинг суратинг йўқ, лекин булар сенинг синфдошларинг. Эсдалик учун олиб қўй. Ҳеч бўлмаса, юқорида расмлари турган муаллимларингни эслаб юрарсан.

Бу мен учун кутилмаган совға бўлди. Ростдан ҳам буни сира-сира кутмагандим, хаёлимга ҳам келмаган эди. Шу кунгача ҳаммага қаҳри қаттиқ бўлиб кўринган муаллиманинг қалби булоқ сувидек тиниқ эканлигини нега пайқамаган эканман, дея ўзимни койимоқда эдим. Афсус, буни эндиғина тушундим. Қанча раҳмат айтганим билан ўзимдан кўнглим тўлмасди. Шу бебаҳо эсдалик ҳаяжони билан қушдай енгил бўлиб кетаётганимда Барно муаллима узоқдан имлаб чақирди.

– Марям, энди нима қилмоқчисан? – деди муаллима. Мен елка қисдим. – Биронта институтни танладингми? Каловланма, Марям, сен ўқишинг керак. Шу битираётгандарнинг ичida уқувлиси сенсан. Қайси ўқишига борсанг ҳам, албатта, кира олишингга ишончим комил. Чет тилларини-ку, мендан ҳам яхши биласан. Қанийди, менинг ёнимга муаллима бўлиб келсанг, бирга-бирга ишлардик.

– Ҳозирча иложим йўқ, – дедим.

– Ҳамма нарсанинг иложи бор. Хоҳласанг, Тошкентга бориб ўқишингга кўмаклашаман. У ерда ама-

ким бор. Мен ҳам талабалигимда уларнинг уйида турадим. Ҳайҳотдай ҳовлида чолу кампир набиралари билан яшашади. Феъли кенг, зиёли одамлар. Сени жон-жон деб қабул қилишади. Мени айтди дерсан, сен ҳам уларни яхши кўриб қоласан.

– Насиб қилган куни ўқирман. Аммо ҳозир бунинг иложи йўқ. Аямнинг соғлиқларидан ташвишдаман, ёлғиз қолдириб кетолмайман.

- Нега аянг ёлғиз бўларкан, отанг бор-ку.
- Отам ўзининг ишлари билан яқинда узоққа кетмоқчи бўлиб юрибди.
- Барибир яхшилаб ўйлаб кўр, Марям. Сенга қўлимдан келганича ёрдам бераман.

Муаллиманинг умидбахш гаплари кун бўйи хаёлнимни банд қилди. Юрагимнинг тубига чўкиб кетган орзуларимга чўғ ташлаб қўйди. Энди бу орзулар қафасдаги безовта кабутарлардек потирлаб, менга тинчлик бермасди. Бироқ нима қилай, ҳозирги аҳволимда бу қафасни очишга ҳам, кабутарларнинг парвозига изн беришга ҳам асло имконим йўқ. Мен учун айни дамда онамнинг ёнида бўлишдан, унга далдаю кўмак беришдан ўзга ҳеч нарса муҳим эмас. Ҳатто кечқурун битириш кечамизга боришга ҳам оёғим тортмай, онам билан бирга қолгим келди. Онам уйда ёлғиз зерикиб ўтиrsa-ю, мен бўлсам ҳеч бири мени ўзига яқин олмайдиган, синфдош бўлишса-да, фақат бегоналиқ сифатларини намоён этиб келган болалар билан бир даврада ўтирсам, бунинг нима гашти бор? Ҳар бири ўз суҳбатдошию ўз сирдоши билан хоҳлаганларича гаплашишлари, кўнгиллари тўлгунча ўйнаб-кулишлари мумкин. Мен-чи, уларнинг яйраб дам олишларини томоша қилиб ўтираманми? Бироқ онам ҳоли-жонимга қўймади: “Яқин дўст бўлишмаган бўлса ҳам, барибир хурматлаб таклиф қилишгандан кейин, албаттa бори-

шинг керак. Кўпнинг қаторидан қолма, қизим. Ўзингни ҳадеб четга тортсанг, четлашиб кетаверасан". Ноилож, кўнглим истамаса-да, боришга ҳозирландим. Онам кўйлагимнинг янги эмаслиги, пойабзалимнинг ҳам анча уриниб қолганини кўриб оғрингандай бўлди. Лекин менга буларнинг аҳамияти йўқ. Бир-икки соатлик кичкинагина базм учун янги кийим-бош бе-зак бўлмаса керак. Балки, янги кўйлагим бўлганда ҳам киймаган бўлардим. Ўзимни бозорга солаётгандек нокулай туюлаверарди-да. Мана шу одмигина кийимларимда ўзимни анчайин хотиржам ҳис этаман. Рўмомлим ҳам эскирмаган, ювиб, дазмоллаб, чиройлигина қилиб ўраб олдим.

Турсунойларнинг ҳовлиси этагидаги боғда кечамиз учун шинамгина жой тайёрлаб қўйишибди. Базм дастурхони ноз-неъматлар билан тўлдирилган, дараҳтларга ранг-баранг шарлар, мусиқага монанд ёниб-ӯчадиган чироқлар илинган, ҳамма ёққа сув сепилиб, ораста қилинган, бир четда ўзимизнинг қишлоқ ҳофизлари бошланишига вазмин ашулани хиргойи қилиб туришибди. Мендан бошқа ҳамма келиб бўлган экан. Ҳали болалар стулларга ўтиришмаган, ўртада товусдай товланиб турган Санобарнинг атрофида гирдикапалак бўлишаётган эди. Санобар ростакамига бугунги кечанинг маликасига айланган, тўлин ойдек чараклаб турар, ҳамманинг суқ тўла нигоҳи унга қадалган эди. Гўё бу ердагилар фақат уни кўриш учун келганга ўхшарди. Буни ҳис қилганим сари унинг яқинига боришга юрагим бетламасди. Кечада биринчи сўз ҳам Санобарга берилди. У давра ўртасига чиқиб, сўзларни дона-дона қилиб, қувончу баҳтга тўлиб, чиройли гапириди. Кейин у бошқаларни рақсга таклиф қилди. Даврабоши: "Санъаткорлар, шўхроғидан айтинглар, латофатли Санобархон ҳаммани ўйинга чор-

лайди" дея эълон қилди. Кўшиқлар янгради. Болалар Санобарни ўраб олиб, рақсга тушишарди. Бошқа қизлар ҳам Санобар каби ўзларига обдон оро беришган, боққан одамнинг ҳаваси келмасдан иложи йўқ эди.

Дастурхонга таомлар тортилди. Қадаҳларга аввал оз-оздан, аста-секин тўлдириб ичкиликлар қўйилди. Йигитлар тап тортмай қадаҳларни бўшатишар, ҳатто Санобар билан яна бир-иккита қизлар ҳам ҳар гал узатилган қадаҳларни яримлатиб қўя бошлишди. Шўх қўшиқлар авжига чиқди, давра қизигандан-қизиди. Мен уларни бир четда қунишибина кузатиб ўтирадим. Ҳар ҳолда, қошимга ўсма, кўзимга сурма тортмаганман, соchlарим ҳам рўмолим остида. Бундай ўйин-кулгиларга ўзи хушим йўқ. Мабодо қўшилишиб рақсга тушганимда ҳам ял-ял товланиб турган бу даврада эски ямоқдек кўриниб қолишим тайин эди. Шунинг учун аста ўрнимдан туриб, боғнинг четроғига бордим. Қийғос очилган атиргулларнинг ҳидидан хузур қилдим. Пастликдаги сойнинг салқинини олиб келаётган шабада танни яйратади. Шу ерда енгил нафас олдим. Гулларни ҳидлаб тўймасдим. Айниқса, ариқ ёқасидаги райҳонларнинг ифоридан кайфиятим чоғ бўлди. Даврада эса яна табрик сўzlари айтилди, яна жаранг-журунг қилиб, қадаҳлар кўтарилиди. Бир четда туриб бундай манзарани кузатиш ғалати бўлар экан. Кичкиналигимиздан бирга ўсан бу йигит-қизларнинг энди бола эмас, кап-катта одам бўлиб қолишганини ҳозир пайқаётган эдим. Улар ҳам энди ўзларини чинакам катта одамлардай ҳис этишаётган бўлса керак, сархуш ичимликларни бамайлихотир кўтаришмоқда. Бир-иккита йигитларнинг четроқقا чиқиб, сигарета чекишаётганларини кўриб, ҳайратим чандон ортди. Улар ўзларининг катта одамлар сафига ўтганларини шу тариқа нишонлашмоқда эди.

– Эртагаёқ Тошкентга жүнайман, – деди Сайфулла икки бармоғи орасига қистириб олган сигаретани алоҳида тавозе билан тортаркан. – Ўқишга киришга уриниб кўраман, дипломатияга. Бўлса бўлди, бўлмаса ҳам ўша ерда қоламан. У ёқларда қимирлаганга иш топилади. Бирорта буюмни чап ёнингдан ўнг ёнингга ўтказиб қўйиб ҳам пул ишласанг бўлади. Ўзим кўрганман, бир қариндошимиз бозорда ишлайди, кўкат сотади. Тирикчилиги ёмон эмас.

У зўр бериб шаҳарда ишлари юришиб кетиши ҳақида гапиради. Гап орасида сигаретани тортиши ҳам эсдан чиқармайди. Менимча, у чекишини машқ қилаётганга ўхшарди: ҳар тортганида ўқтин-ўқтин йўталиб қўяётган эди. Мактабда-ку, яшириб ҳам чекишолмасди. Назира муаллима тутун ҳидини ўн қадам наридан ҳам пайқар, қўлга тушганни аяб ётирмас эди.

– Марка, нега ўйнамаяпсан? – деди Фаттоҳ кутилмаганда ёнимда пайдо бўлиб. Хаёлларим бўлинниб кетди.

– Ўзим, шундай, ўйинга тушишга уқувим йўқ, – дедим.

– Мен ҳам шундай, бунақа шайтон базмларини ёқтиромайман. Хайрлашув кечаси бўлгани учун келишга мажбур бўлдим. Уларни қара, эчкидай сакрашяпти. Шайтоннинг сувига бўкиб олишди-да. Қизларнинг ҳам ширакайф бўлиб олишганини айтмайсанми. Ҳаммалири Худонинг қаҳрини келтираётганини билишмайди. Қизларнинг кийимлари очик-сочик, ўзларини кўз-кўз қилишга келишган. Буларда ҳаёй йўқ, мусулмончилик нималигини билишмайди. Анави олифта Сайфулла бўлса ўқишга кираман, деб керилгани-керилган.

– Сен-чи, ўқишни хоҳламайсанми?

– Сафсата буларнинг бари. Ақлинг бўлса, сен ҳам ўқишга борма. Мана шу худобехабар таннозлару олифталарага эргашсанг, имонингга путур етади. Менинг ўр-

ганадиган бошқа илмларим бор. Мен, ҳар ҳолда, буларга ўхшаб күфр нарсаларни ўқиб вақтимни беҳуда совурмайман. Ҳали күрасан, яқинда катта ўзгаришлар бўлади. Кейин бу танноз ойимчаларнинг аҳволини күрасан.

– Буларни нега менга айтаяпсан?

– Шунчаки, бошқа кимга ҳам айтишим мумкин. Аnavи кофирларга гапириш бефойда. Уларга маст бўлиб, ўйинга тушиш бўлса бас.

– Ҳартугул, бугун бу ерга ҳамма ўйнаб-кулиш учун йиғилган.

– Мен бундай ўйин-кулгиларни ҳазм қилолмайман. Сен муслима қизсан, мен сенинг одобингни ҳурмат қилганимдан гапирдим.

– Болаларни бунчалик ёмон кўрма, Фаттоҳ,

– Яхши кўрайми? Буларнинг ўқиган нарсалари ҳам, қилган ишлари ҳам куфр. Динимизнинг нима эканлигини ҳам билишмайди. Яна ўқиб нима бўларди, баттар кофир бўлишади.

– Ҳар кимнинг ўз истаги, ўз қисмати бор. Қанақасига улар кофир бўлишсин, хеч бири ўғри ёки одамхўр эмас, тўғри йўлдан тинчгина юришибди.

– Тўғри эмиш. Ўғри бўлмаса, бўлишади, одамхўр бўлмаса, бўлишади. Одамхўр бўлиш учун бирорни бўғизлаш шарт эмас. Олифта курсида сипогина ўтириб ҳам юзлаб, минглаб одамларнинг тақдирига қора чизиқ тортиб юбориш мумкин. Жаллодликнинг кўз кўриб қулоқ эшитмаган усуслари кўп.

У яна алланималарни жон куйдириб гапирди. Унинг кейинги вақтларда анчагина ўзгариб, ғалатироқ бўлиб қолганини мактабда сезгандек бўлган эдим. Дарсларга ҳам кам қатнашадиган одат чиқарди. Муаллимлар койишса, уйдагиларга ёрдам беряпман, деб баҳона қиларди. Ўзи нима ишлар билан машғул бўлган, кимдан, нималарни ўрганиб юрган – буни тушунолмадим. Ҳозир бу ҳақда ўйлашга ҳам, уни эшитишга

ҳам тоқатим йўқ. Мен ёлғиз қолиб, сойдаги қурбақаларнинг басма-басига қуриллашларига қулоқ тутгим келарди. Улар ботқоқ қурбақалари эмас, булоқ сувидан куй чиқараётган энг тоза сув қурбақалари. Негадир қизларнинг боғни бошларига кўтараётган шўх қийқириқларидан кўра мана шу митти жониворларнинг куиллашларини эшитиш шу тобда дилимга хуш ёқаётган эди. Қараб турсам, Фаттоҳ таърифлаган “шайтон базми” тонг отгунча давом этадиганга ўхшайди. Қизларнинг яйраб-кувнаб, бир-биридан чиройли рақсга тушишларини бироз томоша қилиб турдим-да, сўнгра астагина боғни тарқ этдим. Ҳеч ким кузатиб чиқмади, бунга зарурат ҳам йўқ эди.

Бу кўчаларда кечаси юришдан унчалик қўрқмайман. Ҳамма чироқлар ўчган бўлса ҳам, салгина юрганимдан кейин кўзларим қоронгиликка кўнишиб, атроф ёришгандай бўлди. Кўқда сон-саноқсиз юлдузлар чараклар, қўл чўзса етгудай жойда осилиб турганга ўхшайди. Уларга қарай-қарай тез-тез қадам ташлардим. Бир пайт ортимдан қандайдир шарпа келаётганини сезиб қолдим. Биронта дайди ит эмасмикан, деган ўйда юрагимга ғулғула тушди. У аввал узоқроқда эди, кейин яқинлашиб кела бошлади. Қадамимни тезлатдим, у ҳам тезлашди. Ниҳоят, юрак ютиб тақقا тўхтадим-у, ортимга қарадим. У ҳам шундай тўхтади. Беш-олти қадамча нарида бир паканагина одам шарпаси туарди. Синфдош йигитлардан биронтаси кузатиб келаётганимикан, деган хавотир билан жойимда туравердим. Йўқ, ундай бўлса, соядай эргашмасдан мени чақиравди. Шундан сўнг у гугурт чақди. Назаримда, у ҳам менинг кимлигимни билмоқчи бўлди. Оловнинг шуъласида унинг юзи ёришди. Дарров танидим – у Дўсан девона эди. Яна тез-тез юриб кетавердим. У ҳам изма-из эргашиб келаверди. Дўсан девона узоқлашиб ҳам кетмас, яқинлашиб ҳам келмас, тўх-

тасам түхтар, ҳар замонда ё йўталар, ё нималарни дир хиргойи қилиб, овоз чиқариб қўярди. Уйга етганимда ҳовлимизга шамолдай кирдим-у, эшикни ёпдим. Юрагим дукиллаб, эшик тирқишидан аста кўчага мўрала-дим. Девонанинг шарпаси ортига қайтиб кетди. Унинг тунда зим-зиё кўчада нега тентираб юргани-ю, нима сабабдан бир сўз демай изимдан эргашиб келганини тушунолмадим. Балки, у бояқиш ҳам менинг кечаси ёлғиз тентираб юрганим сабабини тушунолмай, бехавотир уйга етиб олишим учун кузатиб келгандир? Бундай одамлар бировга яхшилик қилганини гоҳо ўзлари ҳам билишмайди.

Уйга кирсам, отам келган, онам билан бирга иссиқ кийим-кечаклари ва бошқа лаш-лушларини жомадонга солишаётган экан. Онамнинг мени кўзлари тўрт бўлиб кутганини уйга киришим билан енгил нафас олганидан англадим. Отам эса тушуниксиз бир нигоҳ ташлаб кўйди-да, юмушини давом эттириди.

– Нима тараддуд? – шивирлаб сўрадим онамдан.
 – Отанг сафарга кетаяпти, Новосибирга, – деди онам хўрсиниб. Кейин отамга ўгирилди. – Ҳалиям, иложи бўлса, ўйлаб кўринг. Нима бўлганда ҳам, бегона юрт. Қоп-қоп пулни сизга бериб юборамиз деб кутиб ўтиришмагандир. Жонингизни хатарга қўйманг, дейман-да. Кўргончалик Зиёдулла устанинг йигирма ёшар ўғли яқинда ўша томонлардан тобутда келди. Дараҳтдан йиқилиб тушибди, дейишди. Худо билади, нима бўлганини. Кап-катта йигит дараҳтдан йиқилар эмишми?

– Э, нафасингни иссиқ қилсанг-чи, – жеркиб берди отам.

– Ишлайман деганга шу ерда ҳам иш топилади. Мана, ёз ҳам келди, нима кўп, иморат қураман, деган кўп. Усталарга қўшилиб пахса урсангиз ҳам, тирикчилигимиз ўтади, ҳеч кимдан кам бўлмаймиз.

- Ақлинг етмаган ишга түмшүғингни суқмасанг-да. Бир ками энди лойга ботиб, одамларнинг эшигида муте бўлиб юриш қолганмиди?

- Ҳалол меҳнат мутелик дегани эмас.

- Ўргилдим ҳалол меҳнатингдан. Қара, пулдан кўрпа тикиб ухлаётган қанча одам бор атрофимизда. Шулар ҳалол меҳнат билан топаяптими пулни? Бу ҳаёт - фирром ҳаёт. Шунинг учун фақат фирромлик қилганларнинг ошиғи олчи. Ҳалолнинг ҳақи тўрвада. Э, бу тўрванинг тагига етгунча адо бўласан. Лекин шунда ҳам мен фирром йўлни тутганим йўқ, меники ҳалол. Бу ердан пиёзми, мева-чевами йиғиб, узоқларга олиб бориб сотиб келаман. Бу ерларда эшшакдай ишласам ҳам бирим икки бўлмаслигини тушундим. Ҳа, қарз олдим, қарзга ботдим. Ўёққа бориб келай, қарзларни ортиғи билан қутулишга ҳам қурбим етадиган бўлади. Керак бўлса, одамларнинг ўзлари мендан қарздор бўлиб қолишади. Ҳали ҳамма менга ҳасад қиласди. Мени изза қилганларга кўрсатиб қўяман. Соямга салом беришларини томоша қиласан.

Чамамда, отам билан онам мен келгунимча ҳам тортишишган, бу гаплар ўша баҳснинг давоми эди. Отам шаштидан қайтадиганга ўхшамасди. Онам қанчалик жаврамасин, барибир айтганига кўндиrolмади. Отамни каттагина даромад васвасаси ўз измига солиб олган эди. Назаримда, биз унга ҳеч ким эмас эдик. Онам шошилганча хамир қориб қўйган экан. Қоронфисда куймаланиб, тандирга ўт қаладим. Нон ёпиб, яна тиш теккулик нима бор бўлса баридан тугунга жойлаб, отамга йўл учун ҳозирлаб бердик. Ҳамма ишни саранжомлаб бўлай деганимизда олис-яқинда хўроллар қичқира бошлаган эди. Тонг қоронфисида уйимиз олдига машина келди. Биз отамнинг жомадонларини кўтаришиб чиқдик. Юкларини машинага жойлагач, отам биз билан совуққина хайрлашиб, жўнаб кетди.

Менга отам худди бир-икки кунда қайтиб келадигандек тууларди. Онам эса уни бошқа күролмайдигандек изтироб билан кузатиб қолди. Машина чироғининг ғира-шира ёруғида онамнинг кўзларида ёш милтиллаётганини кўрдим.

Парвардигор, адашган бандаларингга тўғри йўлни ўзинг кўрсат!

* * *

Тегирмонга буғдой олиб борган эдим, у ерда ҳеч ким йўқлигини қўриб таажжубландим. Одатда, бу пайтда айвонча тагидаги ўриндиқда одамлар тизилишиб ўтириб навбат кутишар, шу баҳона ҳамма эшигтан-билган янгиликларидан бир-бирларини хабардор қилаётган бўлишарди. Тегирмон эшиги очиқ, ичкарида кимdir “тарақ-туруқ” товуш чиқариб ишляпти. Копни елкамдан тушириб, эшик олдида бироз кутиб турдим. Ичкарига мўралашга ийманиб, бирон ким кўриниб қолар, деган умидда айвонча остига бориб ўтириб, кута бошладим. Офтоб эрталабдан роса тоблади. Терлайверганимдан рўмолим хўл бўлиб кетди. Кафтларим билан юзимга шамол елпиб турганимда ичкаридан уст-бошини қоқиб тегирмончи амаки чиқди.

– Эй, қиз, бу ерда нима қилиб турибсан? – деди у менга қарамай.

- Буғдой олиб келган эдим, ун қилдиргани.
- Тегирмон ишламаяпти.
- Ишламаяпти? Нега ишламайди?
- Таъмиrlаяпмиз.

Шунинг учун бу ерга одамлар келмаётган эканда. Мен бўлсам, ҳеч ким йўқлиги яхши бўлди, тезроқ ишимни битириб кетаман, деб хурсанд бўлибман.

– Қачон келсан бўлади? – дедим тарвузим қўлтиғимдан тушиб.

– Ҳозир янги ҳосил ўрими бошланди. Мавсум охир-лагунча тегирмонни ҳам созлаб қўйишимиз керак. Ҳали анча-мунча иши бор. Бу ҳам одамдай гап, ишлай-верганидан кейин у ёқ-у ёғи емирилади. Йилда ҳеч бўлмагандан бир марта дам олиб куч тўпламаса, чарчаб қолади. Ўзинг ҳам тинмай чопаверсанг, оғриган оёқларингга дам бермасанг қандай аҳволга тушасан?

Энди нима қилдим? Уйда бир кафтча ҳам ун қолмаган. Дўкондан ун сотиб олишга пулимиз йўқ. Аввалги дўкончи чол гоҳида қарзга ҳам бериб турарди. У ўлганидан кейин келган дўкончи беҳад қўпол одам. Қарзга бирон нарса сўрасанг, афт-ангордингга қарайди. Бизга ўхшаганларни, ўҳ-ӯ, жеркиб беради. Отам ҳеч бўлмаса ош-нонимиз учун озгина пул ташлаб кетганида бундай музтар бўлиб ўтирмас эдик. Қандай бўлмасин, тезроқ иш топиб, бирон жойда ишламасам ҳолимизга маймунлар ийғлайди.

– Ўзи қанча буғдой олиб келган эдинг? – сўради тегирмончи амаки ғамга ботиб қолганимни кўриб.

– Ўн кило, – дедим ундан бирон умидли гап эшитадигандек юрагим ҳаприқиб.

– Бу ёқقا бер-чи, – деди у ва қопимни қўтариб, ичкарига олиб кириб кетди. Бироз фурсатдан кейин у қопимни яримлатиб олиб чиқди. Иккинчи қўлида ўшанча ун ҳам бор эди. – Сенга ун жудаям зарурга ўхшайди, қизим. Шунинг учун қопнинг тагида қолган бор унни олиб чиқдим. Буғдойингнинг ярмига алмаштиришга етди. Тегирмон ишлаб турганда-ку, жоним билан янчиб берардим. Ҳозирча бори шу.

Мен шунисига ҳам рози эдим. Қувончим ичимга сиғмай, бир қўлимда буғдой, бир қўлимда ун билан уйга шошилдим.

Онам буғдой ўрими бошланганини эшитиб, дала-га боришга шайланиб қолди. “Сиз уйда ўтираверинг,

хирмонга ўзим бориб келаман, шу аҳволда далада ишласангиз баттар тобингиз қочади”, дедим. Лекин онам мени ёлғиз юбориб, ўзи уйда ўтиришга тоқат қиломади. Наридан-бери тушлик қилиб, сўнг буғдойзорга йўл олдик. Ўрим Акром фермернинг даласида бўлаётган экан. Олтиндай товланиб, денгиздай шо-вуллаётган буғдойзорнинг бир қисми ўрилган, ҳозир туш маҳали бўлгани учун улкан комбайн дала четида тўхтаб турар, ишчилар шу комбайннинг соясида ўтириб, тушлик қилишаётган эди. Бизга ўхшаб буғдой ёки сомон олиш илинжида келган уч-тўртта болалар трактор тиркамасининг соясида бошларини солинтириб ўтиришибди. Биз ҳам уларнинг ёнига бордик. Жазирамада томоқларимиз қақраб кетди. Шошилганда уйдан сув олиб чиқиш эсимизга келмабди. Мен-ку, амаллаб чидайман, аммо онам қуриган томоғини қириб қийналаётган эди. Қоп-қорайиб кетган бир бола елим идишини кўтариб сув ичаётганини кўриб, ҳавасим келди. “Сувингдан бир қултум иссак майлими?” деб ундан илтимос қилдим. Бола сувни узатди, мен ундан олиб, онамга узатдим. Онам озгина ичиб, менга қайтариб берди. Мен ҳам бир қултум ичдим. Сув исиб қолган экан, томоғимни куйдиргандай бўлди.

Тушликтан кейин комбайнчилар дам олиш учун оёқларини узатишиди. Қуёшнинг тафти қайтишини кутишармиш. Бундай жазирамада шу тоғдай темир ҳам ҳансираф қолар экан. Салқинроқда ишласа бузилмасдан, тулпордай гижинглармиш. Ё тавба, темирни ҳам шунчалик авайлашадими. Ўлмаган бизнинг жонимиз. Акром раис қорнини қашлаб биз томонга келаверди.

– Ҳа, яна буғдойми? Шу одатларингизни ҳеч ташламас экансизлар-а. Дўкон тўла ун бўлса, айтарлик қиммат ҳам эмас, тайёрини сотиб олавермайсизларми?! Мен-ку, қизғанмайман, лекин шу иссиқда юрган-

ларингизга ачинаман. Ҳай, майли, ўзингиз биласиз. Агар буғдой шунчалик зарур бўлса, унда ҳов анави зовурнинг нариёфида лавлагипоя бор, ўшани чопиқ қиласизлар. Жўягига қараб меҳнат ҳақингизга буғдой бераман. У ер яхши, ариқда сув бор, чарчаганда тутларнинг соясида дам олсангиз ҳам бўлади. Қизингиз икковингиз ўша ёққа бора қолинг, – деди у онамга қараб. Биз бу таклифга жон деб рози бўлдик. – Сенларга ҳам буғдой керакми? – сўради у болалардан.

– Йўқ, бизга сомон керак.

– Ундай бўлса, паншахаларни олинглар-да, сомонни ғарамланглар. Мана бу янги комбайн буғдойни тоза ўраркан-у, лекин сомонни далага сочиб кетаркан. Ўзимизнинг аввалги комбайнлар дурустмиди дейман, сомонни ҳам бирйўла ғарамлаб кетарди. Уйган ғарамларингга қараб ҳақларингни оласизлар. Лекин ўрилмаган жойга яқин борманглар, келишдикми?

Болалар рози бўлиб, паншаха ва хаскашларни талаша кетишди.

Бир ҳафтача далага қатнаб, лавлагипояни чопиқ қилдик. Онам толиқиб қолди. Ичини бир дард кемираяпти-ю, менгабилдиргиси келмасди. Аммо кундан-кунга сўлиб бораётган юзидан буни сезиб турадим. Шунинг учун ҳам мен кейинги кунларда фақат иш ҳақида ўйлаётган эдим. Нима қилиб бўлса ҳам, бирон иш топишим керак. Отамнинг сафардан қачон қайтиши номаълум. Қайтганда ҳам барибир бизга нафи тегмайди. Рўзғоримиз учун ҳам, онамнинг даволаниши учун ҳам, албатта ишлашим керак. Онамга маслаҳат солган эдим, мийиғида кулди. “Боғишоддан иш топиб бўлмаса керак. Мен ҳам ишлайман деб нечталаб эшикка бош суқиб чиққанман, сен билмайсан, лекин тополмадим, – деди хўрсиниб. – Афсус, сени ўқишга олиб бораман, деб қўнглимга туғиб юрган эдим, лекин шу пайтда мазам бўлмаяпти. Сенга ёрдам берармикан, деб отангдан

умид қилган эдим, бу ҳам саробга айланди. Энди ихтиёр ўзингда, жон қизим, йўлингни тўсмайман. Шундоқ ҳам сенинг олдингда айборман". Онамдан ишлашга розилик олишга олдим-у, бироқ энди ишни қаердан топаман, деб бошим қотди. Шу ҳақда ўйлайвериб, ҳатто кечаси билан мижжа қоқмадим.

Эрталаб кўчага чиқиб, бир муддат қайси томонга юришни билмай иккиланиб турдим. Кейин таваккал қилиб йўлга тушдим. Дўкон ёнидан ўтаётганимда, шу ердан иш сўраб кўрсаммикан, деган ўй хаёлимдан ўтди. Дўкончи бадфеъл одам, лекин наилож, иш бўлса чидаб ишлайвераман. Минг бир истиҳола билан ўша дўкончига рўпара бўлдим.

– Иш йўқ, – деди дўкончи бирданига қўрслик билан. – Супир-сидир десанг, ўзимизнинг ҳам қўлимиздан келади. Бу ер сенга супермаркет эмас. Ўзи бир кичкина дўконча бўлса, сенга ўхшаганларга нимаям иш бўлиши мумкин?

Шу гапни мулойимроқ гапириб тушунтиrsa ҳам бўларди, тиланчига зарда қилгандай бақирмасдан. Оёқ-қўлим қалтираб кетди. Йўл-йўлакай тегирмонга кирдим. Тегирмон ҳали ҳам ишга тушмабди, атрофига ҳеч ким кўринмайди. Ичкарида нималарнидир бўяшяпти шекилли, эшикдан мўралашим билан димоғимга бўёқ ҳиди урилди.

– Яна буғдой олиб келдингми? – деди тегирмончи мени кўриб. – Айтгандим-ку сенга, тегирмон ҳали-бери ишламайди, деб.

– Йўқ, буғдой олиб келмадим, амаки, – дедим ерга қараб. – Иш қидириб юрибман. Агар сизда бирон иш бўлса...

Тегирмончи хохолаб кулиб юборди.

– Бу ерда нима ҳам иш бўларди дейсан. Бу ун заводи эмас, оддий бир тегирмон. Ўзим қуриб олганман. Иш дегани ўғлим икковимиздан ортмайди.

Тегирмондан чиқиб, түғри мактабимизга бордим. Муаллимлар эски кийимларини кийиб олиб, эшик ва ромларни бүяб, деворларни оқлаш усталарга ёрдамлашиб юришган экан. Назира муаллима мени күрибоқ чақырди.

– Ҳа, бирон ҳужжатинг қолиб кетибдими? – деди у қўлидаги челакни ерга қўйиб.

– Ҳужжатларим жойида, иш қидириб юрибман, – дедим ўнғайсизланиб.

– Иш? – муаллима бир лаҳза менга ҳайрон бўлиб тикилиб қолди. – Ўқиш-чи? Нима, уйингдагилар ўқишга боришингга рухсат беришмадими?

Мен ҳозирча ўқишга боролмаслигимни тушунтирудим.

– Ҳа, ҳозир ҳар ким ўз ҳолини ўзи билади, – деб Назира муаллима хўрсинди.

– Мен нима иш бўлса ҳам қилавераман, бўёқ суртиш, деворларни оқлаш, синфхоналарни супуриш – ҳаммаси қўлимдан келади.

Муаллима яна чуқур уҳ тортди.

– Сен-ку, бор-йўғи мактабни битиргансан, институтни тамомлаб келганларга иш топилмаяпти-ю. Ишлаб турганларнинг ҳам анча-мунчасини бўшатишмоқчи, қисқартиришга буйруқ келган эмиш. Тағин ким билади дейсан, директорга учрашиб кўр-чи.

Бўёқлар ҳиди анқиб ётган йўлакдан бориб, директорнинг хонаси ёнида тўхтадим. Хона эшиги очик, дебраздан ичкарига шабада эсиб турибди. Секин мўрададим, хона ичиди директор билан бир бегона киши гаплашиб ўтиришган экан. Директор баланд овозда куйиб-пишиб гапирав, унга нималарнидир тушунтиради. Йўлакдаги деразага суюниб кутиб турдим.

– Ишлашга ҳеч ҳафсалам қолмади, Абдусалом, – деди директор уф тортиб. – Ўзи арзимаган маош ола-

миз, шу ҳам уч ойдан бери қўлимизга теккани йўқ. Ҳар ой муаллимлар менга мўлтираб қарашади. Мен қаердан олиб бераман? Мактабни енгилгина таъмирлаб қўйиш учун ҳам бўёқ билан оҳакни қарзга олиб келдик. Усталарга пул топиб беролмаганимиздан муаллимлар билан фаррошларнинг ўzlари кўмаклашиб юришибди. Маош келавермаганидан кейин буларнинг кўзларига қарашга юзим чидамай, уйга чопаман. Уйда ҳам лўли бозор. Икки ўғлим институтда контрактда ўқияпти. Мана шу баҳорда биттасининг контрактини тўладим-у, иккинчисиникини тўлашга қўлим калталик қилди. Қачон пул топсанг, ўшанда ўқийсан, деб ўқишдан ҳайдashiбди, уйда ўтирибди. Икки қизим бўй етиб турибди, ҳар куни совчи келади. Тўй қилишнинг ўзи бўладими. Э, Абдусалом, бу дунёning ишлари шунаقا экан. Раҳбар деган номим бор-у, лекин бошимда шунча ғалвани кўтариб юрганимни бирор билса қанийди. Бу бошни қайси деворга уриб ёришни эса ўзим билмайман.

Директоримизнинг ҳасратидан кейин унга учрашишмдан фойда йўқлигини дарҳол тушундим. Шундан сўнг бошқа бирон эшикка бош суқиб боришга ҳам иккяланиб қоларкансан киши. Лекин мен ишлашим зарур.

Турфа хаёллар билан касалхона томонга юрдим. Лекин у ерга яқинлашганим сайин оёғим тортмай қолаверди. Балки, бу даргоҳда ҳам бирон иш йўқdir, деган ўй юришдан тўхтатди. Йўл четидаги қайрағоч соясида ўтириб, қаердан иш қидиришни чамалардим. Бир пайт кимдир исмимни айтиб чақиргандай бўлди. Бошимни кўтариб, атрофга алангладим. Кўчанинг нариги бетида бир-иккита одамлар юришган эди. Бир эски машина кўчани чанг ва тутунга тўлдириб ўтиб кетди. Кейин Дилобар хола кўринди. Иссиқда ҳаллослаб ёнимга келди.

– Марям, нима қилиб ўтирибсан бу ерда? – деди дараҳт соясига келиб, юзига елпифич билан шамол

елпиб. – Нега бунча хаёлинг паришон? Онангнинг соғлиғи яхшими?

Ҳамшира хола онамнинг саломатлигини обдон суриштириб, қандай овқатларни күпроқ еб туриши зарурлигини тушунтирди. Мен, хўп бўлади, дегандек бош қимирлатиб, кейин иш ахтариб юрганимни, ҳозир шу дардда касалхонага борсамми, йўқми, деб ўйланиб турганимни айтдим.

– Бориб ўтирмасанг ҳам бўлади, у ердан нажот йўқ барибир. Анчадан бери маошларимизниям ёлчишиб беришмаяпти. Яқинда касалхона ёпилади, ихчамроқ янги пункт қуриб беришармиш. Пунктда кўп одам ишламайди. Қайсимизни у ерга ишга олишади-ю, қайсимизни олишмайди, ҳеч ким билмайди. Шу гапни эшитганимдан бери мениям еганим ичимга тушмай қолган. Касалхонани ўзимиз деворларини суваб, чириган полларини ямаб, амал-тақал қилиб юрган эдик. Энди шу ишлар ҳам тўхтади.

Дилобар хола дардларини айтиб ёрилди. Сўнг онамга салом айтишимни тайинлаб, уйига кетди. Мен ҳам ўйлай-ўйлай, охири уйга қайтадиган бўлдим. Қайтаётиб, кутубхона эшиги очиқ турганига қўзим тушди-ю, юрагим жиз этди. Эҳтимол, шу ердан бирон иш топилиб қолар, деган ўйдан қўнглим ёришди. Яқинлашганимда ичкарида одамлар борлигини сезиб, севиниб кетдим. Болаларнинг кулгилари эшитилиб турарди. Қия очиқ эшиқдан секингина кутубхона ичкарисига қадам қўйдим. Бироқ шу биринчи қадамнинг ўзидаёқ таққа тўхтадим. Кутубхона ичи китоблардан бутунлай тозаланган, бир узун тўсиқ ўрнатилган бўлиб, тўсиқнинг нариги томонидаги девор яқинига қоғоздан ясалган оппоқ каптарлар териб қўйилган, тўсиқ олдида турган болалар бир милтиқни галма-галдан алмашиб, ўша қушларни отиб ўйнашаётган эди. Милтиқхона хўжайини, соқол-мўйлаби ўсиб кет-

ган киши хона бурчагидаги стол ёнида уйқусираб, си-гарета чекиб ўтирибди. У мени пайқамади ҳам. Хона-ни буткул тутун қоплаб олганидан нафас олишга одам қийналади. Эшикдан қандай кирган бўлсам, шундай қайтиб чиқдим. Оҳ, менинг бағри ёпиқ, кўзи очиқ кет-ган китобларим, бечора кутубхонам. Сенинг бу аҳво-лингни кўргандан кўзларим ўйилгани яхши эди. Кўнг-лим бузилиб, уйга қайтдим.

О, Худойим, одамларни тубанлик ботқоғига ғарқ бўлишдан ўзинг асра!

* * *

Икки кун уйдан чиқмадим. Ўрикларимиз роса етилиб пишиби. Эгилган шохларида меваларни ерга тушиб эзилмасин деб авайлаб тердим. Олтиндай товланган ўриклар кўзни қамаштиради. Гилосларни айтмайсизми, қулоғимга тақиб олсан, олмос кўзли зираклар ҳам ҳасаддан ёрилади. Ҳар йили боғимизда мевалар ғарқ пишганда ўрик соясида ўтириб, Анор-ни эслайман. Болалигимнинг ёрқин дамлари – фақат у билан бирга ўтказган лаҳзалар, сўнгги бор яйраб кулганим ҳам ўша кунлари бўлса керак. Шундан кейин завқли ўтган бирон кун хотирамда қолмаган. Уни эслайман-у: “Мана бу дуоларни юз марта ўқисанг, ҳам-ма тилакларинг ўнгингда юз беради” деган гаплари, буни астойдил ишонч билан айтганидан кўзлари чи-ройли порлаб кетгани тасаввуримда аниқ-тиниқ на-моён бўлади ва беихтиёр юзимга мусича патларидек майин табассум юргурганини сезиб қоламан. Ҳозир бир мўъжиза рўй бериб, бу ерда Анор пайдо бўлиб қолга-nidами, дарахтнинг ҳув баланддаги шохларига чиқиб, күёшнинг жазирама тафтида тобланиб пишган мева-ларни териб берардим. Мен узиб ташлайвераман, у эса чаққонлик билан илиб олаверади. У, албатта, мен те-

риб берган ўрикларни мақтаб-мақтаб ейди. Унинг нималар деб мақташини ҳам ич-ичимдан сезмоқдаман, сўзлари қулоғим остида жаранглаб турибди: “Марям, сизларникидай ширин ўрикни ҳеч қаерда емаганман, худди асалга ботириб олинганга ўхшайди”. Кейин мен унинг сойдан итбалиқ тутиб юрган пайтларини ёдига соламан. Ўзиям роса кулги бўлади-да. Ўрикларни ҳовучимда авайлаб ушлаб, ширин хаёллар сурман, гўё улар Анорга аталгандек. Сендан бир умр унутиб бўлмайдиган беғубор хотиралар эсдалиқ бўлиб қолгани учун тоабад миннатдорман, болалик дўстим.

Ўригу гилосларни чеълакларга солиб, якшанба кунлари бозорга олиб бориб сотиб келардим. Озгина пулга сотсан-да, лекин шу ҳам тирикчилигимизга яраб турар эди. Қолган кунлари ерга тўкилган меваларни томга ёйиб қуритиб қўярдик, бир донасини ерда қолдириш ҳам увол, ахир. Лекин барибир ўзимга иш то-пмасам бўлмайди. Боғнинг беминнат инъоми доимий эмас. Саховатли ёзда ҳеч нарсани ўйламай ўйнаб-кулиб, ёмғир томчилай бошлаганда изиллаб чора ахтариб, чумолининг олдига борган ниначининг ҳолига тушмаслигим керак.

Бозорнинг нарироғида эскигина бир бино бўларди. Одамлар уни қисқагина қилиб “артел” дейишарди. Унинг бир хужрасида этикдўз амаки ўтирад, яна бир хужрасида эркаклар сартарошхонаси бўлар эди. Этикдўзга кўп марта ишим тушган. Охирги борганимда иккала ҳужра ҳам ёпилиб, иккови ҳам кўчанинг бошидан ўзларига алоҳида дўкончалар куриб олишган экан. Артелнинг каттароқ яна бир хонасида аёллар ҳар хил кийим-кечаклар тикиб ўтиришарди. Тўғри ўша ерни қўзлаб бордим. Ҳархолда оз-моз бўлса ҳам тикиш-бичишлардан хабарим бор. Онамдан ўргангандарим асқатиб қолар. Билмаганларимни чевар аёллардан ўрганиб оламан.

Авваллари этикдўз амакининг олдига келганимда тикувчилик хонаси шовқинга тўла бўларди. Ҳозир эса сув қўйгандай жимжит. Эшик-деразалар ланг очиқ, этикдўз билан сартарошнинг хужраларининг илма-тешик бўлиб кетган эшикларига қулф осилган. Очиқ деразадан ичкарига кўз ташладим. Икки аёл битта машинка ёнига ўтириб олиб, биргалашиб ниманидир тикишяпти. Қолган машинкалар ёнида одам кўринмайди. Хона бурчагида эса тўладан келган кекса аёл, артелнинг мудираси бўлса керак, кўзойнак тақиб, қандайдир қофозларга кўз юргутираяпти. Кираётганимда оёқ остидаги чириган тахталар ғичир-ғичир товуш чиқарди. Мудира аёл қофозлардан бошини кўтариб, бурнига қўндирилган кўзойнаги устидан менга қаради. У саломимга алик ҳам олмай, қараб тураверди. Унинг бундай кўзқарашидан бирор маъно англаш қийин эди. Мен ҳам нима деб гап бошлишни билмай индамай туравердим.

– Биронта буюртма бериб кетганмидинг? – ниҳоят тилга кирди мудира.

- Йўқ...
- Унда нима қилиб турибсан?
- Мен... иш сўраб келиб эдим.

– Ҳа, шунақа демайсанми, – деди мудира юзини тириштириб. Кейин яна қофозларини титкилашда давом этди. – Сен қиз адашиб келибсан. Артелдаги ишлар адогига етди. Кундан-кунга қисқаравериб, мана, ҳадемай бутунлай ёпиладиган бўлиб турибди.

- Нега ёпилади?

– Нега бўларди, шундай буйруқ қилишди, тамом. Артел эскилик сарқити эмиш. Энди цехми, фабриками, нима қурса одамларнинг ўзлари қуриб ишлатишармиш. Билганларини қилишсин. – Мудира менга яна бир қур разм солди-да, ўрнидан туриб, айиққа ўхшаб маймоқланиб хонанинг бошқа томонидаги жа-

вон олдига борди. Ундан бир талай қоғозларни олиб, яна жойига келиб ўтириди. – Э, мен ҳам бу ерга ишга келганимда сендей ёшгина қыз әдим. Сочим шу ҳужрада оқарди. Ҳар куни давлатнинг қанча буюртмалари ни тайёрлаб берардик. Баъзида ярим кечагача қолиб ишлашимизга ҳам түғри келган. Ишчиларга кийим-кечаклар, боғчаларга чойшаблар, пахта терадиганлар учун этаклар, эҳ-хе, озмунча нарса тикар әдикми. Ҳозир ундаи буюртмалар қаерда дейсан. Ҳаммаёқни четдан келадиган арzonгаров нарсалар босиб кетди. Бизнинг тикканларимиз замонавий бичимда эмасмиш. Замонавий бўлсин деса замонавий машинка, замонавий матолар келтириб беришсин. Йўқ, улар буни ўйлаб ҳам кўришмайди. Даққиёнусдан қолган мана бу машинкалар билан нима ҳам қилиб бўларди. Буюртма тушмагани учун мато ҳам бермай қўйиши. Бечора тикувчиларни ҳам, иш жойларинг қисқартирилди, деб бўшатиб юбордик. Шу учала хотин артелнинг чироғини ёқиб туриш учун қолгандай келиб кетамиз. Ҳатто маош ҳам беришаётгани йўқ. Бир-иккита боғчага ўзим бориб, буюртма олмоқчи бўлдим. Ўзларининг шаҳардаги таъминлайдиган идорасидан чойшаб, кўрпа-ёстиқларнинг жилдларини келтириб беришибди. Ушлаб кўрдим, чиройли чойшаблар. Болаларбоп қилиб бирам безак беришганки, кўзинг қувнайди. Лекин ҳаммаси бир ювишда ўнғиб кетадиган, терлаганда бўёғи баданга ўрнашиб қоладиган, илвираган сунъий методан тикилган. Кўнглим айниди. Бундай чойшабда ётган болаларнинг касал бўлмагани қолмаса керак. Бизнинг тоза пахтали чойшабларимизни эса олгила-ри келмайди. Уларга фақат чет элники бўлса бас. Ҳатто болаларга берган яроқсиз ўйинчоқларининг ҳам ҳаммаси четники. Додингни кимга айтасан, қизим? Ҳатто қилибмиз, энди тўғрилаб қўямыз, дейдиган одам бор

эканми. Дийдиё қилиб кўр-чи, номинг ёмонга чиқади. Қариган чоғимда менга қолдими шу ташвиш. Кимга керак бўлса, ўзи обдовини тўғрилаб олсин.

Шу пайт кутилмаганда машинка ёнидаги аёллардан бири чинқириб юборди. Мудира иккимиз чўчиб тушдик.

– Сичқон, сичқон, – деди чинқирган аёл ёқасига туфлаб.

Иккита сичқон уларнинг ёнидан бир-бирини қувлаб ўтиб кетди ва хона эшигидан чиқиб, этикдўзнинг хужрасига эшик тирқишидан кириб кетди.

– Бу иморат ҳам менга ўхшаб қариб адо бўлди, – деди мудира бошидаги рўмолини бошқатдан ўраб.

– Деворлариям нураб кетаяпти, яқинда тутдай тўкилади. Буларнинг сичқондан қўрққанини қара, менинг эса қаламушдан ҳам этим сесканмай қўйган. Э, ҳеч нарсага қизиқишим қолмади. Мұҳайё, – деб у ҳалиги аёллардан бирини чақирди.

– Лаббай, – деди боя қичқирган аёл.

– Сен кимдир қизларга иш топиб берармиш, деңгандай бўлиб эдингми?

– Ҳа, жарлик томондаги Салима сатанг бир-иккита қизларга иш топиб берган экан, одамлар шундай деийишяпти.

– Балки ўшандан бориб сўраб кўрганинг маъқулдир, – деди мудира.

Салима деган аёлни бир-икки марта бозорда учратганман. Бениҳоя танноз, ўзини маликалардек туладиган ўша аёл мендек бир фақирнинг илтимосини эшитишга ҳафсала қиласмикан? Қизларга ёрдам бераюпти, дейишди-ку. Ноумид шайтон, бошқалар қаторида бир ғарибга ҳам мурувват қилар. Ростдан ҳам кўлидан иш келса, карнайчидан бир пуф-да.

Тупроқ кўчалардан юриб, излаган манзилимни топиб бордим. Ҳадеганда остона ҳатлаб чиқавермага-

ним учун Боғишоднинг бу қўчаларига ҳеч кирмаган эканман. Шу боисдан Салима опанинг уйини ҳам илк бор кўриб туришим эди. Бўёғи ярқираб турган дарвозасини гўё қўлимни куйдиралигандек анчайин истиҳола билан тақиллатдим. Ичкаридан сергак итнинг вовуллаган йўғон овози эшитилди. Кўрқиб кетганимдан бир-икки қадам чекиндим. Кулф шарақлаб, дарваза қия очилди. Бошини чиқариб аланглаган ёшгина жувон мени кўриб:

- Сенга ким керак? – деди.
- Салима опада гапим бор эди.
- Қанақа гап? Кел, буёқقا кир, ичкарида гаплашамиз.

Тортина-тортина дарвозадан кирдим. Баҳайбат бир ит думини ликиллатиб турган экан, кўрқиб ортимга тисарилдим. Баланд айвоннинг тўридаги нақшинкор чорпояда иккита нотаниш қиз ойнага қараб пардоз қилиб ўтирибди. Бири очиқ-сочиқ кийинган, иккинчисининг кийими на қизларникига, на ўғил болаларникига ўхшайди. Улар гоҳ-гоҳ мен томонга кўз ташлаб, бир-бирини турткилаб шивирлашар, беандиша кулишарди.

– Салима опам иш билан бир жойга кетган, бир-икки ҳафта бўлмайди. Нима гапинг бўлса, менга айтавер, – деди аёл энсаси қотгандек афтини буриштириб. Унинг ял-ял товланган кўйлаги, бармоқларидаги қўша-қўша узуклари, қулоқларига осилган зиракларию оғзини тўлдириб турган тилла тишларини кўриб, бир уюм тиллани учратгандек бўласан киши.

– Иш топишда ёрдам беради, дейишган эди, – дедим ийманиб.

– Ким айтган бўлса ҳам, нотўғри айтибди. Опам шаҳардаги танишларига айтиб, фақат чет элдан иш топиб беради, чақалоқларга, қарияларга қараш, тамаддихоналарда югардаклик дегандай. У ёқдагилар

эса фақат “фотогеничний” қизларни қабул қилишади. Очиғини айтиб қўя қолай, сен тўғри келмайсан. – У менинг ранжиганимни сезди. Мен иш топиб бермаганидан эмас, унинг сен тўғри келмайсан, деганда нимага ишора қилаётганини тушуниб, хафа бўлган эдим. Аслида чет элдаги ишларга кўзим учиб тургани йўқ, ҳатто ёлворишса ҳам бормасдим. “Узоқнинг донидан яқиннинг сомони яхши”. – Хафа бўлмайсан энди, улар шундай талаб қилиб туришганидан кейин нима ҳам қила олардинг. Опам ўзи хоҳлаганидаям барибир сенга ёрдам бера олмайди.

Кайфиятим тушиб, ташқарига чиқдим. Ортимда дарвоза шарақлаб ёпилди. Бояги қизларнинг беҳаёларча қийқириб кулганлари эшитилди.

* * *

Кечаси билан қаердан иш топиш ҳақида ўйлаб ётдим. Эрталаб автобусга чиқиб, туман марказига – Узумзорга жўнадим. Ўриндиқларнинг ярми бўш эди, бироқ кейинги бекатларда кўп йўловчи чиқди. Бу автобус ўзи шунаقا, йўл четида одам қораси кўринса бас, албатта бир тўхтаб ўтади. Узумзоргача машинада йигирма дақиқача йўл, лекин автобус имиллаб ҳар қадамда тўхтаб-тўхтаб юрганидан деярли бир соатча судралади. Шу автобусда онам билан марказдаги касалхонага кўп марталаб борганимиз. Аёз кунлари эшигининг тирқишидан изиллаб совуқ киради, иссиқда ойналари очилмайди. Шифтдаги қопқофи очилади-ю, лекин ҳар силкинганида қарсиллаб ёпилиб қолаверади. Ичига буруқсиб кирадиган чанг аралаш тутунидан кўнгил бехузур бўлади. Бунга ҳамма деярли кўникиб кетган. Кейинги бекатдан чиққан одамлар орасида тегирмончи амаки ҳам бор экан. У яқинимга келиб тик туриб қолди. Ўрнимдан туриб жой бердим.

– Ўтиравер, қизим, безовта бўлма, – деди амаки ўнғайсизланиб.

Катта ёшли одамнинг тепамда тик туриши менга ҳам ноқулай эди. Тегирмончи амакини ўтирганига қўймадим.

– Ҳа, ишга жойлашдингми? – сўради амаки халтада шиқирлаётган темир-терсакларини тиззасига қўйиб, ўриндиққа ўрнашиброқ ўтиаркан.

– Шу важ билан кетаяпман Узумзорга, – дедим.

– Ҳозир иш топиш ҳеч қаерда ҳам осон эмас. Сен марказга борсанг, меҳнат идорасига кир, қаерда иш борлигини улар билишади. Ҳеч бўлмагандан бирор йўл-йўриқ кўрсатиб юборишар.

– Раҳмат, яхши маслаҳатингиз учун. Ўзингиз қаёққа кетаяпсиз?

– Мен ҳам Узумзорга. Э, тегирмонниям ғалваси кўп, ҳали у ери эскиради, ҳали бу ери бузилади. Узумзорда бир уста бор, қўли гул йигит. Бузилган қисмларни унга олиб келаман, дарров тузатиб беради, барака топқур.

Тегирмончи амаки айтган меҳнат идорасини суриштириб топдим, автобус тўхтаган охирги бекатдан унчалик узоқда эмас экан. Ичкарига киришим билан тўғридаги очиқ эшикли хонада эти устихонига ёпишган қилтириқдай бир киши ўтирганини кўриб, ўша хонага қараб бордим. Бу ерда пашшалар чунонам кўп эдики, қилтириқ киши қўлидаги пашша ўлдиргич билан яқинига келганини уриб, ўлганларини санаб ўтиарди. Ижозат сўраб, хонага кирдим.

– Келсинлар, марҳамат, ўтирсинлар, – деди қилтириқ киши гавдасига мос бўлмаган салобат билан. – Нима юмушлари бор экан?

– Иш сўраб келдим, амаки, ишламоқчиман, – дедим ва у кўрсатган стулга ўтирмоқчи эдим, ғичирлаб кетди. Чўчиб ўрнимдан турдим.

– Кўрқмасинлар, бу ўриндиқ казо-казо одамларни кўттарган, ҳали ҳеч кимни уялтириб қўйган эмас, сизни ҳам кўтаради.

Стул синган жойларига мих қоқилаверганидан қирқямоқ бўлиб кетган экан. Разм солсам, бу хонада бутун нарсанинг ўзи йўққа ўхшайди. Бурчакдаги шкафнинг оёқлари ўрнига ғишт қўйилган, деразанинг битта ойнаси ўрнига картон қоқилган, чойнакнинг қопқоғи синиқ, пиёланинг лаби учган, ҳатто қилитириқ кишининг чап қўли ҳам дока билан боғланиб, бўйнига осилган.

– Иш сўраб келдик, денг? Бу даргоҳга қадам ранжида қилгувчи одам борки, ҳаммаси иш сўраб келади, бошқа нима ҳам сўраб келарди. Одамларга иш топиб бериш бизнинг вазифамиз. Ишлайман деган одамни қўллаб-қувватлашимиз зарур. Энг ёмони – ишлашни хоҳламайдиган одам, иш топиб берсанг ҳам ишламайдиган ялқовлар. Ундейлардан қўрқиш керак. Ҳа, ҳамма бало ўшандайлардан чиқади. Ўғрилик, қотиллик, фитначилик, эҳ-хе, улардан ҳар қандай ёмонликни кутиш мумкин.

Бу одам гапларини тинглайдиган суҳбатдош то-полмай ўтирган экан, шекилли, жаврашдан тўхтай демасди. Менинг эса бекорчи вақтим йўқ. Бу ерда ишим битмаса, бошқа идораларга боришим керак. У бамайлихотир дардини дастурхон қилиб, гап орасида “тарс” эткизиб пашша ўлдириб турарди. Эътибор берсам, пашша ўлдиргич ҳам синаверганидан турли жойларидан елим тасма билан боғлаб ташланган экан.

– Хўш, ўзларининг маълумотлари қандай? – сўради у менинг бирорта гапига диққат қилмаётганимни кўриб ҳафсаласи пир бўлгандай. – Диплом борми, диплом?

– Мактабни яқинда тамомладим.

– Ие, буёғи қандоқ бўлди? Ҳали бор-йўғи ўрта маълумот билан иш қидириб юрибдиларми? Саломат бўл-

синлар-е. Умуман олганда, бу маълумотингиз билан фақат кўча тозаловчилик ишига дарьвогар бўлсангиз бўлади. Лекин ҳозир ўрта-махсус маълумотлилар ҳам бу ишга жон деб талабгорлик қилишяпти. Аксига олиб, бу соҳада ҳам иш ўрни йўқ. Талабнома келмаяпти. Балки, бўш ўрин бўлса ҳам, бизга юборишмаётгандир. Ҳамма ёқда таниш-билишчилик. Буларнинг ҳаммасини ким ўйлади? Мен ўйлашим керак, мен. Бир ўзим қайси бир ишга бўлай?

- Сиз бошлиқмисиз?

- Афсуски, бошлиқ эмасман. Бошлиқ бўлганимда эди, ишни бошқача ташкил қилган бўлар эдим. Тегирмонни тескари айлантириб юборишим ҳам мумкин эди. Ҳай, майли, бир гап бўлар. Сиз менга исми шарифингиз билан яшаш манзилингизни мана бу қофозга ариза билан бирга ёзиб қолдиринг. Биз, албатта, бу масала билан жиддий шуғулланамиз ва бўш иш ўринлари бўлиши билан сизни хабардор этамиз. Мана, қаранг, қанча аризалар. Уларнинг муаллифлари бизнинг хушхабарларимизни кўзлари тўрт бўлиб кутишмоқда, - деб у боядан бери устида пашша ўлдираётган бир тўп қофозни кўрсатди.

Мен ариза ёзиб узатдим. Қилтириқ киши аризамга кўз ҳам югуртирумасдан, ҳалиги қофозларнинг устига қўшиб кўйди. Секингина хонадан чиқдим. “Тарс” деган товуш эшитилди. Чамамда, менинг аризамнинг устида биринчи пашша қурбон бўлди.

Йўл ёқасидаги бир-бирига уланиб кетган дўконлар ёнидан ўтиб бораётганимда таниш кўча кўринди. Бу касалхонанинг кўчаси эди. Онам билан шу кўчадан неча марталаб юрганмиз. Касалхонадан иш сўраб кўрсам-чи, деган фикр хаёлимга келди. Мабодо у ердан иш топсам, онамни даволатгани олиб келганимда ҳам ёнида бўламан, ўзим қарайман, деган ўйда шу кўчага йўл солдим. Кўча ўртасидаги бир ҳовлининг ёғочлари

чириб тўкилай деб турган эшиги туйнугидан бир қопағон ит ўткир тишлирини кўрсатиб, доим хуарар эди. Ҳар сафар онам билан шу эшик ёнидан ўтаётганимизда юрагимни ҳовучлардим. Ит шундай важоҳат билан ириллардики, гўё ҳозир омонатгина турган эшик қулаб тушади-ю, ит бизни еб қўядигандек ваҳимага тушардим. Хайрият, ҳозир ит кўринмади. Балки жазира-мадан қочиб соя жойда ухлаб ётгандир ёки бўлмасам, хура-хура охири ўзини адойи тамом қилгандир. Ҳартугул кўча сув қўйгандай жимжит эди.

Касалхона эшиги олдида гаплашиб турган ҳамшираларга бу ерга келганим сабабини айтган эдим, улардан бири узун йўлак охиридаги “Бош шифокор ўринбосари” деган ёзувли эшик олдига бошлаб борди. Хона эшиги очиқ, лекин ўринбосар хонада йўқ экан. “Шу ерда кутиб туринг, ҳозир келиб қолади” деб ҳамшира мени эшик ёнида қолдириб кетди. Шифокорлар билан ҳамширалар йўлақда у ёқдан-бу ёққа тез-тез ўтиб туришар, ҳамма ёқни дориларнинг ўткир ҳиди тутиб кетган эди. Бир узун бўйли доктор йўлақдан ҳар ўтганида мен томонга қараб қўяверди. Унинг ортидан иккита ҳамшира дори қутиларини кўтариб чопиб юришибди. Кейин улар йўлак охиридаги палатага кириб кетишиди. Ниҳоят ўша доктор палатадан чиққач, мен қараб турган хонага кирди ва мени чақирди.

- Келинг, қаерингиз безовта қилаяпти? – деди у.
- Ҳеч қаерим.
- Унда менга нима гапингиз бор?
- Бу ерда кўпчилик қизлар ишлашар экан, агар бি-рор иш бўлса, мен ҳам ишласам, деб келдим.
- Қаерда ўқигансиз?
- Мактабда.
- Кечирасиз, бизда ишлаш учун диплом керак бўлади.
- Мактабни битирганларга мос қандай иш бўлса ҳам қиласавераман. Фаррошликими, боғбонликими, ка-

салларни аравачада олиб юришми, ҳаммаси қўлимдан келади.

Доктор бир лаҳза менга ҳайрон бўлиб тикилиб қолди. Синчиклаб разм солди.

– Мени маъзур тутинг, мабодо ногиронлик гурухига чиқмаганмисиз? – деди у.

– Йўқ, соппа-соғман.

– Нега унда... Ҳа, майли, нега бунча ишлашга шошилмасангиз? Аввал ўқиб, бирор касбни эгалласангиз яхши бўларди.

– Менинг ҳозирги шароитим ўқишга имкон бермайди.

– Лекин бизда ҳозирча сизбоп иш йўқ. Фаррошларимизнинг қўпчилиги кампирлар, аммо улар ҳам жойни бўшатгилари келмайди. Барибир сиз хафа бўлманг, синглим, вақт-соати келиб, балки, бўш жой топилиб қолар. Сиз ҳар ой хабар олиб туринг. Биронта ишчи ходим ўз хоҳиши билан бўшаса ёки бўшатилса ёхуд ўлиб-нетиб қолса, ўрнига оламиз. Эҳтимол, компьютерда ишлай оларсиз?

Мен “йўқ” дегандек бош қимиirlатдим. Мактабимизда бир эмас, тўртта компьютер бор эди. Муаллимимиз уларни фақат қўл текизмаслик шарти билан синфхонага олиб кириб кўрсатган. Унинг қандай карорматларга эгалиги ҳақида кўп гапирган. Лекин кўз билан кўролмаганингдан кейин бу ўзга сайёранинг учар жисмлари ҳақидаги афсонадан фарқ қилмасди.

– Мабодо сизларга таржимон керак эмасми? – дедим шошиб.

– Қайси тилларни биласиз?

– Инглиз, немис...

– Рус тилини-чи?

– Биламан.

– Э, рус тилини ўзимиз ҳам эплаймиз, армиядан ўрганиб келганмиз. Бизнинг касалхонамида таржимон-

лик иш ўрни йўқ-да. Шароитингиз қанақалигини билмайман-у, лекин шунча тилларни билар экансиз, сиз, албатта ўқишнинг ҳаракатини қилганингиз маъқул.

Бударгоҳ ҳам ўз остонасини менга муносиб кўрмади. Кейин кўчага чиқиб, яна атрофни кузатдим. Кенг кўчанинг нариги тарафида одамлар кириб-чиқиб юрган бир бинога кўзим тушди. Яқинроқ бориб, идора ҳовлисидаги баланд қайраочнинг қуюқ соясида бирпас ўтириб, нафас ростладим. Иссиқда юравериб, томоғим қақраб кетди. Бинога кираверишда, шундоқ эшик ёнидаги челяқдан бир аёл пиёлага сув олиб ичди. Сувни кўриб кўнглим ёришди. Мен ҳам бориб ўша сувдан ичдим, чанқоғим босилди.

– Бу қандай идора? – деб сўрадим ҳалиги сув ичган аёлдан.

– Солиқхона-ку, – деди аёл бино пештоқидаги бўёғи хиралашиб кетган ёзувга ишора қилиб.

Ичкари ғалағовур эди. Одамларнинг қўлларида қандайдир қоғозлар, у эшикдан чиқиб, бу эшикка киришади. Бир бақувват чол нимадандир норози бўлиб бақиряпти. Хоналарга бирма-бир разм солиб, “Бошлиқ П.П. Поёнкулов” деб ёзилган эшик ёнида тўхтадим. Бўлганича бўлар, деб эшикни тақиллатган эдим, ичкаридан: “Киринг” деган йўғон овоз эшитилди. Хона тўридаги баланд суюнчиқли курсида сариқ соч, қисиқ кўз, икки юзи анордек қип-қизил, тўладан келган киши ялпайганча сигарет чекиб ўтирган экан. Эшикни қия очиб, кўриниш беришим билан: “Киринг, опа”, – деди. Ўзи отам қатори киши-ю, опа, дегани қизиқ. Эҳтимол, қисиқ қўзларига шундай кўрингандирман. Бармоқла-ри орасига қистирилган сигарет билан қайси стулга ўтиришим кераклигини ишора қилиб кўрсатди. Деразанинг бир табақаси очиқ турар, шунда ҳам тутун буруқсиб кетган эди. Бошлиқ шу кўринишида уйқуга шўнғиган айиқни эслатарди. У, қани, гапиринг, дегандек бошини қимирлатиб ишора қилди. Мен муддаони

тушунтира бошладим. Лекин қўшни хонадан келаётган ҳалиги чолнинг бақириғидан бошлиқ менинг гапларимни яхши эшитолмади.

– Қаттиқроқ гапиринг, опаммисиз, синглиллуммисиз, қулоғим сал оғирроқ, – деди у ўнг қулоғини мен томонга тутиб.

Мен гапларимни бошқатдан такрорладим.

– Уф, бу одамлар бунча шовқин кўтаришади, а? Ҳм, тушунишим бўйича сиз иш сўраб келгансиз, шундайми? Ҳа, ишлаш керак. Ишламасак, бизни ким боқади?

– У бармоқлари орасидаги тутаб бўлган сигаретни кулдонга эзғилаб ташлаб, бошқасини олиб ёндириди. – Ишлаган яхши, ишламаган тишламайди, тишламаган хушламайди, дейишади-ку. Мана бу гапнинг мағзини чақингда сиз, опаммисиз, синглиллуммисиз. Ахир, ҳаммамиз ҳам тирикчилик, бола-чақа деб юрибмиз, шундай экан, ишламай иложимиз қанча. Вой-во-ей, бунча бақирмаса бу одамлар. Даврон, – дея бақириб кимни дир чақирди. Даврон деганлари ҳам доим сергак турар экан чоғи, дарров эшикда пайдо бўлди. – Ким у дод солаётган?

– Шоҳбекатнинг ёнидаги чойхонанинг хўжайини Асқар бува. Солиқларни нотўғри ҳисоблагансанлар, деб дийдиё қилаяпти.

- Сенга бақиряптими?
- Менга бақиряпти.
- Ҳм, қаттиқ бақиряптими?
- Ҳа, қаттиқ бақиряпти.
- Айт, аста бақирсин.
- Хўп бўлади, айтаман, хўжайн.
- Бошлиқ шу ердалар, дегин.
- Майли.
- Бунинг устига олдиларида вазирликдан келган бир опа ўтирибдилар, дегин.

- Шундай дейман.
- Табаррук меҳмон келганда кутурган тудай бўкириш одобдан эмас экан, дегин.
 - Айтганингиздай дейман, хўжайин.
 - Ҳа, яна айт, бошлиқ афғончи, дегин.
 - Хўп бўлади, шундай дейман.
 - Контузия бўлганимният айт.
 - Албатта айтаман.
 - Жаҳли чиқса, болта билан чопиб ташлайди, кеин бозорда калла-поча арzon бўлиб кетаркан, деб айт.
 - Айтаман.
 - Менга қара, гапларимни тушундингми?
 - Тушундим, хўжайин.
- Боравер. – У қўлидаги тугаб бораётган сигаретни кулдонга босиб, эзғилаб, навбатдагисини олиб ёқди. Кейин бошини чангллади. – Эҳ, бу афғон. Умримнинг ярмини еди ўша уруш. Қобулда бўлдим, Қандаҳорда қон кечдим, контузия бўлдим. Ўлмаса, юраверар экан одам. Сиз контузия нималигини биласизми? – сўради у мендан.
 - Йўқ.
 - Э, билмаганингиз яхши, опаммисиз, синглиммисиз. У жуда ёмон нарса, одамни хароб қиласади. Эсламай дейман-у, лекин одамлар мажбур қилишади-да.
- Афғончи бошлиқ бирини тоғдан, бирини боғдан олиб гапира-гапира бошини стол устига қўйиб, ухлаб қолди. Қўлидаги яримлаган сигарет ҳамон тутарди. Менинг илтимосим ҳам хонани тумандай тўлдирган тутунларга қоришиб учди-кетди.

* * *

Узумзордаги идоралар ҳам ўзимизнинг Боғишоддагидан қолишимас экан. Бир неча кун у ерга зир қатнаб, кирмаган эшигим қолмади. Биронтаси ишга ола-

ман, демайди. Ҳаммалари “хабар олиб туринг, бирон иш бўлиб қолар”дан нарига ўтишмайди. Хабар олиб туришнинг ўзи бўларканми. Ҳар сафар Узумзорга бо-риб келганимда онам йўлимга илҳақ бўлиб ўтирган бўлади. Чорасиз қайтиб келганимни кўриб, ич-ичидан ғамга ботади. Шундай бўлса-да, сездирмасликка тиришиб, менинг кўнглимни кўтаришга уринади. Оҳ, меҳрибон онажоним-а. Мен қайси идорага бош суҳсам бор-йўғи оддийгина фаррошлиқ ёки хат ташувчиликка ўхшаган фақирона иш сўрадим. Наҳотки шугина ҳам топилмаса? Узумзордаги мактаб, боғчалар, дўкону устахоналар бўсағаси ҳам менинг қадамимдан чангиди. Почта идораси бошлигининг бир оғиз “бу ерга бекор келибсиз, бизда иш йўқ” деган гапини эшитиш учун икки соат кутибман. Газ идорасининг бошлиғидан бир дунё насиҳат эшилдим. У шинамгина хонада ўтирас, хонанинг эшик ва деразалари очиб қўйилган, деразалар чинорнинг қуюқ сояси тушиб турган боғ ҳовлига қараган, у ердан сайроқи қушларнинг ёқимили товушлари эшитилиб турарди. Бошлиқ хонасининг эшиги ёнида бир чол семиз папкадаги сарғай-иб кетган қоғозларни тўғрилаб турган эди. “Сен ҳам бошлиқнинг олдига кирмоқчимисан, қизим? – деди у ўсиқ қошлари остидаги бургут кўзларини менга қадаб. – Унда киравер. Бу ивирсиган бобонг қоғозларини тартибга келтиргунча узоқ кутиб қоласан. Мен сендан кейин кираман”. Бошлиқ менинг гапларимни мўйлабини тарай-тарай эшилди.

– Сиз қайси маҳалладансиз ўзи? – деди у оёқлари ни чалкаштириб ўтирганча.

- Боғишоддан келдим, бошлиқ амаки.
- Боғишодга газ қувури етиб бормаган. Бормоқчи ҳам эмас. Шундоқ ҳам аҳолига газ етказиб бўлмаяпти. Биз биринчи галда марказни таъминлашимиз керак.

Газ етмаганидан одамлар ҳар куни устимиздан шикоят ёзгани-ёзган. Боғишодга газни вақти-вақти билан баллонларда олиб бориб беряпмиз.

– Мен иш...

– Тушундим, бу ҳақда айтдингиз. Биз бир айтган даёқ тушунадиган одаммиз. Лекин сизга иш ўрнига икки оғиз құмматли маслаҳат беришим мүмкін, холос. Ана шу қамматли маслаҳат, билиб қўйингки, бизда мутлақо бепул. Ҳозир ишлайман деган одамнинг ўрни қаерда? Далада. Авваллари экин майдонлари колхозлар ихтиёрида, яъниким давлатники эди. Ҳозир, мана, колхозчиликка, тўрачиликка барҳам берилиб, ер фермерларга, яъниким ҳақиқий деҳқонларнинг қўлига ўтаяпти. Бу нима дегани? Бу ишла, меҳнатингга яраша ҳақингни ол, дегани. Колхоз ва совхозларда-чи, ишлаган ҳам, сояда ётиб ошу нонни тишлиған ҳам баб-баробар маош олаверарди. Сиз ҳам бу атрофлардан енгилгина иш қидириб юрмасдан, фермер дала-ларига боринг, азamat йигитлар, қадоқ қўлли қизлар жавлон уриб ишләётган меҳнат майдонларида ўзингизни кўрсатинг. – У ўрнидан туриб у ёқдан бу ёққа салмоқлаб қадам ташлаганча, қўшиқ айтаётгандек куличини кенг ёзиб гапирав, четдан қараган одам гўё спектакл томоша қилаётгандек бўларди. – Ёки бўлмаса мактабда яхшироқ ўқиши керак эди. Агар яхши ўқиганингизда эди, ҳозир мана бундай қилиб тозаловчи ёки югурдак бўламан деб иш ахтариб юрмас эдингиз. Обрўли университетларга борардингиз, етук кадр бўлиб келардингиз. Иш жойларининг ўзи сизга мунтализир бўлиб турар эди.

О, бошим айланиб қаерларга келиб қолдим? “Мен нима дейман-у, қўбизим нима дейди”. Бу одамга нимани гапирай, қандай тушунтирай? Мен ҳолимдан хабар бериш учун эмас, иш сўраб келганман-ку. Шуларни

ўйлаб, эндинин кетмоқчи бўлиб турганимда бояги қофоз титкилаб турган чол бошлиқнинг хонасига шахт билан кирди.

– Эй, маймуннинг боласи, тур ўрнингдан-е, хунаса, – деди у бошлиқни урадигандай бир важоҳат билан. Бошлиқ кутилмаганда довулга дуч келгандай довдираф қолди. – Нега артистлик қиласан? Муштдай қизга берган насиҳатинг шуми, баччағар? Сен айтган фермерлар иш берганда бу қиз сендай хотинмижознинг пойгагида эгнини қисиб, мистар бўлиб ўтиармиди? Сен айтган йил ўн икки ой “жавлон урадиган” йигит-қизлар арпа-буғдой экиладиган бизнинг далаларда эмас, нариги туманлардаги пахтазорларда. У ёқларга боришга имкони бўлганда, балки, бориб ҳам кўрарди. Ана шу “жавлон ураётганлар” меҳнатига лойиқ ҳақини олаётган бўлса, ҳамма ўша ерга бориб ишламасмиди? Колхоз, совхозларинг қандай бўлганини мана мен биламан. Энди фермерларингниям кўрдим. Ҳаммасиям инсофли бўлса гўрга эди-я. Бу дала хўжайнингнинг орасида шундай пиҳини ёрганлари бор эканки, қилган ишидан илон пўст ташлаб юборади. Қўлида ишлаётган бечораларнинг ҳақини икки қоп буғдой, бир қоп арпа билан баҳолайдиганлари ҳам бор. Бояқиши деҳқонлар болаларининг кўзларига қараёлмаганидан иш излаб бошка юртларга кетиб қолганларини билмайсанми? Буни билиш учун кўриш керак. Кўриш учун мана бу катагингдан бир-икки қадам нарироқларга чиқиш керак. Сен бўлсанг бу ерда новвот солиб, кўк чойни симириб ўтирибсан. Бу қизгинанинг ҳам сенга айтаман деса айтадиган ичиди ана шундай гаплари бор, лекин айтмайди. Чунки андиша қиласди. Унинг ўрнига мен айтдим. Азбаройи юрагим куйиб кетганидан айтдим. Мен андиша қилиб ўтирадиган, сендайларни юзхотир қиласдиган ёшдан ўтиб кетганман.

Қоқ пешинда ҳавонинг тафтидан лоҳасан бўлласан киши. Одамлар ўзларини соя-салқинга урган, мен эса ҳамон кўча кезиб юрибман. Очликдан силлам қуриди. Ўйлаб қарасам, икки кундан бери иштаҳам йўқлигидан туз тотмаган эканман. Қатор ўсган тераклар соясига ўтириб, йўлнинг нариги томонидаги сомсаҳонани кузатмоқда эдим. Сомсанинг тандирдан қўтарилаётган ҳузурбахш ислари димоғимга келиб урилди-ю, иштаҳам Кўқон дарвозасидай очилиб кетди. Лекин ҳамёнимда бор-йўғи йўлкирага етадиган пулим қолган эди. Одамлар айвон тагидаги ўриндиқларни тўлдиришган, манглайига рўмолини танғиб боғлаган бақалоққина аёл бир қўлида патнис қўтариб, хўрандаларга сомса билан чойни етказиб турибди. Мен эса ўзимни эмас, иштаҳамни тўйдирсам бас. Бунинг учун шунчаки, сомсаларнинг иси ҳам кифоя қиласарди.

Шу куни эшикма-эшик юравериб, кеч қолиб кетдим. Бекатга келганимда Боғишодга борадиган автобус аллақачон кетиб бўлган экан. Қуёш ботаётган, шамол туриб ҳаммаёқни тўзғитаётган эди. Бекатда менга ўхшаб улов кутиб турган бир чол билан кампир олдимиизга келиб тўхтаган юк машинасига чиқишиди. Мен ҳам чиқмоқчи бўлган эдим, ҳайдовчи Боғишодга бормаслигини айтди. Бегона бекатда бир ўзим қолдим. Шамол баттар кучайиб борар, қумларни учирив юзимга урар, кўзни очирмасди. Яқин атрофдаги уйларнинг томларидаги тунукалар шамолда ваҳимали тарақлар, қоронғи чўккани сари қўрқувдан дағ-дағ титрардим. Кўчада машиналар ҳам кўринмай қолди. Энди тасодифан бирорта йўловчи машина келиб қолмаса нима қиласман, бу ёт жойларда қаердан паноҳ топаман, деган ўйдан яна минг карра ваҳима босар эди. Аксига олиб шамол тобора ҳаддидан ошаяпти. Бундай тўзонда кўз очиш тугул, ҳатто нафас олишга ҳам қий-

нала бошладим. Бунинг ўрнига ёмғир ёғиб берса яхши бўларди. Тўзонда тўзғигандан ёмғирда шалаббо бўлган афзалроқ эди.

Узоқдан бир отлиқнинг қораси кўринди. У мен томонга яқинлашиб келмоқда эди. Юрагимдаги қўркув кучайди. Ким бўлди экан у одам? Шундай бўронда нима қилиб юрибди? Яхши одаммикан ёки биронта нияти совуқмикан? Нега тўппа-тўғри мен томонга келяпти? Эй Худо, ёмон бўлса, юзини тескари қил, яхши одам бўлса, фақат ўзингнинг раҳминг келганига йўйгайман!

– Хой, кимсиз, шом маҳали бекатда нима қилиб турибсиз? – деди отлиқ ёнимга келиб тўхтаб. Аёл киши экан, шундан ичимдаги ҳадик бироз аригандай бўлди.

– Автобус кетиб қолибди, биронта йўловчи машина ўтиб қолар деб кутиб турибман, – дедим у эшитсин дея қичқириб.

- Қаерга кетмоқчисиз ўзи?
- Боғишодга.

Аёл отдан тушиб менга яқинроқ келди. Елкамга астагина кафтини қўйди ва шамолга тескари ўгириб, юзимга диққат билан тикилди.

– Сен Боғишоддаги Офтоб холанинг қўшнисимисан? Мени эслай оласанми? Сен билан уларнинг уйида кўришган эдик. Офтоб холанинг жияни Нурияман, – деди у қўлларимни ушлаб.

Кўнглимда тонг ёришиб кетгандай бўлди. Юрагимни исканжага олиб турган қўркувдан асар ҳам қолмади энди. Тангримга қилган илтижоларим ижобат бўлиб, кўқдан нажот фариштаси тушгандек эди гўё. Чангга тўлаёзган кўзларимдан ёш чиқиб кетай деди.

– Ҳа, мен ўша қизман, Марямман, – дедим қувончим ичимга сифмай.

– Кутиб турганинг билан энди машина келмайди. Қара, кўчада ҳеч зоғ йўқ. Шом маҳали бундай шамолда машиналар ҳам кўчага чиқмайди. Бизнинг уйимиз яқин жойда, юр, бугун бизникида қоласан.

– Узр, бу ерда қололмайман. Аям мени кутиб хавотир олади.

– Барибир машина йўқ.

– Аям қаттиқ хавотир олади. Яёв бўлса ҳам кетишм керак, опажон.

– Яёв? Богишодга-я? Ундан бўлса майли, аввал бизникига борайлик. Ўша ердан биронта улов топиб, сени уйларингга жўнатиб юбораман. Қани, тезроқ отга мингаш.

Мен шу пайтгача от миниб кўрмаган эдим. Отнинг пишқиришидан ҳам, ҳайбатидан ҳам чўчиб турардим. Нурия опа отига бир сакраб миниб олди. Кейин мен узангига оёғимни қўйиб, қийнала-қийнала миндим. Енгилгина тушган бир қамчидан сўнг от йўргалаб кетди. От устида кетяпман-у, худди Регистон минорасининг устига чиққандек оёқ-қўлларим қалтирай бошлади. Бу баландликдан йиқилиб тушмаслик учун Нурия опани маҳкам қучоқлаб олдим. Истараси иссиқ бу аёлнинг қалбida куёш порлаётганга ўхшарди. У йўл-йўлакай менинг нега адашиб юрганимни сўради. Мен ташвишларимни айтиб бердим. Уларнинг ҳовлисига кирганимизда ҳеч ким кўринмас, айвон остидаги чорпояда сочиққа ўралган чойнак-пиёлалар турган эди. Бизнинг келганимизни билиб, ичкаридан полвон-келбат киши чиқди. У Нурия опанинг эри экан.

– Нима бўлди, кеч кирганда ҳавонинг авзойи бузилдими? – деди у менинг саломимга илиққина алик олиб.

Нурия опа мени у кишига таништириб, аҳволимни тушунтирди. Улар биргалашиб мени ичкарига таклиф қилишди, мен унамадим.

– Сизлар ўтириб туринглар, мен ҳозир бирон чора топаман, – деди Нурия опанинг эри ва кўчага чиқиб кетди. Биз чорпояда ўтириб, бир пиёла чой ичгунимизча дарвоза олдида машина товуши эшитилди.

– Мана шу машина уйингизгача элтиб қўяди синглим, – деди Нурия опанинг эри.

– Эртага мен айтган манзилга албатта келгин, ишни биргалашиб қидирамиз, – дея тайинлади Нурия опа машинага чиқаётганимда. – Келаётганингда онангга айт, кеч қолгудек бўлсам, Нурия опамнинг уйида қоламан, хавотир олманг, дегин.

Парвардигор, сахий ва меҳрибон одамларнинг умри ни зиёда қил!

* * *

Нурия опамнинг олдига қанчалик боргим келса ҳам, лекин шанба ва якшанбани уйимизда ўтказдим. Онам билан бирга ерга дув-дув тўкилган ўрик ва олмаларни тердик. Уларни бозорга олиб бориб сотиб ҳам келдим. Қолганларини қурисин деб томга ёйиб қўйдик. Бир қарич ерни бўш қолдирмайдиган онам баҳорда унча катта бўлмаган томорқамизга ҳар хил сабзавотлар ва кўкатларни эккан, мен гоҳида ёнида ёрдамчи бўлиб турганман. Лекин мен мактабга кетган пайларимда ҳам онам бир лаҳза тин олмаган. Мана, энди карам, сабзи, пиёзлар тайёргина ҳосил бериб турибди. Дилобар опадан олган помидор кўчатларини ҳам ерга қадаб чиққан эдик, ҳозир меваларини кўтаролмай қолибди. Биз шуларнинг тагини юмшатиб, бегона ўтларини юлдик. Сезиб турибман, онамнинг бели оғриб, кўзлари тинди. Лекин менга сир бой бергиси келмай, помидор шохларини кўтариб туриши учун чўплардан тиргак қўяётган эди. “Ая, сиз уйга кириб дам олинг, бу ишларнинг ҳаммасини ўзим қиласман”, дедим. Онам унамади, букилганча ишини давом эттираверди. “Ая, мен чарчадим, уйга кириб озгина дам олайлик, кейин яна ишлаймиз”, дедим. Шундан сўнг, онам зўрға қаддини ростлаб, пайкалдан чиқди. Уйга кириб, нонушта қилиб олгач, қўярда-қўймай онамнинг белини, оёқла-

рини уқаладим. Онам ҳорғин ётиб, ухлаб қолди. Кейин аста чиқиб, экинлар билан ўзим сирлашдим.

Эрталаб чароғон кайфиятда автобусга миниб, яна Узумзорга бордим. Одамлардан сўраб, Нурия опа айтган манзилни топдим. “Шодлик” дўйконининг рўпарасидаги оқ бино, деган эди. Шу оқ бинони Нурия опа ижарага олиб, қизларга чеварлик ва пазандаликни ўргатадиган ўқувхона очган экан. Хоналарнинг бирида қизлар чеварликни ўрганишаркан. У ерга иккита тикув машинкаси қўйилган, жавонда ранг-баранг матолар тахланган, тайёр бўлган бир нечта чиройли қўйлаклар кўз-кўз қилиб илиб қўйилибди. Каттагина газ печи қўйилган иккинчи хонада эса қизлар турли-туман пишириқлар тайёrlаб, пазандаликни ўрганишар экан. Ҳали ҳамма келмаган, фақат икки қиз хоналарни шамоллатиб, эшик олдига сув сепишаётган эди. Улар ичкарига кириб, кутиб туришимни айтишди. Кейин яна ўн чоғли қиз бирин-кетин келишди. Улар шундай хушчақчақ эдиларки, қараб туриб ҳавасим келди.

– Марям, келдингми, хайрият, – деди Нурия опа кела солиб, эшикдан ҳам кирмасдан. – Юр, сени бир жойга олиб бораман. – Гулсара, ишларни ўзинг бошлаб тур, мен ҳозир келаман.

Икковимиз бир-бирига уланиб кетган кенг ва тор кўчалардан яёв юриб кетавердик. Икки томонига ранг-баранг гуллар экилган катта йўлга чиқдик. Бу кўчанинг ҳар икки тарафида кетма-кет жойлашган кўркам иморатлар кўп эди. Биз ойналари қорайтирилган, атрофига арчалару чиройли гуллар экилган бир бино томонга юрдик. Яқинроқ борганимиздан сўнг бу банк биноси эканлигини билдим. Бино ичкарисига кириб, гилам тўшалган зинапоялардан иккинчи қаватга кўтарилидик. “Ходимлар бўлими” деб ёзилган эшикни очганимизда соchlари қордай оппоқ кекса бир аёл қофозларга кўмилиб ўтирган экан. У кўзойнагини

тушириб бизга қаради ва Нурия опани күриб, юзида табассум пайдо бўлди.

- Нурия, қизим, кел, киравер, - деди у. - Олиб келдингми синглингни?

- Жаннат опа, сизга айтган синглим мана шу, - деди Нурия опа.

Улар мен ҳақимда аввалроқ гаплашиб олишган чоғи, Жаннат опа, ҳаммаси тушунарли, дегандек бош қимирлатиб кўйди.

- Кўп сарсон бўлибсан, қизим. Бахтингга ҳозир бизда сенга мос келадиган иккита бўш жой бор. Менга ёрдам берадиган қиз турмушга чиқиб кетди. Икки ойдан бери мана бу ишларнинг ҳаммаси ўзимга қолиб кетган. Фаррош хотин ҳам сурункасига касал бўлавер-иби, охири ишдан бўшади. Маоши оз-у, лекин барибир иш-да.

-Майли, нима иш бўлса ҳам қилавераман, - дедим иш топилганидан ўзимда йўқ севиниб.

- Шу икки ишдан қайси бирига олишни фақат бошлиқ ҳал қиласи. Гаплашиб кўрайлик-чи. Лекин ўзига яраша анчайин ўжар одам-да, - деб у аста ўрнидан қўзғалди. - Сен, Нурия, ишингга боравер. Синглингни бошлиқнинг олдига ўзим олиб кираман.

Бошлиқнинг ҳам хонаси иккинчи қаватда экан. Жаннат опа йўлакдан оқсоқлангандай зўрға юриб борар, мен ҳам ортидан товуш чиқармай, авайлаб қадам ташлардим. Жаннат опа мени қабулхонада қолдириб, бошлиқнинг хонасига кирди. Қабулхонада ўтирган қиз менга эътибор бермай, бир қўлида кўзгу, бир қўлида лаб бўёғи билан ўзига оро бериб ўтиради. Унинг соchlари жингалак қилинган, қошлари қалдирғоч қанотидай чиройли терилган, юзидаги жамики пардози ярашиб тушган, қараган одамнинг ҳаваси келмасдан қолмасди. Лекин енгизиз, ёқаси кенг очиқ кўйлак кийгани менга маъқул бўлмади. Қабулхона ҳафсала билан

жихозланган, деразага ҳарир парда илинган, бурчакларга нафис гуллар қўйилган, ўриндиқлар суюнчиғига оппоқ жилд қопланган, хушбўй атири ҳиди анқиб турган эди.

– Иш масаласида келдингизми, опа? – деди у ниҳоят пардозини тугатаркан, қайрилма киприкларини пирпиратиб. – Мен бош қимирлатиб тасдиқладим. – Аввал қаерда ишлагансиз?

– Ҳеч қаерда, яқинда мактабни битирдим.

Гўзал қизнинг шаҳло кўзлари чақнаб кетгандай бўлди.

– Вой, ёшгина қиз экансан-ку. Кўринишингга қараб катта ёшли аёл бўлсанг керак, деб ўйлабман. Исминг нима?

– Марям.

– Меники Ноила, бу ерда ҳамма Неля деб чақиришади. Аббос Алиевичнинг иш юритувчисиман. – Аббос Алиевич дегани бошлиқнинг исми шарифи бўлса керак. – Фаррошликка келган бўлсанг керак?

– Билмадим, қайси ишга олишса ҳам ишлайвераман. Мухими, олишса бўлди.

– Ҳа, фаррошликка олиши мумкин. Аббос Алиевичнинг қандай қарорга келишларини олдиндан айтиб бера оламан. Чунки у кишининг феълларини мендан яхши биладиган одам йўқ. Ўн кунча бўлди, фаррошга ёлчимай қолдик. Ҳамма ёқ ивирсиб кетди. Аббос Алиевич билан шу ҳақда ўйлаб юрган эдик ўзи. Тик тураверасанми, ўтири. – Мен бошлиқнинг эшиги ёнидаги стулга ўтирдим. – Ҳадеб касал бўлавермайдиган, оёқ-қўли чақон фаррош бўлса ёмон бўлмасди.

Бошлиқ хонасининг эшиги очилиб, Жаннат опа мени чақирди:

– Марямжон, кел, кир бу ёққа, бошлиққа кўриниш бер.

Бошлиқнинг хонаси Неляхоннинг хонасидан ҳам ораста ва шинам экан. Бу хонадан ҳам хушбўй атири-

нинг иси уфуриб турарди. Хона салқинлантирилган, айни офтоб тиғида күйган одам учун бу ер жаннат-нинг ўзгинаси деса бўлади. Оппоқ кўйлагининг ёқасига бежирим бўйинбоғ таққан бошлиқнинг бармоғида тилла ҳалқа ялтираб турибди. Чамамда қирқ ёшлардаги бу одам бир қарашда кишида ёмон таассурот уйғотмайди. Аммо... У ёқдан-бу ёққа юриб, симсиз телефонида ким биландир хушчақчақ кайфиятда гаплашаётган эди. (Биламан, ҳозир кўпчилик раҳбарлар шундай телефон олиб юришади). У телефонни ўчиргач, менга нигоҳ ташлади-ю, юзи бирдан тундлашди.

- Рўмолингизни ечиб қўйинг, мачитда эмассиз, - деди у дабдурустдан.

Мен қўрқиб кетиб, Жаннат опага қарадим, лекин бошимга қилич солсалар ҳам рўмолимни ечгим йўқ эди. Жаннат опа нимадир дейишга оғиз жуфтлаган эди, бошлиқ:

- Бўлди, чиқаверинг, тушунарли ҳаммаси, - деди қўрслик билан. - Опа, сиз қолинг, - деди Жаннат опага.

Мен хонадан чиқиб, бояги ўриндиқча бемажол ўтирдим. Кўлларим қалтираб, ҳолсизланганимдан эшикни маҳкамроқ ёполнадим. Ичкаридан бошлиқнинг Жаннат опага бақириб гапираётгани баралла эшитилиб турар эди.

- Опа, сизга юз марталаб айтганман, бу даргоҳга бунақа рўдаполарни тўплайверманг, деб. Сизга ёрдамчиликка бошқа одам қуриб қолганми? Сизга ёрдамчи дегани шахсий адъютантингиз дегани эмас, банк ходими дегани. Шу аҳволида кириб-чиқиб юрса, кўрган кўз нима дейди? Бу ишхонами, лўлихонами, демайдими? Ҳижоб ўраган қизни менинг олдимга тап тортмай олиб кирганингизни қаранг. Ҳозир бундайлардан ҳушёр бўлиш керак. Огоҳлик, огоҳлик ва яна огоҳлик. Ҳозир бутун дунёда паранжию ҳижоб ичига бекинган

бузғунчилар изғиган пайт. Одамхўрлар мана шунақа мумсиклардан фойдаланиб, ҳамма ёқни остин-устин қилишяпти. Ҳижобни ўраб-чирмаб олибдими, ундан эҳтиёт бўлишимиз керак.

- У ҳижоб эмас, Аббос Алиевич, оддий рўмол-ку.
- Нега у ҳолда, рўмолингни еч, десам унамади?
- У доим рўмол ўраган, ҳаёли, тарбия кўрган қиз.
- Нима, унда бошяланг юриб, замонавий кийинган қизлар тарбия кўришмаганми?
- Ундей демоқчи эмасман.

Мен уларнинг тортишувларини эшишиб туриб, бўлди, бу ерда ҳам омад менга ўз эшикларини очмади, деган холосага келдим. Қалбимда изтироб аланга олди. Мени деб бир бечора кекса аёл ҳам балога қолди. Руҳим чўкиб, кўзларимга ёш қалқиб чиқди. Ё тавба, оддий рўмол билан ҳижобнинг фарқига бормайдиган қандай раҳбар экан бу? Аслида мен ҳижобнинг кўчасидан ҳам ўтмаганман, ҳеч қандай бузғунчилардан ҳам хабарим йўқ. Мен намозхон бўлган эмасман, намоз ўқиш амалларини ҳам ҳозирча билмайман. Аммо ҳар куни дераза олдига ўтириб оламан-да, қиблага юзими ни тутиб, Яратганга илтижо қилишни ёдимдан чиқармайман. Бу одамнинг кўзи ўзларини замонавий деб биладиган қизларнинг очиқ-социқ кийиниб юришларига кўнишиб қолган, шекилли, рўмол ўраганин кўрса юраги безилладиган бўлиб қолибди. Шу кетишда бу одам эчкини кўриб қолса: соқоли бор экан, эҳтиёт бўлиш керак, бу қайсиdir бузғунчилардан бўлиши мумкин, дейишига ҳам асло шубҳа қилмайман. Кўнглим оғриди, лекин наилож, ишлашим керак. Неляхон эса ҳеч нарсага парво қилмасдан, тирноқларига зеб бериб ўтиради. Унга яна ҳам ҳавасим келиб кетди.

- Майли, фаррош қилиб оламиз, – деди бошлиқ ниҳоят. – Шунда ҳам сизнинг хурматингиз учун хўп деялман. Фақат ташқарини супурсин. Бино ичкарисини

супуриб юрганини мен күрмай. Огоҳлантириб қўяй, агар ҳижоб масаласида биронта гап тегадиган бўлса, сиз жавоб берасиз.

Жаннат опа бошлиқнинг хонасидан ҳам чарчаб, ҳам табассум билан чиқди.

- Ишинг ҳал бўлди, жоним қизим, – деди у мени ўзининг хонаси томон етаклаб. Мен қулишимни ҳам, йиғлашимни ҳам билмасдим. Шунча дағдағадан кейин мени ишга олишганига ишонгим келмасди. – Хафа бўлма, бошлиғимиз жizzакироғ-у, лекин ўзи ёмон одам эмас, ҳурмат қилишни ҳам билади. Эртадан бошлаб ишга чиқавер. Вақтлироқ келиб, аввал идоранинг ичкарисини бошлиқ келгунча тозалаб чиқсанг, ундан сўнг ташқарини bemalol саранжомлайверасан. Эшикбонларга сенинг ишга олинганингни айтиб қўяман. Ҳайдар бува деган боғбон ҳар доим шу ерда бўлади. Нимани қаердан олишинг кераклигини сенга кўрсатади. Аттанг, мен яна ёрдамчисиз қоладиган бўлдим-да.

Елкамдан тоғ ағдарилгандай бўлди. Энди иш ахтариб сарсон бўлмайман. Ҳар хил идоралар остонасида бошимни эгиб, бурнидан нарисини кўролмайдиган одамлардан мурувват кутиб ўтирмайман. Муҳтоҷлик кўчасидан ўтиб кўрмаган одамлар эрмаклаб кулиб, дилимга наштар санчишмайди. Энди ҳар куни тўғри мана шу даргоҳга келаман. Ўз ишимни деб келаман. Бу йўлакларни, хоналарни, анвойи гуллари кўзни қувнатиб турган ҳовлини чиннидай қилиб қўяман. Ўз уйимдай озода сақлайман. Буни айтсам, онам ҳам бениҳоя қувонади. Қувонганида юзу кўзларида хасталик аломатлари ҳам кўринмай кетади. Энди онамнинг малҳам дориларини вақтида олиб келаман. Энди биз ҳадеб тегирмонга дон орқалаб боравермасдан, унни бошқалар қатори дўкондан сотиб олсак бўлади.

Ҳаяжоним ичимга сиғмасди. Қўчада кетаяпман-у, ерда юраётган эмас, қанот боғлаб, осмонда учайтган-дек эдим гўё.

* * *

Биринчи иш куним роса қизиқарли бўлди. Саҳарлаб ишга шошилдим. Автобусни ҳам кутиб ўтири-масдан, йўловчи машинага чиқиб, Узумзорга етиб олдим. Ҳали кўчалар сув қўйгандай жимжит, қайси-дир ҳовлилардан хўроzlарнинг кимўзарга беллашиб қичқираётгани қулоққа ёқимли эштилади. Мен иш бошлайдиган идорага ҳали ходимлар келмаган, эшик кўриқчиси кираверишдаги ўзининг ойнаванд хонасида уйқусираб ўтирган экан. Бино олдидаги гулларга ҳозиргина сепилган сув томчилари шудрингдай мильтираб, тонг қуёшининг илк нурларини кутиб олмоқда. Демак, Ҳайдар бува шу ерда. Ҳайдар бува деганимиз бу идорани гулзорга айлантириб юборган киши экан. Фақат эшик олдидаги эмас, ичкаридаги йўлагу хоналарга қўйилган тувакдаги гулларни ҳам ўзи экиб ўстирганлигини кейин билиб олдим. Идоранинг орқа томонида ҳам кенггина боғ ҳовлиси бўлиб, у ерда ҳам йўлакларнинг четларига гулу райхонлар экилган, турли мевали дараҳтлар бўй чўзиб, соя ташлаб турибди. Бу жойни ходимлар ҳазиллашиб “Ҳайдар буванинг боғи” дейишар экан. Ана шу боғчанинг бир чеккасида ошхона ҳам бўлиб, унинг узун айвонига столлар қўйилган, ходимлар шу ерда тушлик қилишар экан. Бу ошхонанинг маликасини ҳам билиб олдим. Саломат исмли тўладан келган, кулча юзли кўзлари қувнаб турадиган бу аёлнинг гаплари одамни эритиб юборади.

Жаннат опа тайинлаганидай, аввал идора ичкарисини тез-тез тозалаб чиқдим. Бу ерда ишловчи-лар юриш-туриши саришта одамлар бўлгани боиси-дан ишим осонгина кўчди. Фақат мижозлар кўп кириб-чиқадиган кираверишдаги қабул майдончасини ювишга бироз ортиқроқ вақтим кетди. Анчадан бўён фаррош келмаганидан бу ерда чанг йиғилиб қолган экан. Туваклардаги гулларга сув қўйдим.

– Қизим, гулларга сувни ўзинг қуй. Уларни эрталаб ҳали қүёш тобламасдан суғорган яхши. Ходимларнинг ўзларига қолса, улар кун қизиганда ҳам қуяверишиади. Қарабсанки, гуллар толиқиб қолиши мумкин, – деди Ҳайдар бува.

Биринчи бор кирганимда бу идора кўзимга анчайин ҳайбатли кўринган эди. Энди ҳар бир хонага кириб-чиқавериб, йигирма чоғли ходим ишлайдиган идора эканлигига кўзим кўнига борди. Ходимлар ишга келгунича ичкаридаги ишларни тамомлаб, ҳовлини супуришга тушиб кетдим. Йўлакларга ариқдан сув олиб сепдим. Ҳовли ҳам унчалик ивирсимаган эди. Фаррош йўқлигида бу ерни ҳар замонда Саломат опа супуриб турган-у, энди шу супурги менинг қўлимда рақс тушмоқда эди.

Идорадаги ишларимни бир ёқли қилдим. Энди эшик олдида ивирсиб юрсам ҳаммага халақит бераман. Тағин бошлиқнинг менга кўзи тушиб, таъби хира тортмасин. Кун бўйи бу ерда бошқа қиласидиган ишим қолмади, уйга қайтаверсам ҳам бўларди. Лекин боғ томонга ўтиб, дараҳтлар соясида, ариқ бўйидаги райхонларни силаб озгина дам олдим. Ошхонада қўли-қўлига тегмай куймаланаётган Саломат опанинг ёнига боргим келди-ю, бироқ тортиниб турган эдим. Худди шуни сезгандай Саломат опа очиқ деразадан қараб, қўли билан ишора қилиб, мени чақирди.

– Нега бир чеккада шумшайиб ўтирибсан? Кел, ўтир мана бу ерга. Боядан бери қараб-қараб қўяман, қўл-оёғи чаққонгина қиз экансан. Сендан аввал ишлаган фаррош хотин ҳам эплигина эди. Шўрлик касал бўлиб, охирги пайтларда ишлашга ярамай қолди. Қани, энди менга гапириб бер-чи, кимсан, қаердан келдинг? Шундай қилиб, бир-биримизни билиб оламиз-да. Мен одамни қўзига қараб ичидагини ўқий оламан. Сенинг

юрагингга йиғилиб қолган анча-мунча дардинг борлиги шундоққина күриниб турибди. Э, қийинчилик ўз йўлига, ҳамма ҳам қийналади. Қаддингни кўтариб, олдинга қараб кетавер, шунда ҳаммаси ортда қолади. Мана, мен бева бошим билан қанча азобларга дучор бўлдим. Раҳматли эrim конда ишлар эди, тупроқ босиб қолди. Иккита болам билан фарёд қилиб қолавердим. Дод-вой қилиб ўтираверсам, полапондай болаларимнинг қорнини ким тўйдиради? Олдинига сомса ёпиб, тоғорада мана шунга ўхшаган идораларнинг атрофида сотиб юрдим. Бир куни шу идорадагилар: “Опа, қўлингиз ширин, пазанда аёлга ўхшайсиз. Ошхонамиз бор, лекин ҳеч тузукроқ ошпазга ёлчимаяпмиз. Шу ошхонани ўзингиз бир яшнатиб бермайсизми?” дейишди. Аёл киши ошхонани яшнатмаса, унинг аёллиги қаёқда қолади? Мана, ўшандан бери бу ердаман. Пиширган овқатларимни ҳаммалари мақтаб тановул қилишади. Фақат бошлиқ ҳар доим ҳам бу ёққа тушвермайди. Инжиқ одам, учеб-қўнаман дейди. Аввалги бошлиқ феъли кенг одам эди. Ҳамма ходимлар билан бирга ўтириб, тушлик қиласди. Менга раҳмат айтиб, таомни мақтаб қўйишни ҳам унутмасди. Вой ўлай, сени гапирираман деб ўзимнинг жағим очилиб кетганини қара. Ўзи шунаقا, кўп гапириб юборганимни кейин билиб қоламан. Сен ҳам фақат эшитиб ўтиравермагин-да.

Мен ҳам таржимаи ҳолимнинг анчагина қисмини айтиб бердим. Сездим, иш қидириб сарсон бўлганларими ни айтганимда хўрсиниб қўйди. Бу аёлнинг ҳам онамга ўхшаб юзи кулиб тургани билан, ичи тўла дард эди, на заримда. Дарди борлар кўзлари билан топишишади.

Ходимлар тушликка чиқишиди. Саломат опа енг шимариб ишга тушиб кетди. Ҳали чой дамлаган, ҳали нон узатган, чинни идишларни олиб бирорвга суюқ, бирорвга қуюқ овқатларни сузиб бераётган эди.

Мен ҳам ёнига ўтиб, күмаклашиб турдим. Ходимлар овқатланиб кетишганидан сўнг биргалашиб бўшаган идиш-товоқларни йиғиштириб олдик. Кейин уларни илиқ сувда ювиб, артдик. Ҳайдар бува келиб, бўш столлардан бирининг ёнига ўтирди.

– Саломат, бир чойнак чойингдан бер, – деди у рўмолча билан манглайидаги терни артиб, сўнг юзига шамол елпиди.

– Овқат ҳам сузиб берайми, Ҳайдар бува? Бугун юмшоққина хоним пиширганман, – деди Саломат опа.

– Бир луқма хоним – роҳати жоним, – дея Ҳайдар бува кулиб қўйди. – Раҳмат, энажоним, ҳозиргина уйдан овқатланиб келдим. Уйдан овқат емасам, кампир уришади. Лекин сенинг чойингдан ҳар куни ичмасам, чанқоғим босилмайди. Чойниям мусалласдай қилиб юборасан-да.

– Сиз уринманг, чойни мен дамлаб бераман, – дедим ва чойнак билан пиёлани ҳозирладим.

– Ундай бўлса, қора чой дамла, Марям, Ҳайдар бува хинд чойини яхши кўради, – деди Саломат опа. – Қора қутида қора чой бор, аччиқроқ қилиб дамла.

Ҳайдар бува чойни кўзларини сузиб, шундай хузур қилаётганини кўрсатиб ичардики, одатда чақалоқлар оналарини шундай иштиёқ билан эмадилар. У чойни мақтай-мақтай боғдаги дараҳтларнинг қай бири нечта мева туккани-ю, яна неча кунда пишишигача айтиб берди.

Боғишодга охирги автобус жўнашига ҳали вақт бор эди. Шу қолган вақтни Нурия опанинг ўқувхонасида ўтказишга кўнглим ҳам, кайфиятим ҳам даъват этаётган эди. Борганимда қизлар иккита машинка атрофига бўлинниб олишиб, мусобақа қилаётгандек нималарнидир тикишаётган, чуғурлашиб бир-бирларига ўргатишаётган экан. Пазанда қизлар эса Гулсара опани ўраб олишган.

– Киравер, Марям, Нурия опа ҳозиргина кетди, – деди Гулсара опа менинг аланглаб, қизлар орасидан Нурия опани ахтараётганимни сезиб. – Бўлди, буёғини энди ўзларинг давом эттиринглар, деб у ишни қизларга қолдириб, хамирли қўлларини ювди. – Ўтири, Марям, мана буларни татиб қўриб, мазасига баҳо бер-чи, – дея у қизлар тайёрлаган шириналарни стол устига қўйди. Улар шундай лаззатли эдики, бундай шириналарни ҳеч қачон татиб қўрмаган эдим.

– Биз ҳам мазасини қўрсак майлим? – деб чевар қизлар ҳам асалариdek ёпирилиб, ўзларининг насибалирини олишди. Кейин қалдирғочлардек чуғурлашиб мақташди.

– Нурия опа келармикан? – сўрадим яна ташқарига қўз ташлаб.

– Албатта, лекин қачон келишини билмайман, – деди Гулсара опа. – Нурия опанинг бошида мингта ташвиш бор. Гоҳ буюртмачиларга боради, гоҳ банкка югуради, ҳаммасига улгуриши керак. Бундай юргурюргулар менинг қўлимдан келмайди. Нурия опа эса бир ишга бел боғладими, қиёмига етказмай қўймайди. Тутган жойини шартта узиб олади. Икковимиз мана шу ўқувхонани бирга очдик, биргаликда қизларга ўргатаяпмиз. Э, мен деярли ҳеч нарса қилганим йўқ. Таклиф берганман, холос. Ҳаммаси Нурия опанинг иши. Мен ҳам асли узумзорликман, ота-онамнинг иши туфайли Тошкентда яшар эдик. Ўша ерда машхур “Юлдуз” ўқув маркази очилганда аввал опаларим ўқишиди, кейин уларга қизиқиб мен ҳам ўқидим. Пазандаликни ҳам, чеварликни ҳам, компьютерда ишлашни ҳам ўрганиб олдим. Тақдир тақозоси билан Узумзорга келин бўлиб келдим. Нурия опа билан танишганимиздан сўнг бир-иккита қўйлак тикиб бердим. Қўйлакларим ёқиб қолиб, менга ҳам тикишни ўргат, деб ҳоли-жонимга қўймади. Майли, дедим. Ҳеч қанча вақт ўтмай

ўрганди-қўйди. Ҳозир мендан ҳам ўзиб кетган. Ўзиям киришимли, ғайратли аёл-да. Пазандалигини-ку айт-масам ҳам бўлади. “Билганингизни бошқаларга ҳам ўргатсангиз бўларкан”, – деди Нурия опа. Шундай қилиб мана шу ўқувхонани очиш фикри туғилди. Икковимиз Тошкентга, “Юлдуз”га бориб келдик. Улар бизга шу ўқувхонани очишда ёрдам беришди. Банкдан қарз олдик. Ҳозир ҳам “Юлдуз”дагилардан маслаҳат олиб турамиз. Нурия опа яқинда бир янги ширинлик тайёрлади, ҳаммамиз лол қолдик. Мен унга озгина қўшимча қилдим – юзига нур сочиб турган қуёш расмини солиб, ширинликка “Нурия ширинлиги” деб ном қўйдим. От минишига бирам ҳавасим келадики. Қашқа Нурия опанинг жону дили – отининг лақаби шунаقا.

– Ҳа, от миниб юришларини кўрганман. Мен от минишига қўрқаман. Лекин бир марта минишимга тўғри келди.

– Қалай, қўрқинчли эмас эканми?
– Юрагим ёрилаёзди.
– Мен эса қўрқмайман. Нурия опадан сўраб бир-икки марта миниб кўрдим. Худди боғдаги чархпалакда учгандай бўласан, мазза. Қашқа деганлариям унча-мунча от эмас, донғи кетган отлардан. Унга суқланниб юрадиганлар қанча. Шунинг учун ҳам Нурия опа уни кўз-кўз қилиб минади. Бек ака, Нурия опанинг эри, уни фақат кўпкариларда минади. Қолган пайт от Нурия опанинг хизматида.

Димоқларимизга аччиқ куюнди ҳиди урилди.
– Оббо, қиз қурғурлар бир балони куйдирди, – дея Гулсара опа пазанда қизларнинг олдига югурди.

* * *

Санобарнинг тўйи бўлишини эшитиб, қулоқларимга ишонгим келмасди. Синфдош қизлар орасидан турмушга чиқаётган биринчи қалдирғоч. Одам ғалати

ҳолатга тушиб қолар экан. Кечагина құғирчоқ үйнаб юрган кичкина қизалоқлар әдик. Энди келин бўляпти, дейишса ростдан ҳам эртак тинглаётгандек этим жимирлаб кетади. Тўй бўлаётган бўлса, таклифнома бергандир, деб ўйлаган әдим. Йўқ, мен ишдалигимда онам икковимизни кўчадан айтиб кетишибди.

– Ҳали яқиндагина мактабни тамомлаган муштдай қиз бўлса. Эрга тегишга бунча ошиқмаса? – деди онам ҳайрон бўлиб. – Яна билмадим-ку, майли, борган жойида баҳтини топсин. Ишқилиб, охири баҳайр бўлсин.

– Ая, кимга келин бўлаётганини эшитмадингизми?
– Нима, хабаринг йўқмиди?
– Турмушга чиқаяпман, дегандай бўлган әди-ю, лекин кимгалигини сир тутган әди.

– Боймурод қассобнинг ўғлига тегаётган экан.
– Қассобнинг учта ўғли бор, қайси бирига экан?
– Каттасига эмиш. У шаҳарда ишлар экан, уйи ҳам бор эмиш. Кейинги иккитаси чет элда ишлайпти, дейишиди. Уйига пул юбориб туришаркан.

– Катта ўғли ҳалигача уйланмаган эканми? Янглишмасам, биздан деярли ўн ёшлар катта әди.
– Билмасам, лекин дугонанг ҳали гўдаккина әдида. Қассобнинг ўғлига ошиқ бўлганми, топиш-тутишигами, тушунмайсан киши.

Мен Санобарнинг тўйига бориш учун ўзимча тайёргарлик кўрган бўлдим. Онам эса шошилтиради.

– Тезроқ ҳаракат қил, дугоналарингдан қолиб кетма.
– Сиз-чи?
– Мен ҳам бораман, бирга борамиз.

Мен деярли тайёр әдим. Қошу кўзларимни бўя-майман, юзимга упа-элик суртиш ҳам менга бегона. Сочларим рўмолим остида. Тирноқларим-ку, бўёқларни орзу ҳам қилмайди. Хуллас, бундай жимжималар-

га менинг вақтим беҳуда сарф бўлмайди. Қайси кўйлагимни кийсам экан, деб ўйлаб ўтиришга ҳам ҳожат йўқ. Бундай жойларга кийиш учун ўзи биргина кўйлагим бор. Мактаб охирида хайрлашув кечасига ҳам шу кўйлак асқатган эди. Рўмолим бўлса ҳали бутунлай оҳорини йўқотмаган.

Санобарларнинг ҳовлисига етиб борганимизда тўй авжида, ҳамма елиб-юргурган, эшик олдида доираю сурнай садолари янграб турарди. Онам ўчоқбoshiда ҳар хил удумларни қилишаётган хотинларнинг орасига бориб кўшилди. Мен эса келиндугоналар чувиллашаётган уйга кирдим. Келин бўлмиш ўртада, қизлар уни қуршаб олиб, ясантиришаётган эди. Санобар келинлик либосида тенгсиз гўзалга айланган, худди маликаларга ўхшарди. Оҳ, бу пардоз деганлари атайлаб Санобар учун чиқарилгандай унинг ҳусну латофатини беармон намоён этиб турибди. Ҳаммаси ма-ромида, ҳаммаси гўзал, заррадек ҳам ортиқчалик йўқ. Эгнидаги оппоқ кўйлак анчагина очик-сочиқ экан-у, лекин фақат унга тикилгандек ярашиб тушибди. Кўйлакнинг орқа этаги узун, гуллари бежирим, қиммат-баҳо эканлигини ҳар қандай қиз бир қарашдаёқ пайқай олади. Бу кўйлакни олгунча тўй соҳиблари ҳам анча тер тўкишган бўлса керак. Санобарларнинг оиласи бадавлат эмас, оддийгина ўртаҳол хонадонлардан. Аммо шўрлик ота-оналар орзулари чегара билмас бу қизнинг баҳти учун нималарга рози бўлишмайди. Санобарнинг ойдай чехрасига қараган кўз қамашади. Шу тобда оқ кўйлак ичиди оддий бир қиз эмас, бус-бутун баҳт тўлғаниб тургандек гўё. Бундай баҳтиёрлик ҳар бир қизнинг орзуси. Шу кунга етмоқликни ўйлаб, хаёл суришнинг ўзи бир олам ҳузур. Момолар, бир қиз эрга тегса, қирқ қиз туш кўрармиш, дегувчи эдилар. Ҳозир Санобарнинг шодлигига ҳамма дугоналар ҳавасда

эдик. Келинчакнинг биримиз сочини, биримиз зирағини, яна биримиз кўйлагини тўғрилаш баҳонасида яқин турганимизнинг сабаби аслида, шу баҳтдан бир томчи бизга ҳам юқсин, деган илинждан эди. Кейин куёв билан келинни мулла ўтирган уйга шоҳидликка ўтувчилар билан бирга олиб киришди. Биз бўлсак келинчакнинг сепини таҳт қилиб қўйиш учун келино-йиларига кўмаклашиб турдик. Санобарнинг бир-бираидан чиройли келин кўйлакларини талашиб томоша қилдик. Лекин бу кўйлакларнинг ҳаммаси шаҳарлик қизлар киядиган фасонда экан. Пардоз ашёларини кўриб, муаттар исларидан маст бўлдик. Бу ашёлар билан пардоз қилиб, фақат шаҳарнинг салқин қўчалирию оромбахш боғларида сайр қилиб юрса ярашади. Пошнаси баланд ва михдек ингичка ўн жуфт пойабзални бизнинг қишлоқ қўчалари бир зумда масхара қилиб қўйиши мумкин. Бу каби пойабзалларни бизнинг нозиктаъб Неляхонимизга ўхшаб фақат ишхонага киргандан кейин кийиб юрса адолатдан бўлади. Бу қимматбаҳо оёқ кийимларини Санобарга олиб бериш учун бечора уйидагилари ҳар битта тишини суғуриб беришгандир, эҳтимол. Бироқ, начора, қиз ҳаётида бундай баҳтли кун бир марта бўлади. Агарда иккинчи марта ҳам ёр-ёр айтишга тўғри келса, буниси энди баҳт эмас, шунчаки тақдир тақозоси бўлади, холос.

Мулла никоҳ ўқиб бўлгач, куёв билан келинни яна биз турган хонага олиб киришди. Келинойилар уларни чимилдиққа солишли. Кўлларига ойна бериб, унга қаратишли. Куёв келиннинг соchlарини силади. Сўнгра икковини кўрпага думалатиб, ҳаммамиз кўрпанинг тўрт ёнидан кўтардик. Жағи тинмаган хотинларнинг удумлари кўп эди. Келинойилар ҳар бир удумдан кейин куёвтўрага товоқ тутиб, қани, иримиға пулдан ташланг, дейишар, куёв бўлмиш чўнтағи-

дан майда чақаларни зўрға-зўрға чиқариб, товоқقا ташлаганда уларнинг афтлари буришиб кетарди. Бу қурумсоқ куёвдан наф йўқ экан, деб қолган удумларни қисқартиришиб, куёвни ташқарига чиқариб юборишиди. Шундан сўнг, келинчакни бошқатдан ясантиришга тушдик. Хотинлар ҳам уйни тарк этишиб, келиннинг олдида биз, дугоналар қолган эдик. Келин тайёр бўлгач, икки йигит кириб келди. Уларнинг бири суратга, иккинчиси видеотасвирга ола бошлишди. Дугоналар келинчакнинг ёнида саф тортишган, хотинлар эшик ва деразалардан қараб туришарди. Ҳовли томондан: “Келинни олиб чиқинглар” деган хитоб эшитилди. Ниҳоят, дугоналар етовида келинчак олдинга қадам ташлади. Келинлик либосининг узун орқа этаги ерга судралаётган эди. Биламан, одатда шу узун этакни келиннинг дугоналаридан бири кўтариб юриши кепрак. Шу ишни мен қила қолай, деб этакни ушладим. Шу пайт Санобар ялт этиб менга ўгирилди-да, этакни юлқиб тортди. “Сен кўтарма, тасвирга олишяпти-ку. Тузукроқ қиз қуриб қолганми?” – деди у аччиқ билан. Ҳамманинг нигоҳи менга қадалди. Мен кутилмаган бу зардадан ўзимни йўқотиб қўяёздим. Атрофга жавдираб қарадим. Очиқ деразадан онам ҳам кузатиб турган экан, киприкларида ёш йилтиллади. Онамга қўзим тушди-ю, қалқиб кетдим. Хайрият, Гулнора жонимга оро кирди. У этакни шартта қўлига олиб: “Этакчиликка мана, мени тайнинлашган-ку, билмайсизларми?” деб ҳаммани кулдирди. Шу билан муздай совуқ лаҳза ўтиб кетди. Аммо юрагим музлаганича қолди. Бекор ушладим ўша этакни. Синфдош қизлар билан ўртамиизда қўринмас жарлик борлигини ҳар доим ҳис қилиб келганман. Лекин ҳозир азбаройи шарқираб турган шодлик дарёсига улар билан бирга шўнғиб кетганимни сезмай қолибман. Бошим айланиб, ўртадаги жар-

ликни хаёлимдан қочириб қўйибман. Мен ҳар сония хушёр туришим зарур эди, афсус. Бошимга тош билан ургандай, юрагимга ханжар суқиб олгандай кўзим ча-рақлаб очилди. Дугонамнинг бахтини ўз бахтиёрлигимдай ҳис этиб, еттинчи осмонда юрган мен бахтиқаро қиз шафқат қилмай айтилган биргина сўз билан ернинг энг чуқур жойига юзтубан тушдим. “Бахтинг тўкис бўлсин, дугонажон. Сен орзуларинг пиллапоясига, мана, биринчи қадамингни қўйдинг, биз фақат ҳавасдамиз. Сен, балки, бир кун келиб ростдан ҳам юлдузга айланарсан. Ўшанда сени эслаб қўйишнинг ўзи биз, қишлоқ даласида кетмону ўроқ кўтариб юрган қизларга бир олам қувонч ҳадя этади. Бугун сенинг энг бахтили кунинг. Шу сеҳрли кунда қувончингга нуқтадай қора доғ тушишини асло истамайман. Шунинг учун ҳам Гулнора хушёрлик қилиб, ҳаммани кулдирганида мен ҳам қўшилиб кулдим”. Куёв билан келин кетганидан кейин ҳамма бу уйни тарқ этиб, куёвнинг хонадонига бориши керак эди. Тўйнинг энг қизифи, висол кечаси ўша уйда бўлади. Онам юзида табассум бўлса ҳам, ичида ғашлик билан уйимизга кетди. “Сен дугоналаринг билан бирга бориб кел”, – деди менга. Юрагимдаги муз ҳамон эримаган, никоҳ оқшомига оёғим тортмаётган бўлса ҳам, лекин ҳозир боришим кераклигини тушуниб турардим. Йўқса, бе-ихтиёр бошқаларнинг ҳам қувончларга тўлиб-тошган дилига ғашлик солиб қўйишим мумкин эди.

Тўй ҳавас қилса қилгудек бўлди. Файзли оқшомга йиғилганларнинг бари ўйнаб-кулди. Тўй бўладиган ҳовли чиройли безатилган, дастурхонлар ноз-неъматлар билан тўлдирилган эди. Куй-қўшиқ авжида, меҳмонлар шавқ билан рақсга тушишли. Ҳатто кутилмаганда пайдо бўлиб қолган Дўсан девона ҳам ғалати-ғалати қилпанглаб, одамларни кулдирди. Қизларнинг

роса “битлари тўкилди”. Мен ўйинга тушмасам ҳам, ўйнаётганларнинг ёнида чапак чалиб турдим. Шоҳсупада куёв билан келин бахтдан яшнаб ўтиришарди. Сабобар ҳозиргина кўқдан тушган фариштага ўхшайди. Унинг кўзларида порлаётган севинчга ҳар қандай қиз суқланмасдан қарай олмас эди. Лекин унинг ёнидаги куёв маликани бахтли қилиш учун мард бўлиб майдонга чиққан шаҳзодага эмас, ёши анчайин катталиги билиниб қолган мўйсафидга ўхшаётганлиги одамларнинг ғашини келтираётганини ён-атрофимдаги шивир-шивирлардан сезмоқда эдим.

* * *

Идорадаги супур-сидирларимни қилиб бўлганимдан сўнг боғ ҳовлига ўтиб, аввал ошхона айвонига сув сепиб супурдим, кейин дараҳтлар тагига тўкилган япроқларни териб олдим. Шу пайт эшик олдида Ҳайдар бува кўринди. У кўзларини қисиб, боғ ичидан мени қидираётган эди, чамамда. Мени кўриб, чехраси ёришди. Нима гапи бор экан, деб у томонга юрдим.

– Хайрият, шу ерда экансан, Марям қизим, бу ёқقا юр, сенга бир нарса кўрсатаман, – деди Ҳайдар бува. У мени бинонинг олд томонига бошлади. Кираверишда, ўнтача тувакда бодроқдек очилган гуллар турган экан. – Мана, гулларнинг янгиларини олиб келдим. Буниси сенга, – деб ўрик гулларидек оппоқ очилган гулни менга узатди.

– Раҳмат, бува, лекин мен уни нима қиласман? – дедим хурсанд бўлганимдан нима дейишни билмай.

– Уйларингга олиб бор, у сеники.

– Уйимга? Йўқ, бу ердан олиб чиққанимни кўрганлар қандай хаёлга боришади? Яхшиси, уни Саломат опанинг ошхонасига олиб бориб қўяман. Уни ҳар куни ўзим парвариш қиласман.

- Майли, ихтиёриң.
- Бу гулнинг номи нима?
- Кел, уни Марямгул деб атаймиз. – Ҳайдар бува күнглимини кўтариб юборди. Мен рози бўлдим. – Энди қолган гулларни юқорига олиб чиқамиз, жуфт-жуфти билан хоналарга қўямиз.

Гулларни иккинчи қаватдаги хоналарга олиб чиқиб, деразалар олдига қўйдик. Барқ уриб очилган бир жуфтини бошлиқнинг хонасига олиб кирдим. Гулларни жойлаштириб, эндинга чиқаётганимда Неляхон келиб қолди. У янги келтирилган гулларни кўриб, ҳайратдан қўзлари чақнаб кетди.

- Бунча чиройли, қаердан олдинг бу гулларни?
- Ҳайдар бува олиб келди.
- Дедуля молодец. Гул ўстиришда ундан ўтадиган одам йўқ. Ҳа, айтганча, стол устидаги чангларни бир артиб чиқ, менинг озгина ишларим бор эди.

“Озгина иш”ини биламан, ойна олдига туриб олиб, лаб бўяшни бошлайди ҳозир. Одатда мен бошлиқнинг хонасини супуриб, гулларга сув қуяман. Мебелларига эса тегмайман, уларни Неляхоннинг ўзи артиб қўяди, шундай қилиш тайинланган. Шундай бўлса ҳам, ҳозир Неляхоннинг раъйини қайтаролмадим. Бошлиқнинг хонасига кириб, мебелларни артдим. Шу чоқ осмондан тушгандай шошилганча бошлиқ келиб қолди. У хонасида менинг юрганимни кўрди-ю, остонаяда бир зум ҳайкалдай қотиб қолди. Менга шундай ўқрайиб қарадики, суратларда Гитлернинг нигоҳи худди шу каби эканлигини кўрганим эсимга тушди. У бир оғиз сўз демаса-да, аммо жамики қаҳрли сўзлар кўз қарашида зоҳир эди. Юрагим така-пука бўлиб кетди. Югуриб хонадан чиқдим. Бошлиқ Неляни чақирди. У ҳовлиқиб кириб кетди. Нафасим бўғзимга тиқилиб қолган эди. Неляхоннинг столи устидаги графиндан бир пиёла сув қуйиб ичдим. Бошлиқ Неляга ўшқирмоқда эди:

- Нега ҳар қандай рўдаполарни менинг хонамга киргизаверасиз?

- Мен киргизганим йўқ, ўзи кирган экан, чангларни артаётган эди.

- Нега менинг хонамнинг чангларини қаёқдаги қаланги-қасанғилар артиши керак? Сиз артсангиз, тирноқларингизнинг бўёғи кўчиб қоладими, хоним?

- Ўзим артаман, деб туриб олса, нима қилий?

Ё тавба, одам дегани ҳам шунчалик юзсиз бўладими? Мен чангларни артаман демаган эдим-ку.

- Артмасин ҳам, кирмасин ҳам. Боринг, кўзимга кўринманг.

Неляхон бошлиқнинг хонасидан ўқдай отилиб чиқди. У менинг ҳамон дағ-дағ қалтираб турганимни кўриб, бор аламини мендан олгиси келди.

- Нима қилиб сўппайиб турибсан бу ерда? Имилламасдан хўжайн келгунича бу ердан қорангни ўчирсанг бўлмасмиди? Сени деб мен балога қолдим. Бор, дағ бўй бу ердан.

Боғ ҳовлига чопиб чиқдим. Хўрлигим келиб, дарахтлар панасида юм-юм йиғлаб олдим. Ё тавба, бу одамлар бунча ёввойи бўлишмаса. Ахир, ҳеч нарса қилганим йўқ-ку. Буларга яхшилик қилиб ҳам ёқмайсан. Кўлларидан келгани одамларга озор бериш. Кишига алам қиларкан. Лекин начора, бошлиқларнинг ургани ур оши, сўkkани сўк оши. Аламимни ичимга ютишдан бошқа иложим йўқ. Ҳай, майли, Яратганнинг ўзи инсоф берсин. Ҳартугул, юзимга қараб ўшқирмади-ку, дея ўзимни юпатишга уринардим. Ҳайдар бува бу машмашалардан бехабар, боғнинг этагида юмушларини қилиб юрган эди. Саломат опа ҳозиргина келиб, тушликнинг тараддудини бошлаб юборган экан. Менга кўзи тушиб, деразадан имлаб чақирди. Кўзёшларимни ариқ сувига ювиб, кейин ҳеч нарса кўрмагандай ошхонага бордим.

– Марям, кел, ўтири, ҳозир бўғирсоқ пишираман. Бугун пайшанба, ўтган азиз авлиёлару яқинларнинг арвоҳларини эслаб, ис чиқарадиган кун, – деди Саломат опа олов устига ёғ солинган қозонни қўйиб. – Ҳозир бирпасда пишади, хамири тайёр.

Бошлиқнинг хонасидаги дилхиралик сабаб бўлиб, Ҳайдар бува ҳадя қилган Марямгул сал бўлмаса ёдимдан кўтарилай дебди. Бечора, якка ўзи йўлакда мунғайиб қолиб кетган экан, чопиб бориб олиб келдим. Аёл зоти борки, гул қаршисида ўзи ҳам гулдай яшнаб, нафосатини намоён этади. Эҳтимол, аслида ҳам Парвардигор одамни тупроқдан яратганда, аёлни асалари каби гулларнинг чангидан йиғиб бунёд этгандир. Гулни кўриб Саломат опанинг кўзлари чақнаб кетди. Мен гулни дераза олдига қўйдим.

– Бунча чиройли гул экан, қаердан олдинг?
– Ҳайдар бува совға қилди. Эрталаб бир талай янги гуллар олиб келган экан. Шунисини менга берди, мен эса уни сизнинг кошонангизга илиндим. Қаранг, деравангиз олдига қандай ярашди.

– Ҳа, ростдан ҳам одамнинг кўзини қувнатади. Ошхонамиз салкам гулхонага ўхшаб кетяпти.

– Ҳайдар бува бу гулга ном ҳам қўйди – Марямгул.
– Қандай яхши. Айнан топиб қўйибди, гулнинг номи ҳам ўзидаи чиройли.

Бир зумда бўғирсоқлар пишди. Саломат опа Ҳайдар бувани чақирди.

– Ўтганларнинг ҳақига қуръон тиловат қилиб юборинг, – деди у.

Ҳайдар бува тиловат қилди. У шундай қироат билан дуо ўқидики, юрагимдан ғашлик ариди, руҳим енгил торти. Ўзимни қушдай енгил ҳис эта бошладим.

* * *

– Қани, бугун Шодияхон нима пишираётган эканлар? Ёқимли ҳидига қараганда антиқа пишириқ тай-

ёрлаётганга ўхшайди.

- Унчалик эмас, ўзингизга таниш бўлган паҳлава. Фақат бу гал шакли бошқачароқ бўлади.

- Қанақа бўлар экан шакли?
- Гул шаклида.

- Шунақаси ҳам бўлар эканми? Унда бу мазали пишириқнинг номи гулпаҳлава бўлар экан-да?

- Вой, Нурия опа, ана, номи ҳам тайёр бўлди. Мен уни номлашни ўйламабман.

- Ўйлаш керак. Бирон янгилик яратдингми, уни, албатта ўзингга ёқсан энг яхши ном билан аташ ёдингда бўлсин. Сен энди яхшигина пазандасан, биздан ҳам ўзиб кетяпсан. Сени келин қилиб олган хонадан келиндан ёлчиди.

Нурия опа пазанда қизларнинг ишларини бирма-бир кўриб, яна нималар қилиш кераклигини эринмасдан битта-битталаб тушунтирас, Шодиянинг янгилигини мақтаб, ўзида йўқ хурсанд бўлар эди. Шодия бу ердаги бошқа қизлардан аввалроқ келган, энди қўли гул пазандага айланганини ўзи пишираётган антиқа егуликлари билан кўрсатаётган эди. Чевар қизлар эса Гулсара опани асаларидек ўраб олишган, болалар учун кўйлакларни қандай бичиш ва тикишни ўрганишмоқда эди. Мен бундай завқли дарсларни ҳавас билан кузатиб ўтирадим.

- Сен нега бегоналардай турибсан? Қизларга қўшилиб дарсларда қатнашавер, - дея Нурия опа инҳоят машғулотини тутатиб, қизларга вазифа берди-да, ёнимдаги ўриндиққа келиб ўтириди. – Билмаганларингни бемалол ўрган, билганларинг бўлса, бизга ўргат.

Мен нима дейишни билмай ўнғайсизландим.

- Тортинмай ўрганавер, сендан ҳеч нарса керак эмас. Сен бизнинг эркин иштирокчимиз бўласан.

Кувончимнинг чеки йўқ эди, лекин дарсга ҳозироқ қўшилмаслигимни, вақт ажратиб, тайёрланиб ке-

лишимни айтдим. Кейин ёпқич билан ўраб қўйилган чойнакдан чой қуиб узатдим. Нурия опа ташқарига боғлаб қўйилган отига деразадан қараб-қараб қўярди.

– От миниб юришингизга бирам ҳавасим келади,
– дедим отига ҳар қараганида қўзлари қувнаб кетаётганини сезиб.

– Ҳа, у менинг беминнат ёрдамчим.
– Кичкиналигингииздан от миниб ўсган бўлсангиз керак?

– Йўқ, қизалоқлигимда от чоптириб юрганларни кўрсам, фақат ҳавасим келарди. От минишни келин бўлганимдан кейин ўргандим. Эхе, бунинг тарихи узун.

– Нурия опа чойни ичиб, қўйлак бичаётган қизларга разм солди, сўнгра чуғурлашиб пишир-куйдир қилаётган қизларнинг ишларига қўз ташлади. – Мана бу отни тўйимиз куни Бек акангизга, Юнусбек aka менинг эзим, Ёрмат бува совға қилган. Бу қўпкарига кирадиган учкур от. Ёрмат бува уни қиличдай чархлаган. Раҳматли қайнотам Абдусалом ота Ёрмат бува билан болалиқдан қадрдон ўртоқ бўлишган. Навқирон йигитлик пайтларида бирга от миниб қўпкариларда чопишган. Ёрмат бува ҳаммадан зўр чавандоз бўлган. Кейинчалик қайнотам давлат идорасига ишга киргач, от минмайдиган бўлган. Ёрмат бува эса оддий дала ишчиси бўлгани учун от доимий ҳамроҳи бўлиб қолган. Токи белидан қуввати кетгунча қўпкариларда қатнашиб юрган.

Нурия опа кекса чавандозларнинг таърифини тилидан бол томиб сўйлар эди. Улар асли уч қадрдон ўртоқ бўлишган экан – Ёрмат, Абдусалом, Ҳамдам. Ёрмат бува билан Абдусалом буванинг ўзларининг отлари бўлган. Ҳамдам буванинг эса оти бўлмаган. Унинг отаси урушдан қайтмаганидан кейин қийналиб яшашган. Лекин ўртоқлари билан қўпкариларда қатнашиб, у ҳам яхши чавандозлигини кўрсатиб юрган. Уч ўртоқнинг биргаликда қўпкарига киришлари анчагина ово-

за бўлган экан. Тасаввур қилинг-а, уч паҳлавон йигит доим бирга от чоптириб, ҳамманинг олқишини олса, худди уч мушкетёрлардек. Ёлғиз онаси ҳам вафот этганидан сўнг Ҳамдам бува ўқишга кириш учун Тошкентга кетган экан. Ҳозир у кишини ҳамма профессор Ҳамдам Ҳамидович дейишар экан. Бир куни Ёрмат бува билан Абдусалом ота ўртоғининг ҳолидан хабар олиб келиш учун Тошкентга боришибди. Ҳамдам домлани излай-излай, охири институтдан топишибди. У ўқиши тамомлаганидан кейин институтда ишлаётган, илмга шўнғиб кетган экан. Сўнг Ҳамдам домланинг уйига боришибди. У оиласи билан торгина бир уйда ижарада яшаётган экан. Икки ўртоқ шу куни Тошкентда меҳмон бўлиб, Ҳамдам домлани баҳорда қишлоққа боришга кўндиришибди.

– Илм – билиминг тўхтаб қолмас. Сен баҳорда ҳеч бўйласас уч-тўрт кунга қишлоққа бор. Бу диққинафас жойда қийналиб кетганинг шундайгина кўриниб турибди. Кенг даштларда от чоптириб юрган йигит эдинг. Хотининг, болаларингни ҳам олиб бор, қирларда бир оёқ ёзишсин. Ўзинг ҳам тоза ҳаводан тўйиб нафас олиб келсанг, ана ундан кейин илм қилишга ҳам ҳеч қийналмайсан, – деган Ёрмат бува.

Баҳорда Ҳамдам домла қишлоққа келган. Абдусалом отанинг отини миниб, қирларда роса чопган. Болалари ҳам кенг даладаги ўтлоқларга ағанаб, мириқиб ўйнашибди. Айрону қатиқларга тўйиб, оппоқ юзларига ранг кириб қолибди. Шаҳарга қайтишадиган куни саҳарлаб Абдусалом ота шошилиб қаергадир кетибди. Автобус жўнашига озгина қолганда бекатга яёв чопиб етиб келибди. Бир тугун пулни Ҳамдам домлага берибди.

– Ма, жўра, шу пулни ол. Шаҳарда ижарама-ижара кўчиб қийналиб юрма, – дебди.

Ҳамдам домла ўртоғининг ҳаллослаб яёв югуриб келганини кўриб, отини сотганини фаҳмлаган экан.

– Йўқ, олмайман, – дебди Ҳамдам домла хижолат бўлиб. – Нега бундай қилдинг? Мендан бир оғиз сўрашинг керак эди.

– Мен энди аввалги чавандоз эмасман. Давлат идорасига ишга кирдим, партия топшириқларини бажарајпман. Отим ҳам бир жойда туриб қолганидан тақаси занглаб кетяпти. От юриб турмаса қўпкарида хомлик қилиб қолади. Уни яхши бир чавандозга сотдим. Кўнглим жойига тушди. Ол, жўра, мана бу қоракўзларинг менинг ҳам фарзандларим. Улар ҳам қийналишмасин.

– Барибир мендан сўрашинг керак эди.

– Биз буни бамаслаҳат қилдик, Ҳамдам, – дебди Ёрмат бува. – Сен у ёқда қийналиб юрсанг, биз бу ерда хотиржам ўтира оламизми? Сен илм қилаётган бўлсанг, фақат ўзинг учун эмас, ҳамма учун қиласапсан. Нима, биз тўйга келибмизми, томоша қилиб ўтирадиган? Абдусаломга қачон от керак бўлса, мана, менинг отим тайёр. Бу ёғини ўйлаб кўнглинг хижил бўлмасин.

Шундай қилиб уч паҳлавон чавандознинг фақат биттасида от қолган ва у кейинроқ чавандоз чол деган номни ҳам олган экан.

– Ҳамдам Ҳамидовичнинг қандай қилиб диссертация ҳимоя қилганини ҳам айтиб берайми? – деди Нурия опа.

– Қандай ҳимоя қилган экан?

– Ростдан ҳам қизиқ бўлган. Ҳамдам Ҳамидович номзодлик ишини якунлаб, ҳимоя қилинадиган кун тайин бўлгач, қишлоққа хабар юборган. Буни эшигтан Ёрмат бува билан Абдусалом ота қувончлари ичларига сиғмай чойхонага бориб, бу хушхабарни ҳаммага овоза қилишган. Чойхонада тўй бўлиб кетибди ҳисоб. Айтилган куни эса икковлон тонг саҳарда бир қўчқорни сўйиб, автобуснинг юкхонасига жойлаш-

ган-да, Тошкентга йўл олишган. Узоқ йўл юриб, бир амаллаб институт мажлисхонасини топиб боришганда анжуман аллақачон бошланиб кетган, Ҳамдам домла диссертация иши бўйича ҳамма гапларини гапириб бўлган, энди катта-кичик олимлар шу диссертацияни бири олиб-бири қўйиб танқид қилишаётган экан. Ҳамдам домла давра столининг бир четида етим қўзидек бошини қўйи солиб, галма-галдан минбарга чиқиб уни аёвсиз савалаётган таниқлию таниқсиз олимларнинг кимўзарга айтаётган танқидларини чидам билан эшитиб ўтирган экан. Эҳтимол, у шу тобда ўзини буткул ёлғиз сезаётган, ҳатто тирноқ орасидан кир қидиришга уринаётгандарнинг жамики ҳамларини якка ўзи кўтаришга ожизлик қиласигандек асабий бир қиёфада қўзларини чирт юмиб, кафтларини маҳкам сиқиб олган экан. Шу боис у Узумзордан етиб борган икки ўртоғининг мажлисхонага кирганини ҳам пайқамабди. Икковлон эса мажлис аҳлига халақит бермаслик учун эшиқдан оёқ учida кириб, пойгакда бўш турган биргина стулга сифишиб ўтиришибди. Уларга кўзи тушган баъзи олимлар ажабланиб қараб-қараб қўйишармиш. Мажлисхонадагиларнинг ҳаммалари оппоқ қўйлакларига чиройли бўйинбоғ тақиб олишган, шимларининг чизиқлари синмаслиги учун ниҳоятда сиполик билан ўтиришар, минбарга чиққанлар ҳам худди ўргатиб қўйилгандек бир хилда бошларини хиёл орқага ташлаб, гапларига расмий тус бериб сўзлашар, ҳар икки гапларининг бирида виқор билан “ўртоқлар” деб таъкидлаб қўйишар, фақатгина мажлиснинг охирида кирган икки тўпори одамнинг содда қиёфалари бу ердаги нозик манзарага қовушмай турган экан. Мажлис роса қизиган. Тортишибдилар, терлабдилар, қизаришибди, оқаришибди, уҳ тортишибди. Мажлисхонанинг тўрида ўтирган оппоқ сочли, қўзойнак таққан кексароқ олим ҳаммани жимликка чақириб:

– Ўртоқлар, – дебди. Мажлисхона сув қуйгандай жим бўлибди. – Яна сўзга чиқадиганлар борми?

Олимлар айтадиган гапларини айтиб бўлишган экан, ҳеч биридан садо чиқмабди.

– Мен бир оғиз гапирсан майлими? – дебди Ёрмат бува кутилмаганда қўл кўтариб.

Ўтирганлар ўгирилиб унга қарашган ва бир-бирларига ҳайрон боқиб, елка қисиб қўйишган. Шундагина Ҳамдам домла пойгакда ўтирган иккала дўстини кўрган ва кўзларига ишонмай лол бўлиб қолган. Оқ-соч профессор ёнидагиларга қараб олиб, кейин бошини ирғаб рухсат берган. Ёрмат бува у пайтларда кучга тўла, полвонкелбат одам бўлган, гурс-гурс қадам ташлаб минбарга чиқсан. Рўмолча билан манглайдаги терларни обдон артган. У бироз ҳаяжонланиб турган. Ахир, унинг умрида биринчи марта (эҳтимол, охирги марта ҳам) минбарга чиқиши экан-да. Ҳамдам Ҳамидовичнинг ҳайрат билан боқиб турган кўзларига кўзи тушиши билан ҳаяжонни бутунлай унугланган.

– Мен сизлардай олим эмасман, – дея гап бошлаган у мажлисхонадагиларга бир қур назар ташлаб. – Мен ҳов анов тоғдан келган оддий одамман. Ҳамдамнинг бирга от чоптириб ўсган жўрасиман. Яна битта жўрамиз, ана, Абдусалом ҳам шу ерда. Биз аввалроқ бу мажлис Московда бўлади, деб эшитиб эдик. Кейин Тошкентга кўчирилди, шу ерда бўлар экан, дейишли. Мана, оёқни қўлга олиб етиб келдик-да. Московда бўлса ҳам, борар эдик. Олим бўлмасам ҳам, сизларнинг одамлар соғлиғи ҳақида жон куйдириб гапираётганингизни яхши тушундим. Катта раҳмат сизларга. Ҳамдам, сенга алоҳида раҳмат, бениҳоя савоб ишга қўл урибсан. Бу дунёда одамларнинг соғлиғидан ҳам қимматроқ нарса борми ўзи? Ҳамдам тоғу тошларда, адирларда гиёҳ тебриб, чашманинг сувига қониб ўсган йигит. Илиги тўқ

бу боланинг. У мана шундай катта шаҳарга нон деб, шон-шуҳрат деб келган дейсизларми? Йўқ, у одамлар деб нонидан ҳам, шонидан ҳам, керак бўлса жонидан ҳам кеча оладиган ориятли бола. Ори бор одамнинг юрагида ўти бўлади. Юрагида ўти бор одамгина шундай катта, хайрли ишларга жазм қила олади. Ҳамдам етимлиқда катта бўлган. Отаси урушда жанг қилиб ҳалок бўлди. Онаси ҳам дунёдан ўтиб кетди. Нега? Чунки у касал бўлганида даволай оладиган, билими етадиган дўхтири топилмади. Мана, вақти келиб ўзи дўхтири бўлди. Кўриб турибсизлар, у ёш, билими бор. Ҳали ўзига ўхшаган ғайратли болаларни ўқитиб, қанча дўхтириларни тайёрлайди, кўпдан-кўп касалликларга даво ҳам топади, мен буни биламан. Чунки у давони қаердан топишни яхши билади. Дардларнинг давоси қаерда? Тоғларда, дашту биёбонларда, чашмаю жилгарларда. Айримларингиз Ҳамдамнинг ишидан хато то пишга чунонам шўнғидингизки, зўрға чидаб ўтирдим. Кўпчилик киришса, олтинни ҳам мисга айлантириш ҳеч гап эмас. Лекин ҳов анов кўзойнак таққан домулла мард гапни гапирди, – деб у Ҳамдам домлага раҳбарлик қилган профессорни қўли билан кўрсатган. – Россти ҳам шу-да, илмни илм қилиш учун одамга билим, куч-ғайрат, сабр-қаноат керак. Ҳамдамда ана шуларнинг ҳаммаси бор. Медицинамизнинг отаси Ибн Сино анча-мунча касалликни оддий сув билан даволаб юборган экан. Сувда ҳикмат кўп. Айниқса, чашманинг суви турган-битгани шифо. Ишонмасангиз, мана, бизнинг Узумзоримизнинг чашмасининг сувидан бир қултум ичиб кўринглар. – Ёрмат бува минбардан тушиб, ўзи олиб келган, боядан бери пойгақда турган латта қопламали идишнинг қопқофини очиб, даврани айланиб стаканларга сув қуйиб узатаверган. Олимлар бўйинбоғларини бироз бўшатиб, бу тўпори одамнинг чин юракдан айтган гапларидан ажабланганча чашма

сувини ҳузур қилиб ичишган. Мажлисга боши билан шүнғиб кетиб, жиддийликдан нафаси қисиб ўтирган олимлар шундан сўнг анча эркин бўлишган. Хўмрайган қиёфалар ўрнини табассум эгаллаган.

– Ўзи биринчи сўзни сизга берсак бўларкан, – дебди йиғилишни бошқараётган оқсоч профессор яйраб куларкан. – Медицинанинг нима эканлигини энг содда қилиб тушунтириб берадиган олим асли сиз экансиз.

– Сиздай академикларнинг мақтоворидан кейин бир қоп семириб кетамиз-да, домулла, – деган Ёрмат бува профессорга яна бир стакан сув узатиб.

Баҳслашиб ўтирганлар шундан сўнг чақчақлашиб қолишибди. Ҳамдам домла ҳам енгил нафас олиб, қадрдонларини бағрига босган. Ҳалигина кўнгли чўкаётган одам энди икки бақувват қаноти бор бургутдай қаддини кўтарган экан.

– Диссертациянинг ярмини сизлар ҳимоя қилдинглар, дўстларим, – деган экан ўшанда Ҳамдам Ҳамидович хурсанд бўлиб.

Кейинроқ Бек акангиз Тошкентда институтда ўқиганда Ҳамдам домла доим ёрдам берган экан. Ҳозир ҳам отақадрдонлигимиз сабаб борди-келди қилиб турамиз.

Очиқ эшиқдан кимdir мўралади. Тиланчи экан, Нурия опа пазанда қизлар тайёрлаган пишириқлардан тугунчага солиб берди.

– Отни Ёрмат бува тўйимиз куни ҳадя қилган, – деди Нурия опа яна жойига келиб ўтиаркан. – Буванинг фарзанди йўқ. Аёлининг гўдаклари туғилиб, нобуд бўлаверган. Бек акангизни эса ўз ўғилларида кўришади. Кекса чавандоз кўпкариларга тушмай кўйганидан кейин отига суқланиб юрганлар харидор бўлиб келаверишган. Нормурод полвон деганлари бор, шу отга канадай ёпишиб олган.

– Менга қаранг, Ёрмат бува, – деган Нормурод отга астойдил харидор бўлиб, – биласиз, мен номи чиққан

чавандозман. Бу атрофда унча-мунча чавандозингиз менинг олдимга туша олмайды. Сиз ҳам зўр чавандоз бўлгансиз, бироқ энди қаридингиз. Оёғингизни узангидан олиб, кўпкарини биздай полвонларга қўйиб берадиган даврингиз келди.

– Менинг қариганим кимга малол келяпти? – деган Ёрмат чавандоз оғриниб.

– Малол келаётгани йўқ. Ҳаммамиз ҳам қариймиз, Худо умр берса. Мен отга ачиняпман. Сизнинг кучдан қолганингиз отга жабр бўлмасин. Түёғидан ўт чақнаб турган от кўпкарига кирмаса увол-да. Ўзингиз яхши биласиз, чавандоз зоти борки, от жинниси бўлади. Бир отга ишқи тушдими, шундан бошқа отни мингиси келмай қолади. Менинг отим ҳам ёмон эмас, у билан доим кўпкарига кираман. Аммо барибир сизнинг Қашқангизга меҳрим бошқача. Унга асл чавандоз керак. Қашқага мендан бошқаси ярашмайди. Уни менга сотинг. Бир куни қазойингиз етиб қолса, отнинг жиловини ушлаб қоладиган зурриётингиз ҳам йўқ. Кейин от хомталаш бўлиб кетади.

Ёрмат чавандознинг дили оғриган. У полвон деган ном чиқариб, от чоптириб юрган кезлари ҳеч ким унга ножўя гап айтишга ботинолмаган. Бироқ Нормурод отга жон-жаҳди билан суқланганидан андишасизлик қилди. Юзинг-кўзинг демай кекса чавандознинг кемтигини юзига солди. Ёрмат бува ҳам унга охирги жавобини айтиб қўяқолган.

– Тўғри айтасан, мен энди қариган бир чолман, отим эса ҳали қиличдай. У кўп кўпкариларда чопиши керак. Уни энг яхши чавандоз кўпкарига олиб киради, сен эмас.

– Унда ким экан ўша чавандоз? Юнусми? Қанақасига у чавандоз бўлсин, ҳали бурнини эплаб артолмайдиган бир тирмизак-ку. У от эмас, беш йилдан бери шаҳарда автобус билан трамвай миниб юрган.

– Сен эпчил чавндоңсан, Нормурод, аммо Қашқани минишигә муносиб әмассан. У фақат мард йигитларни күтәради. Афсуски, сен мардлик нималагини билмайсан, – деган Ёрмат бува.

Лекин шунда ҳам Нормурод Қашқадан умидини узмай юрди. Нормуроднинг Малла деган шериги кунда-кунора отни сўраб, Ёрмат буванинг уйига келаве-рибди. Охири Ёрмат бува Маллани қамчи билан сава-лаб қувган. Шундан кейин ҳам Нормуроднинг икки кўзи Қашқада эканлигини сезиб юрган. Ёрмат бува Қашқани гоҳ-гоҳ кўпкарига солиб юрди. Шунда ҳам уни фақат Бек акангизга ишонарди. Ниҳоят тўйимиз куни Ёрмат бува Қашқани ясантириб, тўй бўлаётган ҳовлининг ўртасига кириб келди. Базмда ўтирган ҳам-ма, ҳатто биз – қуёв билан келин ҳам ҳайрон бўлиб қа-раб қолдик. Ёрмат бува одамларнинг кўз ўнгида оти-ни Бек акангизга ҳадя қилди.

– Сени шу отга муносиб қўрдим, ўғлим. Энди у се-ники. Бу ишимдан раҳматли Абдусалом жўрамнинг ҳам арвоҳи шод бўлар, иншоолло, – деди Ёрмат бува.

Базмга келганлар хурсанд бўлиб, чапак чалишди. Шу пайт ердан чиқдими, осмондан тушдими, Норму-род пайдо бўлди.

– Мен бу отни сотиб олиш учун ҳеч ким айттолмай-диган нархни айтган эдим. Сен, қари эшак уни текинга бериб юборяпсан. Мен сенга шунчалик оёқости бўл-димми? – деб ўшқирди у.

Одамлар бир зумда Нормуродни тўй бўлаётган ҳовлидан кўчага улоқтиришди. Ўшандан бери Норму-род бизга дushman бўлиб қолган. Доим тишини қайраб юради, аламини яшиrolмайди.

Тўйимиздан кейин бир ойча ўтиб, Бек акангиз би-лан Қашқани миниб, адирга бордик. Ўшанда қизғал-доқлар барқ уриб очилган, адир қип-қизил рангга бўялган эди. От минишни ўргандим. Биринчи кунда-

ноқ ўзимнинг чавандозлиқда унчалик нўноқ эмаслигимни билдим. Эрим ҳам ҳайрон қолган. Отдан сира тушгим келмасди. Адирнинг гўзаллигини, шу гўзалик оралаб от устида шамолдай елишнинг қанчалик завқли эканлигини билсанг эди. Кейин бепоён қизғалдоқзорга ағанаб ётсанг, хушбўй ўтларнинг ифорини олиб эсаётган шабада юзларингни силаб ўтса, ох, бунга нима етсин. Ана ўшандан берি гоҳида Қашқани адирга айлантириб келаман. Кенгликка чиққанида шундай яйраб чопадики, шу тобда унинг юраги қандай ураётганини фақат отни яхши тушунадиган одамгина сезиши мумкин.

* * *

Нурия опанинг таклифи билан мен ҳам пазандалик, ҳам чеварликни ўрганувчи қизлар сафига қўшилдим. Ҳар куни ишдан қўлим бўшаши билан ўқувхонага югураман. Машғулотга қизларнинг айримлари пешингача, бошқалари пешиндан сўнг келишади. Лекин мен эркин иштирокчиман. Пиширишу тикиш-бичишлардан олдиндан хабарим бўлгани учун қизлар ўрганаётган нарсаларнинг анча-мунчаси менга таниш эди. Шу боис машғулотларга ўзим истаган вақтда келиб туришимни, билганларимни эса бемалол ўргатиб туришимни айтишди. Улар “Юлдуз” ўқувхонасидан олиб келган журналлардан кўп андозалар олишарди. Аммо журналлардаги таомлару кийим-кечакларнинг деярли ҳаммаси европача эди. Уларнинг орасидан менга янгилик бўлганларини тезда ўрганиб олардим. Лекин менга қўпроқ шарқона бичимдаги кийимлар ва ўзимизнинг оддий масаллиқлардан тайёрланадиган миллий таомлар ёқар эди. Мен мевали пишириқларнинг бир неча хилини пишириб кўрсатдим. Кўриниши ҳам соддагина, мазасидан ҳам ўзимизнинг тандир нонимизнинг

таъми сезилиб туради. Кўйлаклардан эса оддийгина қишлоқ қизларига ярашиб тушадиган уч-тўртта бичимдагисини тикиб кўрсатдим. Кейин уларни журналлардаги бичимлар билан уйғунлаштириб тикиб кўрдик. Янги бичимлар кўзни қувнатарди. Буларнинг ҳеч бири журналларда йўқлигидан Нурия опа ҳам, Гулсара опа ҳам ичларига сиғмасди. Биз бу кўйлакларни кўрим-сизгина матолардан тайёрлаган эдик. Нурия опа синов учун тоза матолардан олиб келиб беришини айтди.

Қизларнинг бир гурӯҳи бу ердаги ўқишларини тамомлаб, энди бошқалари келишган эди. Лекин Шодия ўқиши тутгатса ҳам Нурия опа шу ерда қолиб, машғулотларга қарашиб туришини илтимос қилди. Унинг ўзи бунга жон деб рози бўлди. У Гулсара опа билан бирга қизларга ўргатади. Мен ҳам уларнинг ёнида бўламан. Шодиянинг бир гапириб ўн кулиши, қизиқ ҳангомаларни гапириб, ҳаммамизни кулдириши чарчоғу ғуборларимизни ёзиб юборади. Кўзлари ча-росдек, овози қўнғироқдек бу қизни ҳаммамиз яхши кўриб қолганмиз. Бир зум кўринмаса, ёқимли шамол тингандек жимлик чўкади ва зерикиб қолаётгандек бўлаверамиз. Шодия имтиҳон топшириш учун шаҳарга кетаётганини айтганида Нурия опа нима дейиши ни ҳам билмай қолди. “Эртага имтиҳон топширадиган кун, бугун пешиндан кейин шаҳарга кетаман. Имтиҳон топшириб чиққанимдан кейин дарров уйга қайтаман”, – деди у. Пешингача биз Шодиянинг имтиҳонни яхши топшириб келишини тилаб ишладик.

Пешиндан кейин мен Жаннат опа билан бир хонадонга боришим керак эди. “Марямжон, менинг бир күшним бор, яхши аёл, – деган эди эрталаб Жаннат опа. – Эри Қоплонбек деган одам, терговчи бўлиб ишлайди. Авваллари шу ерда, ўзимизда ишлар эди. Иши шаҳарга ўтганидан сўнг бутун оила кўчиб кетди. Хо-

зир ўша ёқда яшашади. Уйларига мен қараб тураман. Лекин шанба, якшанба кунлари бу ердаги уйига келиб туришади. Уларнинг келишига уйини супуриб, тозалаб қўядиган одам керак. Сендан олдинги фаррошни ҳам бир-икки марта олиб борганман. Энди у йўқ. Агар шу ишни қилишга истагинг бўлса, сени олиб бораман. Меҳнатингга яхшигина ҳақ тўлашади". Мен рози бўлдим. Ахир, уй тозалаш қўлимдан келадиган иш-ку. Ҳақ тўлашса, қандай яхши.

Жаннат опа ўқувхонамиз олдига келиб, деразадан мени чақирди. Икковимиз Қоплонбек амакининг уйига бордик. Бу уй кўчадан қараганда ҳамма уйлар қатори оддийгина кўринади-ю, лекин ичкариси худди саройнинг ўзгинаси эди. Ҳар ҳолда, менга шундай туюлди, не ажабки, аввал ҳеч қачон бундай муҳташам хонадонни кўрмаган эдим. Хоналарнинг деворлари бир-бирига ўхшамаган чиройли гулқоғозлар билан безатилган. Деразалардаги шоҳона пардалар ҳам ҳар бир хонаники ҳар хил рангда. Ҳашаматли қандиллари худди кинолардагидек. Гиламлар устига оёқ босишга ийманасан киши. Ҳовлининг бир бурчагида ток ўчиб қолса чироқларни ёндирадиган ускуна турибди. Демак, бу уй ҳеч қачон чироқсиз қолмайди. Шундай бўлса ҳам, ҳар бир хонага тилларанг шамдонлар қўйилган. Бир эмас, учта хонада телевизор ва ҳаво совуткичлар бор. Хонадон соҳиблари бу уйга фақат ҳафтанинг охирида келиб, қолган кунлари ҳеч ким яшамаса ҳам, музлаткич егуликлар билан тўла эди. Уй ичига айтарли чанг кирмаган, шундай бўлса ҳам, хоналарни бир сидра тозалаб, тартибга келтирдим, эшик-деразаларни ярқиратиб арtdim. Ошхонадаги идишларни бошқатдан ювдим. Ҳовлини супуриб, ҳар қайси бурчагигача сув сепдим.

– Уй деганнинг файзи одам билан-да, Марямжон, – деди ишларимни кузатиб ўтирган Жаннат опа. – Қадам қўйишинг билан чинnidай бўлди-қолди.

Шундай қилиб, мен ҳар жума куни бу хонадонга келиб турадиган бўлдим. Уйни саранжомлаб бўлгач, бекатга югурдим. Бекатда автобус ҳам, одамлар ҳам кўринмайди. Яна кечикканга ўхшайман. Қуёш ҳам ботишга улгурибди. Бундай пайтда йўловчи машиналар ҳам камайиб қолади. Нима қилдим? Агар улов келмаса, Нурия опанинг уйида қолсаммикан? Олдимдан ўтиб кетган иккита машинага қўл силкитдим, тўхтамади. Коронги тушгунча сабр қилиб кутишни ўйлаб турганимда тўрт-беш қадам нарига қоп-қора “Волга” келиб тўхтади. Ойналари ҳам қора экан, ичидা ким борлиги кўринмайди. Илгари бундай машиналарда амалдорлар юришарди, шу боисдан унга аҳамият бермадим. Машина ойнаси очилиб, кимдир исмимни айтиб чақиргандай бўлди. Ҳайрон бўлиб ўгирилиб қарадим. Машина ичидা Фаттоҳ ўтирган экан. Уни бир қарашда таниёлмадим, соқолини ўстириб олибди. Унинг ёнида дўппи кийган, соқолдор, кўринишидан мулласифат бир киши ҳам бор эди.

– Богишодга кетяпмиз, Марям, ўтир машинага, сени ҳам олиб кетамиз, – деди Фаттоҳ машинанинг орқа эшигини ичкаридан очиб.

Улов топилганидан хурсанд бўлиб машинага чиқдим. Ҳеч кутмаган эдим, Фаттоҳ бирпасда машиналии бўлиб олибди.

– Дарров таниёлмадим, бой бўларкансан, Фаттоҳ, – дедим ҳамон унинг ўзгариб кетганига ишонгим келмай.

– Бой бўлиш ҳам гапми, яқинда катта ўзгаришлар бўлади. Ана ундан кейин кўрасан менинг кимлигими ни, – деди у ва ҳамроҳи иккови хохолаб кулишди.

– Тулпор олибсан, муборак бўлсин, – дедим машинага ишора қилиб.

– Йўқ, машина меники эмас, мана бу Бойтўра биродаримизники, – дея у ёнидаги одамга бир қараб қўйди.

– Шундай, тақсир, – деб шериги тавозе билан тасдиқлади.

– Жума намозларини Узумзордаги масжидда бирга ўқиб турамиз. Ундан кейин озгина гап-гурунг деңгандай. Суҳбатнинг қолгани бизницида давом этади. Биродаримиз мўмин одам. Ҳаммани мусулмонликка, яхши ишларга даъват қилиб, савоб олиб юрганлардан.

– Алҳамдуилло, тақсир, – деб соқолдор киши яна тасдиқлади. Кейин у секин ортига ўгирилиб менга бошдан-оёқ қараб қўйди. Унинг ҳурпайган соқолиданми, кўз қарашиданми қўрқиб кетиб, юрагим дукиллаб урди. Қоронғида бу одамнинг афт-ангори янайм ваҳимали кўринар экан.

– Сен, Марям, бошқа қизларга ўхшамагансан. Сен муслимасан, иболисан, одобу ахлоқинг жойида. Шу хислатларингни ҳурмат қиласман. Бошқа қизларни ҳам шунга даъват қилсанг, соз бўларди. Ибодан бегона, имону одобни эсдан чиқарганларни мусулмонликка чорлаш ҳар бир мўминнинг вазифаси.

Фаттоҳ йўл бўйи шундай гапларни айтиб келардики, уларнинг ярмига тушунсан, ярмига тушунолмасдим. Мен бу икки дарбадарнинг не мақсадларда юрганини англаёлмай, тезроқ уйга етиб олишни ўйлаб борардим.

– Менинг гапларимни яхшилаб ўйлаб кўр, – деди Фаттоҳ машинадан тушаётганимда. Мен индамадим.

* * *

Ўкувхонамизга янги бежирим матолар олиб келишди. Уларни Нурия опа буюртма қилган. Қизлар билан матоларни очиб кўриб, кўзларимиз қувнади. Бундай чиройли матоларни кўрганда илҳоми жўш уради кишининг, янги-янги либосларнинг бичимлари хаёлингга келаверади. Мен ўрганувчи қизлардан бирининг ўлчамини олиб, янги кўйлак бичдим. Бир пайлар онам менга арzonгина матодан худди шундай бичимда кўйлак тикиб берган эди. Бу бичим Гулсара

опага ҳам ёқди. У кўйлакнинг ёқа ва енгларига бирозгина қўшимчалар қўшди. Биргалашиб кўйлакни тикдик. Тайёр бўлгач, қизлар чапак чалиб юборишиди. Ўлчами олинган қиз уни кийиб, бир давра айланиб чиқди. Кўйлак бу хушбичим қизнинг эгнида ял-ял товланиб, янаям чиройли кўринар эди.

– Вой, Дилбар, бирам очилиб кетдинг, – дея қизлар қувонишиди.

– Асалларим, аслида одамни лиbos чиройли қилмайди, лиbosни гўзал қилиб юборадиган одам бўлади, – деди Гулсара опа.

Биз ҳаммаслак бўлиб тиккан кўйлак оддийгина эди-ю, лекин ҳаммага маъқул бўлди. Нурия опа нима деркин, дея ҳаяжонланиб кутаётган эдим. Аммо Нурия опа ишлар билан банд бўлиб, кечгacha ҳам ўқувхонага келмади. Кейинги куни эса турли чизмаларни чизиб ўрганаётган қизлар Нурия опа келиши билан ўша кўйлакни кўрсатишган экан. Идорадаги ишларимни тамомлаб, ўқувхонага борганимда Нурия опа мақтоворларга буркаб қарши олди.

– Бебаҳо кўйлак тикибсан, Марям, кўриниши ҳам чиройли, қийқимлари ҳам кам. Қизлар сенинг андозаларингга қизиқиб қолишибди. Бошдаёқ билган эдим уқувли қиз эканлигингни, – деди Нурия опа мендан ҳам ортиқроқ севиниб. Кейин менга товусдай товланиб турган атласни тутқазди. – Мана бу ҳаммамизнинг номимиздан сенга совға. Ўзингга худди ўша бичимда кўйлак тикиб ол.

Мен ўнғайсизландим. Гулсара опа эса чаққонлик билан менинг ўлчамимни ола бошлади.

– Вой, Марям, шундай қадди-қоматингни сездирмай юрган экансан-да. Бундай қомат билан модалар уйида ишласанг бўлар экан, – деб Гулсара опа кутилмаганда мени қучоқлаб олди. Мен чинқириб юбордим. Нурия опа ҳам, қизлар ҳам яйраб кулишди.

– Эх, опажон, кошкийди, фақат қомат билан бирор иш битса, – дедим хүрсиниб.

– Ҳечқиси йўқ, хафа бўлма, – деди Нурия опа ҳасратимнинг маъносини дарров илғаб. – Бенуқсон одамнинг ўзи йўқ, ҳар кимда ҳам бир кемтиклик бор. Қалби нуқсонли бўлишдан асрасин.

Шу чоқ ҳушёр хаёлимга бир хуш фикр келди-ю, шодлиқдан ёрилай дедим.

– Тўхтанг, опажон, – дедим Гулсара опага, – бир дам шошмай туринг, мен идорага учиб бориб келаман.

Кейин идорага югурдим. Тўғри боғ ҳовлига кириб, ошхонага бордим. Саломат опа қозонларга масаллиқларни солиш тараддуидиа экан. Мен Нурия опа берган матодан ўзимга эмас, онамга кўйлак тикишни ўйлаган эдим. Саломат опанинг ўлчами худди онамнинг ўлчамига мос тушади.

– Ҳа, Марям, тинчликми, оғзинг қулоғингда? Бугун қуёш бошқа томондан чиққанми дейман? – деди Саломат опа менинг ҳаллослаб чопиб келганимни кўриб.

Мен ҳаяжоним боисини айтиб, Саломат опанинг ўлчамларини олдим-у, яна шундай юргурганча изимга қайтдим.

– Мана, мана шу ўлчамда тикақолайлик кўйлакни, – дедим Гулсара опага ўлчамлар ёзилган қоғозни кўрсатиб. – Бу кўйлакни онамга мослаб тикамиз.

Гулсара опа бир зум ҳайрон қараб турди ва сўнг илтимосимни қувватлади. Насиб этса кўйлакни кечгача тикиб қўямиз, деб енг шимариб ишга киришиб кетдик. “Кўйлакни мен тикаман, сен эса менга устозлик қилиб ўргатиб турасан. Баҳонада мен билан бирга қизлар ҳам ўрганиб олишади”, – деб Гулсара опа машинка ёнига ўтирди. Мен бундан ғоятда хурсанд бўлдим. Нариги хонада пазанда қизларга машғулот ўтаетган Нурия опа бу гаплардан бехабар қолаётган эди.

Бугун менга ўхшаб Нурия опанинг ҳам кайфияти ёмғирдан сўнг чарақлаган офтоб каби эди.

– Кизлар, тушлиқда бир мириқиб ошхўрлик қилмаймизми? – деди Нурия опа ёнимизга келиб. – Сой бўйидаги чойхонада Илаш бува деган ошпаз бирам мазали палов қиласдики, бир ойгача мазаси оғзингдан кетмайди. Ўша ошдан олиб келамиз. Сизларни бугун ўзим бир меҳмон қиласай. Марям, мен билан бирга борасанми?

Мен янги тикилаётган кўйлакнинг ёнидан жилгим келмасди, аммо Нурия опанинг ҳам раъйини қайтаргим йўқ эди. Мен тугунга ўралган қозончани олдим. Чойхонага от билан бориб келадиган бўлдик. Шу билан номдор бу отга иккинчи бор минишим эди. Бу сафар негадир унчалик қўрқмадим. Тушлик вақти бўлгани учун чойхонада хўрандалар кўп эди. Ошпаз бува ҳил-ҳил пишган ошпаловни қўли-қўлига тегмай сузаяпти. Икки ўспирин йигит елиб-югуриб уларни хўрандалар ўтирган чорпояларга олиб бориб қўйиб келяпти. Биз қозончамизни қўтариб, тўғри дошқозон олдига бордик. Ўзоқ яқинидаги чорпояда ўтирган бир тўда эркаклар хандон отиб кулишарди.

– Илаш тоға, от мингандарга ёғлироқ қилиб сунинг-да, – деди кулаётганлар орасидан кимдир.

Нурия опа ўша томонга ўгирилиб қаради-ю, чехрасини булут буркади. Ҳалиги одамлар яна масхараомуз қийқиришди.

– Менга текизиб гапиряпти, – деди Нурия опа. Ўша гап отаётган ярамас Нормурод бўлади. Қаерда дуч келиб қолса, бир ғаразни бошлайди аглаҳ. Ёнидагилар унинг ялоқхўрлари, ҳаммалари ўзига ўхшайди. Чорпояда ўтирганлар маст-аласт қийқиришар, атрофдаги бошқа одамлар уларга хушламай қараб қўйишарди-ю, лекин ҳеч кимса одобга чақириб қўйишга журъат қи-

лолмасди. Нормурод полвон деганлари шоп мўйлабли, давангирдай одам, болишга ёнбошлаб олиб, юзига рўмолча билан шамол елпимоқда эди.

– Илаш тоға, – деди яна Нормурод бақириб, – биз Қашқани кўпкари чопадиган от деб юрсак, бу фақат хотинларни миндириб юришга ярайдиган байтал экан-ку. Ёрмат чол шунинг учун уни ўзи минишга уялиб, бирорларга ҳадя қилиб юборган экан-да.

Нормуроднинг шериклари яна хандон отиб кулишди. Нормурод гапни қойил қилгандек, ёғ тегиб ялтираб қолган мўйлабини силаб, мамнун тиржаяр эди.

– Эътибор берманг, қизим, улар яхши одамлар эмас, – деди Илаш бува бизнинг қозончамизга ош сув заркан.

Нурия опа эса авзойидан бундай пичингларга индамай кетаверадиганга ўхшамасди. У чорпоя олдига шаҳдам борди-да, Нормуродга юзланди.

– Сен шу ҳолинг билан ўзингни полвон ҳисоблаб юрибсанми? – деди бошқалар ҳам эшлиши учун баланд овозда. – Ўзингга ўхшаган мана бу хотинчалиш улфатларинг билан аёл кишини масхаралаб куляяпсан. Озгина бўлса ҳам эркаклик ғуруринг бўлганида бундай қилмас эдинг. Кўпкарида фақат ғирромлик билан зот оласан, буни ҳамма билади. Сенинг кучинг бор-йўғи оғзингда. Қўлингдан эса ҳеч нарса келмайди.

Чойхона сув қўйгандай жимиб қолди. Ҳатто боядан бери ўрик шохида чуғурлашаётган чумчуқларнинг ҳам негадир уни ўчди. Нормурод тилини ютгандек эди. Унга пишсанг бериб турган улфатлари ҳам нима дейишни билмай лол эдилар. Ҳар ҳолда, улар Нормуроднинг оғзига қарашар, Нормурод эса рўпарасидаги аёлнинг важоҳатини кўриб турган эди. Нурия опа от боғлоғлиқ турган томонга тез-тез юриб кетди. Мен қозончани кўтариб, ортидан эргашдим. Отга мин-

гашдик. Нурия опа отни Нормурод ўтирган чорпоя олдига ҳайдади.

– Эй, Нормурод, сен Қашқанинг тақасига ҳам арзимайсан. Сендай пасткашга остингдаги қирчанғи от ҳам ҳайф, – деди у күзларидан ўт чақнаб.

Бошқа чорпоядагилар бирваракайига шарақлаб кулишди. Нормурод тарсаки егандек ҳамон ўзига келломасди. Нурия опа, охирги гапим шу, дегандек отни йўргалатиб кетди. Мен отдан йиқилиб тушмаслик учун бир қўлимдада қозон, бир қўлим билан Нурия опа ни қаттиқ қучоқлаб олган эдим.

Олиб келган паловимиз чиндан ҳам ўзгача мазали экан. У уйда онам икковимиз онда-сонда пиширадиган паловга унчалик ўхшамайди. Нурия опа айтганича бор экан – таъми оғизда қоларкан. Қизлар билан тилимиздан бол томиб мақтаб едик. Илаш буванинг номига-ку, мақтov ва дуолар мўл-кўл ёғилди. Нурия опанинг ҳам кўнгли ёришиб, юзига офтоб балқиди. Шу офтобнинг нурларидан қувват олиб, Гулсара опа билан бирга бошлаган кўйлагимизни ниҳоят тикиб тутатдик ва мен кечки автобусга улгурдим.

Онам кун бўйи ўзини турли юмушлар билан овутса-да, лекин йўлимга илҳақ бўлиб ўтиришини била-ман. Буни ҳар куни Узумзордан қайтганимда эшикдан киришим билан, келдингми, хайрият, дейишларидан дарров тушуниб оламан. Йўлда кетатуриб, автобус янаем илдамроқ юрсайди, деб шошиламан. Аксига олиб, автобус мен билан ўчакишгандек ҳар кунгидан ҳам имиллаб юраётганга ўхшайди. Қўлимдаги кўйлак кафтларимни чўғ каби куйдираётгандай туюлади. Ҳозир автобусдан ҳам олдинроқ учиб борсам-у, онамжонимни хурсанд қилсам, деб юрагим ҳаприқади. Шундай ҳам бўлди, Боғишодга етганимизда автобусдан деярли сакраб тушдим. Уйимизга шамолдай елиб бордим. Онам одатдагидай эшикка кўз тикиб ўтирган

экан. Менинг бирор фусункор хабар билан келганимни ҳали оғиз жуфтламасимдан күзларимданоқ уқиб олди.

– Бугун бир бошқача кириб келдинг, жоним қизим, илоё, ҳар доим күзларинг шундай қувнаб турсин, – деди онам севиниб.

– Нурия опамнинг ўқувхонасида қизлар билан бирга тиқдим, – деб кўйлакни кенг ёзиб узатдим.

Онам бир муддат нима дейишини билмай туриб қолди. Сўнг жилмайиб, мени бағрига босди. Мижжаларида мунчоқдай ёш йилтиллади.

– Она-бала ҳовлининг ўртасида бир-бирилизни шундай қучиб тураверамизми? Юринг, юринг ичкарига, – дедим ҳамон ҳаяжоним босилмай. Кейин қўярда қўймай ичкарига бошлаб, янги кўйлакни кийгиздим.

Онам ростакамига ёшариб кетгандай бўлди. Ўлчами ҳам қуйиб қўйгандай мос тушганидан ўзимда йўқ шод эдим. Онам раҳмат айта-айта мени бағридан қўйгиси келмасди. Яшнаб кетган чеҳрасидаги қувончни кўриб ўзим ҳам мамнун бўлдим. Аммо бу қувонч пардасининг ортида онамга азоб бераётган дарднинг ҳам дараги сезилиб турарди.

– Энди буни эгнингиздан ечманг, ая, – дедим ярашганини айтиб.

– Сен совға қилган кўйлак дарров эскириб қолсинми? – деб онам уни авайлаб девордаги қозиқقا илиб қўйди. – Уни сенинг қувончли кунларингда кияман, қизалоғим.

* * *

Эрталаб қуёш чиққунча идора ичкарисидаги ҳамма хоналарни, йўлакларни ёғ тушса ялагудай қилиб, ҳовлидаги йўлакларга ҳам сув сепдим. Ҳайдар бува гулларга сув тараб, атиргулларнинг шохларини қайчилашиб тартибга солаётган эди. Ошхона айвонини ҳам тозалайман-у, кейин ўқувхонамизга жўнайман, деб

турганимда Саломат опа келиб қолди. Одатда бунчалик эрта келмас эди. Кўнглимдан кечётган савонни пайқади чоғи, маъноли жилмайди.

– Ҳайрон бўлма, бугун байрам. Шунинг учун сўфи азон айтмасдан туриб, бу ёқقا шошилдим. Илёс келмадими? – деб бошлиқнинг ҳайдовчисини сўради. Кейин қўлидаги катта-катта сумкалардан янги чинни идишларни чиқара бошлади.

– Йўқ, келмади, – дедим стол-стулларнинг чангини тез-тез артиб.

- Ҳализамон келиб қолади тўлиб-тошиб.
- Қандай байрам ўзи?
- Неляхоннинг туғилган куни. Қолганларники унчалик эмас-у, лекин Нелянинг туғилган куни байрамдай ўtkазилади. Ҳали унинг маликалардай ясаниб келишини кўрасан. Нақ оғзинг очилиб қолади. Сен кетиб қолма, илтимос, менга қарашиб юборасан. Тушлик маҳали каттагина зиёфат бўлади. Уч хил овқат пиширамиз, яхналардан ташқари. Столларни тузашимиз керак. Ҳайдар буваниям чақирамиз, ёрдамлашиб юборади.

Ҳайдовчининг қораси кўринди. Эрталабдан бозорга тушганга ўхшайди, қўлида бир нечта қоғоз халта, яна бир қисмини Ҳайдар бува кўтаришиб келяпти. Халталарни ошхонага олиб кириб қўйишиди. Кейин қовун, тарвузларни олиб келишиди. Охирида каттагина бир даста гул келтирди. “Мана бу гулни сувга солиб туринг, Саломат опа, сўлиб қолмасин”, – деди ҳайдовчи. Халталарда дастурхонга қўйиладиган ҳамма ноз-неъматлар бор. Ҳатто ичимликларнинг ҳам ҳар хили жаранг-жулинг қилиб турибди. Саломат опа иккаламиз иштиёқ билан ишга киришиб кетдик. Мен қозонларни ювдим, халталардаги нарсаларни стол устига олиб қўйдим. Саломат опа олиб келинган масаллиқларни навбати билан қозонларга солди. Яхшигина байрамга

тайёргарлик кўрилаётганини қозону капкирнинг жарангую жаз-жуз товушлардан ҳам билса бўлади. Навбат столларга етганда Ҳайдар бува ёрдамлашишга келди. Столларни узун қаторга тиздик. Тўрда туғилган кун соҳибаси учун алоҳида жой ҳозирланди. Қўлимиз қўлимизга тегмайди, оёғи қуйган товуқдай типирчилаймиз. Бошлиқнинг ҳайдовчиси зир қатнаб, яна нималарни дир ташлаб кетди. Йўлакларга бошқатдан сув сепиб чиқдим. Тушлик вақтигача шуларнинг ҳаммасига зўрға улгурдик. Ходимлар бирин-кетин боғ ҳовлига чиқиши. Ошхонага қараб-қараб қўйишарди-ю, лекин бу томонга юришга шошилишмасди. Ниҳоят бошлиқ билан Неляхон бирга тушиб келиши. Улар тўғри айвон томонга қараб юриши. Уларнинг ортидан ходимлар ҳам қадам ташладилар. Биз қозонхонада пишир-куйдир билан овора эдик. Тўрдаги жойга бошлиқ билан Неляхон ёнма-ён ўтириши. Кейин зиёфат дастурхони атрофидан ходимлар жой олиши. Турган гапки, бизни бундай назокатли давраларга таклиф этишмайди, кимдир адашиб чорлаб қолса ҳам у ерда ўтиришга ҳаддимиз сиғармиди. Ҳайдар бува дараҳтларга қараш баҳонасида боғ оралаб кетди. Мен чойнакларга чой дамлаб, столларга қўйдим. Саломат опанинг айтгани рост экан, бошқалар каби менинг ҳам бутун эътиборим Неляхонда бўлиб, оғзим очилиб қолди. Неляхон юзига, соchlарига ҳафсала билан оро берган, қулоқларига таққан тилла зирағи, бўйнидаги тилла занжири ўзига ярашган, енгсиз, ёқаси анчагина очиқ, қип-қизил ҳарир кўйлаги билан ҳар доимгидан ҳам кўра мафтункор аёлга айланган эди. У сепган хушбўй атирларнинг ифоридан боғдаги лўп-пи-лўппи очилган атиргуллар уялиб, ер чизиб қолиши чамамда. Қип-қизил бўялган тирноқлари, қизғиши тус бериб пардозланган ёноқлари ҳам эгнидаги кўй-

лагига ҳамоҳанг эди. Унинг ёнида бошлиқ ҳам бугун бошқача кўркам бўлиб, оппоқ қўйлаги ёқасига чўғдай қизил бўйинбоғ тақиб олибди. У тинмай жилмаяр, нималарнидир гапириб, бошқаларни ҳам кулдирарди. Бу одамнинг хушчақчақ қиёфада бўла олишини шу пайтгача тасаввур ҳам қилолмаган эдим. Аммо сезиб турибман, бошлиқнинг кўзи ҳар гал менга тушганида беихтиёр юзидаги қувноқ табассум бир зум хира тортиб қолаётган эди. Шунинг учун бошлиқ ўтирган жойга яқин бормасдан, дастурхонга тортиладиган нарсаларни пастроқдан узатиб келавердим. Ўтирганлар уларни юқорироққа ўзлари олишарди.

Бошлиқ гулдастани сўради. Саломат опа уни югуриб олиб бориб ходимлардан бирига берди. Бошлиқ чехраси қуёшдай чарақлаб, тилидан бол томиб, Неляхонни табриклади. Аввал гулдастани, сўнг ялтироқ тасма билан боғланган каттагина қутидаги совғани топширди. Ўтирганлар чапак чалиб олқишлиашди. Бояги ҳайдовчи магнитофоннинг қулоғини буради, шўх қўшиқ янгради. Неляхоннинг қувончининг чеки йўқ, қолганлар ҳам шоду хандон. Қадаҳларга ичимликлар куйилди, ходимларнинг ширин-ширин тилаклари айтилди. Туғилган кун Неляхонники-ю, аммо улар негадир бошлиқнинг шаънига ҳам ҳароратли истаклар айтишар эди. Бирин-кетин мазали таомлар сузилди. Яна қадаҳлар жааранглади. Мусиқа товуши яна бир парда кўтарилди.

– Бўлди, ҳамма нарсани дастурхонга қўйдик. Биздан фақат булар кетишганидан кейин стол устидагиларни йиғишириш қолди. Кел, Марям, ўтири, – деди Саломат опа ва дараҳтлар орасида ҳамон куймаланиб юрган Ҳайдар бувани деразадан чақирди. – Энди ўзимизни ҳам тўйғизиб олмасак, бирор бизнинг ғамимизни емайди.

Биз қозонхона тор бўлса ҳам кўнглимиизни кенг қилиб, стол устига кичкина дастурхон ёзиб, учовимиз овқатландик. Даврадагилар орасида Жаннат опа кўринмаганидан ҳайрон бўлаётган эдим. “Жаннат опанинг бундай шовқинларга сираям тоқати йўқ, шунинг учун зиёфатларга ҳадеганда келавермайди”, – деди Саломат опа. Чиндан ҳам бир ёқда баланд мусиқа, бир ёқда ўтирганларнинг қийқириқлари авжига чиққан эди. Улар яна биттадан қадаҳ кўтаришганидан кейин бошлиқ ҳаммани рақсга таклиф қилди. Давранинг маликаси Неляхон ўртада, бошқалар уни қуршаб олиб рақсга туша бошладилар. Неляхон мақтовлар ва олқишилардан маст бўлса-да, ўзини йўқотиб қўймаган, қаддини тик тутганча зеболаниб ўйнар, бу даврада унга суқланиб боқмаган ҳеч ким қолмаган эди. Ҳайдар бува ҳам бу каби шовқинли давраларни хушламайди, шекилли, яна боғдаги ишларига уннаб кетди. Биз эса қозонхонада ўтириб, Неляхоннинг рақсга тушишини томоша қилдик.

* * *

Ўқувхонамизга борганимда Гулсара опани таниёлмай қолдим. Ҳар доим хушчақчақ бўлиб машғулот ўтадиган аёлнинг юзи бугун бошқача ташвишли қўринарди. У саломимни ҳам эшитмади. Ўзи билан ўзи овора, чуқур уҳ тортарди. Шунга яраша, ўрганувчи қизлар ҳам ўз юмушлари билан ивирсиб юришар, ҳеч бирида ҳафсала кўринмасди.

- Нима бўлди, тинчликми? – дедим секингина.
- Эшитмадингми? – деди Гулсара опа баттар хўрсиниб.
- Нимани?
- Шодия... – деди-ю, кўзларидан тирқираб ёш чиқиб кетди. Кейин кафтлари билан юзини ёпиб, шу кўйи узоқ жим ўтиrdи.

Нега бунча қайғураяпти, нима бўлди экан, дея ҳаёлнинг турфа кўчаларига бош сукдим. Шодия яқинда институтга имтиҳон топшириб келган, ўтган куни имтиҳон натижасини билиб келиш учун шаҳарга кетган эди. Агар ўқишга кирган бўлса, ҳаммамизга зиёфат қилиб бермоқчи эди. Кечаке мен бу ерга келолмадим, лекин бирор хушхабар бўлса албатта эшитардим. Демак, у ўқишга киролмаган-у, Гулсара опа шундан ғамга ботаётганмикан? Ахир, бу шунчалик қайғу чекишга арзийдиган воқеа эмас-ку. Бу йил киролмаган бўлса, кейинги йил кирап. Ё бошқа бирон жиддийроқ ҳол рўй бердимикан? Ишқилиб, эсон-омон юрган бўлсин.

Нурия опа ҳам келганида юзида изтироб акс этиб турган эди. Юрагини ғам ўртаётгани, қаттиқ чарчагани кўриниб турибди. Ўриндиққа ўтирди-ю, узоқ бош чайқади. Сўнг қизларга қараб: “Бугун машғулот ўтмаймиз, қизлар, уйларингга бора қолинглар”, – деди. Қизлар буюмларини йигиштириб, бирин-кетин ташқарига йўл олишди. Мен нима қилишни билмай, хоналарни йигиштирадим. Нурия опага чой қуйиб узатдим, у чойни олмади. Менга бир лаҳза тикилиб турди-да: “Марям, юрагим сиқилиб кетяпти, юр, адирга бориб келамиз”, – деди. Икковимиз отга мингашиб, адир томонга кетдик. Қашқа ҳар доим ўзи бориб турдиган йўлни яхши билганиданми, илдам йўргала-моқда эди. Йўлнинг икки томонини ям-яшил барглари билан қоплаган токзорлардан ўтиб, буғойлардан бўшаган кенг далага чиқдик ва қир этагига етиб қолдик. Ҳур-ҳур шабада эсиб турган бу кенгликларда одамнинг баҳридили очилади. Тўйиб нафас олгинг, шамолга қўшилиб чопгинг келади. Қир этагига қўй боқиб юрган чўпон таёғини бошига қўйиб, дўпписини юзига ёпиб мизғияпти. Қўй-қўзилар ёвшанлару қовжираган майсаларни еб, секин-аста қирга ўрламоқда.

Кўйларнинг изидан эргашган қўзиларнинг маъраши қулоққа ёқимли эшитилади. Куёшнинг тафти ҳали ерни қиздириб юбормаган, ёвшанлар тагидаги эрталабки шудрингдан қолган намлик бутунлай парланиб улгурмаган эди. Мен отдан тушиб, шу кенглиқда яёв юргим келди. Нурия опа шабада эсаётган тарафга қараб, чукур-чуқур нафас олди. Отга секингина қамчи уриб, адирни айланиб чоптириди. Назаримда, Қашқа ҳам бу ерларга келганда яйраб кетадиганга ўхшайди. Кейин қир этагида қүёшга тескари соябон қилиб ёпиб ўтирганча бироз дам олдик.

– Шодияга нима бўлди? – дедим ниҳоят боядан бери хаёлимни банд қилиб, тинчлик бермаётган савол билан Нурия опага қараб. Лекин ёмон хабар бўлмасин-да, деган хавотир ичимни тирнарди.

– Кеча саҳар чоғи сигирни соғиш учун оғилхонага кирдим, – деди Нурия опа кўзларини бир нуқтага қадаб. – Челак эндиғина яримлаганида оғил бурчагидаги сомон ғарами устида нимадир шитирлагандай бўлди. Аввалига бунга унчалик эътибор бермадим. Бироқ кейин яна шитирлаб, кимдир нафас олаётгандай туюлди. Ичимга ғулғула тушди. Ҳайрон бўлиб ўша томонга қарадим. Оғилхона қоронғи эди, ҳеч нарса кўринмади. Кўрқа-писа ғарамга яқинроқ бордим. Шунда ғира-ширада ғарам устида бир қизнинг жавдираб қараб турганига қўзим тушиб, юрагим ёрилаёзди.

– Ҳой, кимсиз? – дедим шивирлаб. Ҳалиги қиз баттар ғужанак бўлиб олди. Бирон ажина кириб қолмадимикан, деб қўрққанимдан оғилдан қочиб чиқмоқчи ҳам бўлдим. Лекин ўша қиз тилга кирди.

– Мени ҳайдаманг, опажон, – деди у дағ-дағ титраб. – Хайрият, одам экан-ку, деб кўнглим сал жойига тушди.

- Кимсиз ўзи, нега сомон орасига беркиниб ўтирибсиз? - дедим.
- Менга шу ер яхши, шу ерда қолай, - деди у яна изиллаб йиғлаб.
- Қоронғида сизни яхши күролмаяпман, бу ёққа чиқинг, илтимос.
- Йўқ, ташқарига чиқмайман, қўрқаман.

Унинг овози танишдай туюлди. Янаям яқинроқ бориб, қўлидан ушладим-да, ёруққа олиб чиқдим. Не кўз билан кўрайки, у ўзимизнинг Шодия экан. У мени кучоқлаб йиғлади. Хаёлимда у телбасифат бўлиб қолганга ўхшарди. Сочлари тўзғиган, эгни-боши абгор, ранг-рўйи бир аҳволда эди. Гоҳ ўзига келиб, менга нималарнидир айтиб бермоқчи бўлар, гоҳ асаби қақшаб, соchlарини юлгудек бўлар, юм-юм йиғларди. Уйга олиб кириб, сув ичкиздим, юзларини ювдим. Тинчланганидан сўнг нима юз берганини айтиб берди. Шодия имтиҳон жавобини билиш учун институтга борган. Қараса, ўқишга кириши учун атиги икки балл етмай қолган экан. Институт масъуллари, хафа бўлманг, ҳали қўшимча ўринлар бўлади, ўшанга илинасиз, деб комиссия котибига учрашиш кераклигини айтишибди. Котибнинг қабулига киргунча кеч бўлиб кетибди. Аксига олиб, бекатда ҳам Узумзорга кетадиган биронта машина қолмаган экан. У нима қилишини билмай ҳайрон бўлиб турганида олдига бир қора машина келиб тўхтаб, қаёққа боришини сўрабди. Қараса, ўзимизнинг узумзорлик одам экан. У одам асли банги эди. Бир мўйсафидни пичоқлаб қўйиб, қамалиб ҳам чиққан. Кейинги вақтларда ўзини художўй қилиб кўрсатиб юрган эди. Гоҳ-гоҳ мачитга кириб, кўпчилик билан бирга намозхонлик ҳам қиларкан. Диёнат йўлига кирганига одамларни ишонтиromoқчи бўлган-дир-да. Сипо юришини кўрсанг, бунга ишониб ҳам қо-

ларкансан киши. Мачитдаги намозхонлар ҳам аввалинга унга ишонқирамай, бу чаламулла ифлос оёғи билан мачитнинг табаррук остонасини булғамасайди, дейишган экан. Лекин тоат-ибодат қиласман деб келган одамнинг йўлини тўсиб гуноҳга ботмайлик, дейишган бўлса керак. Бўлмаса, бу одамхўрнинг феъли ҳаммага маълум эди. Бечора Шодия ҳам бу соқолингга ўт тушкурнинг тақводорлигига ишониб, машинасига чиқсан экан-да. Ярим йўлга етганда чаламулланинг одамхўрлик иштаҳаси қўзғаган. Олдинига мусулмончилик таомилларидан роса гапирибди. “Ўқишга кириб нима қиласан, у кофирларнинг ўқиши. Мен сени шундай мударрисларнинг олдига олиб борай, улар сени отин қилиб юборишади. Ҳижобга кириб, чин муслима бўласан. Ёнингга бошқа қизларни ҳам тўпласанг, ошиғинг олчи бўлади”, – дебди. Шодия унинг нияти бузуқлигини пайқаб, машинадан тушиб қолмоқчи бўлибди. Зим-зиё кечада кимсасиз бир далага етганларида чаламулла машинани тўхтатибди. Бечора қизга тажовуз қилиб, уни таҳқирлабди. Шодия ақлдан озиб қолай деган. Шу аҳволида уйига боришга қўрқиб, кечаси мени қидириб келган. Балки, мени чақирган бўлса, эшитмагандирман. Кейин жон ҳовучлаб очиқ турган оғилхонага кирган-у, шу ерда саҳаргача ўтирган. Оҳ, Шодия, сингилжоним, қандай ловуллаб юрган қиз эдинг-а. Мен уни уйига олиб бормоқчи бўлсам, йўқ, шу ерда қоламан, деб яна чопиб бориб сомон ғарами устига ётиб олди. Гўё жонини қўрқувга солиб қўйган ёвуз одам уни бу ердан тополмас эмиш. Бир амаллаб кўндириб, уни тушга яқин уйига олиб бордим. Унинг ота-онаси қазо қилган. Ўйда келинойилари бор экан. Иккала акаси курилишда ишлаш учун Бухорога кетишган экан. Келинойилари Шодиянинг аҳволини қўриб, эслари оғиб қолай деди, қиёмат бўлди. Бугун эрталаб яна бо-

риб хабар олдим. Акалари тонготарда келишибди. Шодиянинг аҳволи яхши эмас, соғлиғидан хавотирдаман. Лаънати одамхўр, гулдай қизнинг ҳаётини заҳарлади, осуда хонадоннинг бошига ташвиш солди.

– Сиз уни қора машинада келган, дедингизми? – сўрадим ҳов бир кунги воқеа эсимга тушиб.

- Ҳа.
- “Волга”ми?
- Ҳа, “Волга”.
- Ўша чаламулланинг исми Бойтўра эмасми мабодо?
- Ҳа, айнан ўша. Сен уни танийсанми?
- Йўқ, танимайман, лекин собиқ синфдошим билан бирга кетаётганида кўрганман.
- Отингиз ўтхўр экан, – деди дўриллаган овозда кимдир гапимизни бўлиб.

Чўчиб кетиб, ортимизга қарадик. Шундай яқинимизда Нормурод чавандоз отини етаклаб турган экан. Сал нарироқда унинг бир шотири ҳам отнинг ёнида турибди.

– Менда бирор гапингиз борми? – деди Нурия опа шахт билан ўрнидан туриб.

– Жаҳлингиз чиқмасин, илтимос, Нурияхон, мен шунчаки сиздан узр сўрамоқчиман, холос. Чойхонада мастиликда билмасдан хафа қилиб қўйдим.

– Мард бўлсангиз, панада эмас, ўша ерда, одамларнинг кўз олдида узр сўрардингиз.

– Айтаяпман-ку, у пайтда маст эдим. Ҳечдан кўра кеч, дегандай...

У менга маъноли қараб қўйди. Мен ўн-ўн беш қадамча нарига кетдим. Улар яна нималарнидир гаплашишди. Нормуроднинг ҳалимдай мулойим гапларига Нурия опа кескин-кескин жавоб берди. Буни қўлларининг ҳаракатидан пайқадим. Қашқа безовта бўлиб кишинади. Нурия опа гапни узиб, мен томонга юрди. Нормурод унинг ортидан кинояли ишшайди-да, шеригига қараб, кетдик, дея ишора қилди.

– Полвонга инсоф кириб қолибдими, ўша кунги хурмача қилиғидан пушаймон бўлганга ўхшайди, – дедим.

– Яхши гапирганига ишонма, бундай одамларнинг яхши гапи тагида ҳам ғараз яширган бўлади. Пинҳона узр сўраши билан балки қайсиdir айблари ни хаспўшламоқчиdir. Ёвузлик қилишга қилиб, энди ундан шубҳаланмаслигимиз учун шу ҳийланни ўйлаб топгандир. Нима бўлганда ҳам пушаймонлиги самимий эканига ишонмайман. Унинг бу ерга мулоим супургидай бўлиб келиши йўлбарснинг ҳамла олдидан ортга тисарилишига ўхшайди. Нормурод шафқатсиз одам, Марям, сен билмайсан. Мана шу от уники бўлмаганига у дунёю бу дунё аламидан чиқа олмайди. Ҳамма иши бекитиқча. Бек аканг ижарага ер олиб, буғдой эккан эди. Бир амаллаб буғдойни ўриб, донини ташиб олди-ю, сомонини ташишга улов топиш қийин бўлди. Далада қолган сомон ғарамларини кечаси кимдир ёқиб юборди. Шунча меҳнатимиз кулга айланди. Ҳамма қатори дэҳқончилик қилиш учун ер олиб, уни узумзорга айлантирган эдик. Бу йил токларимиз айни ҳосилга кирганида кимдир бир оқшомда токларнинг ярмининг томирига нимадир қуйиб, қовжиратиб кетди. Буларнинг барини Нормуроддан бошқа ким ҳам қилиши мумкин? Лекин кўзимиз билан кўриб, қўлимиз билан ушламаганмиз, фақат гумон қилдик, холос. Бадгумонлик қилган бўлсам, Худойим ўзи кечирсин. Мелисаларга айтдик, айборни топишолмади, ҳатто тузукроқ қидиришганиям йўқ. Бек аканг қаттиқ изтироб чекканидан жинни бўлиб қолай деди. “Бу ерлардан кетамиз, чўлга бориб, ҳалол одамлар орасида пахта экиб, тирикчилик қиласиз”, – деб йўлга отланди. Зўрға шаштидан қайтардим ҳозирча. Ахир, кечаю кундуз ер чопиб, сув тараб қанча машаққат чеккан эдик.

Бу далада, бу боғда пешона терини тўқкан одамларнинг меҳнати кўкка совурилди, насибаси увол бўлди. Бунга чидаш осонми, Марям?

Нурия опанинг ғуссага ботганини кўриб, менинг ҳам кайфиятим бузилди. Кўз олдимдан қоп-қорайиб куйган далалар, узумлари ҳали пишиб улгурмай қовжира бўлган токзор, Шодиянинг абгор бўлган қиёфаси кетмай қолди. Ҳатто тушимда ҳам шу аламли манзараларни кўриб чиқдим. Уйғонганимда онам уйқумда алаҳсираганим сабабини сўради. Мен эса ломмим дея олмадим.

Парвардигор, нега одамларнинг ёвузлик қилишига изн берасан? Ёки бу ҳам бандаларинг ғафлатда қолмаслиги учун юборган синовингми?!

* * *

Бугун яна Қоплонбек амакининг уйига бориладиган кун. Жаннат опа келгунча Ҳайдар бувага боғдаги олхўриларни теришга кўмаклашиб юбормоқчи эдим. Кейин Жаннат опадан калитни оламан-да, бориб уйни супуриб келаман. Пешиндан сўнг ўқувхонага боришм керак. Гулсара опа дераза пардаларини тикишни қизларга ўргатяпти. Лекин қуёш тиккага келгунча боғда қолиб кетдим. Дараҳт шохига чиқиб мева териш жону дилим. Ҳайдар бува барибир дараҳтга чиқолмайди. Унга мендай кўмакчи керак. Шунинг учун маймундай шохдан-шохга ўтиб, бўлди, дегунча олхўри тердим.

Қоплонбек амакининг уйига борганимда эшик очиқ экан. Ҳовлида болалар ўйнаб юришибди. Ҳайрон бўлиб ичкарига қадам кўйдим. Хонадон бекаси айвонда ойна олдига ўтириб сочини тараётган экан. Истараси иссиққина аёлга ўхшайди, мени кўриб жилмайди. Мен бу аёлни аввал кўрмаган эдим. Чунки ҳар доим улар келмасидан уйни супуриб кетардим-да. Хизмат ҳақимни ҳам Жаннат опадан бериб юборишар эди.

– Келавер, синглим. Сен экансан-да бизнинг уйимизни саришта қилиб юрган қиз? – деди бека сочларини йиғишириб.

– Бугун келишларингизни айтишмаган эди. Билганимда эртароқ келиб, супуриб кетардим, – дедим хижолат чекиб.

– Ҳечқиси йўқ, келганимизни ҳали Жаннат опа ҳам билмаган эди. Ҳар доимгидай шанба куни келмоқчи эдик, лекин хўжайнинимнинг бу ерда шошилинч иши чиқиб қолди. Биз ҳам бирга келавердик. Балки эшитгандирсан, мачитда бир одамнинг мурдаси топилибди. Хўжайним ҳозир шу ишни суриштираяпти.

– Ё тавба, мачитда ҳам одам ўлар эканми?

– У одам бир қизни хўрлаган экан, уни ўша қизнинг қариндошлари ўлдирган бўлишлари мумкин, дейишяпти. Кечаси мачитнинг ҳовлисига олиб чиқишибди-ю, чавақлаб ташлашибди.

Ичимга ғулғула тушди. Наҳотки, бу ўша Шодияни жувонмарг қилган Бойтўра бўлса? Аҳмоқ бўлмай ўл, Фаттоҳ, сен менга уни художўй, мўмин одам, деб мақтаган эдинг. Уйни йиғишираяпман-у, оёқ-қўлим қалтираяпти. Кўз олдимга соchlари тўзғиган Шодия, ҳовлида бўғизланиб ётган Бойтўра келаверди. Бека ҳануз нималарнидир гапиряпти, менинг эса қулоғим эшитмайди. Кўнглимга ҳеч нарса сифмаяпти. Бу ердаги юмушларни тез-тез адогига етказиб, ўқувхонага шошилдим. Шу маҳалгача бу воқеани Нурия опа албатта эшитган бўлиши керак. Бечора Шодиянинг ҳоли нима кечаяптийкин? Унинг акаларига нима бўлади энди?

Ўқувхонада Нурия опа билан Гулсара опа ҳам айни шу ҳақда гаплашиб ўтиришган экан. Машғулотларини тугатган қизлар хайрлашиб чиқиб кетишаётган эди. Нурия опа эшитганларини титраб-қақшаб айтиб берди. Шодиянинг акалари кун бўйи қиз бечо-

рани сўроқ қилишган. Шодия эса бу ишни ким қилганини айтмай, оғзини маҳкам ёпиб тураверган. Бир фалокат юз беришини кўнгли сезган бўлса керак-да. Лекин ҳоли-жонига қўйишмаганидан кейин, ниҳоят кечқурун ёрилган. Акалари: “Бойтўра бизнинг ғуруримизни, ор-номусимизни топтади. Буни шундай қолдирмаймиз”, – дейишибди-да, Бойтўранинг уйига боришибди. Эшигини қанча тепиб тўполон қилишса ҳам, Бойтўра чиқмабди. У уйда йўқ экан. Уйига ўт қўйиб юборамиз, дейишибди. Кўни-кўшнилар чиқиб, ака-укаларни шаштидан қайтаришга роса уринишибди. Кейин улар Бойтўрани ҳамма жойдан ахтара бошлишибди. Ярим тунда Бойтўра банги ошналарининг ўтиришидан қайтаётган экан. Уни қидиришаётганини эшитиб, ўзини ҳар ҳовлига урибди. Одамлар балога гирифтор бўлишдан қўрқиб, уни киритишмабди. Охири мачитга бориб яширинибди. Тунда маст уйқуда ётган одамларнинг қулоғига қандайдир бақирган овозлар эштилгандай бўлган экан. Муаззиннинг овози бўлса керак, деб эътибор беришмабди. Саҳарлаб мачитга келган бир-иккита намозхонлар мачит ҳовлисида қонга беланиб ётган Бойтўранинг жасадини кўришибди. Шодиянинг акаларини нозир олиб кетибди. “Ҳа, уни биз ўлдирдик, – дейишибди ака-укалар. – Кутурган итнинг жазоси шу”. Энди ҳамманинг оғзида шу гап экан.

– Бойтўра одамларнинг кўзига ўзини художўй қилиб кўрсатиб юргани билан қинғир ишларини ташламаган экан-да, – деди Нурия опа куюниб. – Ҳали ҳам бангилик қилиб юришини-ку, одамлар зимдан билишаркан. Камига ёш йигитларни зўр пул берадиган иш топиб бераман, деб алдаб, чет элга жўнатиб юборар экан. Улар шу қўйи дом-дараксиз кетган эмиш. Уларнинг қариндошларини Бойтўра, ҳадемай яхши кунлар

бошланади, ўғилларингиз күч йифиб, чўнтаклари пулга тўлиб кириб келишади, деб алдаб юрган экан. Бойтўранинг одамларни йўлдан урадиган шериклари ҳам бор экан, дейишяпти. Ҳаммадан ҳам Шодияга жабр бўлди. Келинойилари, сени деб эрларимиз қамалиб кетади энди, деб унга кун беришмаётган экан. Ахир, унда нима айб? Шўрликка шунча азоблар каммиди?

Ўқувхонадан бир аҳволда чиқдим. Боягина ҳёт қайнаб турган кўчада энди файз қолмагандек. Дараҳтлар мунғайиб қолган, япроқлар bemажол шитирлади. Шамол чангни тўзғитиб ўйнамоқда. Унга қўшилиб хаёлларим ҳам нурсизланиб, тўзғиб борајпти. “Нега бундай бўлди? – дейман одамлар ҳорғин ўтирган бекатда туриб. – Нега қулгуларига булбуллар жўр бўлиб юрган бир ожизанинг бошига шунча қайғу ёғилиши керак? Нега офтобга талпиниб, гулдай очилаётган бир маъсумани шайтон измидаги маҳлуқ ҳеч нарсадан тап тортмай, янчиб кетавериши керак?..”

Раббим, ожиз бандаларингни ўзинг паноҳингда асрагин!

* * *

Кузнинг келганини билмоқ учун кун санаш ёки тақвимга қарашга зарурат йўқ экан. Шамолнинг қандай эсишию дов-дараҳтларнинг тусидан, ҳашаротларнинг ғимирлашию ўт-ўланларнинг қовжирашидан пайқаса бўларкан. Бекат ёнида чумолилар уяси бор эди. Ҳар куни ўша уяга тикилиб ўтириб, чумолиларнинг ғуж-ғуж бўлиб емиш ташишларини томоша қиласдим. Энди, мана, ўша чумолилар ҳам сийраклашиб қолган, уя атрофида саноқлигина, бечораҳолгина чумолилар ғимирсиб юришибди. Демак, кузнинг келганини сезишган. Одатдагидай, автобус келгунча шу уяга қараб, ҳар битта чумолининг нима қилаётганини

кузатиб ўтиридим. Худди чумолилардай кўчада одамлар ҳам сийраклашиб қолган. Бу одамларнинг қўшни туманларга пахта териш учун ҳашарга кетишганидан бўлса керак, чунки ҳозир айни йифим-терим палласи. Уйга келганимда ҳовлимиздаги дараҳтларда ҳам кузнинг жамолини кўриб, кўнглим алланечук бўлди.

Саҳар чоғи ишга отланаётганимда онамнинг рангруйи бир аҳволда эди. Ҳар куни мен билан бирга нонушта қиласди, бугун эса бир пиёла чой ҳам ҳўпламади.

– Нега хаёлингиз паришон, ая, аҳволингиз яхшими? – дедим кўнглим безовта бўлиб. – Ёки бугун ишга бормасаммикан? Ёнингизда бўламан. Керак бўлса, Ди-лобар холамни қақириб келаман.

– Ишингдан қолиб кетма, қизим. Бормасанг, бошлиқларингдан балога қоласан.

– Бир кунга осмон узилиб ерга тушмас. Балки, Узумзорга бирга кетармиз? Сизни касалхонага олиб бораман. Шу орада ишимга ҳам бориб келаман.

– Йўқ, жоним қизим, овора бўлма, у ёқларга боришига ҳолим етмайди. Шу ерда яхши юрибман. Мендан хавотир олма.

Ҳарчанд уринмай, онамни Узумзорга бирга кетишга кўндиrolмадим. Лекин кўнглим нотинч эди.

– Ундей бўлса, мен дарров қайтаман, – деб хайрлашдим.

Идорада ҳам кўнглим ҳаловат топмади. Бутун хаёлим онамда бўлди. Назаримда, соғлиғи оғирлашиб қоладигандай туюлаверди. Ҳайдар буванинг ёнимдан ўтганини ҳам, нимадир деб гапирганини ҳам сезмай қолибман. Супур-сиidlаримни тугатиб, уйга кетишга шошилаётган эдим. Ўқувхонага эса боролмадим.

Кўнглим безовта бўлганича бор экан. Уйга келганимда онам ғужанак бўлиб ётган экан. Қисқа-қисқа, тез-тез нафас олаётган эди. Пардаларни, деразани очдим, уй ёришиб кетди. Шундагина онам менинг кел-

ганимни пайқади. Күрпадан бошини чиқариб қаради. Кўзлари жиққа ёш, оғриқ қийнаётгани шундайгина кўриниб турарди.

- Сизга нима бўлди, ая? – дедим ёнига чўккалаб.

Онам нимадир дейишга оғиз жуфтлади-ю, лекин гапиришга қийналиб, бош чайқади.

- Тобим қочди, Биби, – деди кейин инグラб.

Мен онамни ҳеч қачон бунчалик оғир аҳволда кўрмаган эдим. Кўрқиб кетдим. Нима қилишни билмасдим. Пиёлага сув қуиб узатдим, онам озгина ҳўплади. Бошқа яна қандай чора зарурлигини билолмай ҳар томонга жавдирардим. Бундай тураверганим билан онам соғайиб қолмайди. Дилобар холанинг уйига югурдим. Ягона умидим шу аёлдан эди. Аксига олиб, уйида йўқ экан, ҳали ишдан келмабди. Касалхонага чопдим. Ҳамшира хола лой кўлларини юваётган экан, мени кўриши билан хавотирланиб, мен томонга юрди.

- Марям, тинчликми, нега бунча ташвишли кўринасан?

- Аямнинг тоби қочиб қолди, шунга сизни қидириб келдим. Илтимос, бир бориб кўринг, бир ўзим нима қилишни ҳам билмай қолдим.

Дилобар хола шошилганча ичкарига кириб кетди. Бироздан сўнг полвонкелбат доктор билан бирга чиқишиди.

- Сизлар бораверинглар, мен кейинроқ хабар оларман, – деди доктор. Унинг бундай бепарвогина гапиришидан жаҳлим чиқди.

Ҳамшира хола йўл-йўлакай уйига кириб ўтди. Уст-бошини алмаштириб, дорилар солинган қутисини олиб чиқибди. Уйга келгач, онамнинг аҳволини кўриб, лабини тишлади. Онамнинг қўлларини ушлаб, ҳолини суриштира бошлади. Мен ўчоқхонага кетдим. Чой дамлаб кирганимда Дилобар хола онамнинг оғриқларини текшириб бўлган эди.

– Чойингдан бир пиёла қүй, томоғим қақраб кетди,
 – деди ҳамшира хола ҳамон онамнинг ёнида ўтириб.
 – Онангни бу ерда даволаб бўлмайди, Марям. Узум-
 зордаги катта касалхонага олиб бориш керак. Касали
 зўрайганга ўхшайди. Аксига олиб, тез ёрдам машина-
 миз ҳам юрмаяпти, бузуқ. Қишлоқнинг йўлига ярама-
 ди, шалоқ аравадай бўлиб қолган. Эсиргап шопир уни
 тузатолмай овора.

– Қишлоқни оралаб, биронта улов топиб келайми?
 – Сен онангга қараб тура қол, уловни ўзим топиб
 келаман.

Дилобар хола олиб келган машинага онамни зўрға
 суяб олиб чиқдик. Онам йўлда роса қийналди. Букча-
 йиб олиб, овоз чиқармасликка уринарди-ю, лекин ма-
 шина ҳар силкинганида чидаёлмай инграб юборарди.
 Ҳамшира хола елкаларидан ушлаб, юпатиб бормоқда
 эди. Онамнинг азоб чекаётганини кўриб юрагим эзи-
 лар, кўзларимдан тирқираб ёш оқарди. Нафасим бўғ-
 зимга тиқилиб, юпатишга куч тополмасдим. Касалхона
 одатдагидан ҳувиллаб қолган, докторларнинг кўпчи-
 лиги қўшни туманга ҳашарга кетишган экан. Ҳамшира
 ўзи қидирган шифокорларни тополмади. Бир нотаниш
 доктор келиб онамнинг аҳволини текширди. Кейин у
 бошқа докторларни ҳам чақириб келди. Улар онамни
 кўтарма каравотга ётқизиб, бошқа хонага ўтказишиди.
 Дилобар хола билан иккимиз йўлакда кутиб ўтиради-
 ган бўлдик. Мен Тангримга ёлвориб, ичимда тинмай
 дуоларни ўқийвердим. Фақат онажонимга шифо бери-
 шини, доим ёнимда бўлишини илтижо қилдим.

– Марям, боядан бери нималарни пичирляйпсан? –
 деди ҳамшира хола хаёлимни бўлиб.

– Шунчаки, ўзим.

Бояги биринчи келган доктор Дилобар холани
 чақирди. Иккови онам ётган палата эшиги олдида ни-
 маларнидир шивирлашиб гаплашишиди.

– Онангнинг аҳволи ҳозирча яхши экан, – деди ҳамшира хола қайтиб келиб. – Оғриқни түхтатишибди. Энди икковимиз уйга кетаверсак ҳам бўлаверади.

Ҳамшира хола мени бу ердан олиб кетишга қанча ҳаракат қилиб тушунтиrsa ҳам, мен қайсарлик қилиб, онамнинг ёнида қолишимни айтдим. Дилобар хола ортига қарай-қарай хайрлашиб кетди. Кунлар қисқариб бораётганидан тезда қоронғи тушиб қолган эди. Мен йўлакда ёлғиз қолганим учун онам ётган палата-га кирмоқчи бўлиб, аста эшикни тортдим. Ичкарида ҳамшира қиз уйқусираб ўтирган экан. Онамнинг билагига томчилатадиган укол қилишган экан, шу томчи-ларнинг тугашини кутиб ўтирган бўлса керак. У мени ичкарига йўлатмади. Мен яна йўлакда кутиб туравердим. Палатага доктор кириб кетди. Бироздан кейин ҳамшира қофоз кўтариб чиқди.

– Мана шунда ёзилган дориларни тез олиб келинг, – дея менга қоғозни узатди.

Қоғозда бир талай дорилар, шприц, бинт, пахта, яна алламбало нарсалар ёзилган эди. Мен оёғимни қўлимга олиб, дорихонага чопдим. Хайриятки, Узумзорнинг ҳар бир кўчасини яхши биламан. Тор кўчалар оралаб ўзимга таниш бўлган дорихонани мўлжаллаб боравердим. Ҳар доим онамга дориларни шу ердан оламан. Қоронғида тош кўчалардан юриш қийин эди. Дорихона очиқ экан, бир-иккита одам кириб-чиқиб турибди. Сотувчи хушфеъл аёл. Ҳовлиқиб кирганимни кўриб, ташвишли эканлигимни дарров пайқади, назаримда. Қоғозни унга тутқаздим. Рўйхатдагиларнинг ҳаммасини елимхалтага жойлаб, ҳисобни берди. Вой, худойим, ёнимдаги пул ярмига ҳам етмади. Қарзга бериб туришини сўраб ёлвордим. “Ялинишнинг кераги йўқ, синглим, аҳволингизни тушуниб турибман. Сизни танийман, олиб кетаверинг. Пул топганингизда тўлаб кетарсиз. Беморингизга ўзи шифо берсин”,

– деди сотувчи аёл. Мехрибонлиги учун шу тобда уни қучоқлаб олгим келди. Касалхонага келиб, дориларни ҳамшира қизга бердим. У елим халтани очиб, ичига бир назар ташлади-да, менга йўлакни банд қилмасдан ҳовлига чиқиб туришимни тайинлаб, докторнинг хонасига кириб кетди. Зинапоя олдига чиқиб, кута бошладим. Вақт алламаҳал бўлганда ҳамшира яна олдимга келиб, қофоз тутқазди. “Мана буларни ҳам олиб келинг”, – деди чукур эснаб. Қофозда бош ювадиган шампун ва атир совуннинг номлари ёзилган экан. “Булар bemорга нима учун керак? Ёки улар онамнинг соchlарини ювиб қўйишармикан? Лекин бемаҳалда бу нарсаларни қаердан топаман?” деб ўйланиб қолдим. Ишхонамизнинг рўпарасида дўкон бор, ўшани кўзлаб йўлга тушдим. Яна қоронғи кўчаларда қоқиниб-суриниб зўрга юрдим. Дўкон эшиги ёпиқ экан. Лекин, хайрият, деразасидан милтиллаган шамчироқ ёруғи кўринди. Деразани тақиллатдим. Дўкон хўжайини уйқусираб мўралади ва дераза токчасидан узатган қофозимни олди. “Фақат... ёнимда пулим йўқ эди. Мен мана шу рўпарадаги идорада фаррошман. Маош олишим билан, албатта қарзимни тўлайман”, дедим минг бир истиҳола билан. “Биламан”, – деди дўкондор амаки. У бироз иккиланиб турди-да, кейин таваккал дегандек ҳалиги иккала матоҳни токчадан узатди. Касалхонага келсам, йўлакнинг эшиги ёпиб қўйилган экан. Мен эшикни устма-уст тақиллатдим. Ҳамшира кўзларини уқалаб чиқиб, ичкаридан эшикни очди. Олиб келган нарсаларимни унга бердим.

– Эрталаб берсангиз ҳам бўларди-ку, – деди у уйқуси бузилганидан норози бўлиб.

– Аямнинг аҳволи қандай? – дедим, у эшикни ёпмасидан сўрашга улгуриб қолиш учун шошилиб.

– Ухлаяпти, – деди ҳамшира ва эшикни яна ичкаридан қулфлади.

Мен зинапоя ёнидаги ёғоч ўриндиқقا ўтирдим. Ҳамма ёқ сув қуйгандай жимжит. Одамлар ширин уйқуда, аммо менинг кўзимга уйқу келмаяпти. Ҳувилланган бу салқин бинода ёлғиз ўзим хаёл суриб ўтирибман. Онамнинг аҳволидан хавотирдаман. Докторлар, ҳеч бўлмаса, кўнглим тинч бўлиши учун ҳам, менга бирон тузукроқ гап айтмади. Аксига олиб, отамдан ҳам дарак йўқ. Неча ой ўтиб кетганини ҳам билмайман. На икки энлик хат ёзади, на бирордан хабар айтиб юборади. Омонми, йўқми – билолмаймиз. Онам аслида шуларни ўйлаб кўп сиқилди. “Отангта нима бўлди экан, қизим? Бояқиш бегона юртларда қай аҳволда юрган экан. Тез-тез тушимга кириб чиқяпти. Кўриниши абгор, хасталанган. Эсон-омон қайтиб келсин, ишқилиб” деб ич-ичидан қайғурарди. Лекин отам шуларни билармикан? Бизни ҳеч ўйлаганми ўзи? Агар уйда бўлгандা нима қиласарди? Хаста онам учун жон куйдирармиди? Йўқ, бизнинг аҳволимиз отамни ҳеч қачон қизиқтиргмаган. Шундай бўлса ҳам онам негадир уни ўйлайвериб куяди.

Гира-шира тонг ёриша бошлади. Ҳали ҳам атрофда ҳеч зоғ кўринмайди. Ҳамма уйқуда, фақат мен узун ёғоч ўриндиқ устида бошимни билагимга қўйиб, мудраб ётибман. Сукунат ютиб юборай деяпти. Докторлар уйғониб, эшик очилгунча идорага бориб ишларимни қилиб келганим яхши, деб ўйладим. Шу фикр хаёлимга келганидан хурсанд бўлдим. Идорага борганимда Ҳайдар бува аллақачон келиб, боғда кечаси шамолда тўкилган олмаларни териб юрган экан. Мени кўриб ҳайрон бўлди.

- Бугун жуда вақтли келибсанми?
- ...
- Безовта кўринасан?
- Аямнинг тоблари йўқ.
- Нима бўлди? Докторларга кўрсатдингларми?

- Ҳа, күрсатдик.
- Нима дейишди?
- Даволашаяпти, яхши бўлиб қолса керак.
- Даволашаётган бўлса, яхши. Шифо берсин, илойим.

Идорадаги ишларни тугатиб, яна зувиллаб касал-хонага қайтдим. Йўлак эшиги очилган, бирор кириб, бирор чиқиб турибди. Кечаги ҳамшира оқ халатини ечиб, уй кийимида чиқиб кетаётган экан.

– Аямни кўрсам бўладими? – дедим олдига чопиб бориб.

– Менинг навбатчилигим тугади. Палатага қараёт-ган ҳамширадан сўраб кўринг.

Унинг ўрнига келган ҳамшира хушфеъл қиз экан. Эшик олдида кутиб туришимни айтди-да, ичкарига кириб кетди. Бирордан сўнг чақирди. Севинганимдан палатага учиб кирдим. Онам шифтга термилиб ётган экан, мени кўриб, хастагина жилмайди. Шукр, кўри-ниши жуда яхши бўлмаса ҳам, ҳар ҳолда, кечагидан тузукроқ эди. Ёнига ўтириб, қўлини ушладим.

– Аяжон, ахволингиз қандай? – дедим овозим қалтираб, қўзларимдан ёш оқиб кетди.

– Яхшиман, болажоним, оғриқ пасайди, – деди онам шивирлаб.

Онамнинг ёнига киритишганидан хурсанд бўлиб, кун бўйи палатада ўтирдим. Фақат докторлар кирганда йўлакка чиқиб туардим. Чошгоҳда кутилмаганда Нурия опа келиб қолди. Дорихонадаги сотувчи аёлдан эшитибди. “Кечаси келиб, дори олиб кетди, ранг-рўйи бир ҳолда, кимидир касал бўлганга ўхшайди”, – дебди.

– Марям, нима бўлди? Қачон келдинглар бу ерга? – деди ҳовлиқиб. – Нега менга хабар қилмадинг?

У онамнинг ёнида бирпас ўтирди-да, кейин докторнинг олдига кетди. Мен Нурия опанинг йўқлаб келганидан беҳад севиндим. Гўё нажот фариштаси кириб келгандай бир ҳисни туйдим. Нурия опа онам

учун куйиб-пишар, елиб-югурмокда эди. Келибоқ хабардор қилмаганим, ҳеч бўлмаса, кечаси уларни книга бориб ётиб қолмаганим учун мени койиди. Бу каби роҳатбахш койишлардан тоғдай куч олдим. Шу пайт Дилобар хола ҳам келди. Эшикдан мўралаб, мени имлаб чақирди.

– Туни билан хотиржам бўлолмадим. Эрталаб келай десам, ишимиз қўпайиб кетди. Тушдан кейин бирров бўлса ҳам кўриб кетай, деб келавердим. Онанг яхши бўлиб қолдими? Мен бир кўриб чиқай, – деб ҳамшира хола палатага кириб кетди. Мен эса йўлакда қолдим. Ичкарида одам қўпаймаслиги керак экан. – Худога шукр, яхши томонга ўзгариш бор, – деди қайтиб чиққач. – Энди кетамиزمи?

– Мен аямнинг ёнида қоламан, – дедим.
– Бечорагина-ей, кечадан бери туз ҳам тотмагандирсан? Ма, мана буларни сенга олиб келдим. Докторлардан сўраб, аянгга ҳам егизгин, – деб иссиққина овқат ва яна бир талай егуликлар солинган идишларни менга тутқазди.

Нурия опа докторнинг олдидан айтарлик хурсанд бўлиб келмади. Буни кўзларидан дарров илғадим. Ди-лобар хола Нурия опани кўрди-ю, таниди. Икковлари бир четга ўтиб, нималарни дир гаплашишди. Кейин ҳамшира хола биз билан хайрлашиб, уйига кетди.

– Марям, аянгнинг ёнида бўлиб тур, кечқурун келиб сени олиб кетаман. Аянг тузалгунча бизникида тураверасан, – деб Нурия опа ҳам кетди.

Мен қоронғи тушгунча онамнинг ёнида ўтирдим. Палатада яна иккита bemor бор эди. Иккови ҳам кекса кампирлар бўлиб, назаримда, улар анча соғайишган эди. Мен онамнинг ҳам уларга ўхшаб тезроқ тузалиб кетишини истаб, ичимда Худога илтижо қиласардим. Фақат Нурия опанинг доктор ҳузуридан яхши кайфиятда чиқмаганини ўйлаб, кўнглим хира тортмоқда эди.

Онам касалхонада тўрт кун даволанди. Лекин ҳар куни уйга кетишини ўйлар, рухсат беришларини сўраб, докторларга ёлворарди. Мен бўлсанм онамнинг бу ердан соппа-соғ бўлиб чиқишига умид қиласдим. Шу кунлар ичидаги Нурия опанинг уйида меҳмон бўлдим. Мен уларнинг уйидан ҳар куни саҳарлаб ишга, у ердан касалхонага борардим. Кечқурун Нурия опа мени олиб кетарди. Онамга эса ҳар куни иссиқ овқат олиб келишни канда қилмади. Саломат опа ҳам, Ҳайдар бува ҳам, ҳатто ўқувхонадаги қизлар ҳам келиб ҳол сўраб кетишиди. Бешинчи кун деганда докторлар онамнинг уйга кетишига ижозат беришиди. Нурия опани чақириб, нималарнидир гаплашишиди. Кейин Нурия опа палатага келиб, онамнинг нарсаларини йиғиширишимизни айтди. Ўша куни онам бутунлай соғайгандек тетик кўринди. Кетишига рухсат беришганини эшитиб, қувонди. Нурия опанинг чехрасида эса негадир ҳануз хурсандлик сезилмасди. Онам иккаламизни йўловчи машинага ўтқазиб кузатаётганида: “Марям, онангга эҳтиёт бўл, ёлғиз қолдирма. Онанг буткул тузалгунча ишга келмай турсанг ҳам бўлади. Ўрнингга ўзимизнинг қизлар қарашиб туришади”, – деди.

Уйга келганимиздан кейин онам соchlарини ювди, сўнгра ойна олдига ўтириб, ҳафсала билан таради. Мен ҳам кўмаклашдим. Рўмол тагида бекитиб юрган экан, соchlари орасида оқ толалар кўпайиб кетиби. Мен тикиб берган янги кўйлагини кийиб, яна ойна олдига келди. Илгари ўзига ҳеч қачон бунчалик оро бермаган эди. Мен шунга ҳайрон бўлсанм-да, лекин бугун онамнинг кайфияти саҳар чоғи баҳор шудрингига қадаҳ тутган қизғалдоқ сингари очилиб кетганидан ғоятда шод эдим. Онам ҳатто бир-икки марта кўча эшикни очиб, ўйлга узоқ-узоқ кўз тикди. Балки, дом-дараксиз кетган отамнинг ҳализамон келиб қолишидан умидвор бўлаётгандир. Ёки Эъзоз тоғамнинг келишини

муштоқ бўлиб қутаётганмикан? Яккаю ёлғиз жигарини соғинган, албатта. Ё бўлмаса бу етти ёт биёбонларга қайси йўллардан адашиб келиб қолган эканман, деб термилаётганмикан?

Ҳаммаси қуёш уфқ ортига йўл олиб, бутун қишлоққа туннинг қуюқ пардаси ёйилганда аён бўлди. Кун бўйи хурсанд қўринган онамнинг юзи оғриқдан буришди. Кутимаганда дарди зўрайиб, ғужанак бўлиб ётиб қолди. Мен қўрқиб кетдим.

– Биби Марям, қизалогим, менга бир нарса бўлса, ўзингни йўқотиб қўйма, – деди онам инграб.

– Нега бундай гапларни гапиряпсиз, мени қўрқувга солиб? Ахир, тузалдим, деган эдингиз-ку, ая.

– Мен фақат бугун эмас, умрим бўйи дардларимни яшириб келдим, ичим дардга тўлиб кетган. Бу дардларни даволаш учун дўхтирларга минг йил керак, болам.

– Мен ҳозир Дилобар холамни чақириб келаман.

– Йўқ, керак эмас, қизалогим, сен ёнимдан кетма. Биби Марям, жон қизим, мен ҳам сени ташлаб кетгим келмаяпти. Лекин нима қиласай, болажоним, қўзимнинг гавҳари, кетар вақтим бўлганга ўхшайди. Оҳ, бутун танамда оғриқ. Нафас ололмаяпман. Тангirimning юборган охирги тортиғи шумикан? Онамнинг арвоҳи ҳар куни бошимга келиб, мени чақирияпти. Буни сенга айтмагандим. Сенинг баҳтингни қўриб, кейин ўлсам, армоним йўқ эди. Во дариф, энди бунинг имкони йўқ. Сўнгги нафасларимда бир-биримизнинг тафтимизни сезиб турибмиз. Шу охирги дийдор учун ҳам Яратганга шукр дейман. Сенинг кўнглинг тўлмаган, рўшнолик бермаган бу уйда танҳо ўзингни қолдириб кетаётганимдан афсус ва қиёмат қадар хавотирдаман. Бироқ жон қизим, бошим улоқиб бу ёқларга келиб қолганим учун муштипар онангни айблама. Жоҳил отанг менинг ҳамма ишонч ва умидларимни поймол қилиб, маст бўлган чоғлари аёвсиз уриб, азоблаб ҳузур қиларди. Сен дунёга келганингда уни хурсанд бўлар, ўша лаъ-

нати гиёхвандлигини ташлар, деб ўйлаган ва буни жон-жонимдан истаган эдим. Аммо у хурсанд бўлмади, қайтага баттар ваҳшшилашиб кетди. Бир куни сени бағримга босиб ухлатаётганимда яна ўша зормандасини чекиб, кўзлари қонга тўлиб кириб келди. Мени хўрлади, уриб-тепди. Унинг уришларига ҳар қанча бўлса ҳам чидар эдим. Аммо у, одам шамойилидаги маҳлуқ сени қўйнимдан юлиб олди-ю, қайноқ сув тўла тоғрага қарата улоқтириди. Жон ҳайбатида қандай сакраб тоғора олдига етганим-у, сени қандай илиб олганимни аниқ-тиниқ эслай олмайман. Мен ўшанда илк бор ўлим билан юзма-юз келган эдим. Фаришталарни қўрдим, улар теграмда гир-гир айланишарди. Сени маҳкам қу-чоқлаб олганман. Фаришталар иккимизни даст кўта-риб, йиртқичнинг чангалидан кутқаришди. Хушимга келганимда сени опичлаганча қорли кўчада ялангоёқ чопиб кетаётган эканман. Ана ўшанда юрагим қинидан чиқиб кетган, соғлиғим ҳам йўқолган эди. То ҳозирги лаҳзагача ҳам қўрқув билан яшаб келдим. Худдики ўша жоҳил бизни учратиб қолса, чавақлаб ташлайдигандек, доим юрагим таҳликада бўлди, кўзларим уйқуни билмади. Шунинг учун ҳам мана шу чекка қишлоққа келиб, хилват гўшада овоз чиқармай умргузаронлик қилдим. Оҳ, жоним, бунча азоб бермаса, бутун танам қақшаб оғрияпти. Марям, кўзмунчоғим, сен асло қўрқма, ҳайҳотдай уйда ёлғиз қолаяпман, деб ўйлама. Мен ўлсам-да, аммо руҳим доим сенинг ёнингда бўлади. Бир-биrimизни кўрмасак ҳам, гаплашмасак ҳам, ба-рибири сенинг ёнингда эканлигимни билиб туришинг керак. Бошингга бирор мушкуллик тушгудек бўлса ҳам, албатта, менга айт. Тонг маҳали бўлса, қуёш чиқаётган тарафга қара, мен ўша томонда бўламан. Шомда бўлса, қуёш ботар манзилдаги алвон шафақларга қара, мен ўша томонда сенинг ёруғ жамолингни кутиб турман. Тунда ойга, ой чиқмаса, чарақлаган юлдузларга

қара. Агар юлдузлар ҳам пинҳон бўлса, бепоён осмонга боқ, милт этган шуъла борки, ўша мен бўлламан. Эвоҳ, азобинг бунча қаттиқ бўлмаса. Марям, лолақизғалдоғим, сен бу маконда бутунлай ёлғиз эмассан. Эъзоз тоғанг бор, сени жонидан ортиқ яхши кўради. У сени йўқлаб келади, албатта келади. Аввал ҳам бир неча марта келган, сен уйда йўқ эдинг. Унинг иши шундай, вақти бениҳоя тифиз, келарди-ю кетарди. Бизнинг эсон-омонлигимизни кўриб, хурсанд бўларди. Унинг шодланганини кўрсам, менинг ҳам кўнглимга ёруғлик югуради. Эй, дунёи дун, бу не кўргилик бўлди, ёлғиз қизимни, кўзимнинг оқу қорасини баҳтли қилиш қўлимдан келмади, аттанг. Чумчук ҳам полапонини қанот чиқаргунча ҳар балодан ҳимоя қиласди. Мен одам қавмидан бўлиб, ягона жигарбандимни балолардан асрай олмадим. Мен қандай она бўлдим? Келдим, кетяпман, бу дунёда нима кўрдим – билмайман. Энди мен учун ҳам сен яша, овунчоғим. Сенга ғам-ғуссадан бош-қа ҳеч нарса қолдирмадим...

* * *

Онамнинг вафотидан сўнг гўё кимсасиз саҳрова адашган ёлғиз йўловчига ўхшаб қолдим. Бирор ишга қўлим бормайди. Уйга кирсам ҳам, чиқсан ҳам онам кўзимга кўрингандай бўлаверади. Сочиқни, чойнакни, ҳатто эшик тутқичини ушласам ҳам, онамнинг тафтини туяман. Кўзимдан тинмай ёш қуйилаверади. Дилобар хола уч кун бизницида қолиб, менга юпанч бўлди. Соли амаки ҳам ҳар куни шу ерда эди. Таъзияга келиб-кетувчиларнинг кети узилмасди. Эркакларнинг таъзияларини ҳовлида Соли амаки қабул қиласди, хотинларни ҳамшира хола уйга олиб кираради. Яхшиям, улар бор экан, йўқса, ёлғиз ўзим нима қиласди? Марҳумнинг хотираси учун ўтказиладиган урф-одату маросимлар ҳам кўп экан. Мен уларни деярли билмас

эканман. Майитни ювганга, жаноза ўқиганга, гўрковга, яна ким-кимларга бериш керак, деб Соли амаки уйдаги қўрпами, гиламчами, белбоғми, қўлга илинадиган нарса борки, олиб кетди. Ҳар куни новвойхонага бир қоп иссиқ нон, қассобга гўшт буютиради. Мен кун бўйи ўчоқхонада ивисийман. Ҳар қайси келиб-кетувчининг олдига чой-нон қўямиз. Бафуржা ўтириб, суҳбатлашиб қоладиганларга иссиқ овқат ҳам сузамиз. Уч кун деганда худойи қилинди. Соли амаки бутун қишлоқни худойига чақиртирди. Дошқозонга ош дамланди. Мулла тиловат қилди. Маърака тугагач, Соли амаки муллага тугун тайёрлади. Одамлар кетатуриб, ҳаммалари ошни мақташди. Мақтовларни Соли амаки тавозе билан қабул қиласарди.

- Ош жуда тобида бўлибди, Соли ака.
- Савоб иш қилибсиз, тақсир.
- Қариндош дегани бундай бўлибди-да.
- Шопўлатнинг йўқлигини билдирмай турганингизга тасанно.
- Саховатпеша одамсиз-да, Соли ака...

Бундай мақтовлардан Соли амакининг кўнгли тоғдай кўтарилади.

– Савоб учун юрибмиз-да бу дунёда. Қариндош шундай кунда ярамаса, қачон ярайди, – дейди иягини силаб.

Одамлар кетганидан кейин Соли амакининг қарз дафтарига нималарнидир ёзиб қўяётганига кўзим тушди.

– Соли амаки, – дедим ичимга ғулғула тушиб, – маъракаларни ўтказиб, кўп харажат қилиб юбордингиз, сизга жабр бўлиб кетмадими?

– Эй, чироғим, бу дунё – ҳисобли дунё, кетган харатларни ёзиб қўйган яхши-да.

– Лекин бунча чиқимни тўлашга менинг қурбим етмайди-да.

– Сен ташвишланма, чироғим, отанг билан ҳар

доим ҳисоб-китобимиз түғри бўлиб келган, бу ёғини ҳам түғрилаб оламиз. Отангнинг борган жойида ишлари бироз чалкашиб қолибди. Алданган қўринади. У томонларда ити адашганмиди. Майли-да, бутунлай қолиб кетмайди-ку, бир куни қайтиб келади. Йигит киши йиқилади, суринади, вақти келиб йўлига тушиб олади. От айланиб қозифини топади. Мана бу маъракага келсак, бу ҳали бошланиши. Ҳали мархуманинг еттиси, йигирмаси, қирқи, йили дегандай кўп маъракалари бор. Уларда ҳам халойиқни чақириб, ош тарқатишимиш керак. Элнинг удуми-да, элдан чиқиб қаёққа бораардик, чироғим. Одамлар қанча кўп ош еса, мархуманинг руҳи шунча шод бўлади. Сен ҳали ёшсан, бу нарсаларга ақлинг етмайди.

Отамнинг катта савдони бошлайман, деб чув тушиб, катта ғавғони бошлаганини энди эшитиб туришим эди. Демак, шунинг учун бедарак бўлиб кетган экан-да. Ҳаммага кўрсатиб қўяман, деб кетган одам энди бошига тушган кўргиликдан гангиб юрган бўлса керак. Онамнинг кўнгли шуларни сезган, шу сабабдан безовта бўлган. Отам гарчи бизни одам қаторида санамаган бўлса-да, онамнинг унга юраги ачиган.

Нурия опа келганида кўнглим анча кўтарилди. Мени юпатди, таскин берди. Кетаётганида мени ўзи билан бирга олиб кетмоқчи бўлди, унамадим. Кейин Дилобар хола кетишига тараддувланиб, мени ҳам уйига олиб кетишини айтди, бормадим. “Ундей бўлса, кечкурун яна келаман, сизларникида ётиб қоламан”, – деди. Кўнмадим, ёлғиз қолгим келаётганини айтдим. Шундоқ ҳам уч кун менга ҳамдард бўлиб, ёнимда қолган эди. Энди бу ёғига бошқаларни овора қилмасдан, ёлғиз яшашни ҳам ўрганишим керак.

Тунни чироқ ёнида ўтказдим. Ҳудди ҳозир онам мени йўқлаб келиб қоладигандек, тиқ этган товушга қулоқ тутаман. Хаёлан онам билан гаплашаман. Мени

ташлаб бошқа оламга кетганига сира-сира ишонгим келмайди. Азонлаб қабристонга йўл олдим. Ҳали уфқ ёришмаган бўлса ҳам ҳеч қандай қўркув рахна солмади. Одатимизга кўра майитни қабрга қўядиган куни қабристонга фақат эркаклар боради. Аёллар эса кейинги кунлари саҳар чоғи, тонг ёришгунча бориб келишади. Фира-ширада дўмпайиб турган каттаю кичик қабрлар четида янги қабр кўринди. Лекин унинг ёнида яна бир янги қабр бор эди. Буларнинг қайси бири онамнинг қабри экан, деб ўйланиб қолдим. Атрофда бирон кимса кўринмайди. Одатда қабристон қоровули доим шу ерда айланиб юради, дейишарди. Мен ҳам аслида шунга ишониб келган эдим. Энди кўнглим сезгисига суюнишдан бошқа илож йўқ. Қабрлардан бирининг ёнига ўтириб, ўзим билган дуоларни пичирлаб ўқий бошладим. Кўзларимдан дув-дув ёш оқиб, тупроққа сингиб кетмоқда эди. Шу пайт узоқдан бир шарпа кўринди. У тўғри мен турган жойга қараб келаверди. Қадам ташлашидан мункиллаган чол эканлигини билдим. Қоровул бўлса керак, деб ўйладим. Яқин келганидан сўнг танидим, у Одил бува экан. “Бу Офтоб момонгнинг қабри, қизим, – деди Одил бува мени дарров таниб. – Мана бу ёнидагисида онанг ётибди”. Офтоб момо биз Узумзордаги касалхонада эканимизда қазо қилибди. Шунинг учун мен эшитмаган эканман. Нурия опа ҳам айтмаган. Ўлим билан олишиб ётганларга ўлим дарагини айтмай, дегандир-да. Офтоб момонинг кўзимга хас кирганида бир зумда чиқариб олгани эсимга тушиб, яна кўнглим бўшаши. Ўзи Офтоб момонинг ўша яхшилиги учун ҳам бир кўзёши қарзим бор эди, деган гап дилимдан кечди. Одил бува намхуш ерга чопонини тўшаб ўтирди-да, иккала мархуманинг ҳаққига тиловат қилди. Кейин мен ортимга қайтдим. Тонг ёришаётган, кенг адирдаги қовжираган ўт-ўланлар устига кўн-

ган шудринглар зар сочган каби жимирлаётган эди. Ҳар бир майсада, ҳар бир шабнам томчисида онамнинг акси кўринаётгандек нигоҳимни тортиб кетаверди.

Уйга келганимда сукунат мени оч аждар сингари ютиб юбораётгандек туюлди. Энди бу хувиллаган уйда менинг шу сукунатдан ўзга ҳамхонам ҳам, ҳасратдошим ҳам йўқлигини ўйласам, юрагим сиқилаверди. О, онажоним-а, хаста бўлсангиз ҳам ёнимда борлигингиж бахтим ва давлатим экан. Сизсиз нимам қолди? Толеи қулмаган жигарбандингизнинг бу шошқин дарёи азимда энди кимга ҳам кераги бор? Бу шовуллаган дарёда ҳар ким ўз истагиу имконича сузар экан. Ўйлашимча, Парвардигор ҳам фақат омади қулганларга боқади, мискинлар эса мудом уқубат соясида қоловеради. Агар барчага баробар назар солганда эди, шунча қилган дуо ва илтижоларимга мисқолча бўлса ҳам марҳамат қиласмиди?

Тўрт девор ичида қаттиқ сиқилдим. Ҳовлига чиқиб ҳам сукунатдан айро кетолмадим. Қилт этган шабада йўқ. Ўрикларнинг қирмизи япроқлари ерга гиламдек тўшалган, ҳали тусини йўқотмаган анжир япроғи устига қўнган шабнам томчиси хотиржам ҳордиқ чиқармоқда эди. Беихтиёр унга томон талпиндим. Назаримда, бу томчи юксак қоя узра мағрур турган улкан харсангтошга ўхшарди. У менга ғайритабиий куч берди. Қанот чиқариб учдим-да, анжирнинг энг баланд шохига қўндиндим. Ўзимнинг ерда турган нусхамга юқоридан нигоҳ ташладим. Шунда мен бу бепоён даҳридуnda кўз илғамас кичик бир зарра эканлигимни кўрдим. Ерда юрсам ҳатто чумоли ҳам мени эзғилаб ўтиши мумкинлигини англамоқда эдим. Сўнг яна ердаги вужудимга қайтдим ва тирмашиб қояга чиқдим. Менга нажот қалъаси бўлиб кўринган шабнамнинг шаффоғ соясига бекиндим. Шу ерда ҳаловат топгандай бўлдим. Қирлар ортида

аста бош күттарган қүёшнинг заррин нурларидан менинг қоятошим олмосдай жилваланди. Унинг соясида туриб онамнинг тафтини сездим. Зиё таралаётган тарафга юзимни бурдим. Онам мендан хавотир олиб, қирортидан мўралаб қараётганга ўхшарди.

Тангрим, ўзинг мушфиқу меҳрибонсан, ҳузурингга борган муштипар оналарни жаннатингга муюссар айла!

* * *

Ўқувхонадаги машғулотларга бутунлай шўнғиб кетдим. Ҳар ҳолда, бу ерда ёлғизликни сезмайман, жимжитлик тубсиз ғордай ютиб кетмайди. Энди ҳадеганда уйга кетишга ҳам шошилмайман. Идорада эса баъзида Саломат опага ёрдам бераман. Одатий таомларига қўшимча қилиб озгина бирор янгича егулик тайёрлаймиз. Ходимларга бу егуликларимиз хуш ёқади. Кузнинг ёмғирли ва салқин кунларида Қоплонбек амакининг оиласи уйига аҳён-аҳёнда келадиган бўлиб қолди. Лекин шундай бўлса ҳам мен ҳар ҳафта бориб тозалаб турардим. Кейин кечгача чевару пазанда қизлар орасида бўламан. Ҳавонинг авзойи бузилган кунлари ёхуд анча кеч қолиб кетган пайтларимизда Нурия опа мени кўярда-кўймай уйига олиб кетади. Эндиғина мактабга борган қизалоғи билан жажжи ўғилчаси ҳам менга ўрганиб қолишиди. Кечқурунлари қизалоқнинг дарс тайёрлашига кўмаклашиб юбораман. Зеҳни ўткир қиз экан, ўргатганларимни тезда илғаб олади. Шундан сўнг унга яна ҳам кўпроқ ўргатгим келаверади. “Тайёргина муаллима экансан-ку, қизим ўқишини мактабда бунчалик тез ўрганмаётган эди”, – деб Нурия опа хурсандлигини яширмайди. Гоҳида уйимиздан болаларни қизиқтирадиган китобларни олиб келиб, уларга ўқиб бераман. Болалар диққат билан тинглашади. Гоҳида бирор эртакнинг ярмига етганда тўхтаб

қарасам, болакайлар ширин уйқуга кетган бўлишади. Лекин қай куни бормай, Бек акани тушкун кайфиятда кўрардим. У саломимга илиққина алик олиб, ҳол сўрар эди-да, кейин индамай уйга кириб кетарди. Кўзлари ғусали эди. Болаларни эркалатганини ҳам, Нурия опага бирон оғиз гапирганини ҳам кўрмадим. “Эр-хотиннинг уриши – дока рўмолнинг қуриши” бўлса керак-да, деб ўйлаган эдим. Аммо бора-бора бу шунчаки “дока рўмолнинг қуришига” ўхшамаётгандек туюлди. Нурия опа менга сездирмасликка ҳарчанд уринмасин, барibir ичини қандайдир алам ўти куйдираётганини юрагим сезиб турарди. Яна бир куни кечки пайт осмонни қора булут қоплаб, ёмғир томчилаётганида қизлар билан хайрлашиб, уйга қайтмоқчи бўлиб тараддуланаётган эдим.

– Кетма, Марям, бизникида қола қол, – деди Нурия опа.

– Уйга борай, опа, узоқда бўлса ҳам, ўз уйим – ўлан тўшагим. Ўзи менсиз ҳам анчадан бери ташвишли кўринасиз, – дедим.

– Ҳа, яшириб нима қилдим, ташвишим бор. Лекин сен парво қилма. Сен бизникига борган кунинг шу ташвишлар бир зум унутилгандай бўлади. Кўнглим ёзилиб, ором оламан. Болаларим ҳам сени яхши қўриб қолишган. Уларга мураббийдай бўлиб қолдинг. Сен уйимизга келган кунинг уларнинг ҳам митти юракларига ёруғлик киради. Йўқсан... у бечораларга ҳам қийин. Ҳаммасига Нормурод сабабчи. Эсингдами, адирда юрганимизда қўққисдан келиб қолиб, узр сўрагандек ялтоқланган эди. Кўнглимга келган эди-я, бунинг ҳар бир қадамида фитна изғийди, деб. Қанча уринсам ҳам, барibir ҳушёрликни бой берган эканман. Ўшанда шериклари унинг мен билан гаплашиб турганини яширинча суратга олган экан. Шу суратни энди бек акангга юборишиб-

ди. Ким юборгани ҳам маълум эмас. Ҳовлимизга девор оша ташлаб кетишибди. Сурат тагига “юлдузни бенарвон урадиган хоним донгдор полвондан дарс оляяпти” деб хат ҳам ёзиб қўйишибди. Шундан бери Бек акамиз тўнини тескари кийиб олган. Ўзимни қанча оқламай, суратни дастак қилиб олган. Ҳеч қайси гапимга ишонтира олмадим. Орамизга совуқлик тушди. Тун чўкканига қарамай, отга миндим-у, тўппа-тўғри Нормуроднинг уйига бордим. Отдан тушмай эшигини тақиллатдим. У мамнун тиржайиб чиқди. Ойнинг ёруғида унинг айёр башараси янаем жирканч кўриниб кетди. Суратларни йиртиб, бетига отдим. Номард, қилмишини тан олмади. “Бекорчи болаларнинг ўйини бўлса керак” деб пинагиниям бузмади. Менга қанчалар алам қилганини билсанг эди. Юзига қамчи тортиб юбордим-у, изимга қайтдим. Бек аканг хонанишин бўлиб қолган. Ҳеч ким билан гаплашишни ҳам, бир одим кўчага чиқишни ҳам хоҳламайди. Тўй, кўпкариларга айтишди, бормай қўйди. Латънати Нормурод оиласманга оғу солди. Аламимдан қандай чиқишни билмаяпман, Марям.

Нурия опанинг кўзларидан ёш оқди. Мен яна уларникида қолдим. Уйга кирганимизда болалари югуриб келиб, Нурия опа билан мени кучоқлаб олишади, қийқиришиб ўйнашади. Бутун уйни эгаллаб олган жонсиз сукунат бекинишга мажбур бўлади. Кейин кўзларимизни то уйқу элитгунча болаларни ўйнатаман. Қизалоқнинг дарсларини тайёрлатиб, китоблар ўқиб бераман. Гоҳо Бек ака болаларнинг қувноқ шовқинини эшитиб, эшикдан қараб туради. Биламан, болаларини опичлаб ўйнатгиси келади. Аммо ичини кемираётган қайғу бунга изн бермайди. У яна индамай ўзининг ётоқхонасига кириб кетади.

Кейинги жума кунларининг бирида Боғишодга қайтмоқчи бўлиб турганимда Гулсара опа: “Эртага Узумзордаги сайилгоҳда ҳосил байрами бўларкан.

Кўпкари ҳам бўлади, дейишяпти. Сен ҳам кел, бирга борамиз”, – деди. Эрталаб Нурия опанинг уйида кўришишга келишиб олдик. Бундай байрамларни кўрмаганимга ҳам анча бўлган эди. Гулсара опа ҳосил байрамига авваллари ҳам борган, таърифини сўйлайвериб, қизиқишимни ўн чандон оширди.

Нурия опанинг уйига келганимда Бек ака ҳовли ўртасидаги ғўла устида бошини чангаллаб ўтирган, Нурия опа эса аламини тўкиб-солаётган эди. Хижолат тортиб, бир муддат кўча эшик олдида туриб қолдим.

– Сиз чимилдиққа кирган келинчакдай уйда ўтираверинг. Номард Нормуроднинг ошиғи олчи бўлаверсин. Ҳамма полвон деб уни олқишиласин. Ахир, унинг нияти шу эмасми? Мана шу фитнани шунинг учун ўйлаб топмаганми? Энди на кўпкарига борасиз, на бирор тўйга. Шунчалик ҳам осон енгиласизми? Бундай қилаверсангиз, одамлар сиздан юз ўгириб, устингиздан кулиб юришади-ку. Бугун катта сайилга бориб, Нормуродни яксон қилмасангиз, кейин ҳеч қайси даврага бош суқиб боролмайсиз, – дея Нурия опа жон куйдиарди. Бек акадан эса садо чиқай демасди. Шу пайт ёнимга Гулсара опа келиб қолди-да, ичкарига мўралади. Нурия опанинг кўзи бизга тушиб, киринглар, дегандай имо қилди. Ўзи эса айвон томонга кетди. Бек ака ҳамон бошини кўтармай ўтиради. Болакайлар бизни кўриши билан югуриб келишди. Уларни қучиб, юзларидан ўпдим. Биргалашиб уйга кирдик. Эр-хотиннинг даҳана-ки тортишувини кузатиб ҳовлида туравериш ноқулай эди-да. Биз Нурия опанинг кийиниб чиқишини кутаётган эдик. “Шу кайфиятда сайилга борармикан?” – деди Гулсара опа. Лекин Нурия опа Қашқани миниб чиқди. Авзоридан у кўпкарига киришга бел боғлаган ростакам чавандозга ўхшарди. У ниҳоятда асабий кўринарди. Биз нима бўлаётганини тушунолмай караҳт бўлиб қолган эдик. Отнинг дупурини эшитиб, Бек ака боши-

ни күтариб қаради. От устидаги күзларидан ўт чаңнаб турган чавандозни кўриб, сесканиб кетди.

– Эркакка ор керак, ор, – деди Нурия опа қичқириб ва отга қамчини сермади.

– Тўхта, – деди Бек ака сапчиб туриб.

Лекин Нурия опанинг шахтидан қайтмаслиги шундоққина кўриниб турган эди. У отнинг ортидан чопиб кетди.

Биз болакайларни етаклаб, сайил майдонига келганимизда ҳосил байрами бошланган, адирга тумонат одам тўпланган эди. Дехқонлар нимаики етиштирган бўлса, намойишга олиб чиқишиган. Кўшиқлар авжида, полвонлар, масхарабозлар, ҳайвон ўйнатувчилар томоша кўрсатишшапти. Бир пайт қўпчилик одамлар тепаликка қараб чопа бошладилар. Кўпкарини ўша ердан туриб томоша қилишаркан. Биз ҳам у ерга шошилдик. Баҳодирлар беллашувини кўришга ошиқсан оломон қир устига жам бўлди. Қир этагида кўпкарига шайланниб турган отлиқ чавандозлар кўринди. Файрати ичига сиғмай басма-басига кишининг завқи ошади. Майдоннинг бир четидан трактор тиркамаси устига айвон қурилган, бу айвонга оқсоқоллар жойлашишган эди. Оқсоқоллар чавандозларни ҳалол курашишга даъват этишди. Ҳаммадан олдинда Нормурод турибди. Гёё унинг олдига тушишга ҳеч ким журъат қилолмайдигандек. Нихоят, зот айтилиб, ўртага улоқ ташланди. Полвонлар улоққа қараб ўзларини урдилар. Қийқириқ, олқишлиар қулоқни қоматга келтирай дейди. Отлар югурди. Чавандозлар улоқни талашишарди. Улоқ Нормуроднинг қўлига ўтди. У улоқни тақимиға босганча майдонни бир айланиб келди ва улоқни қўрага ташлади. Полвонга олқишлиар ёғилди.

Кейин ўйинбоши иккинчи зотни тайин қилди. Полвонлар яна ўзларини улоққа уришди. Худди шу лаҳ-

зада тепалиқдан бир отлиқ шамолдай учиб келди-да, тұда орасига қиличдай ёриб кирди. Күтилмаган бундай шиддатдан чавандозлар гангиб қолиши. Томошага келган ишқибозлар учқур отни танидилар-у, бироқ от устидаги чавандозни таниёлмадилар. Қалпоғини қулоғигача бостириб олган, юзини ниқоб билан бекитган чавандознинг кимлигини билолмай, кўпкарига кириб урҳо-ур қилаётган полвонлар ҳам бир зумга чалғидилар. Нотаниш чавандоз эса улоқни юлқиб олиб, тақимига қистирди-да, майдонни айланиб, от чоптириб кетди. Чавандозлар ўзларига келиб, унинг ортидан қувишига тушдилар. Нотаниш чавандоз ортига ўғирилиб қарамади. Соҳибининг раъйини англаған каби от ҳам елдек учмоқда эди. Унинг ортидан қувлаётганларнинг энг аввалида Нормурод полвон борар, отини тинмай қамчилаб, унга тобора яқынлашмоқда эди.

- Эй, кимсан? - деда қичқирди Нормурод.

Нотаниш чавандоз парво қилмади. Шунда ғазаби қайнаган Нормурод унинг бошига қамчи урди. Нотаниш чавандознинг бошидан қалпоғи учиб кетди. Нормурод ҳамон кутурған кўйи пишқирарди.

- Кимсан ўзи, юзингни оч, - қичқирди у.

Нотаниш чавандоз яна жавоб бермади. Жавоб ўрнига қамчисини қаттиқ сермаган эди, Нормуроднинг оти хуркиб кетиб, сакради. Нормурод ерга гурсиллаб йиқилди. Чанг тўзғиб кетди. Нормурод нотаниш чавандознинг ортидан: "Кимсан?" деда қичқирди. Бу гал овози хириллаб чиқди. У лой аралаш қон туфлади. Нотаниш чавандоз майдон бошига шамолдай учиб борди ва улоқни сомондан қурилган доира ичига ташлади. Кейин олқишиларга қиё ҳам боқмасдан, тупроқ устида тиззалаб ўтирган Нормуроднинг олдига қайтиб борди. У юзидаги ниқобни ечди. От устидаги Бек акани ишқибозлар дарров таниши. Улар шунча кўпкариларни кўриб, лекин ҳеч қачон бундай ғаройиб томо-

шага дуч келишмаган бўлса керак. Бек ака Нормуродга нимадир деди-да, келган йўлига шиддат билан қайтиб кетди.

Ортимга ўгирилиб қараганимда пастликда бир қизнинг телбаларча тентираб юрганига кўзим тушди. Унинг рўмоли елкасига сирғалиб тушган, соchlари тўзғиган, кўйлагининг этаги йиртилиб, ерга судралган, оёқяланг, ғарип бир аҳволда эди. “Ахир, у Шодия-ку!” дея қичқириб юбордим. Одамлар орасидан туртимиб-суртиниб ўша томонга юрдим.

- Ҳой, қаёққа? – деди Гулсара опа.
- Ҳозир келаман, – деб оломон орасидан чиқдим.

Шодияга яқинлашиб қолганимда у мени кўрди-ю, ёвни кўргандай қўрқиб кетди. У соchlарини чанглалганча қоча бошлади. Унинг ортидан югурдим. “Тўхта, Шодия, қўрқма, бу менман, Марямман” дея чопиб боравердим. У эса телбалардек чинқирганча орқасига қарамай қочарди. Унга етолмаслигимни билиб, чопишдан тўхтадим. Шодия қирдан ошиб, кўздан ғойиб бўлди. Мен бугунги ҳамма ғаройиб ишлардан бошим гангиб, изимга қайтдим. Оломоннинг ҳамон чавандозларни олқишлиб қийқиришаётгани элас-элас қулоғимга етмоқда эди.

* * *

Яна шаррос ёмғир қўйди. Кечқурун Боғишодга қайтгунча уст-бошим бутунлай шалаббо бўлди. Қоронғи қўчаларда қўлмакларга тушавериб, калишим лойга тўлиб қолибди. Уйга киришдан олдин тарнов тагида туриб калишимни тозалаб ювдим. Кейин электрчироқни ёқдим, хайрият, ток бор экан. Ўчиб қолмасидан кийимларимни дазмоллаб қуритиб олсан бўлади. Бўлмаса, бу салқин ҳавода эрталабгача ҳам қуримайди. Йўқ, афсус, улгуrolмадим, тежоғлиқ электрчилар яна

токни узиб қўйиши. Баданимдан совуқ ўтди, оёқ-қўлларим музлаб, мени қалтироқ тута бошлади. Қорним оч эди, лекин овқатга уннай олмадим. Энди иштаҳам ҳам йўқолди. Шамоллаб қолдим чоғи. Ёмғир остида келаётганимда шундан хавотирга тушган эдим. Муздай ёмғир кийимларимдан ўтиб, бутун танамга сингиб кетди-да. Рўмолимни сиқсам, бир коса сув тушди. Сочларим ҳалигача қуригани йўқ. Ёмғир ҳануз тинай демайди. Ҳар замонда момақалдироқ гумбурлагандага юрагим така-пука бўлиб кетади. Илгари онам борлигида ҳамма нарсани ҳам парвойимга олавермаган эканман. Энди эса бундай ваҳимали кечада “тиқ” этган товушдан сесканяпман. Совқотиб дир-дир титрашдан тўхтамайман. Печкага ўт қалашга ҳолим йўқ. Қишига ўтин ҳам ғамлаганим йўқ эди. Ўтган йилдан қолган озгинна токпоя ёмғирда ивиб кетган бўлса керак. Мойчироқни ёқиб, унинг шишиасига қўлимни яқин тутиб исинмоқчи бўлдим. Қўлим олов тафтини сезди-ю, лекин бу иссиқ танамга татимади. Кейин устимга кўрпаларни қалин қилиб ёпиб, бошимгача бурканиб ётдим. Шу кўйи қулоғимга ёмғирнинг шитирлаши ҳам, гумбурлаган товушлар ҳам эшитилмай қолди. Кечаси алаҳсирадим, шекилли, бир неча марта чўчиб уйғондим. Энди совуқни сезмаётган, аксинча, иссиқлаб, терлаб кетаётган эдим. Уйқу аралаш шуларни ҳис этдим-да: “Менинг ҳам паймонам тугадимиликан? – деб ўйладим. – Тугаса тугай қолсин. Ўзи бу ахволда яшаб юришдан нима фойда? Бир ўзинг бир қўрғонда ўз ҳолингча нафас олиб юрганинг нимаси? Шу ҳам яшаш бўлдими? На сенинг бирорвга керагинг бор, на бошқаларнинг сенга. Бир умр шундай сўппайиб юриш шунчаки одамларга кулги бўлишдан бошқа нарса эмас. Отам қайтиб келса-чи, унда нима ўзгаради? Шу билан ёлғизлик чекинадими? У билан ота-боладай яшаймизми? Ҳеч қачон. Отам билан бир том остида яшаш мутлақо бегона эркак билан

умргузаронлик қилиш дегани. Унда оталик меҳри деган нарсанинг ўзи бормикан? Бор бўлганида менда ҳам фарзандлик меҳри куртак отган бўлар эди. Аммо қани у? Бу манзилда на бир сирдошим, на сухбатига шерик қиласидиган тенгдошим бор. Бошимни олиб Узумзорга кетиб қолсаммикан? У ёқда ҳам қайси гўшадан паноҳ топаман? Ҳар кимнинг ўз оиласи, ўз яқинлари, ўз ҳаёти бор. Қайси хонадонга бош суқсан ҳам, уч кунлик меҳмон бўламан. Шу тариқа яна бир умр ёлғизлик гирдо бида яшайман, шўрлик Дўсан девона каби. Шу кўйи бир кун келиб мени ҳам ё телба, ёки девона деб аташлари турган гап..."

Қачон тонг отганини билолмадим. Ёмғир тиниб, паға-паға булуллар сузаётган эди. Чошгоҳ маҳали Ди лобар хола келди-ю, ахволимни кўриб нафаси ичига тушиб кетди. Мен шамоллашга даво бўлармикан деб исериқ тутатаётган эдим.

– Марям, сенга нима бўлди, тобинг йўқми? – деди Ди лобар хола хавотир билан тикилиб. – Қовоқларинг қизарган, лабингга учук ҳам тошганга ўхшайди,вой, бечорагинам-ей. Шу оқшом тушимда сени кўрибман. Оққушларга миниб, учиб юрибсан. Бирам хурсанд эдингки. Бир ёруғлик бўлдимикан, деб сендан хабар олгани келган эдим. Тушимнинг тескари келганини қара. Нима қайнатаяпсан?

– Исириқ.
– Исириқ билан тузалиб бўлар эканми? Шошмай тур, мен ғиз этиб бориб уйдан дори олиб келаман.

Ҳамшира хола, керак эмас, деганимга қарамасдан уйига кетди. Анча вақтдан кейин бир талай дори билан бир коса иссиқ овқат ҳам олиб келди. Икки кунча шамоллашни қувиш билан овора бўлиб ётдим. Кўча эшик тақиллаганда яна жонсарак Ди лобар хола кел гандир, деб ўйладим. Эшик такрор тақиллади. Одатда, ҳамшира хола кўпинча тақиллатмасдан ҳам овоз бе-

риб кириб келаверарди. Ким экан, деб ҳовлига югуриб чиқдим. Эшикдан бир нотаниш киши кирди-ю, мени күриб тақقا тұхтади. Бүй-басты келишган, салобатли кийинган, соchlарию мүйлабига оқ оралаган, күзойнак таққан, құлларида жомадонлари ҳам бор бу хушсурат одамни таниёлмай мен ҳам ҳайрон боқиб турдим. Чамамда, бу одам бизнинг уйга адашиб кириб қолганга үхшарди. У ҳам шундай деб үйлади, менимча ва ортига бурилиб кетмоқчи ҳам бўлди. Кейин бир дам тўхтаб:

- Кечирасиз, адашмасам, Гулшан опа шу уйда яшар эди. Ёки мен ҳовлини адастириб юбордимми? – деди.

- Ҳа, шу уйда яшар эди. Сиз ким бўласиз? – дедим баттар ҳайрон бўлиб.

- Мен... ўша аёлнинг укасиман.

Гўё зулмат ичра чақмоқ чақнагандай бўлди. Қулоқларимга ишонмадим. Ҳаяжондан юрагим тарс ёрилай деди.

- Тоға! – дея чинқириб юбордим. Тоғамнинг кўзларидан ўт чақнаб кетди.

- Сиз... кимсиз? – деди лаблари титраб.

- Мен Марямман, тоға...

- Марям?!

Яна бир лаҳза шу ҳолда турсам, ҳушим бошимдан учиб йиқилар эдим. Чопиб бориб тоғамнинг бағрига отилдим. Бошимдан рўмолим учди. Лойгарчинда оёқяланг турганимни ҳам сезмабман. Тоғамни қучоқлаб олдим. Бутун вужудим кўзёшга айланди. Ёлғизлик мени оч аждардай ютаётганида кимдир мени кутқариб қолаётгандек, зулмат тубига ғарқ бўлаётганимда најот шуъласи милтирагандек жонимга оро кирди. Назаримда, баҳт ҳамиша кутилмаганда келади. Сен уни илҳақ бўлиб ахтарсанг-да, лекин қачон ва қайси томондан келганини билмай қоласан. Тоғамни яна ҳам маҳкам қучоқлаб, иссиқ бағридан узоқлашгим

келмасди. Гүё ҳозир қўйиб юборсам, кўзёшларимнинг шафқатсиз сели мени оқизиб кетиб, кимсасиз жарликларга улоқтириб ташлайдигандек туюларди. Тоғам менинг юзларимга разм солди. Унинг ҳам кўзларидан икки дарё мисоли ёш оқмоқда эди.

– Юзингга нима қилган, Марям? Ким сени бу қўйга солди? – деди у овози қалтираб. Мен индамадим. Гапиролмасдим. Ҳамма умидларим саробга айланди, деб тушкунлик исканжасида ўтирганимда Эъзоз тоғамнинг, мана, мен борман, деб қучоқ очиб кириб келгани боис борлиғимни ўртаган ҳаяжон ҳали-бери босиладиганга ўхшамасди. Тилим калимага келмай, фақат юм-юм йифлар эдим.

– Меҳмонни уйга таклиф қилмайсанми, жиян? – деди тоғам мени йифидан чалғитиш баҳонасида жилмайиб.

Мен шошиб қолдим. Оёғимга илашган лойларни бўсағадаги йиртилавериб, илвираб кетган шолчага арта-арта чопиб уйга кирдим-у, кўрпача ташлаб, дастурхон ёздим. Нон пишириш ҳали эсимга келмаган экан, суви қочган нонни минг истиҳола билан дастурхонга қўйдим. Жондан азиз тоғамни меҳмон қилиш учун дастурхонга қўядиган бундан ортиқ ҳеч нарса йўқлигидан ерга кириб кетай дедим. Кейин ўчиқхонага кириб, чой қайнатишга уннаб кетдим. Ҳаяжоним ҳамон босилмас, бугун қайси кун, қандай кун ўзи, билолмай бошим гангиган, пойқадами билан кўнглимга кутилмаган қувончни ҳадя этган тоғамни, тоғажонимни еру кўкка ишонмаётган эдим. Чой дамлаб олиб киргунимча ғарип дастурхонимиз “очил дастурхон”га айланганини кўриб, довдираб қолдим. Тоғам дастурхонни мен тушимда ҳам кўрмаган неъматлар билан тўлдириб ташлаган эди. Тоғамдан бир зум ҳам узоқлашгим келмасди. У онамнинг сўнгги кунларини сўради. Мен

бу ерда қандай яшаганимиз, нималар рўй берганини оқизмай-томизмай айтиб бердим.

- Аям охирги нафасида сизни албатта келади, деб айтди. Мен бунга унчалик ишонмаган бўлсам ҳам, ўша кунни кутиб яшадим. Аямнинг айтгани рост чиқди, тоғажон.

Тоғам бошини чанглаб оҳурди.

- Ҳаммасига мен айборман. Опамнинг, яхши яшаяпмиз, ҳаловатимиз жойида, биздан хавотир олма, деган гапларига ишониб кетаверган эканман. Демак, ёлғон айтган экан. Икки марта келиб кетдим. Икковида ҳам сени кўрсатмади. “Отаси шаҳарга олиб кетган, отаси узоқ қишлоққа тўйга олиб кетган. Отасининг эрка қизи. Ҳаммадан чиройли, ҳаммадан тўқис қиз бўлган жиянинг. Биз яхши яшаяпмиз” деб мени ишонтириб, жўнатиб юборар эди. Мен гумроҳ шу гапларга ишонибман. Ҳамма сир бу ёқда экан-да. Сени менга бу аҳволда кўрсатишга жазм этмаган. Ҳаётини ҳам ўзгартиришни хоҳламаган. Мени ўйлаб шундай қилган. Опам доим менинг ишимни, олимлик қилишимни ўйларди. Ёлғиз жигарим мени деб ўзини қурбон қиласа-ю, мен унинг асли ҳолини билмай юраверсам, бундай қариндошликтининг, бундай олимликнинг кимга кераги бор? Опамнинг руҳи олдида умрбод қарздорман. Бу қарзимни узмасам бўлмайди. Бўлмаса, тоабад дўзах азобида ёнаман. Сени олиб кетаман, Марям. Мен билан кетасанми?

- Кетаман, тоғажон, албатта, кетаман.

Эъзоз тоғам бир неча кун Боғишодда қолиб, мени олиб кетиш тараддудини кўрди. Ҳар куни ишни онамнинг қабрини зиёрат қилишдан бошларди. Узумзорга, ҳатто шаҳарга ҳам бориб, қандайдир ҳужжатларни олиб келди. Тоғам келган куннинг эртасига уйимизга Соли амаки келди. Ўзи тоғамга онамнинг вафот этганини Соли амаки тоғамнинг Тошкентда ишлаган институтига хат юбориб, маълум қилган экан.

– Чироғим, жигарларингизни эслаб келганингизни эшитиб, баайни бошимиз осмонга етди, – деди Соли амаки Эъзоз тоғам билан саломлашаркан. – Сизнинг жигарларингиз бизнинг ҳам жигарларимиз-да, иншо-оллоҳ. Мана, опангизнинг умри андак қисқароқми-кан, омонатини топшириб қўйди. Энди, бандалик-да, иним. Бу дунёда ҳамма ғанимат. Опангизнинг маъра-ка-мавридларини рисоладагидек ўтказдик, элдан кам қилмадик. Шундай кунда бир корига ярамасак, қачон яраймиз? Булар бизга етти ёт бегона, бўлмаса. Биз са-воб учун юрган одаммиз. Маъракалар кўнгилдагидай бўлмади, деб мархуманинг руҳи чирқирамасин, дедик.

– Соли амаки илмоқ-силмоғи билан шундай гапиради-ки, Эъзоз тоғам бу гапларнинг мағзини чақолмаёт-ганиданми, индамай эшитиб ўтиради. – Нафсиlamри-ни айтганда, бундай урфу одатларнинг ҳаммасига белни боғлаб, чидаб бериш осон эмас. Буларнинг бари сарф-харажат дегани. Лекин элчилик-да. Аксига олиб денг, Шопўлатбой мусофиричиликда юрибди. Адашиб кетмаган бўлса, қайтиб келади. Ҳисобимиз тўғриланиб қолар. Келмаса, мана, сиздай жигарлари бор. Э, одамзод ўлмасин экан. Ўлганидан кейин ташвиши қўпаяркан. Тирик одамнинг юки ўзига, ўлганидан кейин орқаси-да қоладиганларнинг жонига тўзим берсин. Мархуманинг учи, еттиси, йигирмасию қирқи, мулласию гўр-кови, тобуткашию ювгувчиси, ўчоқбоши, қозонқурди, эҳ-ҳе, айтаверсан, эсим оғиб қолади. Биз, бечораларга шунча удумни ўтказиш осонми? Буларнинг қўпини ўт-казиб бўлдик. Энди ҳар ҳафта пайшанбалик келди-кет-дилардан ташқари, олдинда фақат йил оши қолди. Уни ҳам, худо хоҳласа, ҳар бир амалини ўрнига қўйиб, одам-ларни норози қилмасдан ўтказиб оламиз. Сиз билан биздан от билан тую кетармиди? Муллага бир чопон, бир тугун, ёнидагиларга биттадан тугун, яна бир-ик-кита ошпазу ўтинчиларга дегандай, ўтади-кетади. Эл-

чилик-да, элдан чиқиб бирон ёқقا кетармидик. Мана бу ерда ҳамма ҳисоб-китоблар ёзилган, бирровгина күз ташлаб қўйсангиз, ўзингиз дарров тушунасиз, иним.

Соли амаки тоғамга ҳисоб-китоб дафтарини узатди. Ёзувларга диққат билан қараб, тоғамнинг капалағи учди, шекилли, бошини чайқади.

– Шунча сарф-харажатни марҳуманинг тириклигига ўзига берилса, ақлли иш бўлмасмиди, мулла ака? – деди тоғам.

– Э, иним, айтаяпман-ку, ўлган ўлиб кетаверади, ортида қоладиган биз, бечораларга қийин. Қишлоқда тирикчилик ўтказишнинг ўзи бўладими? Бунинг устига эл-улуснинг ўзига яраша урф-одатлари бор. Буларга амал қилмасак, элда бош кўтариб юриб бўладими? Мана, сиз зиёли одам қўринасиз, биз шўрлик қишлоқаҳлининг ҳолимизни тушунсангиз керак, дейман, чироғим. Тағин ўзингиз биласиз, биз, бечораларга осон эмас.

Тоғам йиғлагудек бўлиб гапираётган Соли амакига ачиниб қараб қўйди. Ёнидан бир даста пул чиқариб узатди.

– Мана буни олиб қўйинг, қилган харажатларингиз учун, – деди. Кейин жомадонидан яна бир даста пул чиқариб берди. – Буниси энди бўладиган маъракалар учун.

– Ие, овора бўлиб нима қиласдингиз, ўзимиз ҳам ўтказаверардик-ку маъракаларни. Жуда бўлмаса, Шоппўлатнинг ўзи келганидан кейин бир четини кўтаратарди. – Соли амаки пулларни олиб, қўйнига солди-ю, мамнун жилмайди. – Ҳа, майли, нима ҳам дер эдик, сиздай зиёли одамнинг хайру садақаси табаррук, иним. Бу ёғидан кўнглингиз тўқ бўлсин, йил ошида ўзим юз кило гуруч дамлайман. Одамлар кўриб қўйсин-да, марҳуманинг кимлари бор эканлигини.

Тоғам бошқа гапирмади. Гаплашиб бўлдик, дегандек фотиҳага қўл очди. Шундай қилмаса, Соли амаки ҳали-бери кетадиганга ўхшамасди. Фотиҳа тортилгач, Соли амаки хурсанд қиёфада уйдан чиқди.

Эъзоз тоғам керакли ҳужжатларни тайёрлаб бўлгач, биз иккимиз саҳар чоғи Тошкентга жўнадик. У ерда ҳам яна бир талай ҳужжатларни тўғрилаш учун бир қадрдонининг уйида бир-икки кун қолиб кетдик. Шу кунларда мен остона ҳатлаб кўчага чиқмадим. Тошкентни айлангим келса-да, бу ерни яхши билмаганимдан ташқарига чиқмай ўтиришни маъқул кўрдим. Шу ерда ўтиришнинг ўзи ҳам мен учун завқли эди.

Ниҳоят биз ярим тунда аэропортга йўл олдик. Машинада кетяпмиз-у, ортда қолаётган ранг-баранг чироқлар, баланд бинолар, сийракроқ бўлса-да, зувзув ўтиб турган машиналар кўзларимни қувнатарди. Шу пайтгacha қишлоқдан чиқмаган мендай хонаки қиз учун буларнинг бари худди эртакка ўхшарди. Биз Франкфуртга учадиган самолётга чиқдик. Илюминатордан пастга қарайман. Ҳали учмасимиизданоқ жуда баландда турганга ўхшайман. Ярим кечада бўлишига қарамасдан атроф ёп-ёруғ. Қатор тизилган чироқларга кўз ташлайман. Шуъла сочаётган ҳар бир чироқда онамни кўргандай бўлавераман. Бечора онам. Мен жуда-жуда олисларга кетяпман-у, онам маъюсгина мени кузатиб қолаётганга ўхшайди. Самолёт қўзғалди. Бир зум ерда юрди-ю, кейин шиддат билан осмонга кўтарилиди. У мен соғинган турналар каби қанотларини кенг ёзиб, учиб кетмоқда. Яна пастга қарадим. Милтираган чироқларга тўла бепоён шаҳар ортда қолиб, аста-секин кўринмай кетди. Ўгирилиб тоғамга қарайман. Тоғам кўзларини юмиб олган, ухляяпти чамамда. Гарчи биринчи парвозим бўлса ҳам ҳеч нарсадан кўрқмадим. Энди мен Эъзоз тоғамнинг ёнидаман. У билан ерда ҳам, осмонда ҳам хотиржамман.

О, Европа! Бетакрор гўзаллик ўлкаси. Мен уни шу чоққача фақат харитада кўрганмман. Энди шундоққина

унинг бағрига келиб тушганимга асло ишонгим келмасди. Мен буюк Гёте пойқадами теккан саховатли заминдаман. Эъзоз тоғам анча йиллардан бери Франкфуртда шу ерлик ҳамкаслари билан илмий тажриба устида ишлар экан. Тоғам шу ерда бир озар аёлига уйланган, уларнинг Ширин исмли ширинданд-шакар қизалоғи ҳам бор экан. Келинойимни ҳамма Ҳаёт хоним деб чақирапкан. У ҳам тоғам билан битта илмий иш бүйича ишләётгандыгини йўлдаёқ билиб олган эдим. Тоғамга ўхшаб илмга ўйниган келинойим қандай аёл экан-у, менинг бу ерга келишимни қандай қабул қиласкан, деган хавотир кўнглимга тинчлик бермаётган эди. Аммо келинойимнинг онамга ўхшаб кетадиган рухсорига илк нигоҳим тушгани ҳамон хавотирим тумандай тарқаб кетди. Унинг иссиқ истараси бир қарашдаёқ одамни мафтун қилиб қўяди. Тоғам оиласи билан шаҳар чеккасидаги бир уйда ижарада яшар экан. Биз ўша ҳовлига кириб борганимизда келинойим мени гўё аввалдан танийдигандек кучоқ очиб қарши олди. У кулганда худди офтоб чарақлагандек юзидан нур ёғиларди. “Оҳ, сендан меҳрибон Осиё қуёшининг тафти сезиляпти”, дея у мени бот-бот қучоқларди. Мен келинойимни ҳали йўлдалигимизда ўзимча мутлақо бошқача тасаввур қилган эдим. Сочлари калта қилиб қирқилган, юз-кўзларига ҳар хил бўёқлардан пардоз берган, ҳатто кўпинча шим кийиб юрадиган, ниҳоятда жиддий қиёфадаги аёлни кўз олдимга келтирибман. У эса этаги узун кўйлак кийган, узун қора соchlарини рўмоли остига яширган, қувноқ чехрали оддий аёл бўлиб чиқди. Кўринишидан ўзимизнинг боғишодлик аёлларнинг ўзгинаси дейсиз. У уйга қўлимдан етаклаб олиб кирди. Кенг ва шинам уйнинг ҳар бир деворидан файз ёғилиб тургандек. Деразалар олдига қўйилган бир-биридан чиройли гуллардан хушбўй ислар таралиб турибди. Бу хонадонга қўйган биринчи қадамимданоқ

бегоналик туйғусини заррача ҳам сезмадим. Келинойим мени құярга жой тополмасди. Беш-олти ёшлар чамасидаги жажжи қизалоқ Ширин билан ҳам бир-биримизга дарров үргандик. “Бу қиз аммажонинг Марям бўлади” дея Ҳаёт хоним бизни шундай таништириб қўйдики, қизалоқ менинг атрофимда гирдикапалак бўлиб қолди. Ташқарида қиши ҳавоси-ю, уй ичкариси эса баҳор нафасига тўйинган эди.

Кечқурун овқат тайёрлашга тараффуд кўраётганимизда келинойим: “Келинг, Эъзоз, бугун Марямнинг оиласиз сафини тўлдиргани шарафига ўзбекча қўлбона палов пиширамиз”, – деди. – Сиз тайёрлай қолинг, Эъзоз, мен қанча уринмай, барибир сиздай пишира олмайман”.

– Хўп, десангиз ошни мен пишираман, – дедим.

– Ҳа, тўғри айтасан, Марям, сен пишира қол, – деб тоғам таклифимга қўшилди. – Ош деганларини ростакам эгасининг қўлидан еган маъқул. Кейин дўлмаю котлетларни келинойингга қўйиб берасан.

Шундай қилиб ошни мен тайёрладим. Ўчоқда токпоянинг оловига пишган ош янаем оромижон бўларди-ю, лекин бу ҳовлида ўчоқ ҳам, токпоя ҳам йўқ эдида. Шундай бўлса ҳам ошимиз қўнгилдагидай чиқди.

– Мана, буни ҳақиқий ўзбекча палов деса бўлади, – деди Ҳаёт хоним хурсанд бўлиб.

– Худди мана шу ошни неча йиллардан бери соғининг эдим, – дея ҳузур қилганидан тоғамнинг кўзлари сузилиб кетди.

Жажжи Ширин хонимнинг эса ўртадаги лаганга қўли етмасди. Шунинг учун унга алоҳида тарелкага сузуб бердим. Неча кунлардан бери ўзим ҳам бундай роҳатланиб овқат емаган эдим. Гоҳо иштаҳам йўқ, иштаҳам бўлса ҳафсалам йўқ эди. Ҳозир эса ҳаммаси жойида. Энди мен ўзимнинг жондан азиз яқинларим ёнидаман.

Келинойимни онам билан иккимизнинг Боғишоддаги ҳаётимиз қандай ўтгани қизиқтириб қолди. Дас-

турхон устидаги суҳбатимиз мавзуси шу бўлди. У гапларимни бениҳоя таъсирланиб тинглади. Улар бизни ростдан ҳам ҳеч нарсага зориқмай, тўкис яшайди деб ўйлаб юришар экан. Бор ҳақиқатни билганларидан кейин эса келинойимнинг ҳам, тоғамнинг ҳам кўзларига ёш келди. Сўнг Ширин иккаламиз алламаҳалгача телевизор кўриб ўтиридик. Тоғам билан келинойим бўлса қоғозларга шўнғиб кетишиди. Ширин елкамга бошини қўйиб, ухлаб қолди. Уни ўрнига ётқизиб, телевизорни ўчиридим. Кўшни хонада Эъзоз тоғам билан келинойим ғўнғир-ғўнғир гаплашишарди. Кулогимга чалингган гаплардан англадимки, улар мен ҳақимда гаплашишаётган экан.

– Уларнинг хўрланиб яшашларига мен айборман, – деди тоғам. Унинг овозида йиғи борга ўхшади. – Менниг яккаю ёлғиз опамдан бошқа туғишганим ҳам, қариндошим ҳам бўлмаган. У суюнса, фақат менга суяниши мумкин эди. Мен эса опамдан хабар ололмадим. Унинг, биз яхши яшаяпмиз, бизни ўйлама, деган гапига ишониб юраверибман. У бу гапни менинг тинчгина илм билан шуғулланиб юришим учун айтган. Марям болалигида олов ичидаги қолган. Буни мен шу пайтгача билмаганман. Унинг олдида ҳам гуноҳкорман. Ўз жигарларини хору зорликка ташлаб қўйган укани ким деб аташ мумкин? Энди мен қандай одам бўлдим, Ҳаёт?

– Ўтган ишга саловат, Эъзоз, кўп қайғуриб ўзингизни азоблайверманг. Энди қандай бўлмасин, биргалашиб Марямни даволатиш йўлини излашимиз керак. Бунинг чорасини топамиз деб ўйлайман.

– Ҳа, Ҳаёт, бунинг чорасини, албатта топишимиз шарт. Бўлмаса, умрбод виждан азобида қийналаман.

Эрталаб келинойим роппа-роса ярим соат вақтини менга бағишилади. Сочларимни ювишга кўмаклашди, ўзи қуритиб, турмаклади. Қошлиримни бўяди, юзими ни пардозлади. Ярадор юзимга тикилиб қолганида

күнглим беихтиёр маъюс тортди. У буни дарров пай-қади-ю, жилмайди.

– Сен гўзал қизсан, Марям, – деди келинойим. – Ҳали бу жароҳатни кўрмагандай бўлиб кетасан. Сенинг шундай маликага айланганингни кўрайликки. Фақат кўнглингдаги жароҳатларни ўзинг енга олсанг бўлди.

– Йўқ, келинойи, ташвиш қилманглар. Мен ҳаммасига аллақачон кўникиб кетганман. Бу ярам билан ҳеч кимдан уялмай ҳам қўйганман. Бу ерга сизларни ортиқча овора қилиш учун келганим йўқ. Илтимос, мен учун чалғиманглар. Мен фақат ёлғизликдан зада бўлган эдим. Энди сиз, яқинларимнинг ёнида бўлишнинг ўзи мен учун етарли, бошқа ҳеч нарса керак эмас.

– Сен бундан бўён яқинларингнинг ёнидасан, Марям. Энди бизга ҳақиқатан ҳам яқинлигимизни исботлашимизга имкон берсанг бас.

* * *

Эъзоз тоғам билан келинойим ҳар куни эрталаб ишга кетишар, кейин кун бўйи ишда бўлишар эди. Ширинни яқин атрофдаги бир энага тарбиячига беришган, у бутун кун давомида энага қарамоғида бўлар экан. Мен ҳали бу жойларга бутунлай мослашиб ололмаганим учун ёлғиз қолиш зерикарли эди. Шу сабабдан Ширинга энагадан бир неча кунга таътил олдик. У билан овуниш мароқли эди. Ширин, амма, аммажон, деб чақириб, мени ўйинчоқлари билан кўмиб ташлайди. Бундай шириндан-шакар чақиришлар жонимга хузур бағишлийди. У менинг рўмолимни тортқилаб, ечиб қўйишимни сўрайди. Мен эса, рўмолимни ечсан совқотиб қоламан, деб уни ишонтираман. Яхшиям, ўзим билан бир талай китобларни олиб келган эканман. Шириннинг бийрон-бийрон саволларига жавоб топишга қийналган кезларимда ўша китобларни ўқиб бераман. Шунда такрор ўқиётганим бу китоблардан

ўзим ҳам завқланаман, Шириң ҳам жон қулоғи билан тинглайди. Үнга ҳаммасидан ҳам “Ёрилтош” эртаги ёқиб қолди.

– Амма, мен ҳам тош олдига бориб, ёрил, десам тош ёриладими? – деди у чаросдек күзлари порлаб.

– Тош фақат эзилган, дардларга күмилган одамлар учун ёрилиб, бағридан жой беради. Жажжи асалымнинг қандай дардлари бор экан? Сен, ёрил, десанг менинг ўзим ёрилиб құя қоламан, жоним, – дейман унинг оппоққина, лўппи юзларидан ўпиб.

Шириңнинг ранг-баранг суратли китоблари кўп эди. Бу китобларни ҳам варақлаб, кўп нарсаларни ўрганамиз. Уларнинг баъзилари немис тилида бўлса, баъзилари инглиз тилида ёзилган. Энага Маргарет хоним, таътил сўраган бўлсак-да, кунора вақт топиб келиб, Шириңнинг нималар билан машғул бўлаётганидан хабар олиб кетишни канда қилмайди. У гоҳ не-мисча сўзлар, гоҳ инглиз тилида гапиради. Менинг ҳар икки тилда ҳам у билан гаплаша олишимни билганидан кейин суҳбатимиз қовушиб кетди. Ўта босиқ ва мулојим бу аёл билан суҳбатлашиб ўтириш ёқимли эди. Унинг баҳонасида мен иккала тилда яна ҳам равон гаплашишни ўргана бордим.

– Нега доим юзингизни ўраб-чирмаб юрасиз ёки бу сизларда урф-одатми? – деди у бир куни гап орасида.

– Рўмол ўраш бизда одат ҳам ҳисобланади. Лекин... аниқроғи, бу менинг мажруҳлигимни бекитиб туради, хоним, – дея қисматимдан бир лавҳани айтиб бердим.

– Уни яшириш эмас, операция қилиш керак, Марям. Хайриятки, бу ҳозирги пайтда унчалик мураккаб иш эмас. Ҳатто билишимча, соппа-соғ одамлар ҳам ўз ҳаваслари учун баъзан қиёфаларини ўзгартириб юришади, – деди Маргарет хоним маслаҳат бериб.

Ҳар куни тоғам билан келинойимнинг ишдан келишига Шириң икковимиз тотлигина таом билан

турли пишириқлар ҳозирлаб қўямиз. Булар, албатта, ўзбекча таомлар ва Нурия опанинг ўқувхонасида ўрганган ширинликлар бўлади. Икковлари ҳам овқатни еб чарчоқлари чиқиб кетганини айтиб мақташади.

– Кўлинг бирам ширин эканки, Марям, мен ҳам шулярнинг ҳаммасини сендан ўрганиб олиш учун вақт ажратмасам бўлмайди. Ишга берилиб кетиб, бекалик вазифаларимни унутиб қўйганимни энди англайпман. Аслида аёл киши рўзғорни кўпроқ ўйлаши керак, – деди келинойим.

Кечки овқатдан кейин келинойим билан ярим соатча суҳбатлашиб ўтириш бизнинг кундалик одатимизга айланди. Тоғам эса дарров қофозу китобларига мук тушарди.

– Сен Эъзоз тоғандан хафа бўлма, Марям. У фақат дастурхон ёнида суҳбатлашишга вақт топади, холос, – деди келинойим. – Биз бу ерлик ҳамкаслар билан бир илмий лойиҳа устида биргаликда ишлайпмиз. Шу ишни тезроқ якунлаб олсак, кейин Тошкентга қайтамиз. Шуннинг учун кечаю қундуз ишлашимизга тўғри келади.

Келинойим ҳам компьютер рўпарасига ўтириб олиб, кўп нарсаларни ёзиб-чизади. Шу ишлар орасида мен учун ҳам жон қуидиради. Бир неча шифохоналар билан интернет ёрдамида гаплашди. “Ҳаммаси қандай бўлса, шундайлигича қолаверсин. Сизларни овора қилишни истамайман” дейишимга қарамасдан менинг бир нечта суратларимни докторларга юборди. Улардан қандайдир маслаҳатлар ҳам олиб турди. Лекин нима гаплар бўлаётганини менга тўлиқ айтиб бермасди. “Ҳадемай ҳаммаси яхши бўлади” деб нафис табассум билан кўнглимни кўтарувчи сўзларни айтарди, холос.

Бир куни келинойим айни чошгоҳ маҳали ишдан келди. Одатда у бундай вақтда ишда бўлиши керак эди. Мен Маргарет хоним билан бирга уйимиз яқинидаги хиёбонда Ширинни сайр қилдириб юрган эдим.

Кечагина қор ёғиб ўтган бўлса-да, ҳаво илиқ эди. Келинойим тезда қалинроқ кийиниб чиқишим зарурлигини, қайсиdir докторнинг қабулига ёздириб қўйганини айтди. Кейин биз таксида шаҳар ичкарисига кириб бордик. Айтилган манзилга етганимиздан сўнг, унчалик катта бўлмаган бир шифохонага кирдик. Келинойим докторни топиб гаплашди. Ўша доктор яна бир ҳамкасби билан менинг эски жароҳатларими ни синчилаб қўздан кечирди. Бир нечта ускуналар билан текширишди. Компьютердан нималарнидир кўришди. Сўнгра маслаҳатлашиш учун ўзларининг хонасига кетишди. Маслаҳатга келинойимни ҳам чақиришди. Анчагина вақтдан кейин келинойим мамнун жилмайиб қайтиб келди. “Ҳамма ишлар биз хоҳлаганимиздай силжияпти. Насиб этса, даволанишга киришамиз, фақат байрамдан кейин”, – деди у. Олдинда янги йил байрами яқинлашиб келаётган эди.

Янги йилни кутиб оладиган кунимиз Эъзоз тоғам ҳаммамизни шаҳар марказидаги байрамлар майдонига олиб борди. Боягина учқунлаб турган қор майдонга етганимизда капалак қорга айланди. Ранг-баранг ўйинчоқлару чироқлар билан безатилган улкан арча атрофи одамлар билан гавжум эди. Улар ҳар хил тилларда гаплашишар, лекин юзларига балқиб чиқсан шодликлари бир хил эди. Бутун майдон узра чироқлар порлар, ҳамон ёғаётган қор парчалари чироқлар шульласида учиб ўйнаётган капалакларга ўхшарди. Чанаси қўш отга бойланган қорбобо билан қорқиз (бу ерликлар уларни бошқача аташар экан) майдон бўйлаб айланиб, ҳаммага совғалар улашишар, одамлар жўр бўлишиб, қувноқ қўшиқ куйлашар, рақсга тушишар, тинмай мушаклар отиларди. Ҳеч ким бегонасирамас, ҳамма аввал-азалдан қадрдондек бир-бирларини кутлашар, арча атрофида бир-бирларининг қўлларидан ушлаб, давра қуришарди. Мен чинакамига эртаклар

мамлакатига тушиб қолган каби байрам шукухидан сармаст бўлиб, уларни ҳайрат билан кузатардим. Назаримда, бу ерда фақат баҳтли одамлар яшайдигандек, ҳеч бирининг ҳаётида ғам-ғуссаю ғубор йўқдек эди. Биз паға-паға ёғаётган қор остида майдонда сайр қилдик. Янги йил бонги чалинишига бир соатча қолганда уйга келдик. Байрамнинг қолганини иссиққина ижара уйимизда давом эттиридик. Ширин икковимиз завқимиз ичимизга сифмай ҳовлида қорбўрон ўйнадик. Тоғам билан келинойим бизнинг қийқиришларимизни кузатиб, шавқ билан кулишарди. Кўчадан байрам қилаётган одамларнинг тантанали овозлари эшитилиб турибди. Кейин бутун оила байрамга атаб безатилган дастурхон атрофига жам бўлдик. Янги йил кирганини эслатувчи бонг чалингдан ҳаммамиз ўрнимиздан туриб, чапак чалдик. Бир-биримизни табриклидик. Ташқарида одамларнинг қувонч тўла ҳайқириқлари яна ҳам авж олди. Кетма-кет отилаётган турфа ранг мушакларнинг фараҳбахш ёғдуси дебраза оша аввал уйимизга, сўнг юракларимизга кирди. Мен янги йилни умримда биринчи бор шундай кутиб олмоқда эдим. Бизнинг Боғишодда ҳеч қачон улкан арча безатилмаган. Уйимизга ҳам байрам шодлиги деярли кирмаган. Ҳар доим онам икковимиз ғаригина дастурхон тузаб, жимгина янги йилни кутиб олганмиз ва шуни ўзимизча байрам ҳисоблаганмиз. Ўша кунлар эсимга тушди-ю, кўнглим тўлиб, кўзларимдан дарёдай тошиб чиқсан ёшни бекитолмадим.

– Нега йиғлајасан, Марям? – дея келинойим мени кучоқлаб олди.

– Бу – шодликдан. Илгари ҳеч қачон бунчалар завқ-қа тўла мўъжизавий оқшомни кўрмаган эдим. Ҳали уни бир неча кунлар ҳазм қилолмай юрсам керак.

Ҳаммалари кулиб юбориши. Эъзоз тоғам кулаётган бўлса ҳам, кўзларида икки томчи ёш милтираб

туради. Келинойим қўлларимиздан тортиб, ўйнамаганимизга қўймади.

– Бугун байрам, – деди у кўзларида қувонч чақнаб, – ҳамма андуҳларимизни бекитиб, янги йилга яшнаб турган юзларимизни тутайлик. Кейин йил бўйи шодликка тўла кунлар бизни қарши олади.

Биз тонг отгунча базм қилдик.

Раббим, мендай ожиз бандангга шундай саодатли кунларни ҳам раво қўрганингга агадул-абад шукроналарим бўлсин!

* * *

Янги йилнинг илк ҳафтасида келинойим таътилга чиқди. “Озгина ҳордик чиқармасам, ўзим ҳам лабораториянинг бир буюмига айланиб қоладиганга ўхшайман”, – дея кулди у. Лекин биламан, у таътилни мени деб олган. Бечора келинойимнинг ишларига халақит бердим, деб хижолат бўлганим-бўлган. Бироқ у бир ишга киришдими, охирига етказмасдан тинчимайдиганлар хилидан эди. Келинойим мен учун елиб-югурди. Кунора докторнинг ҳузурига маслаҳатга бориб турдик. Ҳар гал у ердан қайтишда бирозгина шаҳар айланардик. Қаҳважоналарга кириб, иссиққина қаҳва ичиб дам олардик.

Доктор охирги хulosаларини тайёрлаб, бизга бир талай қофозларни берди. Унинг тавсияси билан келинойим иккимиз Мюнхенга жўнадик. Минг бир хаёлларни ўйлаб, юрагим ҳадикдан титрарди. Шу даҳмазаларнинг ўзи менга кераги бормиди, деб ўзимни коийман. Кўнглимдан кечётган гапларни келинойим дарров уқиб оларди. “Сен мутлақо хавотирга тушма, мен ҳар дақиқа ёнингда бўламан”, – дерди у. Мюнхендаги шифохонада бизни соч-соқоли қордай оппоқ нуроний доктор қабул қилди. Унинг юзи жиддий, нигоҳи эса совуқ туюлди. Келинойим у билан гаплашиб, менинг туриш-турмушимни, ҳозирги аҳволимни обдон

тушунтириди. Франкфуртдаги доктор ҳам у билан анчагина маслаҳатлашган, кўпгина гаплардан хабардор қилган экан, сухбат чоғида билиб олдим. Доктор мени ўзининг гапларига тушунмаяпти, деб ўйлади чамамда, аммо мен барини тушуниб турадим.

– Унга айтинг, курсига ётсин, – деди доктор келинойимга қараб.

– Қандай гапингиз бўлса, ўзимга буюраверинг, доктор, – дедим унинг тилида. Доктор ажаблангандек бир менга, бир келинойимга қаради ва жилмайиб қўйди.

– Операциядан қўрқмайсанми, қизалоқ? – деди у мулоийимлик билан.

– Мен бу ерларга жуда ҳам олисдан келдим, муҳтарам доктор. Шу ергача келибманми, энди довдирашнинг ҳожати қолмаган бўлса керак, деб ўйлайман. Аввало, жонимнинг эгаси – яратган Эгамга, кейин сизга ишониб, таваккал қилишга жазм этишим керак. Ҳаётимда ниманидир ўзгартироқчи эканман, ҳар қандай оқибатга тайёр туришдан ўзга иложим ҳам йўқ, – дедим шу лаҳзада ўзимда ғайриоддий дадилликни сезиб.

– Баракалла, операция столига ётган беморнинг қўрқувни енгиши – бизнинг ишимизнинг деярли ярми битди, деган гап.

Юрагимдаги кечмишларнинг ҳаммаси операция куни аён бўлди. Мен сиртдан ўзимни қанчалик жасоратли қилиб кўрсатмайин, жарроҳлик курсисига ётганимда ичимда қўрқув ҳукмронлик қилаётганини ҳис этдим. Бечора келинойим, ўзини унутиб, мени кўпроқ ўйлаяпти. Тинмай елиб-югурди, ҳозир жон, деса жонини беришга ҳам тайёр. Бу шаҳарга келган кунимиз шифохонага яқин жойдаги меҳмонхонага жойлашган эдик. Ҳозир ўша ердан шифохонага қатнаб турибди. Кунни гоҳ палатада – менинг ёнимда, гоҳ шифохона йўлагида ўтказади. Операция бошланаётганда ҳам

ойна ортидан кўз узмай қараб турди. Ҳар доим қулиб турадиган чехрасида хавотир зоҳир бўлган, кафтларини маҳкам сиқиб, Худога илтижо қилаётганини пайқадим. Мен унинг қиёфасида онамни кўриб турардим. Жарроҳлар ўз ишларини бошлаганларида ҳам хаёлимда фақат онам бўлди. Эҳтимол, ҳозир шу ердан тўппа-тўғри онамнинг ёнига борарман, дея ўйладим. Жароҳатим буткул тузалишига, бирор яхши ўзгариш бўлишига ишонмаётганимдан ўзим хафа бўлиб кетдим. Шу ишга рози бўлиб тўғри қилдимми? Тоғам мени олиб кетаётганида операция ҳақида лом-мим демаган эди-ку. Ҳаммаси ўз ҳолича қолаверса, нима бўларди? Қишлоқда қолаверсам бўлмасмиди? Қариндошларим яқин вақтларда Тошкентга кетамиз, дейишяпти, кеъин тез-тез кўришиб тураверардик. Ахир, Боғишоддагилар менинг бор афт-ангоримга ўрганиб кетишган, мен ҳам кўнишиб қолган эдим. Шундай давом этаверганида ҳам бунинг нимаси ёмон? Оҳ, Боғишодни, у ердаги ўзим кўрган ва билган одамларни соғиндим. Ҳозир айни қиши. Кимсасиз қолган уйимиз печка ёқилмаганидан музлаб кетгандир. Ҳовлимиздаги қорлар куралмай қолган. Ҳар куни супадаги ушоқларни териб ейдиган мусичалар муз қотган ўрик шоҳларига қўниб, эшиги очилмаётган уйимизга ҳайрон қарашаётган бўлса керак. Сойимиз яхши, суви шарқираб оқишдан тўхтамайди. Аммо ҳозир унда итбалиқлар йўқ. Ҳозироқ, шу лаҳзада дунё бир айланиб, болалик қунларимга қайтиб қолсам. Ёзнинг иссиқ кунларини сойда ўтказаётган бўлсам. Бу пайтда итбалиқлар кўп бўлади. Албатта, Анорни кўраман. Унга итбалиқларни ушлаб бераман. У хурсанд бўлади. Унинг хурсандлигини кўрсам, менинг ҳам дилим чоғ бўлади. Мана, докторлар ишга киришишди. Уларнинг темир асбоблари қулоғим остида шарақ-шуруқ товуш чиқарайпти. Майли, бўлар

иш бўлди, бир уриниб кўришсин. Операция яхши чиқмаса ҳам, бирон бир ўзгариш қила олишмаса ҳам хафа бўлмайман. Тоғамдан ҳам, келинойимдан ҳам, мана бу жон койитаётган докторлардан ҳам мингдан-минг розиман – кўнглимга таскин берганлари, мени инсон деб эъзозлаганлари учун ҳам.

Операция қандай ўтгани, қанча давом этганини билолмадим. Чамамда, мен ғордаги айиқ сингари узоқ уйқуга кетган эдим. Балки, бир неча кун, ҳатто бир неча ой ухлагандирман. Юз-кўзларим боғлаб ташланган. Аввалига, боқий оламга келдиммикан, деб ўйладим. Кўлларим билан атрофимни пайпаслаб кўриб, ҳали бу дунёда эканлигимни билдим. Кўлимни ушлаган кўлларнинг тафтини сездим, бу келинойимнинг меҳрибон қўллари. Уни сира адаштиришим мумкин эмас. У унсиз йиғлаётган эди. Буни кўрмаётган бўлсам-да, билинар-билинмас титраётган қўлларидан сезиб турибман. Кейин у менга овқат берди. Мен оғизимни қўмирлатишга қўрқардим. Юзимда, танамнинг бошқа жойларидаги эски жароҳатларим ўрнида ҳам оғриқ сезилаётган эди. Қачон тонг отиб, қачон кун ботаётганини билмасдим. Келинойим ёнимда ўтириб, кундан-кунга яхши бўлаётганини, докторлар шундай деб тушунтиришганини айтиб турарди.

Ниҳоят юзимдаги боғламлар ечилган куни қаршিমда нуроний докторни кўрдим. Унинг мовий кўзларида хурсандлик аломатлари бор эди. У ҳали ўзими ни уринтирмаслигимни, юзимга қўл теккизмаслигимни тайинлаб, қандайдир хушбўй исли дорини суртиб, юзимга ниқоб ёпиб қўйди. Яна бир неча кун шу ерда ётдим. Хайриятки, энди ёруғ дунёни кўриб турардим. Доктор ҳар куни кириб муолажа қиласар, юзимдаги оғриқлар кундан-кунга пасайиб бормоқда эди. Бир куни доктор одатдагидай ёнимга ўтириб, ниқобни олди ва юзимга узоқ тикилиб турди. Менинг хаво-

тирли хаёлларга чўма бошлаганимни кўриб, мамнун жилмайганча чиқиб кетди. Кейин келинойим кирди. У менга яқинроқ келиб, юзимга қаттиқ тикилди. Ёнимга чўккалаб, кўлимни кафтлари орасига олди. Кўзларидан тирқираб ёш оқди. Лекин бир сўз демасди. Юрагимни баттар қўрқув қамради. У қўлимдан тортиб ўрнимдан турғизди. Палатадан чиқиб, йўлак майдончасидаги ойна олдига етаклади. Мен кўзларимни чирт юмиб олдим. Ойна олдига боргим келмасди. Келинойим эса етаклаб бораверди. “Агар операция яхши чиқмаган бўлса нима қиласман? Яна дард устига чипқон бўлади-да. Шунча оворагарчилик, сарф-харажат, вақт увол кетади. Буларнинг ҳаммасига ўзим айборман, деб ич-этимни еб адо бўламан” дея ўйлардим. “Қани, гўзаллик маликаси, кўзингни оч”, – деди келинойим, ойна олдида тўхтаганимиздан сўнг. Мен азбаройи кўрқанимдан ойнага тескари ўгирилиб кўзимни очдим. Келинойим елкамдан қучиб, юзимни ойнага қаратди. У ерда менга нотаниш бўлган бир қиз турарди. Унинг ёнида келинойим турганини билгач, бу қиз ўзим эканлигимни тушундим. Нималар рўй берадётганини англаёлмай бошим айланар, хаёлларим оний лаҳзада бутун оламни кезиб чиқаётган эди. Келинойимни қаттиқ қучиб, йиғлаб юбордим. Икковимиз ҳам кўз ёшларимизни тиёлмас эдик. Кейин докторнинг хонасига бордик.

– Доктор, ахир, бу мўъжиза-ку, – деди келинойим қувончини яширолмай. – Сиз чинакам сеҳргарсиз.Faқат сеҳргарлар мўъжиза яратса олади.

– Хоним, балки бу сизга ростдан ҳам мўъжизадек туюлаётгандир, аммо мен шунчаки ўз вазифамни бајардим, холос, – деди нуроний доктор худди ҳеч иш қиласмандай хотиржамлик билан.

Уйга қайтганимизда Ширин мени таниёлмай бир зум бегонасираб турди. “Аммангман, жоним, ўзинг-

нинг аммажонингман” деб қучганимдан сўнг овозимдан таниб, ёнимдан жилмай қолди. Эъзоз тоғам мени қучиб йиғлади, қувонди, кулди. Кейин келинойимга қараб: “Сен ростдан ҳам одамларга ҳаёт улашувчи меҳригиёсан, Ҳаёт. Сендан миннатдорман”, – деди.

Тангрим, одамларнинг жамики яхши амаллари учун мукофотинг борлигига имон келтираман!

* * *

Энди кўзгуга қарашдан сира-сира қўрқмайман. Ҳатто кўзгу менинг энг кўп дийдорлашадиган сирдошиму суҳбатдошим бўлиб қолди. Неча йиллар у билан бегоналашиб юрдим. Гоҳ-гоҳ қарасам ҳам, шунчаки узоқроқдан кўз ташлаб қўярдим. Ҳозир ўша айрилиқда ўтган кунларнинг ҳиссасини чиқариб олаётган-декман. Эрталаб уйғонишим билан ойна олдига бораман. Юзимга, соchlаримга, бўй-бастимга разм соламан. Бет-қўлларимни юваётиб ҳам ундан нигоҳимни олмайман. Вақти-вақти билан доктор тавсия қилган дориларни жароҳатдан халос бўлган юзимга суриб, сўнгра ўзимга ҳафсала билан оро бераман.

– Бизнинг маликамиз энди кўзгудан бошқа ҳеч ким билан гаплашмайдилар, – дея ҳазиллашади келинойим.

– Узр, келинойи, узоқ вақтлардан бери ойнани соғиниб қолган эканман. Ростдан ҳам энди у билан суҳбатимиз роса мароқли кечяпти, – дейман шўхлигим тутиб.

– Ойнанинг омади бор экан, ҳусну латофатда тенинг йўқ жиянимни ўзига ром этиб олибди, – деб ҳазилимизга Эъзоз тоғам ҳам қўшилади.

Менинг юриш-туришимга эътибор бериш келинойимнинг кундалик энг муҳим ишлари қаторидан жой олган қўринади. У дам олиш кунлари мени шаҳар бўйлаб айлантирди. Дўконларга кирдик. У ердан мен Ширинга мос келадиган нарсаларни ахтардим. Ке-

линойим бўлса, менга мос нарсаларни қидираётган экан. У, қиммат бўлса ҳам, менга атаб чиройли қўйлакларни, бир неча рангдаги пойабзалларни, ҳатто мўйнали палто ҳам харид қилди. Мен яқинларимнинг меҳрибонликларидан ортиқча талтайиб кетмаяпманми, деб хижолат тортаётган эдим. “Тортинма, сен буларнинг барига муносибсан. Энди ҳамма нарсанг ҳусни жамолингу қадди-қоматингга мос бўлиши керак” деб келинойим менга далда берарди. Кейин гўзаллик пардоҳонасиға олиб борди. Сартарош қиз соchlаримни кийимларимга мос қилиб турмаклади. Оҳ, бечора соchlарим, неча йиллар рўмол остида патақдай бўлиб биқиниб ётган эди. Мана, улар чимматдан қутулган Шарқ аёллари сингари яйраб нафас олишмоқда. Зулматга маҳкум этилган шу шўрлик соchlар тонг маҳали шарқираган шаршарадек жилваланар экан-ку. Мен ҳамон ўз-ўзимни таниёлмай қийналардим. Хаёлимда ўзимни бошқа вужудда кўраётгандекман. Аввалги вужудим армон билан омонатини топширган-у, мен қайтадан туғилиб, ўзга вужудда пайдо бўлиб қолганга ўхшайман.

– Сиз кундан-кунга мафтункор бўлиб кетяпсиз, Мария, – деди Маргарет хоним уйимизга келганида. – Сизга жудаям ҳавасим келяпти. Бундай жозибали қоматни ҳушёрик билан сақлаш керак.

У менга сумкани қандай тутиш, баландроқ пошнали пойабзал кийганда қандай қадам ташлаш, қоматни қай тарзда тик тутиб юриш ҳақида эринмасдан сабоқ бера бошлади. Бундай ҳаракатлар менга қандайдир эриш туюлса-да, аммо унинг айтганларини қилганимдан кейин қаддим кўтарилиб, ўзимни яна ҳам дадил тутаётганимни сездим.

Баҳорнинг илиқ кунлари бошланганда дам олиш учун оиласиз билан Парижга отландик. Бир кун келиб бу оғатижон шаҳарга пойқадамим етишини хаёлимга ҳам келтирмаганман, тушимга ҳам кирмаган. Бу

бус-бутун мўъжиза. Аслида бизнинг Боғишодимиз қаёқда-ю, Париж қаерда. Ҳали ўзимизнинг Самарқандни бориб кўролмаган мендай қизнинг Париж кўчаларида юриши афсонанинг ўзгинаси. Бу шаҳарнинг рамзига айланган кўхна минора ёнига борганимизда Ширин икковимиз хумордан чиққунча ўйнадик. Болалигимда армон бўлиб қолган тўптош ўйинини Ширинга ўргатмоқчи эдим. Эҳ-ҳе, бу озода шаҳарда беш-ўнтача майдатошни топиш ҳам даргумон экан. Кейин Эйфел минораси ёнида роса суратларга тушдик. Истироҳат боғига борганимизда ҳам бир дунё суратга тушдик. Энди мен сураткашнинг мажбурлашини кутиб ўтирасдан, ўз ихтиёrim билан суратга тушишни жуда-жуда хоҳлаётган эдим. Тоғамни, келинойимни, Ширинни қучиб тушдим. Яқинларинг билан завққа тўлиб яшаш қандай мароқли. Ширин ҳайвонот боғига боришни истади. Тоғам жон деб бизни у ерга олиб борди. Ҳайвонот боғининг манзараси беҳад гўзал эди. Ҳали дов-дараҳтлар уйғонгач, яна ҳам бошқача бўлиб кетса керак. Одамлар гавжум эди. Ҳар ким ўзига ёққан жонивор олдида тўхтаб, томоша қилмоқда. Ширин ойнаванд қафасга солинган маймунлар қаршисида туриб, қиқирлаб кулмоқда эди. Мен эса бу бечораларни томоша қилишни истамасдим, ҳатто ойнажомлар ичида бамайлихотир сузиб юрган турфа ранг балиқларни ҳам. Уларга қарасам, бир пайлар мени одамлар қандай томоша қилганлари, кимдир ачиниб, кимдир ижирғаниб қарагани, бундай қарашлардан хўрлигим келиб, юрагим зада бўлгани ёдимга тушаверди.

– Маряям, нега маъюс бўлиб қолдинг? Сенга бу ер ёқмадими? – деди келинойим аҳволимни дарров илғаб.

– Шунчаки, мен бундай томошаларни унчалик хушламайман, – дедим. Лекин Шириннинг қувончу ҳайратига халақит бергим келмасди.

Париждаги икки кунлик саёчтимизда жонли эртаклар ичида яшагандек бўлдим. У ерда тушган суратларимизни томоша қилиб тўймайман. Франкфуртга қайтганимиздан кейин ҳам суратлар солинган албомни ёстиғим ёнига қўйиб ётадиган бўлдим.

Тоғам билан келинойимнинг бу ердаги ишлари якунлангунча яна икки йилдан ортиқроқ вақт ўтди. Мен бу пайтда нон маҳсулотлари цехида ишладим. Биз шундай лаззатли нонлар, ширинликлар тайёрлар эдикки, ҳатто ҳидидан маст бўлиш мумкин эди. Бу ерда ҳамма нарса муҳайё. Вақтида ишлаб, вақтида дам оламан. Дам олиш кунлари ҳордиқ чиқарай десам, дўконлар, театрлар, боғлар – ҳаммаси бор. Қиш учун ўтин ғамлаш, хамир қориш учун қоп орқалаб тегирмонга бориш каби ташвишлар йўқ. Аммо шундай бўлса ҳам, негадир Боғишодни соғиндим. Ғарибина ҳовлимиз, онам иккимиз нон ёпган тандир, ёзда итбалиқлари кўп бўладиган сойимиз – бари-барини кўргим кела-верди. Тошкентга қайтадиган кунимиз яқинлашгани сари соғинчдан юрагим баттар орзиқиб кетаверди.

* * *

– Марям, агар қишлоқни шунчалик соғинган экансан, майли, бориб бир хумордан чиққунча айланиб кел, – деди Эъзоз тоғам Тошкентга келганимиздан сўнг. – Тушунаман, ҳар ҳолда, ўзинг катта бўлган жой, дўст-қадрдонларинг бордир. Мен сен билан бирга бориб келаман. Сенинг баҳонангда қишлоқ ҳавосидан нафас оламан.

– Йўқ, тоға, сизни бошқа овора қилишни хоҳламайман. Ўзим бора оламан.

– Ундай бўлса, ўзинг биласан, лекин у ерда узоқ қолиб кетмассан деб ўйлайман. Тезроқ қайтиб келишинг керак. Биз бир оиласиз, энди бу ерда бирга яшаймиз.

– Ўйлаб қўраман, аввал бориб кўрай, уйимизни жуда соғиндим.

– Барибир сени ёлғиз юборолмаймиз, Марям. Балки, мени ҳамроҳ қилиб оларсан? – деди келинойим.

– Ўзимнинг меҳрибон келинайижоним-ей, мени бўри ермиди? Кап-катта одамман. Мабодо Боғишодда қолиб кетадиган бўлсам ҳам, сизларни хабардор қила-ман. Мен, албаттa келаман. Ҳали ўқишга тайёрланишм керак, университетга кирмоқчиман.

– Буни яхши ўйлабсан,унда тезда бор-у, қайт.

Автобусда кетяпман-у, Боғишодга яқинлашгани-миз сайин юрагим тез-тез ура бошлади. Қирларни қоплаган ям-яшил майсаларнинг исларини туйган-дай бўляяпман. Қизғалдоқлар очилганидан қип-қи-зил тусга кирган адирларга қараб, кўзим қувнайди. Тупроқ ўйлли кўчамизни ҳам, деворлари ёмғирлардан нураган уйимизни ҳам, ҳозир айни қийғос гуллаган ўрикларимизни ҳам тезроқ кўргим келаётпти. Ҳатто мени ўйинларига қўшмаган қизларни ҳам узоқдан бўлса-да, кўришни хоҳляяпман. Майли, мени яккалашса ҳам, инсон қаторига қўшишмаса ҳам, барибир уларни қаттиқ соғинаяпман.

Кўча эшигимиз негадир очиқ қолибди. Кетаётганимизда мен унга қулф осиб қўйган эдим. Ҳовли ҳам супурилган. Лекин қолган ҳаммаси жой-жойида турибди, айтарли ҳеч нарса ўзгармаган. Ҳовлимизни ўраб турган деворлар яна бироз нурабди, бироқ хайрият, қуламабди. Сомонхона деворидаги ўша даҳшатли алангадан қолган қора доғлар ҳамон ўчмаган, худди юрагимдаги доғ каби сақланиб турибди. Шу қора куя ҳар доимгидек яна қўрқинчли кунни, бечора му-шукчаларни эсимга солди. Улар жудаям чиройли ва буткул ҳимоясиз эди. Шуларни эслаб, бир дам ҳовли ўртасида серрайиб қолдим. Ичкаридан чиққан ёшгина жувон хаёлимни бўлди.

– Келинг, сизга бирон ким керакми? – деди у янги, гулдор рўмолини тўғрилаб. Эгнидаги атлас кўйлагу пойчаси ўзига ярашиб турган эди.

– Мен шу уйда яшайман... тўғрироғи, яшар эдим, – дедим бу жувонни таниёлмай ҳайрон бўлиб. У гапимдан ажабланди.

– Сиз адашиб кириб қолганга ўхшайсиз. Мен келин бўлиб тушганимдан бери шу ерда яшаймиз, бу бизнинг уйимиз.

Ҳеч нарсага тушунолмай, бошим гангиб қолди. Ошхона томондан бир одам кўринди, биз томонга қараб аста-аста қадам ташлаб келаверди. Аввалига бу одамнинг кимлигини билолмадим, чуқурроқ разм согланимдан кейин отамни танидим. Сочларининг ярми оқариб, ярми тўқилган, юзлари сўлғин, қошлари ўсан, манглайнини шудгор қилингандай ажин босган, қадди букилган, бутунлай абгор аҳволда эди. Ҳаммага кўрсатиб қўяман, деб олисга кетган бу одамнинг ўзи ҳамма кўргиликларни кўриб келганга ўхшайди. У мени танимаганидан яқинроқ келиб, хира тортган кўзларини қисиб қаради. Жувон эса югуриб уйга кириб кетди.

– Сизга ким керак? – деди отам хаста овозда.
– Мен... Маряман, – дедим бўшашиб.
– Марям? – отам таърифлаб бўлмас даражада ҳайратга тушди. Атрофга аланглади, юзимга қайта-қайта тикилди. – Ахир, сен...

– Ҳа, мен бошқача эдим, энди бошқа қиз бўлиб келдим. Дунёда шундай мўъжизалар ҳам бўлар экан, ота, – дедим ниҳоят, ўзимни қўлга олиб.

– Сен қаерларда юрган эдинг?
– Сиздан ҳам олисларда. Мана, қайтиб келдим. Лекин менинг қайтишим сизникидан бошқачароқ бўлган кўринади.

Бояги аёл яна уйдан ҳовлиқиб чиқди. Унинг ортидан уйқусираган Донабой кўринди. У қовоқларини уқалаб, менга яқинлашиб келди.

– Ким экан, нима иши бор экан? – деди у кўзларини очолмай, отамга қараб.

- Марям экан, – дея отам йўталиб жавоб берди.
- Нима? – Донабойнинг кўзлари катта-катта очилди.

Мен ҳам унга ҳайрон бўлиб қарамоқда эдим. Энди у аввалги отасига думдек эргашиб юрадиган Дониш эмас, бинойидай одам бўлиб қолибди. Фақат бурни остидаги икки ирмоқ ҳамон тўхтамабди, чамамда. Уйга кирганимиздан кейин Донишдан ҳамма гапни билиб олдим. Отам мусоғирчиликдан қайтиб келганидан сўнг қарзларини тўлай олмай, Соли амакига уйимизни бериб қутулибди. Соли амаки Донабойни уйлантириб, шу уйга жойлаштирибди. Отам эса ўчоқхонамиз орқасидаги туршак, буғдой сингари нарсалар сақланадиган ертўлани оз-моз саранжомлаб, ўша ерда яшаётган экан.

– Сен ҳам бемалол биз билан яшайвер, – деди Донабой уйнинг хўжайини энди ўзи эканлигини билдириб кўяётгандек. – Қиз боласан, барибир, ҳадемай эрга тегиб кетасан. Жудаям ўзгариб кетибсан, бу кўринишингда бозоринг чаққон бўлади-ёв.

Мен ҳеч нарсага парво қилмай, собиқ бўлса ҳам ўзимизнинг уйимизда яшай бошладим. Отам қилар ишни қилиб бўлган, мен жон койитганим билан ўзгариб қолармиди. Ҳар балога куюнавериб куйиб бўлганман. У кунлар ортда қолди. Энди ҳаётга кулиб қарашни келинайимдан ўрганиб олганман.

Менинг қайтиб келганим шу куниёқ бутун Боғи-шодга овоза бўлган экан. Эртасига биринчи бўлиб Соли амаки келди.

– Чироғим, сенга чет элнинг ҳавоси ёқибди, ойпарчадай қиз бўлибсан. Йўл-йўриғини айтсанг, момонг-

ниям бир жүннатиб олсакмикан ўша ёқларга, – деди у. – Энди совчилар келавериб бўсағанинг чангини чиқариб юбормаса гўрга эди. Шопўлат шошқалоқлик қилиб дуч келганга ортқилаб жўннатмасин. Совчи келса, мени чақиринглар, ўзим қуёв танлайман. Энг яқин қариндошларинг менман, ахир. Уруғимизнинг кайвониси ҳам ўзим. Савоб учун юрган одамман. Сизларга қайишмасам, кимга қайишаман?

Кейин Дилобар хола ҳовлиқиб келди. Мен уни соғинганимдан қучоқлаб олмоқчи бўлдим. Лекин у биллур идишга бехосдан тегиб кетиб синдириб қўйишдан қўрққандек ўзини тортди. Ёқасини ушлаб, кўзларига ишонмасди. Гўё янги тикитирган кўйлагини кўздан кечираётгандек ҳар тарафимдан гир айланиб томоша қилди.

– Ростдан ҳам бу сенмисан, Марям? Одамнинг ақли шошиб қоларкан. Давосиз дарднинг ўзи йўқ, дейишарди, тўғри экан, – деб ҳамшира хола ҳануз нима қилишини билмасди.

Боғишодлик мен таниган ва танимаган одамлар ҳар хил баҳоналар билан ҳовлимизга келаверадиган бўлиб қолиши. Эшик тақиллаган заҳоти gox Дониш, gox хотини ёки отам қарайди. Келувчилар, бирор жавоб бермаса ҳам, тап тортмай ичкарига қадам қўйишарди. Охири отам чорпояни кўча эшикка рўпара қилиб қўйиб, келган-кетганни кузатиб ўтирадиган бўлди. Остона ҳатлаб кирганлар менга бир кўз ташла масдан кетгилари келмасди. Уларнинг қайси бири совчиликка-ю, қайсилари шунчаки томошага келганини мен билолмайман. Соли амаки ҳам ҳар куни бир келиб кетади. Отамга насиҳат қилиб, бир нарсаларни тушунтиргандай бўлади. Отам эса ранги унниқиб кетган дўпписи қийшайиб, қўлини кўксига қўйиб, индамай қулоқ тутади.

Собиқ синфдошларим келганини эшигтганимда ичимга сиғмай кетдим. Улар уйимизга киришга ийманыб, эшик олдида кутиб туришарди. Югуриб чиқдим. Гулнора, Турсуной, Ҳожия, кўпчилиги келган, фақат Санобар кўринмасди. Улар мени ўраб олишди. Гир айланиб қаравашар, соchlаримни, кўйлагимни эҳтиёткорлик билан ушлаб кўришар, ҳайратдан гоҳ нафаслари ичларига тушиб, гоҳ бир-бирларига гал бермай чуғуралишишар, қай бирининг гапига жавоб беришни билмай ҳалак эдим.

– Вой, Марям, дугонажон, сени чет элга бориб Мария бўлиб келибди, дейишса ишонмаган эдим. Ростдан ҳам таниб бўлмайдигандай ўзгарибсан, – деди Гулнора. – Йўлини айт, дугонажон, мен ҳам ўша ёқларга бориб, Гуля бўлиб келай.

Ҳаммамиз қийқиришиб кулишдик.

– Ўзи қаерларда бўлдинг, Марка, вой ўлай, Мария, гапириб бер, – деди Турсуной.

– Кўчада гапириб бераманми, уйга киринглар, – деб уларнинг кўлларидан тортдим.

– Йўғ-е, Мария, ҳозир айни экин-тикин вақти, ҳаммамиз далада ишляпмиз. Тушлик вақтидан фойдаланиб, ўзимиз келишиб, уйдагилардан яширинча сенинг олдингга келдик. Одамларнинг ҳар хил гапларини эшигтгандан кўра кўзимиз билан кўрайлик, дедик-да. Энди тезроқ далага қайтиб боришимиз керак, – дея Гулнора атрофга ўғринча қараб олди. – Хўп десанг, эртага саҳар пайтида яна келамиз. Қир ортига бориб, қуёш чиқишини томоша қиласмиз. Илгари биз кўп марта томоша қилгансиз.

– Эрталаб қабристонга бормоқчи эдим, ҳали келганимдан бери онамнинг қабрини зиёрат қилолмадим.

– Унда жуда соз, биз ҳам қабристонга сен билан бирга борамиз, келишдикми?

– Майли.

– Ҳа, айтганча, чет элда тушган расмларинг бўлса, ўзинг билан олиб ол, бизга кўрсатасан.

Кечаси билан ёмғир шитирлади. Эрталаб ҳовлига чиққанимда салқин шабада эсаётган, осмон ниҳоятда тиникә эди. Қизлар айтган вақтларида келишиди. Биргалашиб аввал қабристонга бордик. Бутун қабристонни ям-яшил ўт-ўланлар, чучомалару қизғалдоқлар қоплаган, ҳавонинг мусаффолигидан чор атроф хушбўй исларга бурканган эди. Онамнинг қабри қаровсиз қолиб, янтоқлар қоплаганмикан, деган хавотирда эдим. Бироқ онамнинг ҳам, ёнидаги Офтоб момонинг ҳам қабрлари бир хил тозаланган, иккала қабр устидан ҳам қизғалдоқлар униб чиққан, ҳатто улар ёнига икки туп қайрағоч экиб қўйилиби. Булар Одил буванинг ёки набираларининг иши бўлса керак, кўриб кўнглим ёришди. Онам билан Офтоб момонинг ҳақларига дуо ўқидим. Қизлар пичирлашиб менга қўшилишди. Кўзларимга ёш келганда улар ҳам унларини чиқармай йиғлашди. Қизларнинг бундай тақлидлари менга сохта иш бўлиб туюлар, негадир тинмай ғашим келарди. Кейин қир ортидаги адирга бордик. О, бу қадрдан ерларда қачонлардир бир ўзим тентираб, исмалоқлар териб юрардим. Баттол овчининг ўқига учраган бечора турналар ҳануз кўз олдимдан кетмайди. Ўша машъум кундан сўнг бу ерда турналарни бошқа учратолмадим.

Уфқ қизараётган, лекин ҳали офтоб жамолини кўрсатмаган эди. Қизлар билан қуёш чиқишини кутиб ўтиридик. Улар менинг альбомимни очиб, чет элда тушган суратларимни томоша қилишга киришиб кетишиди. Парижда тушганларимга бири ишониб, бири ишонмасди.

– Қизлар, нега Санобар кўринмайди, қаерда у? – сўрадим дабдурустдан ёдимга тушиб. Негадир шу тобда уни кўргим келиб кетди.

– Э, у бояқишига қийин, – деди Турсуной. – Эри жудаям золим чиқди. Уйидан бир қадам ҳам ташқарига

йўлатмайди. Эртаю кеч томорқада қулдай ишлатгани-ишлатган. Бойўғлига ўхшамай ўлгур, тўй куни дуппа-дуруст кўринган эди. Одамнинг оласи ичидаганда.

- У шу ердами?
- Ҳа, шу ерда, Боғишодда яшаяпти, бошқа қаёққа ҳам борарди.
- Кўёвболанинг шаҳарда уйи бор, тўйдан сўнг кўчиб кетишади, дейишган эди-ку.

- Шаҳардаги уйи унинг чет элда мусофириликда ишлаб юрган укасиники экан. Ўша уйда Санобарнинг эри ҳеч қаерда ишламай, укаси юбориб турган пулларнинг бир четидан еб, ялло қилиб яшаб юрган экан. Ҳатто бир аёл билан никоҳсиз яшаркан, боласи ҳам бор, дейишиди. Укаси чет элдан қайтиб келгач, гўрсўхта акасини келгинди хотини билан уйидан чиқариб юборган. Ака бўлмиш сўппайиб қишлоққа қайтиб келди. Сирлар сандиги очилганидан кейин Санобар дунёни бошига кўтариб кўрди. Лекин ҳеч нарса қилолмади. Қайтага сал бўлмаса, калтак остида қолиб ўлиб кетай деди. Энди эса тақдирга тан бериб, эр-хотин қўш хўқиз бўлиб, бешикда боласи, елкада кетмони билан юрибди. Шунақаларни кўрганингдан кейин уйингга совчи келса, юрагинг безилладиган бўлиб қоларкан.

- Қизлар, қаранглар, қуёш чиқаяпти, – дея қичкирди Ҳожия.

Бепоён адирлар ортида қуёш аста-секин кўрина бошлиди. Унинг илиқ тафти этларимизни жимиirlатди.

Парвардигор, қани эди бандаларинг бағридаги юрак атамиши улкан тоғ ортидан ҳам ҳар тонг қуёш балқиб чиқса!

* * *

Ўйда ўтиравериб яна нафасим бўғилаётгандек туюлди. Эски одатимга кўра, саҳарлаб Узумзорга жўнадим. Аввал ўзим ишлаган идорага бораман, кейин

Нурия опани бориб қўраман, деб режа қилдим. Идорадагилар мени эсдан чиқариб юборган бўлишса ҳам, лекин идорада мен эслайдиган, мен соғинган одамлар ҳам бор. Одатдагидек, ҳали ходимлардан ҳеч ким ишга келмаган, Ҳайдар бува эса дараҳтларнинг тагларини юмшатиб, шохларини тартиблаб қўйибди. Бироқ идора ҳовлиси, йўлаклар супурилмаганлиги кўриниб турибди. Фаррош ҳали келмадимикан ёки мендан сўнг бошқа фаррош олишмаганмикан, деб ўйладим. Ҳозироқ супургини олиб келиб ўзим супуриб қўйишга ҳам тайёр эдим. Ичкари ҳовлига ўтмоқчи бўлиб турганимда йўлакда Ҳайдар бува пайдо бўлди. У менга бир-икки қараб қўйди.

- Катталар ҳализамон келиб қолишади, ичкарига кириб ўтириб туринг, синглим, - деди у мен томонга уч-тўрт қадам ташлаб.

Мен салом бериб, кулиб туравердим. Ҳайдар бува мени танимади, аммо ўз исмини эшишиб, ҳайрон бўлиб қаради.

- Синглим, сизни таниёлмадим, шаҳардан келган текширувчилардан бўлсангиз керак?

- Марямман, Ҳайдар бува.

Ҳайдар бувани ишонтириш осон бўлмади. Қай юртларга борганим-у, нималарни бошимдан кечирганимни бир бошидан ҳикоя қилиб бердим.

- Ҳозир ҳамма ишнинг иложи топилади, деганларича бор экан, - деди бува. - Мўъжизага ўхшаган нарсаларни ҳаётимда кўп кўрдим-у, лекин... омадингиз бор экан, қизим.

- Нега мени сизлаяпсиз, бува, ҳар доимгидек сенлаб гапираверинг. Ахир, ўзингизнинг қизингиздайман-ку.

- Шундай-ку-я, лекин... барибир қандайдир, ноқулай.

Ҳайдар бува билан сухбатимиз илгаригидай қовушмади. Саломат опа билан ҳам деярли шундай бўлди. У мени қаерга ўтқизишини билмасди. Кейин стол

ёнига таклиф қилиб, қўярда-қўймай дастурхон ёзди. Бисотида нимаики мазали егулик бўлса, дастурхонга қўяр, чой қуйиб узатар, бирпас ўтириб гаплашолмай типирчиларди. Мен эса бундай мулозаматга кўниколмай, хижолатда қолиб қийналардим.

– Қойил қилибсиз, Марям, синглим, ҳамманинг оғзига урибсиз. Сизни менсимаганлар паст бўлади энди. Биз ғарибларни эслаб келганингиздан, писанд этганингиздан бошим осмонга етди. Кечкурун бизникида қолинг, сизни меҳмон қиласман, бу ердаги ўтиришимиздан кўнглим тўлмаяпти.

– Иложим ийӯқ, кетишим керак, – дедим тарвузим қўлтиғимдан тушиб.

Ошхонада нафасим бўғилди. Ташқарига чиқиб, олма шохидаги нафис ва беғубор гулларини ҳидладим. Деразадан ходимлар галма-галдан мен томонга қарашаётганлигини пайқаб қолдим.

– Марямжон, – дея деразадан кимдир чақиргандай бўлди. Жаннат опа экан. – Ўзингизмисиз? Нега у ерда турибсиз? Бу ёққа чиқинг.

Жаннат опа мендан кўз узолмай қолди. Лапанглаб қофозларини йиғишириар, стол-стулларнинг чангини артиб, менга ўтириш учун жой ҳозирлар, қаёқларга борганим-у, қачон келганимни суришириб, тинмай юз-кўзларим билан кийимларимни мақтар эди.

– Одамнинг бошига омад қуши қўнаман деса, ҳеч гап әмас экан. Бирорга эрта, бирорга кеч. Бу ёғига ишларингиз юришиб кетадиганга ўхшайди, сингилжоним, кўнглим сезиб турибди, – деб қуйиб-пишарди Жаннат опа. Ходимлар ҳар хил баҳоналар билан эшиқдан мўралаб кетишаётган эди. – Бошлиқ энди сизга ҳар қандай ишни бемалол бериши мумкин, мен у кишини яхши биламан. Лекин менинг жойимни таклиф қилса, унамай туринг, илтимос. Пенсияга чиқишимга озгина қолди. –

Тўсатдан телефон жиринглади. Жаннат опа ҳовлиқиб гўшакни кўтариб, қисқагина гаплашди. – Ана, айтмадимми, бошлиқ чақиряпти. Албатта, сизнинг ишингиз бўйича гаплашса керак. Янгиликни эшитган заҳоти ишга киришганини қаранг, эътиборли одам-да. Мен бошлиқнинг феълини биламан. Марямжон, сингилжоним, илтимосим эсингиизда турсин. Сиз шу ерда ўтириб туринг, мен дарров бориб келаман.

Жаннат опа лапанглаб бошлиқнинг олдига кетди. Бу ер тор ва диққинафас эди. Йўлакка чиқиб, кутиш йўлагидаги ўриндиқقا ўтириб Жаннат опани кута бошладим. Ходимлар тинмай у ёқдан-бу ёққа ўтишар, менга еб қўйгудек тикилишар эди. Кутилмагандা Неляхон ўз хонасидан чиқиб келиб, рўпарамда тақса тўхтади. Ўзга сайёралик мавжудотни кўргандай бир лаҳза қотиб қолди.

– Сиз ростдан ҳам бизда фаррош бўлиб ишлаган ўша қизмисиз? – деди у ниҳоят дудуқланиб.

– Нима эди? – дедим пинагимни бузмай.

– Бу... қандай рўй бериши мумкин? Ахир... кўзларимга ишонмайман. Умуман, бўлиши мумкин эмас.

Кейин у хонасида телефон жиринглаганини эшитиб, яна югуриб кетди. Бирпастдан кейин Жаннат опа хурсанд бўлиб бошлиқнинг хонасидан чиқиб келди. Қўлимдан ушлаб, яна ўзининг каталакдай хонасига етаклади.

– Айтдим-ку, мен бошлиғимизнинг феълини биламан, деб. Сизни, яна бизда ишлармикан, деб сўради. Ҳа, дедим. “Фаррошликка олсак уят бўлар, ўзига ёқкан бошқа ҳар қандай ишни айтсин, шу бугуноқ оламиз”, – деди. Омадингиз чопгани шу-да, сингилжоним. – У оғзи ни кафтининг орқаси билан бекитиб шивирлади. – “Иложи борича иш юритувчиликни сўраб кўринг”, – деди.

Мен бутунлай гангиб қолдим.

– Нима, иш юритувчи? Унда Неляхон-чи?

– Э, уни ўйлаб нима қиласиз. У анчадан бери ишни эплай олмай, бошлиқнинг ғашига тегиб юриди. Ўша жойга сиз муносибсиз, Марямжон. Бошлиқнинг кайфияти чоғ пайтида отингизни қамчилааб қолинг. Бу ишга унинг ўзи сизни таклиф қилиб турганда фурратни бой берманг. “Яхшилаб ўйлаб кўриб, олдимга кирсин, сиз дарров буйруқ тайёрлайсиз”, – деди. Мана, ўйлингиз ўз-ўзидан очилиб кетаяпти, сингилжоним.

– Билмадим... ҳозир нима дейишим мумкин? Томдан тараشا тушгандай...

– Хўп, деяверинг, ҳозироқ бошлиқ қабул қилади. Хоҳласангиз, шу бугундан ишни бошлайсиз.

– Ўйлаб кўраман, – дедим ниҳоят ҳушёр тортиб.

Одамларнинг бунчалик тез ўзгариб қолиши хаёлимга ҳам келмаган эди. Кўнглим бузилди.

Йўлакка чиққанимда ходимлар тўп-тўп бўлиб суҳбатлашиб туришган, назаримда, бу даргоҳда эрталабдан шивир-шивирлар урчигандан-урчиб, ходимлар ишларини тўхтатиб, жамоли ўзгарган бир қизни ўз кўзлари билан кўришга муштоқ бўлиб туришганлигини тушундим. Мен яна ҳамма жойда одамларга томоша бўлиб қолаётганимни сезиб, юрагим тилка-пора бўлди. Оҳ, бунчалар томошаталааб, бунчалар бешафқат бўлмаса бу одамлар. Наҳотки, бир умр одамларга эрмак бўлиб ўтсан? Ахир, мен ҳам одамман, томошақовоқ эмасман-ку!

Кўз ёшларимни ичимга ютиб, Нурия опанинг ўқувхонасига бордим. Мехрибон аёл билан озгина суҳбатлашибоқ ғуборим тарқалишини ўйлаётган эдим. Лекин аксига олиб, ўқувхона эшиги қулфланган, атрофда ҳеч ким кўринмас эди. Барибир Нурия опани кўриб кетишими керак. Уларнинг уйига бориб, эшикни тақиллатдим. Ичкаридан ёшгина, хушрўйгина бир аёл чиқди.

– Нурия опа уйдами? Ишхонасига борсам, негадир ҳеч ким йўқ экан, – дедим саломлашиб.

- Қизлар мактабини айтаяпсизми? У ернинг ёпилганига анча бўлган.

- Ёпилган? Нега ёпилади?
- Ишлашга қўйишмади. Ҳар турли идоралардан келиб текшираверишди, текшираверишди, охири ёпилди. Ўзингиз ким бўласиз?
- У кишининг шогирди, Марямман. Нурия опани кўрсам бўладими?

- Улар оиласи билан чўлга кўчиб кетишган. Ўша ёқларда пахта экиб, дехқончилик қилишаркан. Биз узокроқ қариндоши бўламиз, уйларига қараб турибмиз.

Бошқа ҳеч ким билан кўришиш ҳам, гаплашиш ҳам кўнглимга сиғмай қолди. Не-не умидлару соғинчлар етаклаган эди мени бу ерларга. Афсус, ўйлаганларимнинг бари тескари чиқиб, дилим вайрон бўлиб Боги-шодга қайтдим.

Отам ҳовлида нима қилаётганини ўзи ҳам билмай тимискиланиб юрибди. Кўчага деярли чиқмайди. Аввалги улфатчиликлар, маст бўлиб келишлар ўтмишда қолганга ўхшайди. Энди эски ошналари ҳам уни йўқламай қўйганидан ўзи билан ўзи гаплашадиган бўлиб қолган. Донабойнинг ҳам, хотинининг ҳам у билан ишлари йўқ. Ҳатто Донабой онам билан иккимиз ҳар йили сабзи, пиёз, картошка экадиган ерилизга бирон уруғ қадамаган, ўша-ўша танбаллигича яшаётган эди. Уларга қараб туриб, зерикишдан тарс ёрилай дейман. Кечгача сойга тушиб, сув кечдим. Сой ёқасидаги ялпизлар ҳеч ким термаганидан қамишдай ўсиб кетибди. Уларга термилиб, болалик кунларимни эслаб ўтирдим. Анор совға қилган китобчадаги дуоларни ёддан такрор-такрор ўқигим келарди. О, қўзла-ри беғубор, қувноқ болакай, қаердасан ўзинг, болалик қадрдоним?

Шом қоронғисида кимдир кўча эшиқдан ўғринча

мўралаб, шивирлаган овозда исмимни айтиб чақириди. Фира-ширада қандайдир хотин киши эканлигини илғадим. Яқинроқ борганимда ҳам уни таниёлмадим.

- Кимсиз? – дедим юрагим дукиллаб.
- Мен, Санобарман, дугонажон, – деди у яна шивирлаб.
- Ие, Санобар, нега пичирляяпсан? Кел, ичкарига кир.

– Йўқ, киролмайман. Сувни баҳона қилиб чиққан эдим, уйдагилар бу ёққа келганимни билишмайди. Сени бир кўриб кетай дедим-да, дугонажон. Ростдан ҳам бир қошиқ сув билан ютиб юборадиган қиз бўлибсан, Марям. Кўриб, хурсандлигим ичимга сифмаяпти.

Санобар яқинроқ келиб юзимга тикилар, ноёб буюнни қўққисдан учратиб қолгандек атрофимда айланиб, суқланиб қаарди. У сирама ўзига ўхшамасди. Ёшгина бўла туриб букчайиб қолган, ҳаллослаб чопиб келган бўлса керак, рўмоли бошининг ярмига тушиб, хира тортган соchlари тўзғиган, юзи офтобда қорайиб куйган, лаблари ёрилган, қўлларини яра-чақа босган, абгор бир аҳволда эди. Турмушидан рўшнолик кўрмаган бу аёлни танимаган одам бир кўришда кампир деб ўйларди. Яхшилаб разм солсам, юзларини доғ босган, чап қовоғи қоп-қорайиб кетган экан. Унга раҳмим келиб кетди. Шу аёлни яқиндагина осмондаги ойдай ярақлаб турган Санобар эди, деса бирор ишонмас, деб ўйлайман. Инсон боласининг калтакланган дайди итдай бунчалар хўрланишини тасаввур ҳам қилолмасдим.

– Вой, Марям, икковимиз қандай яхши дугона эдиг-а, – деб у ҳамон тинмай жавварди. – Шунинг учун ҳам сени бир кўриб кетмасам сабрим чидамади. Эшитдим, қизларга расмларингни кўрсатибсан, ҳамма ҳавас қилаяпти. Менга ҳам бирон кун расмларингни албатта кўрсатасан-а?

- Юр, ҳозироқ күрсатаман.

- Узр, дугонажон, ҳозир күролмайман, вақтим зик. Ҳозиргина даладан қайтдим. Ҳали овқат қилишим, кир ювишим керак. Болам ҳам йиғлаб қолгандир.

- Болали бўлдингми?

- Ҳа, ўғилчам бор, каттагина бўлиб қолди. Иккинчим, мана, тайёр бўлиб турибди, – деб кулди у дўмпай-ган қорнини силаб.

- Санобар, турмушинг яхшими, ишқилиб?

- Албатта яхши, дугонажон, мен баҳтлиман, энг баҳтли аёлман. Ҳали бемалол ўтириб гаплашамиз, ҳам-масини айтиб бераман. Сенинг чет элда тушган расмларингни шунақаям кўргим келаяпти.

У атрофга қўрқув билан аланглаганча, шоша-пиша хайрлашди. Агар Санобарнинг баҳтлиман, деганига ишонсан, унда қовоғидаги қорайган доғ ўша баҳтнинг муҳри бўлса керак. Гарчи аввалги муносабатларимиз ҳавас билан эслагулик бўлмаса-да, унга юрагим ачиdi.

* * *

Уйимизга тез-тез совчилар келишмоқда эди. Ким эшик қоқиб келса, отам қулбасидан уйқусираб чиқади. Тузук-куруқ гаплашиб ҳам кўрмасдан Соли амакига одам юборади.

- Мени турмушга бераман деб овора бўлманглар. Қачон оила қуришни, кимга розилик беришни ўзим биламан. Соли амакига ҳам айтиб қўйинг, – дедим отамга.

Отам индамади. Соли амаки бўлса, насиҳат қилишга уриниб кўрди.

- Чироғим, бу умр савдоси. Билмасдан, ёшлиқ қилиб биронта ғарибу бедавога эрга тегиб, кейин афсулланиб юрмагин, дейман-да. Эр танлашни қиз болага ким қўйибди. Бу ёғини бизга қўйиб бер. Кимнинг хотин олишга қурби етади, кимнинг чўнтағида ҳеми-

риям йўқ – буни биз биламиз. Сенга оғиз соладиганлар кўпайиб қолди. Ҳаммасини қайтараверсанг, ўтириб қоласан. Шунинг учун бизга қулоқ солиб тур.

Отам билан Соли амакидан рад жавобини олиб кетганлар ўзим билан юзма-юз гаплашиб кўришмоқчи ҳам бўлишди. Бир куни қоқ ярим тунда девор орқасида роса дупурлаган товуш эшитилди. Ухлаёлмай ҳар ёнга ағдарилиб ётдим. Эрталаб кўчага чиққан Донабой бир гап топиб келди. “Кечаси уйқумни бузиб, уйимиз орқасида қандай тасир-тусир бўлдийкин, десам, Акром раиснинг ўғли билан Мұҳсин майизфуруш иккови ёқалашган экан. Икковлари сени талашиб муштлашибди”, – деди Донабой масхараомуз қулиб. Турган гапки, бу машмаша бутун қишлоққа ёйилган. Эртаси куни кечқурун эса Турсуной эшик олдида пайдо бўлди.

- Марям, бир дақиқага кўчага чиқ, – деди у.
- Нима гап, ўзинг киравер.
- Менинг эмас, Сайфулланинг сенда гапи бор экан.
- Қайси Сайфулла?
- Ўзимизнинг синфдошимиз Сайфулла.
- Менда қандай гапи бўлиши мумкин?
- Билмадим, ўзингга айтаркан, чиқа қолгин энди.

У қўярда-қўймай мени тол тагига етаклади. Сайфулла сочини елкасигача ўстирган, мўйлаб ҳам қўйган, эгнига алламбало олифта кийим кийган, шаҳарнинг нуқси ургани шундайгина билиниб турарди. Турсуной бизни холи қолдириб, ўзи бир неча қадам нарига бориб тўхтади. Сайфулла жағи тинмай гапиришга киришиб кетди. У синфдошлар ичидан энг учеб чиққани ўзи бўлгани, Тошкентдаги қайсиdir бозор ёнида қора бозорга ишга кириб, чет эл пулларини сотиш билан шуғулланишини, топиш-тутиши зўрлигини, машина сотиб олгани, яқинда уй ҳам олишини мақтаниб гапиради. Нихоят у ўзига муносиб қизни қидираётганини айтди.

- Менинг тирикчилигим зўр, кўплар ҳавас қиласди. Ўз ишимни яхши биламан. Аҳмоқ эмасман Фаттоҳга ўхшаб ўлиб кетаверадиган.

- Фаттоҳ ўлдими?
- Нима, эшиитмаганмидинг?
- Йўқ.
- Ҳа, ўлди. Ўлганда ҳам итдай хор бўлиб ўлди. Мўмайгина пул топаман, деб ажнабийларга сотилган экан. Унинг шериклари мен ишлайдиган бозор олдида ўзларини портлатишиди. Фаттоҳ бошқа бир жойни портлатмоқчи бўлганида ҳарбийлар хушёрлик қилиб, отиб ташлашди.

Сайфулланинг оғзидан боди кириб-шоди чиқарди. У мактабда ўқиган пайтларимизни ҳам эслади. Гапларидан гўё биз иноқ бўлганмиз-у, тақдирнинг ўзи бизни яна учраштирган эмиш. Синфдаги болаларнинг озор беришидан зада бўлиб, мактабга бормай қўйган кунларимни қандай унутай? Уларнинг орасида Сайфулла ҳам бор эди. Одамзод бирорни хўрлаб ҳузур қиласётганида эртаси нима бўлишини билмайди-да. Кечки салқин тушиб, этим жунжикиди.

- Совқотдим, энди ҳамма уй-уйига, – дедим ва индамай кетавердим.

- Марям, бирор жавоб айтмадинг-ку, – деди Сайфулла ортимдан.

- Бизнинг йўлимиз бошқа-бошқа, хафа бўлма, – дедим.

Эшик олдига етганимда ичкаридан ғўнғир-ғўнғир овозлар эшитилди. Уйимизга кимдир келган-у, отам уни қузатиб чиқаётган эди. Эшик орқасида тўхтаб, бироз кутиб турдим. Улар ҳам ҳовлида тўхтаб қолишиди. Аста эшиқдан мўраладим. Танидим, бу барваста гавдали одам Узумзордаги ҳозирги бойлардан. Дўпписи ерга тушса, пулга олдирадиганлар хилидан. Қамбарбой деса узумзорликларнинг ҳаммаси танийди. Унинг

исмини эшитганда кўпчиликни қўрқув босишини ҳам эшитганман. Қизлар ўқувхонасида бу одам ҳақида ги шов-шувлар кўп гапирилар эди. Унинг қўша-қўша дўконлари, беҳисоб моллари, уч арзанда ўғли борлигини ҳам айтишган. Тўнғич ўғли яккатутлик бир сулув қизни кўз остига олган экан. Лекин у қизнинг аҳду паймон қилган йигити бор экан. Қамбарбойнинг ўғли қанча ҳаракат қиласа ҳам, қиз аҳдидан кечмабди. Йигитни ҳам авраб кўришибди, қўрқитишибди, у ҳам қиздан воз кечмабди. Охир-оқибат бир куни тонг маҳали йигитни ўша қишлоқдаги кўприкка осилган ҳолда кўришибди. Одамлар, бу Қамбарбойнинг шов-воз ўғилларининг иши, деб жар солишибди. Лекин ҳеч ким исботлаб беролмагач, қотил топилмай, иш босди-босди бўлиб кетган экан. Шўрлик қизнинг эса Қамбарбойнинг ўғлига тегишдан бошқа иложи қолмабди. Энди келиб-келиб шу одам уйимизда айланишиб юрганидан қўнглимга ғулғула тушди.

– Шопўлат ака, мендан бир-икки ёш бўлса ҳам каттасиз, ҳаётнинг паст-баландини тушунадиган одамсиз, – деди Қамбарбой ғўладай билагини отамнинг суюклари бўртиб чиқсан елкасига қўйиб. Отамнинг буқчайган жуссаси янайм кичрайиб қолгандек кўринди.

– Ҳозир замон кимники – пул топганники. Юз гектар ерим бор. Дўконларим, мол-ҳолларим ҳақида гапирмай. Учта ёқилғи сотадиган дўконим бор. Қизингиз маликалардек яшайди. Яқинда яна битта газ қуядиган дўкон очмоқчиман. Сизни ўша ерга ишга оламан. Мижозлардан пулни санаб олиб турсангиз бўлди. Пичоғингиз мой устида бўлади. Мендай танти одамлар дунёга бир келади.

– Биламан, Қамбарбой иним, кўли очиқ одамсиз. Сиз айтгандай, гаплашиб кўраман, – деди отам ғарибсиниб.

Қамбарбой кетгунча девор орқасида бекиниб тур-

дим. Кейин ҳовлига кирганимда отам бошини қуи со- либ ёнимга келди. Гапни нимадан бошлашни билмай каловланди. Гапни ўзим бошлаб қўя қолдим.

- У одам нимага келибди?
- Қайси одам?
- Ҳозиргина уйимиздан чиқиб кетган одамни айтаман.
- Ҳа... Совчиликка.
- Кимга?
- Бу уйда сендан бошқа кимга ҳам келарди. Сен йўғингда аввал ҳам бир келган эди. Соли амакинга ҳам маъқул тушиб турибди, тўғриси, менга ҳам. У давлатманд, қўли узун одам. Истаган нарсангни муҳайё қила олади.

Отам Қамбарбойни оғзидан бол томиб мақтай кетди. У ўша бойни таърифлагани сари ўзининг қанчалар нотавонлигини ошкор қилиб қўяётганини англамаётган эди. Менинг эса борган сайин ғашим келар, отамда заррача ҳам ор қолмаганини кўриб, тоқатим тоқ бўлмоқда эди.

- Қайси ўғлига экан ўзи? – дедим шартта гапини бўлиб.
- Отам бир зум гапиролмай, атрофга олазарак қараб қўйди. Пешонасидаги терни артди. Чуқур нафас олди.
- Ўзига, – деди ниҳоят шивирлагандай ожиз овозда.
- Жон-поним чиқиб кетди. Кўзларимдан ўт чақнаб, қаҳрим бўғзимга тиқилди.

- Нима?
- Олти ой олдин хотини ўлган экан. Шунга...

Вужудим ёниб кетди. Қаршимда шунчаки бир ўгай ота эмас, инсонлик қиёфасини йўқотиб қўйган кимса турганлигини англаб, нафратим қайнади.

– Сиз сотмаган нима қолди? – дедим лабларим титраб. – Қайси виждон билан менга шу тақдирни раво кўраяпсиз? Инсоф нималигини тушунасизми ўзи?

Отам күзларимга қарай олмади. Боши эгилиб, баттар буквайиб қолди.

– Койима. Мен бир бедаво, синган одамман. Шусиз ҳам адойи тамом бўлганман. Менга раҳминг келсин.

Борган сари нафасим бўғилар, бўғзимда бўғриқиб турган нафратимни қай сўз билан баён этишни билмасдим. “Сиз сингансиз? Синиш қанчалар азоблигиги ни мендан сўрамайсизми? Сиз ёшингиз бир жойга борганда ўйламай босган қадамингиз учун ҳисоб беряётгандирсиз. Мен эса ҳали ҳаётнинг нималигини англаб улгурмай, кўзи очилмаган мушук болалари каби мурғак қизалоқлигимдаёқ синиб қолмадимми? Аждардек қутурган аланга ичидаги қолиб куйганимда, ҳаммага текин томоша бўлганимда, болалар мени ўзларига яқин йўлатмай, яккараб қўйишганида сиз қаёқда эдингиз? Ростдан ҳам отам бўлсангиз, нега синган қалбимни бутлаш учун оталик қўлингизни чўзмадингиз? Сиз мени қизим деб бошимни силамаган, фарзанд ўрнида кўрмаган бўлсангиз ҳам, мен сизни ота деган эдим. Аям икковимиз сизнинг бир оғиз илиқ сўзингизга муштоқ бўлиб яшадик. Сиз-чи? Аям аввалги турмушидаги жаҳолатдан сўнг сизни ўзига паноҳ деб билди, сизга умрини бағишилади. Сиз эса бундай садоқатнинг қадрига етмадингиз. Доим ўй-хаёлингиз сизни омадсиз деб ташлаб кетган аввалги аёлингизда бўлди. Кўп-кўп пул топиб, яшаш қандай бўлишини ҳаммага кўрсатиб қўймоқчи бўлганингиз ҳам аслида шу важдан. Бойиб кетсам, ўша аёл қайтиб келади, деб хомтама бўлгансиз. Сиз бор муҳаббатингизни бизга эмас, ғойибона ўша биринчи хотинингизга бахшида этдингиз. Эвазига нима топдингиз? У аёл сизнинг жонфидолигингизни сариқ чақага ҳам арзитмади-ку. Аям бечора сўнгги нафасигача сизнинг инсофга келиб қолишингизни кутиб, ғам-ғуссаларини ичига ютиб

яшади. Энди эса яна диёнатдан қочиб, менинг ҳаётимни ҳам заҳарламоқчи бўлаяпсиз. Асли имонсизлигингиж учун ҳам омад сиздан юз ўгирган. Мана, қаранг, мен энди мажруҳ эмасман. Менинг жароҳатларимни ким тузатганини биласизми? Мусаффо юракли одамларнинг меҳр-муҳаббат деб аталган мўъжизалари туздиди. Бу жароҳатни аллақачонлар сиз тузатишиңгиз мумкин эди. Аммо сиз буни ўйлаб ҳам кўрмадингиз. Сиз менга ҳам, аямга ҳам, ҳатто ўзингизга ҳам меҳрингизни намоён этишга, демакки, мўъжиза кўрсатишга ҳеч қачон қодир бўлмагансиз". Шу гапларни унинг юзига шартта-шартта айтгим келди, ичимдаги фарёд вулқондек тўлғаниб, бўғзимга қадалди. Лекин айттолмадим. Кўриб турибманки, ўгай отам шундоқ ҳам ўз қилмишларининг сийловини татиб кўраётган, шу боисдан менинг бу гапларимни чидам билан тинглай оладиган ахволда эмас эди.

Ўгай отамнинг ўйламай қилган ҳаракати мени ҳушёр тортириди. Кўзим энди очилгандай бўлди. Юрсам ҳам, турсам ҳам, ҳатто кечаси ухламасдан шуларни ўйлаб чиқдим. "Нега қайтиб келдим ўзи бу ерга? Нимани орзу қилган эдим-у, кўз ўнгимда нималар рўй берди? Ахир, мен кимсасиз қолган ғаригина уйимизни, Богошоддаги, Узумзордаги мен таниган ва мени таниган одамларни соғинганим учун келмаганмидим? Уларни қандай бўлса, шундайлигича соғинмаганмидим? Бироқ кимларни кўрдим? Ниҳоят дийдор кўришиб, юзма-юз бўлганимизда мен уларнинг юракларига йўл ахтараяпман-у, улар эса менинг юзимдан нарига ўтишмайди. Мен жонсиз бир қўғирчоқмидим ёки ҳайвонот боғида одамларга эрмак бўлишга маҳкум этилган ёввойи жонивормидимки, галма-галдан айланиб томоша қилишса? Теграмда тентираган одамларнинг ҳаммаси майсага ёпирилган чигирткага ўхшайди: яшнаб турганингда сенга томон талпинадилар-у, сўнг ўзлари адо

қилиб, яна юзларини ўгириб кетадилар. Мен қаердаман, кимлар орасига келиб қолдим? Уйимизга одамлар қадам ранжида қила бошлаганларида, бир пайтлар мени ранжитиб, ўзларига яқин йўлатмаган қизлар яна атрофимда парвона бўлганида энди мен бу ерда ёлғиз эмасман, деб севинч дарёсига шўнғиб кетибман. Аммо ўйлаб қарасам, аввалгидан ҳам баттар ёлғизланиб қолган эканман. Гўё хаёлларга берилиб, бутқул бегона манзилга келиб қолганга ўхшайман. Мана, кўзим очилди, бу бегона одамлар орасида рўшнолик топмаслигими ни, ёлғизликдан хароб бўлишимни англаб етдим. Энди вақт ғаниматида бу маконни тарк этиб, мени кутаётган яқинларим, меҳрибонларим ёнига қанот боғлаб учишим керак” дея сўнгти қарорга келдим. Аzonлаб ўйлга чиқдим. Ҳеч ким билан хайрлашмадим. Зотан, бу ерда хайрлашадиган, ортимдан қўл силкиб қоладиган бирон яқиним ҳам йўқ эди. Йўл-йўлакай Боғишодда ўтган кунларимни сараладим. Ҳамма изтиробларни ортга ташладим, улар шу ерда қолгани дуруст. Фақат онам билан бирга ўтган кунларимиз, Нурия опанинг нур ёғилиб турган чехрасини, менга нажоткор дуоларни ўргатган, сўнмас умидларни дилимга жойлаб кетган болакай дўстим Анорни тошга ўйилган нақшдек хотирамга мангуга муҳрлаб олдим. Қолган ҳамма-ҳаммасини хотирам пучмоқларидан олиб, бепоён далаларга сочиб юбордим. “Армонли кунларингда сени ёлғизлатиб қўйган ва омадсизлигинг боис сендан юз ўгирган одамлардан вақти келиб сен ҳам воз кечишга, улардан қолган барча мудҳиш хотираларни унтишга ҳақлисан” дея ўзимга тасалли бердим.

Тошкентга келганимда Эъзоз тоғам хурсанд бўлиб кутиб олди. Ҳаёт келинойим тинмай юзларимдан ўпарди. Ширинжонимни қучоқлаб, қўнғироқ сочларини ҳидлаб тўймайман. Уни ерга қўйгим келмасди. Тоғамнинг Тошкентдаги камтарингина хонадони мен

учун ҳаловат гүшаси, баҳт эшиги, жаннатнинг ўзгинаси эди. Бу ерда мени севадиган, мени тушунадиган одамлар яшайди. Мен ҳам улар учун, керак бўлса, жонимни ҳадя этишга ҳар лаҳзада ҳозир нозирман.

* * *

Университет ҳовлиси йигит-қизлар билан тўлган. Жазира маисикдан қочганлар дараҳтлар соясида тўптўп бўлиб суҳбатлашиб туришибди. Бир ҳафтадан буён шу ерга келиб кетаётганимдан кўпчиликнинг юзи деярли таниш ҳам бўлиб қолди. Тақдир насиб этиб, университетга кира олсан, бу қизлару йигитлар билан қадрдон бўлиб кетармиз. Ҳужжатларим чалалиги туфайли қабул комиссиясига бир неча марта кириб чиқдим. Ниҳоят ҳужжатларимни қабул қилишди. Лекин ҳадеганда уйга шошилмасдим, соя-салқин бу файзли хиёбонда айланиб юргим келди. Узун йўлакнинг икки тарафида қатор ўсган чинорлар соясидаги ўриндиқлардан бири ёнида тўхтаб, китоб варақлаб ўтирган эдим. Нарироқдаги фаввора бирам чиройли эдик, гўё рақсга тушаётганга ўхшарди. Майсалар ва гул япроқларига шабнам каби қўнган томчилар маржондек товланар, улар юзидағи митти камалаклар кўзни қувнатар эди. Майса устидаги мунчоқдек бир томчи мени сеҳрлаган каби ўзига тортаверди. Энгашиб унга тикилдим. У менга ниманидир эслатарди. Гўё у менга аввалдан танишдек. Ҳа, эсладим, у бир пайтлар мени соясида сақлаган анжир япроғи устидаги шабнам томчисининг худди ўзгинаси. Фаввора ёнидан шошилганча тез-тез қадам ташлаб ўтиб кетаётган бир йигит шундай иссиқ кунда ҳам бўйинбоғ тақиб олгани учун эътиборимни тортди. Қўлида ихчамгина сумкаси ҳам бор. Балки, шу ерда ишлайдиган ёшгина ўқитувчидир. Аммо кутилмаганда унинг ўнг юзига кўзим тушди-ю, вужудим титраб кетди. “Анор!” дея қичқириб юборга-

нимни ўзим сезмай қолдим. Бу фавқулодда юз берди. Йигит таққа тұхтаб, мен томонга ўгирилиб қаради. Довдираб қолдим. Ҳаяжондан нафас ололмай қийналардим. У томонга бир-икки қадам ташладим.

- Анор, – дея олдим яна зүрға.
- Мени чақирайпсизми? – деди йигит ҳайрон бўлиб.

Мана, яна яқинроқ бордим. Кўзлари ҳам таниш. Манглайнинг ўнг томонидаги қизил холи ҳам ўшаша. Бу холни танимаслигим ёхуд адаштиришим мумкин эмас.

- Аномисан? – дедим кўзларимга ишонмай.
- Ҳа, ўзингиз кимсиз?
- Мен Маряман.
- Қайси Марям? – деди у елка қисиб.
- Биби Марям. Эсладингми?
- ...
- Боғишод эсингдадир? Болалигингда борган эдинг. Сойимизда итбалиқлар тутардинг. Мен сенга ўриклар териб берардим.

– Марям! – Унинг кўзлари чақнаб кетди. – Наҳотки, сен ўша Биби бўлсанг?

- Ҳа. Сени дарров танидим, Анор.
- Сени эса таниш қийин бўлиб қолибди. Ахир сен...

- Бошқача эдим. Энди бўлса, ҳаммаси ўзгарди.

Мен ҳамон ҳаяжон қуршовида эдим. Анордан кўзларимни узолмасдим. У улғайиб, ўқтам йигит бўлибди. Болалигига ҳам ёқимтой эди. Ўриндиқда бирпас ўтириб суҳбатлашдик. Бошимдан ўтганларини, узук-юлуқ бўлса ҳам, гапириб бердим.

– Сени ҳар ёзда интизор бўлиб кутдим, Анор. Чунки сен менинг болаликдаги яккаю ягона ўртоғим эдингда. Лекин сен бошқа келмадинг.

– Қишлоққа бориш жону дилим эди-ю, аммо бувам ойимни кечирмади. Шундан кейин боришга баҳона

қолмади. Бувам вафот этганида ойим билан яна Богишодга бордик. Сени йўқлаб уйларингга борсам, у ерда ҳеч ким йўқ экан. Кейин қўшниларингдан суриштиредим, сени тоғаси билан чет элга кўчиб кетган, дейишиди.

– Мени қидирдингми? Сен мени ростдан ҳам қидириб бордингми, Анор?

– Сени эсимдан чиқармаганман, Марям.

Анорнинг гапларини тинглаб тўймасдим. Уни учратганимга ҳам, ёнма-ён ўтирганимга ҳам ҳамон ишонмаётган эдим. Бу мен ҳаётимда дуч келган яна бир мўъжиза эди. Мўъжизалар эса тушга ўхшайди.

– Яқинда ўқиши тамомладим. Устозим қабул комиссиясида ишлайпти. Бироз қарашиб юбор, деб мени чақирган эди. Эртага яна келасанми?

– Келаман, Анор, албатта келаман.

– Унда эртага худди шу вақтда, худди мана шу ерда кўришамиз.

У билан хайрлашдик. Ортига қараб-қараб қўл сил-киди. Эртага, албатта кўришамиз. Истасанг, ҳозир ҳам кун бўйи сени мана шу арғувонлар остида кутишим мумкин, Анор.

Мен дарахтларнинг қуюқ соясидан чиқиб, фаввора ёнига бордим. Шу пайт чор атроф яна ҳам тиниқлашгандай бўлди. Чамамда, фаввора куй чалаётгандай шарқираб менинг шодлигимни олқишлиамоқда эди. Унинг биллур томчилари юзларимга тегиб, кўнглимни равшан этди. Ҳалиги шабнам томчиси эсимга тушиб, уни қидира бошладим. Лекин энди у ҳеч қаерда йўқ эди. Мен бир лаҳза чалғиганимни тушундим. Сояларни бир четга суриб, тобора юксакка кўтарилаётган офтоб нурлари билан майса устида омонатгина турган шабнам бир зум жимиirlаб ўйнаган-у, кейин ғойиб бўлган. Мен ўзимни ҳозиргина шабнам соясидан чиқиб келгандек ҳис этмоқдаман. Заминга ҳаёт бағишилаётган сахий қуёш нурларидан бирданига гангиб

қолдим. Сўнгра кўзларимни секин-аста очиб, ёруғликка кўнига бошладим. Мен узоқ вақт сояда жон сақлаганимни англадим. Энди эса қаршимда мунаввар ҳаёт эшиги очилганлигини кўриб турардим. Кичкина қизалоқлигимда кўрганим сеҳрли манзара яна кўз ўнгимда намоён эди: дараҳтлар ям-яшил баргларга бурканган, анвойи гуллар ифори бутун боғни тутиб кетган, ранг-баранг ниначилар завқли ўйинларини бошлаб юборишган. Фавворали ҳовузга энгашиб қараб, тиниқ сувда аксимни кўрдим. Мен энди шабнам соясида мудраётган ожиз зарра эмас, заррадан залворли қояга айланган бир хилқатман. Энди борлиқ гўзаллигини бус-бутун кўраяпман ва шу гўзалликдан куч-кудрат олаётганимдан танамга сиғмасдим. Юрагимда ишонч ва ҳавас денгиздай мавж ураётганини сезмоқдаман. Ҳозир олдинга бир қадам ташласам, қадамимдан учқун чақнашини ҳам биламан. Буларнинг барига сабабчи сенсан, Анор. Сенинг бола қалбинг осмон билан teng. Сен ўз идрокинг ва юрагингдаги меҳру муҳаббатинг билан қанчалар буюк иш қилганингни, эҳтимол, ўзинг билмассан, чунки сен каби меҳрибон одамлар яхшиликни ҳар доимги оддий юмуш деб ўйлайдилар. Лекин мен биламан. Зимистон бағрида қуёшни кутиб яшаган, фақат сен ёққан митти шуълага суяниб, кутилмаганда ёруғликка мушарраф бўлган ва баҳтдан боши айланаёзган мен, сендай дарёқалб одамларга бу шўрлик дунё нечоғлик ташна эканлигини бор овозим билан ҳайқириб айтгим келади.

Уйга келганимда тоғам ҳам, келинойим ҳам, ҳатто Ширинжоним ҳам вужудимни ҳануз ҳаяжонга солиб турган бетимсол қувончни дарров пайқашди. Бу қувонч уларнинг ҳам юзларига табассум бўлиб кўди. Мана, яна бир сокин оқшомда хонамда ёлғизман. Йўқ, янглишдим, ёлғиз эмасман, сенинг суратинг ўйларимда, Анор, болалик қадрдоним. Қўлимда варақла-

ри титилиб кетган бўлса-да, сўзлари қалбимга кўчган миттигина дуолар китобчаси... Туни билан ҳатто мижж-жа қоқмадим. Тўғри-да, шундай ширин хаёллар турганда кўзга уйқу келармиди. Шу ҳузурбахш туйғуларнинг ўзи ором эмасми? Тонг ёришайпти. Бу саховатли тонг бизни яна учраштиради. Тун бўйи менга ҳамхона бўлган соҳир хаёллар ҳадемай ўнгимда рўй беражаги-ни ўйлаб, юрагим муҳаббат номини айтиб урмоқда.

Сени менга яна қайта учратганига минг бора қуллук.

*Тангрим, бу ёруғ оламга келтириб, бир ожиза
бандангга юборган синовларингга ҳам, хайрли
инъомларингга ҳам беадад шукроналар айтаман!*

2020 йил, июнь.

Адабий-бадиий нашр

Уйғун РҮЗИЕВ

ШАБНАМ СОЯСИДА

Роман

Мұхаррир *Дилрабо Мингбоева*
Бадиий мұхаррир *Шамсiddин Ходжаев*
Мусаҳҳих *Шаҳзода Ҳакимова*
Саҳифаловчи *Азамат Қаюмов*

ЎЗБЕКИСТОН ЁЗУВЧИЛАР УЮШМАСИ
«ADABIYOT NASHRIYOTI» МЧЖ

Нашриёт лицензияси: № АА 0043. 27.01.2020

100129, Тошкент, Марказ 15. 1/90.

 (+98) 128-30-04. e-mail: mashkhur-press@mail.ru

Босишига 2021 йил 18 январда рухсат этилди.

Бичими 84x108 ¹/₃₂. Офсет босма. “Cambria” гарнитураси.
Шартли босма табоги 13,44. Нашриёт босма табоги 16,0.
Адади 1000 нусха. Буюртма №

«AZMIR NASHR PRINT» МЧЖ босмахонасида чоп этилди.
100200, Тошкент шаҳри, Адҳам Раҳмат кўчаси, 10-уй.